



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search


Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>





600099530W





THEOLOGIA

DOGMATICA CATHOLICA,

CONCINNATA

▲

JOANNE SCHWETZ,

SS. THEOLOGIAE DOCTORE, ATQUE EJUDEM IN C. R. UNIVERSITATE [VINDOBONENSIS]
PROFESSORE P. O.

VOL. I.



*Ἡμεῖς δὲ κηρύσσομεν Χριστὸν ἐσταυρωμένον.
Ἐπιστ. πρ. Κορ. Α. α. 23.*



VIENNAE 1851.

TYPIS CONGREGATIONIS MECHITARISTICAE.

100. w. 104.

110. h. 322.

THEOPHILUS

BY THEOPHILUS

1800

THEOPHILUS

THEOPHILUS

1800



THEOPHILUS

THEOPHILUS

THEOPHILUS

Opus litterarium, quod Adm. Reverendus Dom. *Joannes Schwets*,
SS. Theologiae Doctor ac ejusdem p. o. Professor sub titulo :

THEOLOGIA DOGMATICA CATHOLICA.

pro approbatione obtinenda Nobis submitit, diligenter discussum iisdem quoad materiam ac formam praerogativis eminere deprehendimus, quas in Theologia generali ab eodem Auctore in lucem publicam emissa litteris Nostris datis 5. Octobris 1848 laudare non haesitabamus. Quapropter praefatam Theologiam Dogmaticam Catholicam pro typo auctoritate Nostra Archiepiscopali hisce approbamus, omnibusque Scientiarum sacrarum studiosis egregie commendatam volumus.

Dabamus Cremsirii Moravorum in Residentia Nostra Archiepiscopali die 18. Julii a. r. s. 1851.



Maximilianus Josephus m./p.
Cardinalis a Somerau-Beeckh,
Princeps Archiepiscopus.

Index.

Isagoge

	Pagina
§. 1 Notio Theologiae dogmaticae	1
§. 2 Argumentum seu objectum	1
§. 3 Methodus	2
§. 4 Finis	4
§. 5 Scientia et fides, earumque mutua ad invicem relatio	4
§. 6 Divisio	7
§. 7 Succincta historia Theologiae dogmaticae	7
§. 8 Continuatio	32
§. 9 Conclusio	41

Pars I.

De Deo.

§. 1 Momentum	49
§. 2 Divisio	51

Sectio I.

De Dei notione atque existentia.

§. 3 Notio Dei	52
§. 4 Existentia Dei	65
§. 5 Unitas Dei	76
§. 6 Deus a mundo diversus	85

Sectio II.

De absoluta Dei essentia seu natura.

§. 7 Transitio. Natura Dei neque plene intelligi, neque explicari potest	92
§. 8 Offert tamen revelatio et ratio sufficientem Dei notitiam	99
§. 9 Attributa divina	108
§. 10 Divisio attributorum divinarum	111
§. 11 1. Deus est, et quidem quoad existentiam: a) spiritus purissimus, seu simplex omnino	113
§. 12 2. b. Immutabilis	125
§. 13 3. c. Aeternus	133
§. 14 4. d. Immensus	141
§. 15 Intellectus divinus	152
§. 16 5. Quoad intellectum Deus est: a. Omniscius	152
§. 17 6. b. Sapientissimus	172
§. 18 Voluntas divina	178
§. 19 7. Quoad voluntatem Deus est: a. Omnipotens	184

II

	Pagina
§. 20 Continuatio	189
§. 21 8. b. Summe bonus	193
§. 22 9. c. Liberrimus	203
§. 23 10. d. Sanctissimus	208
§. 24 11. e. Veracissimus ac fidelissimus	215
§. 25 12. f. Justissimus	218
§. 26 13. Quoad statum internum Deus est: a. Sibi sufficientissimus	224
§. 27 14. b. Summa majestate conspicuus, atque rerum omnium Dominus	226
§. 28 15. c. Beatissimus	229

Sectio tertia.

De vita Dei absoluta, seu de Deo triuno.

§. 29 Transitio	231
§. 30 Momentum doctrinae	231
§. 31 Conspectus	232

Titulus I.

Articulus I.

De Patre vero Deo.

§. 32 Pater Deus	233
----------------------------	-----

Articulus II.

De Filio vero Deo, Patri consubstantiali.

§. 33 Ingressio	236
§. 34 A. Testimonia S. Scripturae. a. Effata Jesu	237
§. 35 b. Testimonia SS. Apostolorum. α. Petri et Thomae	243
§. 36 β. Joannis	244
§. 37 γ. Pauli. δ. Philipp. 2, 5—11	250
§. 38 ε. Rom. 9, 3—5. et Tit. 2, 11—13.	252
§. 39 ζ. Hebr. 1, 1—14. et Col. 1, 15—20, 2, 9	254
§. 40 δ. Apostolorum universim	260
§. 41 B. Testimonia ex Traditione petita	265
§. 42 Continuatio	287

Articulus III.

De Spiritu S. vero Deo, Patri et Filio consubstantiali.

§. 43 Ingressio	294
§. 44 Probatum divinitas Spiritus S.: A. Ex SS. Litteris	294
§. 45 B. Ex Traditione	302
§. 46 Continuatio	310

Titulus II.

Pater et Filius et Spiritus S. tres personae realiter distinctae, in una tamen ac individua natura et substantia.

III

	Pagina
§. 47 Ingressio	312
§. 48 Pater persona	317
§. 49 Filius persona a Patre distincta	317
§. 50 Spiritus S. persona a Patre et Filio distincta	319
§. 51 Pater et Filius et Spiritus S. unus Deus	321
§. 52 Mysterium SS. Trinitatis	330

Titulus III.

De processionibus ac notionibus divinis.

§. 53 Ingressio	343
§. 54 Quid processio ac notio? — Doctrina Catholica	344
§. 55 Pater ingenitus, ἀγέννητος	345
§. 56 Filius a Patre genitus	347
§. 57 Spiritus S. procedit a Patre	349
§. 58 Et a Filio	350
§. 59 Relatio personarum divinarum ad res creatas	351

Pars Secunda.

De operibus divinis, seu de relatione Dei ad mundum universim.

§. 1 Ingressio	365
§. 2 Mundus	265
§. 3 Divisio	366

Sectio I.

De creatione mundi, seu de Deo mundi Creatore.

§. 4 Creationis notio	366
§. 5 Mundus a Deo creatus	367
§. 6 Mundus a Deo ex liberrimo consilio aeterno juxta sapientissimam illius ideam pariter aeternam creatus	380
§. 7 Modus creationis	385
§. 8 Finis creationis ultimus	396
§. 9 Mundi perfectio	401

Sectio II.

De divina providentia, seu de Deo mundi Conservatore et Governatore.

§. 10 Providentia divina	405
§. 11 Conservatio	406
§. 12 Modus conservationis	413
§. 13 Gubernatio	414
§. 14 Modus gubernationis	420
§. 15 Theodicaea	422

Pars tertia.

De natura spiritali, seu de Angelis.

§. 1 Ingressio	427
§. 2 Notio Angeli	428
§. 3 Dantur Angeli a Deo creati	431
§. 4 Continuatio	438

IV

	Pagina
§. 5 Natura Angelorum	440
§. 6 Numerus atque ordines Angelorum	450
§. 7 Angelorum status originalis	453
§. 8 Continuatio	455
§. 9 Finis Angelorum	457
§. 10 Peccatum multorum Angelorum	457
§. 11 Conditio Angelorum bonorum	462
§. 12 Relatio Angelorum bonorum ad genus humanum	463
§. 13 Custodia Angelorum	465
§. 14 Cultus Angelorum	470
§. 15 Conditio daemonum	473
§. 16 Relatio daemonum ad mundum	475
§. 17 Sollicitatio diabolica	476
§. 18 Continuatio	477
§. 19 Obsessiones daemoniacae	478



Editiones operum SS. Patrum, aliorumque Scriptorum
ecclesiasticorum, quae in hoc opere citantur.

SS. Patrum, qui tempp. apostolicis floruerunt, Barnabae, Clementis, Hermae, Ignatii, Polycarpi, opera unac. Clem. Ign. Polycarpi actis atque martyriis, c. nott. integr. Cotel. aliorumque dd. VV. item G. Bervegerii, Jac. Usserii et J. Pearsonii dissertt. cur. J. Clerici, Amstelod. 1724. 2 V. fol.

Ambrosii Opera, stud. et lab. Monach. Ordin. S. Bened. e Congr. S. Mauri, Paris. 1686. 2 T. fol.

Anselmi Cantuar. Opera, ed. Gabr. Gerberon. Lut. Paris. 1675. f.

Arnobii Adv. Gentes libri VII, et Jul. Firmici Martini De errore profan. religionum ad Constant. et Constantem libellus, ed. Fr. Oberthür, Wirceburg. 1783.

Athanasii Opera omnia, op. et stud. Monach. Ord. S. Bened. e Congr. S. Maur. Par. 1698. 2 T. f.

Augustini Opera, op. et stud. Monach. S. Bened. e Congr. S. Maur. Venet. 1729—35. 11 T. f.

Basilii M. Opera omnia, op. et st. Jul. Garnier, Presb. et Monach. Benedict. e Congreg. S. Maur. Par. 1721. 3 T. f.

Vener. Bedae Opera, Colon. 1688. 8 T. f.

Bernardi Claraevallens. Opera omnia, post Horstium denuo recogn. J. Mabillon, Presb. et Mon. Bened. e Congreg. S. Mauri, Par. 1719. 8 T. 2 V. f.

Boëthii De consolat. philosophiae libri V, ed. Patav. 1721.

J. Cassiani Opera omnia, ed. Alardus Gazaeus, Atrebat. 1627. f.

Cassiodori Opera omnia, op. et st. Garetii, Monach. Ord. S. B. e Congr. S. Maur. Venet. 1729. 2 T. f.

Petr. Chrysologi Sermones, ed. Seb. Paulus, Aug. Vindel. 1758. f.

J. Chrysostomi Opera omnia, op. et st. Bern. de Mont-
aucon, Mon. O. S. B. e Congr. S. Maur. Par. 1718. 13 T. f.

Clementis Alexandr. Opera, recogn. et illustr. per
J. Potterum, Venet. 1757. 2 T. f.

Cypriani Opera, ex recens. Steph. Baluzii absolv. Prud.
Maranus, Mon. Ord. S. B. e Congr. S. Mauri, Mediol. 1834.
2 V. 8.

Cyrilli Alex. Opera, gr. et lat. ed. J. Aubertus, Par.
1738. 6 T. f.

Cyrilli Hieros. Opera omnia, gr. et lat. c. et stud. Ant.
Aug. Toutée, Presb. et Mon. Ben. e. Congr. S. Mauri, Par.
1720. f.

J. Damasceni Opera omnia, op. et st. Mich. Leqien,
Ord. FF. Praed. Ven. 1748. 2 T. f.

Petr. Damiani Opera omnia, st. ac lab. Const. Cajeta-
tani, Par. 1743. 4 T. f.

*Dionysii Areop. Opera cum scholiis Maximi et para-
phrasi Pachymerae*, a Balth. Corderio S. J. D. Th. lat. interp.
et nott. theol. illustr. Antverp. 1634. 2 T. f.

Ephraem Syr. Opera omnia, gr. syr. et l. ed. Petr. Be-
nedictus, et Steph. Evod. Asseman, Rom. 1732—46. 6 T. f.

Epiphanii Opera omnia, gr. et l. rec. vert. et animadv.
illustr. Dion. Petavius, S. J. Par. 1622. 2 T. f.

Eusebii Caesar. Praeparatio Evangelica, gr. et l. ed.
Fr. Vigerus, Par. 1628. f. — *De Demonstratione Evangelica
libri X*, access. *Cont. Marcell. u. II. De eccles. Theologia libri
III*. gr. et l. cum. nott. ed. R. M. (Rich. Montacutii), Par.
1628. f. — *Historiae Ecclesiasticae libri X*, et *De vita Constantini
libri IV*, gr. et l. ex rec. Ern. Zimmermann, Francofurt.
1822. 8.

Fulgentii Ruspensis Opera omnia, Par. 1684. 4.

Gregorii M. Opera omnia, stud. et lab. Monachorum. O.
S. B. e Congreg. S. Mauri, Par. 1705. 4 T. f.

*Gregorii Nazianzeni Opera ex versione Jac. Billii
Prunaei*, auct. et nott. illustr. Venet. 1753. 2 T. f.

Gregorii Nysseni Opera, gr. et l. Par. 1615. 2 T. f.
1638. 3 T. f.

Irenaei Contra haereses libri V, st. et l. Ren. Mansuet, Mon. O. S. B. e Congr. S. Mauri, Par. 1710.

Isidori Hispalensis Opera omnia, ed. Jac. du Breul, Col. Agripp. 1617. f.

Isidori Pelusiotae Epistolarum libri III. de interpretatione S. Scripturae, Venet. 1745.

Justini M. Opera, nec non *Tatiani adv. Graecos oratio*, *Athenagorae Legatio pro Christianis*, *Theophili Antiocheni tres ad Autolicum libri*, *Hermiae Irrisio gentil. philosophorum*, op. et stud. unius ex Monachis Congreg. S. Mauri, Venet. 1747. f.

Hieronymi Opera, post Monach. O. S. B. e Congreg. S. Mauri recens. st. ac l. Dom. Vallarsii, Venet. 1766—71. 11 T. 4.

Hilarii Pictaviensis Opera, st. et l. Monach. O. S. B. e Congreg. S. Mauri, auct. cur. Scip. Maffei, Veron. 1730. 2 T. f.

Lactantii Opera omnia, ed. J. Le Brun et N. Lenglet Dufresnoy, Par. 1748. 2 T. 4.

Leonis M. Opera omnia, access. *Hilarii Arel. opuscula, vita et apologia*. Lugd. 1700. f.

Maximi Taurinensis Opera, Rom. 1784.

Optati Milevitani De schismate Donatistarum, op. et st. M. Lud. Ell. Dupin, Lut. Par. 1702. f.

Origenis Opera omnia, op. et st. Car. Delarue, Presb. et Mon. Bened. e Congreg. S. Mauri, Par. 1733. 4 T. f.

Paulini Opera, ed. J. Fr. Madrisius, Congr. Orat. Presb. Venet. 1787. f.

Prosperi Aquitani Opera omnia, ed. a J. B. le Brun et D. Mangeant, Par. 1711. f.

Socratis Scholastici, Hermiae, et Soxomeni Historia ecclesiastica, ed. H. Valesius c. observv. etc. adjunct. a Gul. Reading, Aug. Taurin. 1747. f.

Theodoreti, Evagrii Hist. eccles. cum. excerptis ex historiis Philostorgii et Theodori Lectoris, ed. H. Valesius, c. observv. etc. adj. a Gul. Reading, Aug. Taurin. 1748. f.

Theodoreti Opera omnia, c. et st. Jac. Sirmondi, Lut. Par. 1642. 4 T. f.

Tertulliani Opera, ed. Rigaltius, Mediol. 1831. 2 V. 8.

Theophylacti Opera omnia, gr. et l. access. *Euthymii Zigabeni Comment. in Psalm.* ed. cur. Bern. Marc. de Rubéis et Bonf. Finetti, Venet. 1754—63. 4 T. f.

Thomae Aquinatis Opera omnia theologica, ed. Bern. de Rubéis, Venet. 1745—1760. 28 T. 4.

Vincentii Lirinensis Commonitorium adv. haereses, ed. Steph. Baluzius, Aug. Vindelic. 1757. 8.

Reliqui citantur e

Maxima Bibliotheca veterum Patrum et antiquorum Scriptorum eccles. Lugdun. 1677. 27 T. f. et

Bibliotheca veterum Patrum antiquorumque Scriptorum ecclesiasticorum, c. et st. Andr. Gallandii, Presb. Congr. Oratorii, Venet. 1765—1781. 14 T. f.



Is a g o g e.

§. 1. Notio Theologiae dogmaticae.

Quae nobis credenda atque observanda sunt, ut salutem consequamur, Christus Dominus nobis per se et suos Apostolos, atque ante adventum suum in orbem terrarum jam per Prophetas revelavit, hancque doctrinam revelatam Ecclesiae suae, Catholicae, et in hac iterum magisterio, a se instituto, custodiendam fidelibusque proponendam commisit. Quicumque itaque in numerum Magistrorum ecclesiasticorum adscriptus est, aut adscribi cupit, quae divinitus sint revelata, et cum talia ab Ecclesia nobis ad credendum proponantur, quam adcuratissime cognita habeat necesse est; qui enim alios in doctrina fidei Catholicae instituendi provinciam sustinet, clariori ac subtiliori cognitione ejusdem destitutus esse nequit. Hinc in verbi divini doctore requiritur, ut non tantum de singularum sententiarum, quas ut divinitus revelatas praedicare vi muneris suscepti obstringitur, origine divina convictus sit, easque fide inconcussa teneat, sed et claram ac perspicuam illarum notionem habeat, porro rationum momenta, quibus easdem revelationi deberi monstratur, sciat, nec non mutuum illarum necessitudinem, atque internam rationem seu necessitatem, quatenus id fieri potest, perspectam habeat, ejusque fides tali modo una scientia collustrata sit.

Praestat autem id docendi muneris sacri candidato Theologia dogmatica, quae nihil aliud est, quam doctrinae fidei Catholicae scientia, seu ea disciplinae theologiae pars, quae veritates Deum ejusque opera attinentes, fide divina amplectendas (dogmata), prout nobis sunt per divinam revelationem patefactae, et quae tales ab Ecclesia Catholica traduntur, perspicue, subtiliter et systematico ordine exponit.

§. 2. Argumentum, seu objectum.

Theologia dogmatica itaque, seu, ut adcuratius loquamur, Theologia dogmatica Catholica pro argumento suo habet verita-

tes, quas nobis Ecclesia Catholica tanquam divinitus communicatas, et ideo fide divina tenendas proponit, et quidem has omnes, sive caeterum sint jam per certam sententiam Ecclesiae definite enuntiatae, sive non, praeter illas autem nil aliud, vel paucis symbolum seu dogma Catholicum. Christus Dominus enim, ut alibi demonstravimus, omnem revelationem suam Ecclesiae tradidit, in qua et per quam redemptionem continuat, et in nobis perficit. Quapropter Theologia dogmatica, ut scientia doctrinae fidei divinitus revelatae dici, Catholicaque cognominari queat, doctrinam illam, prout in sinu Ecclesiae Catholicae custoditur, et per eam traditur, exhibeat necesse est. Praeter veritates autem ad fidem Catholicam spectantes nonnisi illas, quae cum revelatis necessario cohaerent, et ad easdem collustrandas ac firmandas, seu, ut ajunt, rationi quoque suasibiliores reddendas faciunt, ex sana philosophia, vel potius ex ipsa rerum natura depromtas recipit, quod indoles scientiae necessario deposcit; reliquas autem omnes, tanquam a suo argumento alienas respuit.

§. 3. Methodus.

Methodus, quam in Theologia dogmatica tradenda servari oportet, est methodus scientifica ipsa ad dogma Catholicum adcommodata. Quapropter quum scientiae sit efficere, ut res, circa quas versatur, sciantur, notio earundem clara, certa et completa obtineatur: Theologia dogmatica prae omnibus notiones singularum veritatum credendarum perspicuas exhibere debet, quae verae cognitionis nostrae atque fidei rationabilis conditio ac fundamentum sunt. Quo respectu non abs re erit ubique paucis praemittere adversariorum errores, quum ex hisce veritas opposita non parum lucis ac claritatis accipiat. Porro quum omnes sententiae, quae ad ambitum doctrinae Catholicae pertinent, haud ejusdem sint certitudinis, sed aliae dogmata sint definita, aliae non item: fidei gradum cujuslibet indicet, ejusque veritatem firmis ac solidis argumentis demonstret necesse est. Inter argumenta autem isthaec primum locum nunquam non occupare debent illa, quae ex ipsis revelationis fontibus, S. Scriptura scilicet et Traditione, unde, quid quovis tempore inde ab initio Ecclesia docuerit, comparet, et haec ipsa doctrinam, seu, ut nostris diebus loqui amant, suam conscientiam instaurat ac renovat, depromuntur; quum tantum iisdem, singulas sententias revera revelationi divinae in acceptis referendas esse, monstretur. Quod cognoscere manifeste quam maxime ac imprimis necessarium est. Doctrina enim Catholica a Deo

modo supernaturali data, seu divinitus posita est, et hinc etiam ceu talis nobis fide recipienda, suo positivo caractere divino, in quo ejus principalis, imo omnis virtus ac efficacia supernaturalis reposita est, exui sine sacrilegio nequit. Caeterum argumentandi ratio isthaec, et etiam scientia, quam gignit, quoniam externis, positivis ac historicis constat rationibus, externa, positiva seu historica, vel etiam traditionalis audit.

Verumtamen in argumentatione externa et historica Theologia dogmatica haud acquiescit, sed fidem, quam per scientiam externam ac positivam, rationabilem ac necessariam esse ostendit, firmat ac stabilit, una per probationem sic dictam speculativam seu philosophicam ad scientiam, internam scilicet, seu veram ac propriam, evehere satagit. Hinc internam rationem seu necessitatem singularum sententiarum indagat, atque mutuum earundem nexum perquirat, quum una alteri tanquam causae suae quasi inhaereat, et ex illa consequatur, ac sic illas ex se ipsis, et per se ipsas veras esse demonstrat. Philosophica seu speculativa haec dogmatum investigatio ac demonstratio, quamdiu intra justos continetur limites, haudquaquam est damnanda, quin imo laudem meretur. Haec enim mentis nostrae indoles est, ut ipsa ad scrutandas rerum causas suapte ac necessario trahatur, atque omnino haud quiescat, donec veritatem ipsam intelligentiâ apprehenderit. Insuper intelligentiâ fides ipsa in nobis promovetur, atque efficacior redditur. Quando enim mens nostra perspicit, quae credit, magis veritati est addicta, et pronior ad vitam ei conformandam, quam si tantum captivam fidei se subicere coactam se sentit. Ne tamen speculativa illa dogmatum pertractatio plus noceat, quam prosit, nunquam non obliviscatur Theologus, fidem initium ac fundamentum scientiae, uti salutis nostrae, esse. Propterea speculatio a dogmate seu fide divinitus data procedat, ad illam semper respiciat, et velut normam inflexilem disquisitiones suas exigat, minime autem eam ad hasce detorquere audeat. Nam non de eo agitur, aut agi potest, quid forsitan verum aut revelatum esse queat, sed de eo tantum, ut veritas per revelationem accepta rationi magis pervia reddatur. Porro speculatio haudquaquam id sibi propositum teneat, ut fidem semoveat, aut superfluum efficiat, sed potius in id enitatur, ut illam confirmet, ejusque in vitam nostram efficaciam augeat, idque eo magis, quoniam veritas supernaturalis, prout a ratione humana non potuit inveniri, etiam non plene ac perfecte, sed duntaxat appropinquando potest comprehendere, ita ut, quamdiu in hoc praepara-

tionis stadio vivimus, meritum fidei haud destruat. Quapropter speculatio humilitatis sensum comitem nunquam non habeat, quae radix ac fons uti omnis virtutis, ita et fidei est, simulque nos ab insolentia illa tuetur, qua autumamus, omnes hucusque in tenebris inscitiae sedisse, atque nobis tandem tam felicibus esse contigisse, qui verum lumen scientiae orbi coecutienti afferamus.

Denique Theologia dogmatica sententias singulas justo ordine disponit, et in systema redigit, prout id pariter indoles scientiae exigit. Ad quod conficiendum tamen non requiritur, ut omnes veritates fidei revelatae ex uno principio deriverent; tale enim principium in nulla scientia datur, ipsa mathesi non excepta, et ideo eo magis in scientia haud mere formali, sed reali frustra quaeritur. Verum magis *σκελετόν* illius ex natura argumenti disciplinae nostrae, vel potius illarum rerum, ad quas veritates fidei referuntur, non aliunde repetatur; quum nonnisi tale systema, utpote in ipsa re fundatum, cum hacce convenire possit.

§. 4. Finis.

Finis, quem Theologia dogmatica sibi praefixum habet, ex dictis non est alius, quam ut per illam doctrinae Catholicae claram, certam ac omnibus numeris absolutam cognitionem nanciscamur, atque hacce ipsa fides nostra firmior ac efficacior evadat, seu ut credendo intelligamus, et intelligendo firmiter ac efficacius credamus, sicque eo aptiores verbi divini praecones evadamus. Scientia enim et fides se nequaquam tollunt aut evertunt, sed mutuo adjuvant ac promovent, ut ex supra dictis colligitur, et mox dicendis magis adhuc patebit.

§. 5. Scientia et fides, earumque mutua ad invicem relatio.

Scientia, quatenus ad doctrinam fidei Catholicae refertur, ex supra disputatis, duplex est, alia historica seu externa, alia speculativa seu interna. Prior secundum ea, quae ibidem dicta sunt, est illa, qua ex argumentis externis seu historicis firmiter ac indubitate persuasum habemus, primo doctrinam fidei generatim spectatam divinitus esse revelatam, et per omnia saecula in Ecclesia Catholica, a Spiritu S. illustrata et directa, integram ac illibatam conservari, atque deinde singulas sententias speciatim, quae nobis credendae ab illa proponuntur, ex revelatione divina derivari. Scientia vero interna seu specu-

lativa rerum revelatarum ea est, qua internam harum rationem seu necessitatem perspectam habemus. Fides autem est assensus, quem revelationi datae, et singulis veritatibus seu sententiis, ad eam pertinentibus, ob auctoritatem Dei revelantis ex decreto voluntatis, reverentia ac amore divinae veracitatis ducti, praestamus. Fides itaque cum scientia historica seu externa necessario conjuncta est, vel potius hanc sequitur. Fides enim firma et inconcussa, quae Deo revelanti debetur, tantummodo tunc sententiae alicui praeberi potest, quando modo certo ac evidenti de ejus origine divina constat. Ut igitur quis rationabiliter credat, et insuper fidei suae rationem cuilibet quaerenti reddere queat, evicta facti revelationis divinae veritate, et ostensa Ecclesiae Catholicae auctoritate, singulas sententias, ad ambitum doctrinae revelatae spectantes, ceu tales sive ex ore Ecclesiae docentis, sive una ex fontibus revelationis, unde illa ipsa doctrinam suam haurit, cognitae habeat necesse est. Attamen licet fides cum scientia historica necessario conjuncta sit: haudquam propterea hac scientia sola absolvitur. Ut scientia ista in fidem abeat, voluntas, quae illa pro veris seu divinitus revelatis cognovimus, etiam pro veris ac revelatis admittendi ad eandem accedere debet. Scientia enim omnis est duntaxat functio intellectus, et argumentorum pondere quasi extorquetur, fides autem simul actus est voluntatis, atque ex reverentia et amore Dei veracissimi nascitur; quamvis fides scientiam historicam semper ac necessario consequatur. Quamprimum enim, sententiam aliquam vere esse revelatam, cognoverimus, illam quoque tantquam certissimam fide inconcussa amplecti obstringimur; secus enim ipsam revelationem negare, i. e. nobismetipsis repugnare cogeremur.

Quod ad relationem fidei et scientiae speculativae et internae attinet: utriusque natura adcuratius expensa, patet ante omnia, fidem aequae rationabilem esse ac scientiam. Etenim fides quidem sententias revelatas admittit, licet illas non comprehendat, attamen tantum propterea, quia summam Dei veracitatem, omniscientiam ac sapientiam, falli fallereque nesciam perspectam, eamque summe venerandam esse persuasum habet, et ideo se auctoritati divinae subjicit, quia novit, Deum nonnisi absolute verum manifestare posse, et subjectionem officium suum esse agnoscit. Quod manifeste dignitati naturae nostrae rationalis haud repugnat, sed quam maxime convenit. Nam fide homo nequaquam usui rationis renuntiat, sed tantum praepedi-

tur, quominus revelationem rejiciat, atque dubiis vanis et opinionibus erroneis, ad fallendum compositis, aurem praebeat. Quin immo fides aequae ac scientiae, i. e. absolute certa est. Nam licet certitudo scientiae immediata sit, utpote perspectae internae necessitati innixa: ideo tamen minime major aut tutior statui potest certitudine fidei, quamvis mediata, infallibili scilicet auctoritate divina suffulta. Scientia quidem majorem cognitae rei revelatae claritatem, atque etiam naturalem illam admittendi animi alacritatem sibi conjunctam habet; attamen ignis illius coelestis, quo cor nostrum fide vera ac viva repletum incalescit, vicem nequaquam explere, aut eidem exaequari potest; et hinc quoque fides, partim quoniam auctoritati divinae innititur, partim quia non tantum intellectus, sed et voluntatis motus est, majorem scientia vim in vitam nostram exerit, et plus, quam haec ad mores nostros voluntati divinae conformandos confert. Bonum est scire, melius credere, optimum utrumque.

Porro fides scientiae basis est ac fundamentum, quae ab illa necessario progredi, et per illam continuo dirigi debet. Res enim, de quarum intelligentia hicce agitur, ejusmodi sunt, quas ratio, sibi relicta, nunquam inveniret, seu ex principiis perspicue cognitis deduceret. Quare revelationem alio modo, quam per fidem apprehendere non valemus, et prout omnis nostra institutio atque educatio ab auctoritate ac fide incipit, ita quoque institutio ac educatio religiosa ab auctoritate et fide initium capiat necesse est. Insuper nisi philosophica rerum revelationum disquisitio fidem continuo respiciat, eidemque immoto quasi pede insistat: ratio facile in illa instituenda eandem ob causam, quoniam res illae naturales ipsius limites transcendunt, eique duntaxat per revelationem innotescere potuerunt, aberrare, et, phantasiae fallaciis decepta, istius portenta veritati substituere posset. Unde sine fide scientia revelationis neque datur, neque firma ac tuta est.

Denique fides absolute est necessaria, scientia autem haudquaquam. Etenim quae Deus nobis de se suisque operibus, ac praecipue naturis intellectualibus, Angelis et hominibus, revelavit, atque continuo per Ecclesiam suam nos edocet, quivis cognoscere (cognitione externa seu historica) ac credere potest, et etiam tenetur; ad scientiam vero horum omnium, licet imperfectam, evehi nonnisi paucis electis, naturali perspicacitate mentis praeditis, ac praecipue uberiori coelesti gratia illustratis, datum, ad perfectam autem pertingere nemini

est concessum. Etenim *videmus nunc per speculum in aenigmate: tunc autem facie ad faciem* ¹⁾, et *cum apparuerit, similes ei erimus: quoniam videbimus eum sicuti est.* ²⁾

Ex altera parte autem minime timendum est, ne scientia fidem evacuet, aut ex animis nostris tollat. Quamvis enim fides et scientia circa easdem veritates revelatas versantur, idemque habet utraque objectum: tamen quaevis earundem proprio ininitur fundamento, fides videlicet auctoritati divinae, scientia vero cognitae internae rei rationi ac necessitati; et ideo sibi invicem haud repugnant, sed potius se invicem multum adjuvant, quum fides scientiae afferat certitudinem ac firmitatem, scientia autem fidei alacritatem, nec non majorem efficacitatem.

§. 6. Divisio.

Veritates revelatae, quas nobis Ecclesia Catholica fide divina recipiendas proponit, referuntur aut ad Deum ipsum, aut ad ejus opera, et posteriores rursus vel ad mundum generatim, vel speciatim ad naturam angelicam, humanam et physicam. Qua propter Theologia dogmatica pro indole argumenti sui, cui necessario adcommodari debet, ne scopo suo desit, in quinque dispescitur partes. Quarum

1. continet doctrinam de Deo;
2. de mundo in genere;
3. de Angelis;
4. de homine et
5. de mundo physico.

§. 7. Succincta historia Theologiae dogmaticae.

Priusquam ad exponenda doctrinae Catholicae dogmata accedamus, non abs re esse videtur, brevem disciplinae nostrae praemittere historiam. Quemadmodum reliquae disciplinae theologiae, ita et Theologia dogmatica non uno continuo culta est modo, neque una eademque tradita est methodo; quamvis dogmata religionis nostrae quae illa proponit, eadem semper immota ac inconcussa steterint.

Licet autem tres diversas doctrinam fidei tractandi methodos distinguere, patristicam, scholasticam et recentio-

¹⁾ 1. Cor. 13, 12.

²⁾ 1. Joan. 3, 2.

rem, et hinc etiam historiam Theologiae dogmaticae in tres sectiones seu periodos dispescere.

Periodus prima seu patriistica, a Christo Domino usque ad medium aevum. — Christus Dominus ipse doctrinam suam, occasione oblata, modo simplici, populo, ad quem verba faciebat, adcommadato, sine omni scientifico adparatu, quo haud indigebat, utpote qui erat ipsa veritas, et ideo edocebat, *sicut potestatem habens*, ¹⁾ verbum vitae omnes, *quotquot receperunt cum*. ²⁾ — Simplex quoque erat methodus, qua Apostoli in doctrina revelata tradenda usi sunt. Pro fundamento institutionis suae historiam Salvatoris collocant, quem ex vaticiniis V. T., in ipso exitum nactis, atque miraculis, ab ipso patratis, promissum Messiam atque unigenitum Dei Filium esse, ostendunt, doctrinamque, ab ipso traditam, narrationibus suis intexunt, aut etiam, prout in epistolis faciunt, data opportunitate, ex industria exponunt, *non in persuasibilibus verbis, sed in ostensione spiritus, et virtutis*, ut fidem hominum non humana sapientia, sed vi divina niti, intelligeretur. ³⁾ Attamen jam ipsi ad dogmata, uti de corporum resurrectione, de nostra justificatione ac praedestinatione, contra adversariorum objectiones vindicanda, ea magis explicare, eorundem possibilitatem atque cum sapientia ac sanctitate divina congruentiam monstrare coguntur.

Qui Apostolis succedere Scriptores ecclesiastici, Patrum apostolicorum nomine condecorati, ut Clemens Rom., Ignatius M., Polycarpus, Hermas, quibus accensent auctorem epistolae, quae S. Barnabae nomine circumfertur, apostolicum dicendi scribendique genus imitati, sine adcuratori dogmatum divinorum disquisitione instituta, atque ordine systematis haud servato, sed prout eorum, quibuscum agebant, exigebat necessitas, aut ferebat occasio, sermonem habuere de rebus divinis stylo simplici et ab ornatu quaesito vacuo. Non enim hisce viris tam cordi erat, ut scientiam, quam potius, ut vitae sanctimoniam inter homines promoverent; et hinc malebant Christum ejusque religionem magis re ac vita, tum in se, tum in aliis exprimere, quam ornare adscitio adparatu.

Saeculo II. vero quum plures essent, qui, disciplinis profanis probe exculsi, Christo nomen dedissent; atque Christianae fidei

¹⁾ Matth. 7, 29.

²⁾ Joan. 4, 10 ss. 1, 12.

³⁾ 1. Cor. 2, 4 s.

hostes varia ejusdem dogmata, praecipue ideo, quod rationi humanae adversentur, impeterent: non poterat non fieri, ut viri illi iisdem armis, quibus adversarii rem Christianam adgressi erant, hos refellerent, eamque tueri satagerent, mysteriorum revelationis divinae internam rationem ac necessitatem, aut saltem possibilitatem ostendendo; idque eo magis, quum menti nostrae desiderium a natura insitum sit, ad clariorem in dies rerum, etiam divinarum, notionem eluctandi, earumque internam veritatem seu intelligentiam assequendi. Neque asseri potest, & Scripturam hujusmodi conaminibus adversari, quum Apostolus nos admoveat, ut ambulemus *digne, in omni opere bono fructificantes, et crescentes in scientia Dei*, ¹⁾ atque solummodo philosophiam οὐ κατὰ Χριστὸν rejiciat. ²⁾ Tali modo igitur nata est scientia Christiana; atque omnes Patres et Scriptores Ecclesiae, qui de dogmatibus sacris scripserunt, dum ex unâ parte unanimiter agnoscunt, doctrinam divinitus revelatam, in sinu Ecclesiae repositam, atque ab ea traditam, absolute perfectam esse, ita ut nec dilatari, nec perfici queat, ex altera parte simul, alii magis ac consulto, alii minus ac quasi praeter voluntatem, profunda illius doctrinae scrutantur, ut falsae scientiae phantasmata destruant, et nativo illi rationis nostrae desiderio veritatem comprehendendi, quantum id videlicet fieri potest, satisficiant. In hac divina scientia perfectionem Theologi, quin imo omnis Christiani reponunt, ut nominatim Clemens Alex., qui illam γνῶσις, et ideo Theologum seu Christianum sapientem vel perfectum γνῶστικὸν adpellat, atque eam ita describit: *Cognitio (γνῶσις) autem est firma et stabilis demonstratio eorum, quae assumpta sunt per fidem, quae per doctrinam Domini super fidem aedificatur, quae transmittit ad infallibilitatem et scientiam et perfectam comprehensionem. Ac mihi quidem ea videtur esse prima salutaris mutatio, quae fit a gentibus ad fidem; secunda autem, quae est a fide in cognitionem. Illa vero desinens in charitate, amicum id, quod cognoscit, ei reddit, quod cognoscitur. Et fortasse qui est ejusmodi, jam praeoccupavit, ut sit similis Angelis.* ³⁾ Hinc et usum philosophiae, cujus ope divina scientia, tam in nobis, quam in aliis, efficitur ac formatur, non tantum ipsi ubique faci-

¹⁾ Col. 1, 10. Cf. 2. Petr. 3, 18.

²⁾ Col. 2, 8.

³⁾ Strom. I. 7. n. 10. Opp. ed. c. T. 2. p. 865 s.

unt, sed et Theologo commendant. ¹⁾ Etenim *rationi*, ut ait Cassianus, *non obest sermo rationis, et semper veritas ventilata plus rutilat, meliusque est errantes disputationis curatione corrigi, quam censurae severitate damnari.* ²⁾ Atque Hilarius: *Fidem non nudam* (indoctam) *Apostolus atque inopem rationis reliquit: quae quamvis potissima ad salutem sit, tamen nisi per doctrinam instruat, habebit quidem inter adversa tutum refugiendi recessum, non etiam retinebit constantem obtinendi securitatem; eritque, ut infirmis sunt post fugam castra, non etiam ut castra habentibus adest interrita fortitudo. Contundendae sunt ergo insolentes adversum Deum disputationes, et destruenda rationum fallacium munimenta, et elevata ad impietatem ingenia conterenda, nec carnalibus armis, sed spiritualibus; nec terrena doctrina, sed coelesti sapientia: ut quanta rerum divinarum humanarumque discrefio est, tanta ultra terrena studia ratio coelestis excedat.* ³⁾ Nimirum quamvis ad repellendos ac refutandos haereticos divinis Scripturis ac dogmatibus, hoc est, propriis disciplinae principiis nitatur Theologus, ac praecipuum in iis robur, ac momentum pugnae positum habeat; non tamen illis ipsis uti, nec ea tractare scienter arma poterit, si scientia divinorum dogmatum sit destitutus.

Omnem tamen malum philosophiae ac scientiae usum in negotio fidei ac Theologiae iidem viri respuunt; qui duplex esse potest. Primus ille est, quando sola ratio credendi in scientia constituitur, adeo ut nulli assentiri dogmati libeat, quod sola auctoritate constat, nisi humana ratiocinatione capi probarique potuerit. Quam sapientiam humanam atque mundanam vocant. *Humana mens*, ait Hilarius, *hoc solum sapit, quod intelligit, et mundus hoc tantum, quod potest, credit, secundum elementorum naturas id tantum possibile existimans, quod aut videret, aut ageret.* ⁴⁾ Quam nobis prorsus non posse sufficere, porro adstruunt. *Nescit plane, sapere*, inquit idem S. Doctor, *qui Deum nescit. Et cum sapientia Christus sit, necesse est, ut extra sapientiam sit, qui Christum aut ignorat, aut odit*, h. e. fide ejus doctrinam haud reci-

¹⁾ Cf. Clem. Alex. Strom. l. 6. n. 18. T. 2. p. 821 s. Augustin. De doctr. Christ. l. 2. c. 31. 40. n. 48—49. 60—61. Opp. ed. c. T. 3. c. 38. 42. s. Gregor Naz. Or. 20. Opp. ed. c. T. l. c. 300. c.

²⁾ De Incarn. l. 1. c. 6. Opp. p. 972.

³⁾ De Trinit. l. 12. n. 20. Opp. ed. c. T. 2. c. 419 s.

⁴⁾ De Trinil. l. 8. n. 53. Ib. c. 251 s.

pit. ¹⁾ Quamobrem juxta illorum doctrinam praecedere omnino fides debet, sequi deinde ratio ac intelligentia seu scientia. Quod ex Clementis Alex. loco supra laudato efficitur. In quo asserit, fidem instar esse fundamenti, super quod ἡ γνῶσις, id est, scientia et cognitio struitur. *Janua nostra fides est*, ait Ambrosius, *quae totam domum, si fuerit robusta, communit.* ²⁾ Cassianus: *Sed rationem dicti quaeris? non reddo. Interim Deus hoc dixit. Deus hoc locutus est mihi; verbum illius summa ratio est. Removeo argumenta; removeo disputationem. Sola mihi ad credulitatem sufficit persona dicentis. Non licet mihi de fide dicti ambigere; non licet deliberare. Quid mihi quaerere, quomodo verum sit, quod Deus dixerit, cum dubitare non debeam, quin verum sit, quod Deus dixit?* ³⁾ Atque Cyrillus Alex.: *Fidem enim sequitur cognitio, non antecedit, juxta illud: „Si non credideritis, non intelligetis.” Fide quippe simplici, non curiosa basis instar constituta, superaedificatur deinceps cognitio, quae paulatim in mensuram aetatis Christi et in virum perfectum ac spirituales nos effert.* ⁴⁾ Hanc ergo ex mente Patrum Ecclesiae disciplinae coelestis ac divinarum rerum percipiendarum hominibus viam Christiana praescribit religio, ut credendarum rerum rationem non ab intelligentiae luce repetant, nec argumentis ac probabilibus inventis humanae sapientiae, vel argumentorum subtilitate, aut demonstrandi necessitate moveantur ad assensum, sed sola auctoritate testificantis Dei, quae quidem idoneis ad sui significationem notis ac documentis illuxerit. Postquam vero propositis rebus assensi sunt, ac fide suscepta Christiani jam esse coeperunt: tum ex frequenti creditarum rerum meditatione ac tractatione oritur illa scientia seu cognitio, quae robur ac firmitatem addit fidei, et ad eam tuendam, illustrandam, tradendam lumen ingeniis et adjumenta suppeditat. Non ergo philosophia et intelligentia dux est habenda et magistra credendi, sed ancilla et pedisequa; non quae meliori luce afflata regat mentes, ac, quo velit, ducat, sed obsequatur potius, ac praesto sit ad tutelam et mini-

¹⁾ Ib. n. 6. c. 218.

²⁾ Expos. in Ps. 118. Serm. 12. n. 14. Opp. ed. c. T. 1. c. 1118. Cf. De. Abrah. 1. 1. c. 3. n. 21. Ib. c. 289.

³⁾ De Incarn. 1. 4. c. 6. Opp. p. 1007.

⁴⁾ In Joan. 4, 69. 1. 4. c. 4. Opp. ed. c. T. 4. p. 393. Cf. Augustin. Epist. 120. n. 3. Opp. ed. c. T. 2. c. 347. Hom. in Ps. 115. Inter opp. Basilii M. ed. c. T. 1. p. 371 ss.

sterium. *Haec artis humanae peritia*, ait Petrus Damianus, *si quando tractandis sacris eloquiis adhibetur, non debet ius magisterii sibi melius arroganter arripere, sed velut ancilla dominae quodam famulatus obsequio subservire, ne, si praecedat, oberret, et, dum exteriorum verborum sequitur consequentias, intimae virtutis lumen, et rectum veritatis tramitem perdat.* ¹⁾

Alter sinister philosophiae in Theologia usus, quem SS. Patres atque Scriptores priorum saeculorum respuunt, est, quum ille, prout a sophistis tam gentilibus, quam haereticis fiebat, in solis sophismatum nugis ac praestigiis reponitur, ad veram fidem evertendam, et circumveniendos rudes ac simplices. De hocce abusu loquitur Ambrosius, quum de Arianis disserens ait: *Omnem vim venenorum suorum in dialectica disputatione constituunt, quae philosophorum sententia definitur non adstruendi vim habere, sed studium destruendi. Sed non in dialectica complacuit Deo saluum facere populum suum. „Regnum enim Dei in simplicitate fidei est, non in contentione sermonis.“* ²⁾ Quam improbam disputandi solertiam in divinam invasisse sapientiam conqueritur, Gregorius Naz., qui ait, in Ecclesiam irrepsisse captiones sophisticas, pravum artium Aristotelicarum artificium, ac Platonicae facundiae praestigias, et hujus generis alia, velut Aegyptiacas quasdam plagas. ³⁾ Quae illius querimonia crebrior ac vehementior est in iis orationibus, quas contra Eunomium scripsit; cujus arguta loquacitate, ait, eo rem adductam esse, *ut periculum sit, ne magnum fidei nostrae mysterium exigua quaedam articula esse videatur.* ⁴⁾ Quod etiam longe ante cavendum esse, monuerat Gregorius Thaumaturgus. *Ne Evangelicam scripturam*, inquit, *curiosius inquiramus, aridis, et enucleatis dictionibus inhaerentes; ac ne quaestiones inextricabiles, verborumque contentiones seminemus, ac planum et facilem, eundemque rectissimum fidei sermonem asperum scabrumque reddamus.* ⁵⁾

Inter scripta tamen, quae hac aetate ab Ecclesiae Scriptoribus exarata sunt, nullum occurrit, quod sententias singulas fidei Christianae certo quodam nexu colligatas exhiberet, atque plenum

¹⁾ Opusc. 36. c. 5. Opp. T. 3. p. 312.

²⁾ De fide. l. 1. c. 5. n. 42. T. 2. c. 451.

³⁾ Or. 26. T. 1. c. 403. D.

⁴⁾ Or. 33. lb. c. 467. D.

⁵⁾ De Incarn. et fid. Cf. Petav. De theol. dogmat. Prol. c. 3. n. 6. Antverp. 1700. T. 1. p. 8 s.

et apte concinnatum systema Theologiae Catholicae sisteret, solis quibusdam periculis, atque praecipue Joannis Damasceni libris *De fide orthodoxa* exceptis. Nec mirum. Religio Christiana inter insectationes undique nata est et adolevit; et quemadmodum Reges ac Praesides in Christianos ferro ignique saeviebant, ita philosophi ac docti, Gentilium et Judaeorum, atque haeretici et schismatici postea fidem Christianam lingua et calamo aggressi sunt. Quapropter omnes viri eruditi, quotquot sacra Christiana eo tempore amplexati, aut in religione Christiana sunt enutriti, ad eam contra adversarios tuendam, ejusque dogmata vindicanda cogeantur, ita ut de horum systemate construendo haud cogitent.

Qui ex Gentilibus contra religionem Christi insurrexerant, partim Christianis contemptum plurimum deorum, partim una cum Judaeis fidem in mysteria generatim, ac speciatim in Deum-hominem vitio vertebant. Unde auctores Christiani, qui adversus Gentiles scripserunt, prae omnibus unitatem Dei adserunt, cujus potentia sicut condita sint universa, ita et providentia gubernentur, fidem Christianorum in mysteria, utpote auctoritate revelantis Dei sapientissimi nixam, haud irrationabilem aut coecam esse ostendunt, atque divinitatem Filii, hominis facti, aliaque ejus mysteria exponunt. Id pariter fit ab iis, qui contra Judaeos calumum strinxerunt, cum hoc tamen discrimine, quod adversus Gentilium philosophos disserentes magis argumentis internis, qui vero contra Judaeos disputant, una testimoniis A. T. veritatem dogmatum Christianorum demonstrare satagant. Inter Scriptores ecclesiasticos, qui defensionem rei Christianae contra Gentiles susceperunt, eminent: Justinus (M., *Apologia I. ad Antoninum Pium* ¹⁾; *Apologia II. ad Senatum Romanum* ²⁾; et, si ejus opus est, *Liber de Monarchia* ³⁾; Tatianus, *Oratio adversus Graecos* ⁴⁾; Athenagoras, *Legatio pro Christianis* ⁵⁾; Theophilus Antiochenus, *Ad Autolicum libri tres* ⁶⁾; Hermias, *Gentilium philosophorum irrisio* ⁷⁾; Hippolytus, *Adversus Platonem de causa universi* ⁸⁾; Clemens Alex., *Pro-*

¹⁾ Opp. p. 42—90.

²⁾ Ib. p. 90—102.

³⁾ Ib. p. 35—42.

⁴⁾ Ib. p. 254—293.

⁵⁾ Ib. p. 294—334.

⁶⁾ Ib. p. 359—428.

⁷⁾ Ib. p. 429—436.

⁸⁾ Gallandii Biblioth. vv. PP. T. 2 p. 451—454.

trepticus, seu *Cohortatio ad Gentes* ¹⁾; Origenes, *Contra Celsum libri VIII* ²⁾; Eusebius Caesar., *Praeparationis Evangelicae libri XV* ³⁾, et *Liber contra Hieroclem* ⁴⁾; Athanasius, *Oratio contra Gentes* ⁵⁾; Gregorius Naz., *Orationes invectivae adversus Julianum Imperatorem* ⁶⁾; Theodoretus, *Orationes X de Providentia* ⁷⁾, et *Graecarum affectionum curatio* ⁸⁾; Cyrillus Alexandrinus, *Pro sancta Christianorum religione adversus libros athei Juliani* ⁹⁾. Huc quoque quodammodo referri possunt Bassilii *Homiliae IX in Hexaëmeron*, ¹⁰⁾ Gregorii Nyssa. *De hominis opificio* ¹¹⁾, item *Contra fatum* ¹²⁾, et tractatus *Adversus Graecos, ex communibus notionibus*, seu de Deo trino ¹³⁾, Joan. Chrysostomi *Homiliae tres adversus eos, qui dicunt, daemones gubernare res humanas, etc.* ¹⁴⁾ et *De S. Babyla, contra Julianum et Gentiles* ¹⁵⁾, Nemesii Emeseni *Liber de natura hominis* ¹⁶⁾, et Zachariae, Mitylenensis Episcopi, *De mundi opificio, contra Philosophos disputatio* ¹⁷⁾. Porro ex latinis Patribus: Tertullianus, *Apologeticus adversus Gentes* ¹⁸⁾, *Ad nationes libri duo* ¹⁹⁾, *De testimonio animae* ²⁰⁾, et *Ad Scapulam* ²¹⁾; Minucius Felix, *Octavius* ²²⁾, Cyprianus, *De idolorum vanitate* ²³⁾, et *Ad Demetrianum* ²⁴⁾; Arnobius, *Adversus Gentes libri*

¹⁾ Opp. ed. c. T. 1. p. 1—95.

²⁾ Opp. ed. c. T. 310—799.

³⁾ Ed. Fr. Viger. Par. 1628.

⁴⁾ Demonstr. Evang. etc. ed. R. M. Par. 1628. p. 511—545.

⁵⁾ Opp. ed. c. T. 1. P. 1. p. 1—47.

⁶⁾ Or. 3. et 4. Opp. ed. c. T. 1. c. 45—121.

⁷⁾ Opp. ed. c. T. 4. p. 319—359.

⁸⁾ Ib. p. 461—679.

⁹⁾ Opp. ed. c. T. 6. Sect. 2. p. 5—362.

¹⁰⁾ Opp. ed. c. T. 1. p. 1—88.

¹¹⁾ Opp. ed. Par. 1638. T. 1. p. 44—138.

¹²⁾ Ib. T. 2. p. 62—81.

¹³⁾ Ib. p. 82—89.

¹⁴⁾ Opp. ed. c. T. 2. p. 244—276.

¹⁵⁾ Ib. p. 529—577.

¹⁶⁾ In Galland. Biblioth. PP. T. 7. p. 353—425.

¹⁷⁾ Ib. T. 11. p. 266—293.

¹⁸⁾ Opp. ed. c. V. 1. p. 20—79.

¹⁹⁾ Ib. p. 81—120.

²⁰⁾ Ib. p. 121—127.

²¹⁾ Ib. p. 128—132.

²²⁾ In Galland. Biblioth. PP. T. 2. p. 377—408.

²³⁾ Opp. ed. c. V. 2. p. 105—112.

²⁴⁾ Ib. p. 88—104.

VII.¹⁾; Lactantius, *Divinarum institutionum libri VII*²⁾; *Epitome institutionum divinarum*³⁾, *Liber de opificio Dei*⁴⁾, *Liber de ira Dei*⁵⁾, et *Liber de mortibus persecutorum*⁶⁾; Prudentius Clemens, *Libri II adversus Symmachum*⁷⁾; Julius Firmicus Maternus, *De errore profanarum religionum*⁸⁾; Paulus Orosius, *Historiarum libri VII*⁹⁾; atque Augustinus, *Libri III contra Academicos*¹⁰⁾, *De vita beata*¹¹⁾, *Libri II de ordine*¹²⁾, *Sex quaestiones contra Paganos expositae*¹³⁾, et *De civitate Dei libri XXII*¹⁴⁾; — Adversus Judaeos vero, quorum scripta conservata et typis impressa exstant, scripserunt: Justinus M. *Dialogus cum Tryphone Judaeo*¹⁵⁾; Tertullianus, *Adversus Judaeos*¹⁶⁾; Hippolytus, *Demonstratio adversus Judaeos*¹⁷⁾; Cyprianus, *Testimoniorum libri III adversus Judaeos*¹⁸⁾; Eusebius Caesar., *Demonstrationis Evangelicae libri XX*, quorum tamen tantum X superstites sunt¹⁹⁾, Gregorius Nyss., *Ex vet. Testamento delecta testimonia cum adjecta quadam explicatione adversus Judaeos de S. Trinitate*²⁰⁾; Basilii Seleuciensis, *Demonstratio adversus Judaeos, de adventu Christi*²¹⁾; Joan. Chrysostomus, *Adversus Judaeos et Gentiles demonstratio, quod Christus sit Deus*²²⁾, et *Orationes VIII*

1) Ed. c. p. 1—268.

2) Opp. ed. c. T. 1. p. 1—591.

3) Ib. T. 2. p. 1—69.

4) Ib. p. 71—125.

5) Ib. p. 127—179.

6) Ib. p. 180—250.

7) In Galland. Biblioth. vv. PP. T. 8.

8) Arnobii Adv. Gent. ed. c. p. 269—322.

9) In Galland. Biblioth. PP. T. 9. p. 63—156.

10) Opp. ed. c. T. 1. c. 245—296.

11) Ib. c. 297—312.

12) Ib. c. 318—352.

13) Ib. T. 2. c. 273—297.

14) Ib. T. 7.

15) Opp. p. 103—245.

16) Opp. V. 1. p. 264—298.

17) In Gallandii Biblioth. vv. PP. T. 2. p. 448—450.

18) Opp. V. 2. p. 200—296.

19) Ed. Fr. Viger. Par. 1628.

20) Opp. ed. Par. 1638. T. 2. p. 151—162. Item in Galland. Biblioth. vv. PP. T. 6. p. 578 ss.

21) In Biblioth. max. PP. Lugdun. T. 8. p. 495—496.

22) Opp. T. 1. p. 557—583.

adversus Judaeos ¹⁾; Augustinus, *Tractatus adversus Judaeos* ²⁾; Gergentius, seu, ut alii judicant, Palladius Alexandrinus, *Disputatio cum Herbano Judaeo* ³⁾; Anastasius, Abbas Palaestinensis *Adversus Judaeos disputationes* V ⁴⁾; Julianus Poletanus, *Contra Judaeos libri III* ⁵⁾.

Gentilibus et Judaeis in impugnando genuino dogmate Christiano se statim saeculo primo adjunxerunt Gnostici, haeticorum primi surculi, licet et ipsi magis ad externos, quam internos Christiani nominis hostes pertineant; nam dogmata sua ex orientali philosophia pleraque hauserunt, quibus tantum speciem quandam dogmatum Christianorum praetenderunt, ideam redemptionis systemati suo adcommodantes. Haeretici autem hi, qui, se solos scientiam, γνῶσις, rerum divinarum habere, jactitabant, inde etiam Gnostici adpellati, substituerunt mysterio SS. Trinitatis et creationis naturarum invisibilium, seu Angelorum, emanationem aeonum e Numine quodam incomprehensibili, mundum visibilem e materia aeterna formatum esse, contendebant, atque ejus creationem, vel potius formationem non unico ac vero Deo, sed aeoni alicui, vel demiurgo tribuebant, et ideo, quoniam de materia male sentiebant, matrimonium spernebant, ac resurrectionem corporum negabant. Quoad personam Christi alii Jesum pro mero homine habuerunt, cui se aeon quidam inde a baptismo usque ad passionem junxerit, alii vero, aeonem ipsum esse, censebant, qui ad speciem tantum humanam naturam induerit. Quapropter Patres, qui tempore Gnosticorum, dogmata Ecclesiae depravantium, vixerunt, praecipue ad id adnituntur, ut ostendant, verum ac proprium principium religionis Christianae doctrinam seu praedicationem Ecclesiae esse, utpote quae sit praedestinata columna et firmamentum veritatis, atque unum supremum Deum esse Creatorem mundi visibilis et invisibilis, absque ullo mediatore, Demiurgo sive Angelo, honestas esse nuptias, darique resurrectionem mortuorum, atque unum esse eundemque Jesum Christum, indivisum et inseparabilem, unigenitum Dei Filium, qui vere, non specie tantum, homo factus, passus ac mortuus sit pro salute nostra, et ideo verum Deum et

¹⁾ Ib. p. 583—686.

²⁾ Opp. T. 8. c. 29—40.

³⁾ In Biblioth. max. PP. Lugdun. T. 6. p. 1014—1040.

⁴⁾ In Ang. Maji Coll. nov. vet. Script. V. 7. P. 1. p. 207—244.

⁵⁾ In Biblioth. max. PP. Lugdun. T. 12. p. 614—630.

verum hominem, ac Salvatorem generis humani existere. In certamen adversus Gnosticos descenderunt praeter Patres Apostolicos: Irenaeus, *Contra haereses libri V*¹⁾; Epiphanius, *Panarium sive Adversus LXXX haereses*²⁾; Tertullianus, *De praescriptione haereticorum*³⁾; Augustinus, *Liber de haeresibus ad Quodvultdeum*⁴⁾; Theodoretus, *Haereticarum fabularum libri V*⁵⁾; atque Clemens Alex., Origenes, Cyrillus Hieros., in suis libris; qui contra haereticos generatim scripserunt. Porro qui singulares hujus generis commentationes elucubrarunt: Agrippa Castor, *Excerpta ex confutatione adv. Basilidem*⁶⁾; Tertullianus, *Adversus Hermogenem*⁷⁾, *Adversus Valentinianos*⁸⁾, *Scorpiace*⁹⁾, *de carne Christi*¹⁰⁾, *De resurrectione carnis*¹¹⁾, et *adversus Marcionem*¹²⁾; Augustinus *Contra adversarium Legis et Prophetarum libri II*¹³⁾, et *Ad Orosium contra Priscillianistas et Origenistas*¹⁴⁾; Orosius, *Com-monitorium de errore Priscillianistarum et Origenistarum*¹⁵⁾; Leo M. *Epist. ad Turibium*¹⁶⁾; Turibius, *Epist. — de secta Priscillianistarum ad Idacium et Caponium*¹⁷⁾; atque auctor *Tractatus de S. Trinitate*, seu *in Symbolum Apostolicum*, olim Ambrosio adscripti¹⁸⁾.

Ex orientali philosophia, quae gnosticismo originem dedit, sine dubio natus quoque est saeculo tertio manichaeismus, qui cum illo eatenus convenit, quatenus pariter dualismum, principium videlicet bonum et malum, statuit, de materia aequè male

¹⁾ Ed. c. p. 1 ss.

²⁾ Opp. ed. c. T. 1.

³⁾ Opp. V. 1. p. 299—333.

⁴⁾ Opp. T. 8. c. 1—28.

⁵⁾ Opp. T. 4. p. 187—318.

⁶⁾ In Galland. Biblioth. vv. PP. T. I. p. 300.

⁷⁾ Opp. V. 1. p. 349—381.

⁸⁾ Ib. p. 382—402.

⁹⁾ Ib. p. 403—427.

¹⁰⁾ V. 2. p. 43—72.

¹¹⁾ Ib. p. 73—145.

¹²⁾ Ib. p. 146—102.

¹³⁾ Opp. T. 8. c. 549—606.

¹⁴⁾ Ib. p. 611—620.

¹⁵⁾ Ib. c. 507.

¹⁶⁾ Epist. 15. Opp. ed. c. p. 226—282.

¹⁷⁾ Ib. p. 134—235.

¹⁸⁾ Opp. Ambros. Append. c. 310—344.

sentit, atque, Christum haudquaquam ejusdem numero substantiae cum Patre, sed eo longe inferiorem esse, contendit, qui figuram tantum humani corporis retulerit, actusque humanos specie tantum peregerit, et nec incarnatum, nec vere passum et mortuum, sed ad speciem tantum cruci se affigi permisisse, ut carnem crucifigendam seu mortificandam esse, hominibus indicaret. Contra hanc famosissimam, et late diuque propagatam haeresin multa prodierunt SS. Patrum scripta, e quibus aetatem tulerunt: Archelai *Acta disputationis cum Manete*, a. 277. in urbe Caschar Mesopotamiae habitae ¹⁾; Alexandri Lycopolitani *Adversus Manichaeorum placita* ²⁾; Serapionis Thumensis *Liber adv. Manichaeos* ³⁾; Titi Bostrensis *Contra Manichaeos libri IV* ⁴⁾; Didymi Alex. *Liber adv. Manichaeos* ⁵⁾; Gregorii Nyss. *Contra Manichaeos syllogismi decem* ⁶⁾; Epiphani *Haeresis LXVI, quae est Manichaeorum* ⁷⁾; Fab. Mar. Victorini *Liber ad Justinum Manichaeum, Contra duo principia Manichaeorum et de vera carne Christi* ⁸⁾; Augustini *De libero arbitrio libri III* ⁹⁾, *De Genesi contra Manichaeos* ¹⁰⁾, *De moribus Ecclesiae Catholicae et Manichaeorum libri II* ¹¹⁾, *De vera religione* ¹²⁾, *Liber de utilitate credendi* ¹³⁾, *De duabus animabus contra Manichaeos* ¹⁴⁾, *Acta contra Fortunatum Manichaeum*, seu disputatio contra eundem a. 392 Hippone habita ¹⁵⁾, *Liber contra Adimantum Manichaei discipulum* ¹⁶⁾, *Liber contra epistolam Manichaei, quam vocant Fundamenti* ¹⁷⁾, *Contra Faustum*

¹⁾ Opp. Hippolyti, ed. Fabric. T. 2. p. 142 ss. Et in Galland. Biblioth. vv. PP. T. 3. p. 569—610.

²⁾ In Fr. Combefis. Biblioth. graecc. PP. Auct. noviss. T. 2. p. 3. ss.

³⁾ In Henr. Canis. Lectt. antiqq. ed. Basnage. T. 1. p. 35—56.

⁴⁾ Ib. T. 1. p. 156—163.

⁵⁾ Ib. T. 1. p. 197—217.

⁶⁾ Opp. ed. Par. 1638. T. 3. p. 180.

⁷⁾ Opp. T. 1. p. 617—709.

⁸⁾ In Galland. Biblioth. PP. T. 8. p. 133—137.

⁹⁾ Opp. T. 1. c. 563—642.

¹⁰⁾ Ib. c. 643—684.

¹¹⁾ Ib. c. 684—744.

¹²⁾ Ib. c. 744—788.

¹³⁾ T. 8. c. 45—70.

¹⁴⁾ Ib. c. 71—92.

¹⁵⁾ Ib. c. 92—106.

¹⁶⁾ Ib. c. 109—150.

¹⁷⁾ Ib. c. 150—182.

Manichaeum libri XXXIII ¹⁾, *Libri II de actis cum Felice Manichaeo* ²⁾, *De natura boni adv. Manichaeos* ³⁾, denique *Liber contra epistolam Secundini Manichaei* ⁴⁾; Evodii *Liber de fide contra Manichaeos* ⁵⁾; Zachariae Mitylen. *Disputatio adv. Manichaeos* ⁶⁾; Joan. Damasceni *Dialogus contra Manichaeos*, recentiores scilicet, seu Paulicianos ⁷⁾, qui nempe, sub finem saeculi VII. oborti, propter errores suos Manichaeis affines recentiores Manichaei vulgo adpellantur; Photii *Adversus Paulianistas, seu recentiores Manichaeos libri IV* ⁸⁾; Petri Siculi *Historia de vana et stolta Manichaeorum haeresi* ⁹⁾; et Joan. Ozniensis *Oratio contra Paulicianos* ¹⁰⁾.

Quemadmodum Gnosticorum et Manichaeorum haereses ex philosophia orientali pullularunt, ita ex sinistra Judaismi intelligentia alius funestus error, Antitrinitariorum videlicet, ortus est. Ad Antitrinitarios sive Unitarios pertinent: Praxeas, Noëtus, Sabellius et Paulus Samosatenus, porro Theodotus et Artemon. Qui omnes in eo conveniebant, ut, sublata trinitate personarum in divina substantia, unicam tantum personam in Deo dari, assererent; quoad Christum autem a se invicem discedebant, ita ut alii statuerent, eundem illum unum Deum, qui alias ut Pater operatur, humanam in Jesu Christo naturam sibi adsociasse, natum, passum et mortuum esse, unde etiam Patripassiani, alias Monarchiani dicti sunt, alii vero sub Filio et Spiritu S. virtutes quasdam, ex Deo Patre profectas, intelligerent, quarum altera, cum Jesu mero homine juncta, redemptionis mysteria operata sit, altera nos illustret ac sanctificet, alii tandem blasphemarent, Jesum Christum merum hominem fuisse, attamen supernaturali modo conceptum, virum sanctum ac sapientem, ipsisque Prophetis praestantiorum. Contra hos errores plures Scriptores ecclesiastici surrexerunt, dogmaque Catholicum de tribus in divina substantia personis, atque de Christo Jesu, vero Dei Filio, et quidem non tantum ex

¹⁾ Ib. c. 182—470.

²⁾ Ib. c. 470—500.

³⁾ Ib. c. 500—518.

⁴⁾ Ib. c. 519—548.

⁵⁾ In Augustin. Opp. T. 8. Append. c. 25—36.

⁶⁾ In Galland. Biblioth. PP. T. 11. p. 293.

⁷⁾ Opp. ed. c. T. 1. p. 429—465.

⁸⁾ In Wolf. Anecdott. graec. Hamb. 1722—24. T. 1. p. 1 ss.

⁹⁾ In Biblioth. max. PP. Lugd. T. 16. p. 754—764.

¹⁰⁾ Opp. ed. J. B. Aucher. Venet. 1834.

fontibus revelationis divinae, sed et rationibus internis, seu speculative, ut ajunt, contra adversarios demonstrarunt.

Quorum scripta, huc spectantia, sunt: Caji, Rom. Presbyteri, *Parvus Labyrinthus*, adversus Artemonem, cujus tamen libelli nonnisi fragmenta supersunt ¹⁾; Malchionis, Antiocheni Presbyteri, *Disputationis cum Paulo Samosateno*, et *Epistolae Synodicae* fragmenta, ab Eusebio et Leontio Byzantino nobis servata ²⁾; Tertulliani *Adversus Praxeam* ³⁾; Hippolyti *Tractatus contra haeresin Noëti*, et *contra Beronem et Heliconem* ⁴⁾; Novatiani *De Trinitate* ⁵⁾; Dionysii Alex. *Adversus Sabellium* ⁶⁾; Dionysii, Rom. Pontificis, *Epistola encyclica adversus Sabellianos*, ad Ecclesias Aegyptiacas data ⁷⁾; Eusebii Caesareensis *Adv. Marcellum libri II*, *De ecclesiastica Theologia libri III* ⁸⁾, et *Libri II adv. Sabellium* ⁹⁾; Basilii *Homilia 24. contra Sabellianos, et Arium, et Anomoeos* ¹⁰⁾, atque *Epistola 210*, ad Primores Neocaesareae exarata ¹¹⁾; auctoris incerti *Liber contra Sabellii gregales* ¹²⁾; et Gregorii Nyss. *Sermo adv. Arium et Sabellium* ¹³⁾.

Cum haeresis Antitrinitariorum nondum esset exstincta: alia initio saeculi IV., et quidem ex ea ipsa manavit, omnium hucusque formidolosissima, Ario auctore. Qui impio ore ajebat, Dei Verbum non semper fuisse, sed ex nihilo factum esse ac creatum, non aeternum, neque ejusdem cum Patre substantiae. Similia his de Spiritu S. statuebant Macedoniani deinde, ex Arianis procedentes. Primus, qui novae haeresi sese opposuit, erat Alexander Alexandrinus, utpote qui vi muneris sui Arium, ad resipiscendum frustra admonitum, anathemate percussit deposuitque, atque reliquos Episcopos ea de re litteris encyclicis certiores fecit. Exstant ejus hodie adhuc nonnullae

¹⁾ In Galland. Biblloth. vv. PP. T. 2. p. 204—207.

²⁾ Ib. T. 3. p. 558—562.

³⁾ Opp. V. 2. p. 403—442.

⁴⁾ In Galland. Biblioth. vv. PP. T. 2. p. 454—473.

⁵⁾ Ib. T. 3. p. 287—314.

⁶⁾ Ib. p. 494 s.

⁷⁾ Ib. p. 538—540. In Mansi Coll. Conc. T. 1. c. 1011—1016.

⁸⁾ Demonstr. Evang. Sect. 2. p. 1—195.

⁹⁾ In Biblioth. max. PP. Lugdun. T. 4. p. 2—9.

¹⁰⁾ Opp. T. 2. p. 189—197.

¹¹⁾ T. 3. p. 313—318.

¹²⁾ Inter opp. Athanas. T. 2. p. 37—48.

¹³⁾ In Ang. Maji Coll. nov. vv. Scriptt. V. 8. P. 2. p. 1—9.

Epistolae de Ariana haeresi, deque Aarii depositione ¹⁾). Acerri-
mus autem veritatis Catholicae vindex exstitit Athanasius M.,
cujus opera, huc pertinentia, haec sunt: *Epistola ad Monachos* ²⁾,
Historia Arianorum ³⁾, *Condemnatio Aarii* ⁴⁾, *In illud: Omnia*
mihi tradita sunt ⁵⁾, *Orationes IV contra Arianos* ⁶⁾, *Epistola*
encyclica ⁷⁾, *Apologia contra Arianos* ⁸⁾, *Epistola de decretis*
Nicaenae Synodi ⁹⁾, *Epistola de sententia Dionysii* ¹⁰⁾, *Epistola*
ad Serapionem de morte Aarii ¹¹⁾, *Epistolae quatuor ad eundem* ¹²⁾,
quarum prima, tertia et quarta Spiritus S., secunda vero Filii
divinitatem defendit, *Epistola de Synodis Arimini et Seleucia* ¹³⁾,
De Incarnatione, et contra Arianos ¹⁴⁾, *Epistola ad Adelphium* ¹⁵⁾,
Epistola ad Maximum Philosophum ¹⁶⁾, et alia ¹⁷⁾. Athanasium
secutus Basilius, a quo conscriptae sunt *Rationes syllogisticae*
contra Arianos ¹⁸⁾, *Antirrheticus adversus impium Eunomium* ¹⁹⁾,
et *Liber ad Amphilochoium de Spiritu S. Deo* ²⁰⁾. Is Amphilo-
chius ipse in certamen cum hostibus his veritatis divinae descen-
dit, et quamvis liber illius *De Spiritu S. Deo* perierit, ab interitu
tamen vindicata est ejusdem *Epistola synodica*, in qua divinita-
tem Spiritus S. demonstrat. Et quum interim ad Antirrheticum
Basilii impugnandum Eunomius haeresiarcha apologiae suae ite-
rum apologiam scripsisset, Basilius autem tunc jam supremam
diem obiisset: refutationem suscepit Gregorius Nysa. con-

¹⁾ In Galland Biblioth. PP. T. 4. p. 441—456.

²⁾ Opp. T. 1. P. 1. p. 343 s.

³⁾ Ib. p. 345—402.

⁴⁾ Ib. p. 396—402.

⁵⁾ Ib. p. 103—108.

⁶⁾ Ib. p. 403—645.

⁷⁾ Ib. p. 110—118.

⁸⁾ Ib. p. 118—205.

⁹⁾ Ib. p. 206—242.

¹⁰⁾ Ib. p. 242—262.

¹¹⁾ Ib. p. 310—312.

¹²⁾ T. 1. P. 2. p. 645—714.

¹³⁾ Ib. p. 714—769.

¹⁴⁾ Ib. p. 870—890.

¹⁵⁾ Ib. p. 910—917.

¹⁶⁾ Ib. p. 917—920.

¹⁷⁾ Ib.

¹⁸⁾ In Canis. Lectt. antiqq. ed. Basnage. T. 1. p. 169 ss.

¹⁹⁾ Opp. T. 1. p. 205—323.

²⁰⁾ Ib. T. 3. p. 1—68.

scribens *Orationes* seu *libros XII. antirrheticos adv. Eunomium* ¹⁾. Ab eodem exstat quoque *Sermo de Spiritu S. adv. Macedonianos pneumatomachos* ²⁾. His accesserunt: Gregorius Naz., *Orationes de Theologia V* ³⁾, opus tanta ab omnibus admiratione exceptum, ut inde sanctus auctor nomen Theologi promeritus sit, *Oratio in laudem Martyrum* ⁴⁾, *Tractatus de fide* ⁵⁾, et *Tractatus de fide Nicaena* ⁶⁾; Epiphanius, *Ancoratus* ⁷⁾; Joan. Chrysostomus, *De Incomprehensibili adv. Anomoeos homiliae VI* ⁸⁾, item *Hom. 7—12. contra Anomoeos* ⁹⁾; et Cyrillus Alex., *Thesaurus* ¹⁰⁾, *Dialogi VII de sancta et consubstantiali Trinitate*, cum compendio dialogi septimi *de Spiritu S.* ¹¹⁾, *Dialogus octavus De Incarnatione Unigeniti* ¹²⁾. — E latinis Patribus doctrinam Catholicam contra Arianos et Macedonianos defenderunt: Hilarius Pictaviensis, e cujus scriptis huc pertinent: *De Trinitate libri XII* ¹³⁾, *Liber de Synodis, seu De fide Orientalium* ¹⁴⁾, *Ad Constantium Augustum libri II* ¹⁵⁾, *Liber contra Constantium Imperatorem* ¹⁶⁾, et *Liber contra Arianos, vel Auxentium Mediolanensem* ¹⁷⁾; C. Mar. Victorinus, *Adv. Arium libri IV* ¹⁸⁾, *De óπονοσφω recipiendo* ¹⁹⁾, *De generatione divina* ²⁰⁾; Eusebius Vercellensis, *Epist. ad Presbyteros et plebem Vercellensem*, cui additus est *Libellus facti*, seu protestatio contra violentas Patrophili, cujusdam Arianorum Episcopi, injurias ²¹⁾;

¹⁾ Opp. ed. Par. 1638. T. 2. p. 284—864.

²⁾ In Ang. Maji Scriptt. vv. nov. Collect. V. 8. P. 2. p. 10—25.

³⁾ Opp. T. 1. c. 467—548.

⁴⁾ Ib. c. 645—648.

⁵⁾ Ib. c. 652—666.

⁶⁾ Ib. c. 667—668.

⁷⁾ Opp. T. 2. p. 1—125.

⁸⁾ Opp. T. 1. p. 443—501.

⁹⁾ Ib. p. 501—557.

¹⁰⁾ Opp. T. 5. P. 1. p. 1—381.

¹¹⁾ Ib. p. 383—677.

¹²⁾ Ib. p. 678—713.

¹³⁾ Opp. ed. c. T. 2. c. 1—444

¹⁴⁾ Ib. c. 445—520.

¹⁵⁾ Ib. c. 531—550.

¹⁶⁾ Ib. c. 553—586.

¹⁷⁾ Ib. c. 587—602.

¹⁸⁾ In Galland. Biblioth. PP. T. 8. p. 152—197.

¹⁹⁾ Ib. p. 198 s.

²⁰⁾ Ib. p. 140—150.

²¹⁾ Ib. T. 5. p. 78—80.

Luciferus Caralitanus, *Ad Constantium Imperatorem pro S. Athanasio libb. II* ¹⁾, et *Moriendum pro Filio Dei* ²⁾; Faustinus, *De Trinitate*, seu *De fide contra Arianos* ³⁾; Ambrosius, *De fide libb. V ad Gratianum Augustum* ⁴⁾, *De Spiritu S. libb. III ad eundem* ⁵⁾, *De Incarnationis Domin. Sacramento* ⁶⁾, et *De fide orthodoxa contra Arianos*, seu *De Filii divinitate et consubstantialitate tractatus* ⁷⁾, quem tamen alii Gregorio Nazianzeno, alii Vigilio, alii Gregorio Eliberitano tribuunt; Hieronymus, *Epistolae ad Damasum P.*, et *Marcum Presbyterum*, scilicet *XV. XVI. et XVII.* ⁸⁾; Augustinus, *Contra sermonem Arianorum* ⁹⁾, *Collatio cum Maximino Arianorum Episcopo*, librique duo contra eundem ¹⁰⁾, et quodammodo *De Trinitate libb. XV* ¹¹⁾; Paschasius, *De Spiritu S. contra Macedonium libb. II* ¹²⁾; Vigilius Tapsensis, *Contra Arium Dialogus* ¹³⁾, *Contra Arium Sabellium et Photinum libri III* ¹⁴⁾, *De Trinitate*, seu *De unita trinitate Deitatis libb. XII* ¹⁵⁾, et *Adversus Varimadum seu Maribadum*, Diaconum et amicum Hunerici, Regis Vandalorum, quem librum tamen alii Idacio Claro adscribunt ¹⁶⁾; Cerealis, *Adversus Maximinum* ¹⁷⁾; Avitus, *Collatio Episcoporum coram Rege Gundebaldo adversus Arianos* ¹⁸⁾; Fulgentius Ruspensis, *Contra Arianos* ¹⁹⁾, *Libri III ad Trasimundum Regem* ²⁰⁾, et *Liber Contra sermonem Fastidiosi Ariani, ad Victorem* ²¹⁾.

¹⁾ Ib. T. 6. p. 155—198.

²⁾ Ib. p. 245—256.

³⁾ In Galland. Biblioth. PP. T. 7. p. 441—459.

⁴⁾ Opp. ed. c. T. 2. c. 439—596.

⁵⁾ Ib. c. 596—700.

⁶⁾ Ib. c. 700—730.

⁷⁾ Append. Opp. Ambros. c. 343—358.

⁸⁾ Opp. ed. c. T. 1. c. 38—45.

⁹⁾ Opp. T. 8. c. 621—648.

¹⁰⁾ Ib. c. 649—744.

¹¹⁾ Ib. c. 745—1004.

¹²⁾ In Biblioth. max. Lugdun. T. 8. p. 807—818.

¹³⁾ Ib. T. 8. p. 743—752.

¹⁴⁾ Ib. p. 753—773.

¹⁵⁾ Ib. p. 773—806.

¹⁶⁾ Ib. T. 5. p. 726—751.

¹⁷⁾ In Biblioth. max. PP. Lugdun. T. 8. p. 671—675.

¹⁸⁾ In Galland. Biblioth. PP. T. 10. p. 794—796.

¹⁹⁾ Opp. ed. c. p. 51—68.

²⁰⁾ Ib. p. 69—143.

²¹⁾ Ib. p. 340—359.

Quum divina Jesu Christi natura per definitionem solennem Ecclesiae esset stabilita: scientia, quae inflat, charitate aedificante destituta, novos de ejus humanitate excogitavit errores. Apollinaris videlicet, Laodicenae Ecclesiae Presbyter, et postea Episcopus, duplicem animam cum Platoniciis, sentientem et rationalem statuens, Christo illam tantum adjudicavit, hujus locum ipsam ejus divinitatem obtinuisse, contendens, idque ideo, quod anima rationalis mutationi, errori et peccato obnoxia sit, et quod perfectus Deus et perfectus homo unicam personam constituere non possint. Quod pariter Nestorius, Patriarcha Constantinopolitanus, probavit; verumtamen quum sententiam sustineri a Patribus et Ecclesia, Christum perfectum Deum et perfectum hominem esse, videret: duplicem in ipso personam, alteram divinam, humanam alteram assumpsit, ita ut Christus Jesus ut homo minime verus ac proprius Dei Filius, neque B. V. Maria *θεοτόκος* sit. Quem errorem ut evitaret, in oppositum lapsus est Eutyches, non tantum unam in Christo personam, sed et unam naturam, ex divinitate et humanitate confusam, propugnans. Ex hac Monophysitarum haeresi alia Monotheletarum processit, quae sententiam de una natura in Christo damnatam defendere non ausa, unam saltem in ipso naturalem voluntatem et operationem statuebat. Attamen etiam contra hosce haereticos genuina doctrina multos nacta est defensores, qui ex SS. Litteris et Traditione, nec non ex redemptionis necessitate probarunt, eundem Christum verum Deum esse, et hominem verum, ita ut in ipso utraque natura, divina et humana, in una eademque hypostasi divina conjuncta sit, indivise et inseparabiliter, ast simul confuse ac impermixte, salva utriusque naturae proprietate, et hinc, divina et humana natura, licet ejusdem personae divinae, Dei Filii scilicet, propria sit, naturalem suam *βούλησιν* et *ἐνέργειαν* retineat. Contra Apollinaristas Catholicam veritatem tuitus est Athanasius in *Epistola ad Epictetum* ¹⁾, et *Lihb. II contra Apollinarium* ²⁾; Gregorius Naz. in *Duabus oratt.* seu *Epist. ad Calidonium Presbyterum* ³⁾; Gregorius Nyss. in *Antirrhelico Contra Apollinarem* ⁴⁾, et *Epist. ad Theophilum adv. Apollinarium* ⁵⁾; Joan. Chrysostomus, vel potius incertus

¹⁾ Opp. T. 1. P. 2. p. 900—910.

²⁾ Ib. p. 920—955.

³⁾ Opp. T. 1. c. 669—680.

⁴⁾ Opp. Par. 1638. T. 2. p. 47 s.

⁵⁾ Ib. T. 3. p. 261—266.

auctor *Epist. ad Caesarium Monachum* ¹⁾; Damasus in *Epist. ad Paulinum Antiochenum* ²⁾, et altera *Epist. Synodica contra Apollinarium et Timotheum* ³⁾; atque Leontius Byzantinus in tractatu *Adversus eos, qui proferunt quaedam Apollinarii* ⁴⁾. — Contra Nestorianos et Eutychianos scripserunt: Cyrillus Alexandrinus, inter graecos Scriptores in causa Nestoriana sine dubio princeps, a quo exstant: *Adversus Nestorii blasphemias contradictionum libb. V* ⁵⁾, *Explicatio duodecim capitum* ⁶⁾, *Liber de Trinitate Dialogus* (nonus), *quod unus sit Christus* ⁷⁾, *Scholium de Unigeniti Incarnatione* ⁸⁾, *De Incarnatione Verbi Dei Filii Patris* ⁹⁾, *Apologeticus pro duodecim capitibus, adv. orientales Episcopos* ¹⁰⁾, *Apologeticus adv. Theodoretum* ¹¹⁾, et alius *Apologeticus ad Theodosium Imperatorem* ¹²⁾; Theodotus Ancyranus, *Homilia contra Nestorium* ¹³⁾, et *Liber adv. eundem, seu Expositio Symboli trecentorum octodecim Patrum Conc. Nicaeni* ¹⁴⁾; Proclus, *Laudatio in S. Dei Genitricem Mariam* ¹⁵⁾, *De Incarnatione Domini nostri Jesu Christi* ¹⁶⁾, et *Epist. de fide* ¹⁷⁾; Theodoretus, *Eranistes, seu Polymorphus* ¹⁸⁾, *Fabularum haereticarum l. 4. c. 12—13.* ¹⁹⁾; Joannes Maxentius Scythopolitanus, *Contra Nestorianos capitula*, et *Dialogi contra Nestorium* ²⁰⁾; Euphraemus Alexandrinus, *Adversus Mo-*

¹⁾ Opp. J. Chrysostom. T. 3. p. 736—749.

²⁾ Mansi, Coll. Conc. T. 3. c. 425 a. Et Galland. Biblioth. PP. T. 6. p. 325—327.

³⁾ Ib. p. 337.

⁴⁾ In Biblioth. max. PP. Lugdun. T. 9. p. 707—713.

⁵⁾ Opp. T. 6. Sect. 1. p. 1—143.

⁶⁾ Ib. p. 145—157. In Mansi Coll. Conc. T. 5. c. 1—19.

⁷⁾ Ib. T. 5. P. 1. p. 714—778.

⁸⁾ Ib. p. 779—800. In Mansi Coll. Conc. Ib. a. 141—168.

⁹⁾ Ib. p. 801—804. In Mansi Coll. Conc. Ib. 169—178.

¹⁰⁾ Ib. T. 6. p. 157—200. In Mansi Coll. Conc. T. 5. c. 19—82.

¹¹⁾ Ib. p. 200—210. In Mansi Coll. Conc. Ib. c. 82—140.

¹²⁾ Ib. p. 241—252. In Mansi Coll. Conc. Ib. c. 225—255.

¹³⁾ In Galland. Biblioth. PP. T. 6. p. 456—458. In Mansi Coll. Conc. Ib. c. 221—225.

¹⁴⁾ Ib. p. 425—439.

¹⁵⁾ Ib. p. 614—619. 629—616.

¹⁶⁾ Ib. p. 619—626.

¹⁷⁾ Ib. p. 684—691.

¹⁸⁾ Opp. ed. c. T. 4. p. 1—175.

¹⁹⁾ Ib. p. 244—247.

²⁰⁾ In Biblioth. max. PP. Lugdun. T. 9. p. 537. 546—549.

nophysitas, opus deperditum, cujus tantum fragmenta a Photio sunt asservata ¹⁾; Justinus Sicularius, *Expositio rectae confessionis* ²⁾; Leontius Byzantinus, *Contra Nestorium et Eutychen libri III* ³⁾, et *Dubitationes hypotheticae et definiennes adv. Eutychianos* ⁴⁾; Anastasius Sinaita, Ὁδηγός, i. e. dux viae adversus Acephalos ⁵⁾; Eulogius Alexandrinus, *Capita VII de duabus naturis Domini Deique Salvatoris nostri Jesu Christi* ⁶⁾; Theodorus Abucara, *De unione et Incarnatione* ⁷⁾; atque Joannes Damascenus, *Contra Jacobitas* ⁸⁾, *Institutio elementaris*, *Dissertatio de natura composita contra Acephalos*, *De duabus in Christo voluntatibus et operationibus*, *deque naturalibus reliquis proprietatibus*, et *Adversus exosam Deo Nestorianorum haeresim* ⁹⁾. E Latinis: Leporius, *Libellus emendationis, seu satisfactionis ad Episcopos Galliae* ¹⁰⁾; Joan. Cassianus, *De Incarnatione Christi libri VII contra Nestorium* ¹¹⁾; Marius Mercator, *Refutatio Symboli Theodori Mopsuesteni* ¹²⁾, *Comparatio dogmatum Pauli Samosatani et Nestorii* ¹³⁾, item *Contradictiones adv. anathematismos Nestorii* ¹⁴⁾; Capreolus, Episcopus Carthaginensis, *De una Christi Dei et hominis persona, contra Nestorium* ¹⁵⁾; Petrus Chrysologus, *Epist. ad Eutychetem Archimandritam* ¹⁶⁾; Prosper Aquit. *Epitaphium Nestorianae et Pelagianae haereseos* ¹⁷⁾; Leo. M. *Epistola ad Flavianum* ¹⁸⁾, et *Epist. ad Leonem Augustum* ¹⁹⁾,

¹⁾ Photii Bibl. Cod. 228 et 229.

²⁾ Opp. Justin. M. Append. P. 1. p. 447—465.

³⁾ In Biblioth. max. PP. Lugdun. T. 9. p. 674—706.

⁴⁾ Ib. p. 721—724.

⁵⁾ Ib. p. 808—857.

⁶⁾ In Galland. Biblioth. PP. T. 12. p. 310.

⁷⁾ Ib. T. 13. p. 296—289.

⁸⁾ Opp. T. 1. p. 396—427.

⁹⁾ Ib. p. 515—571.

¹⁰⁾ In Galland. Biblioth. PP. T. 9. p. 396—399.

¹¹⁾ Opp. p. 959—1130.

¹²⁾ In Galland. Biblioth. PP. T. 8. p. 625—628.

¹³⁾ Ib. p. 628.

¹⁴⁾ Ib. p. 651—658.

¹⁵⁾ In Galland. Biblioth. PP. T. 9. p. 490—492.

¹⁶⁾ In Biblioth. max. PP. Lugdun. T. 7. p. 979.

¹⁷⁾ Opp. c. 197—200.

¹⁸⁾ In Mansi Coll. Conc. T. 5. c. 1363—1390.

¹⁹⁾ Ib. T. 6. c. 349—370.

praeter alias plurimas; Felix III P. *Epistolae duae ad Petrum Fullonem*, praeter alias, item *Tractatus*, in quo, quae pro Acacio afferebantur, refellit ¹⁾; Faustus Regiensis, *Epist. ad Gratium Diaconum* ²⁾; Gelasius P. *De duabus in Christo naturis adversus Eutychen et Nestorium* ³⁾; Vigilius Tapsensis, *Contra Eutychetem libri V* ⁴⁾; Severinus Boëthius, *Adversus Eutychen et Nestorium de duabus naturis et una persona Christi* ⁵⁾; Fulgentius Ferandus, *Epist. ad Anatolium, Diaconum Romanum, de duabus in Christo naturis, et quod unus de Trinitate natus passusque dici possit* ⁶⁾. — Haeresi Monotheletarum opponuntur: Sophronii, Patriarchae Hierosolymitani, *Epistola de haeresibus adversus Cyrum Alexandrinum et Sergium Constantinopolitanum* ⁷⁾; item RR. Pontificum, Joannis IV. et Martini I. *Epistolae* ⁸⁾; porro Maximi, Abb. et Confessoris, *Disputatio cum Pyrrho* ⁹⁾, et *De duabus naturis Domini et Dei Salv. n. J. Chr. capita decem* ¹⁰⁾; Anastasii, in monasterio ad S. Euthymium in Palaestina Abbatis, *Epist. ad Monachos Carakitanos* ¹¹⁾; Anastasii, Presbyteri et Apocrisiarii Romani, *Epist. ad Theodosium*, Presbyterum Gangrensem ¹²⁾; Anastasii, Rom. Eccl. Bibliothecarii, *Collectanea*, i. e. variae epistolae et relationes de Monotheletarum erroribus congestae ¹³⁾; et Joan. Damasceni *De duabus in Christo voluntatibus* ¹⁴⁾. — Contra adoptionismum, qui tanquam surculus haeresis Nestorianorum considerari debet, scripserunt: Beatus et Etherius, *De adoptione Fidei Dei adversus Elipandum libri II* ¹⁵⁾; Paulinus,

¹⁾ Ib. T. 7. c. 1037—1094.

²⁾ In Biblioth. max. PP. Lugd. T. 8. p. 553—555.

³⁾ Ib. p. 699—707.

⁴⁾ Ib. T. 8. p. 722—743.

⁵⁾ Opp. ed. Loriti Glareani. Basil. 1570.

⁶⁾ Opp. ed. Petr. Fr. Chifflet. Divion. 1649. p. 181—206. In Biblioth. max. PP. Lugdun. T. 9. p. 502—508. In Galland. Biblioth. PP. T. 11. p. 346—354.

⁷⁾ In Mansi Coll. Conc. T. 11. c. 462—510.

⁸⁾ Ib. T. 10. c. 682—686. 790—864.

⁹⁾ Ib. T. 10. c. 709—760.

¹⁰⁾ In Biblioth. max. PP. Lugdun. T. 12. p. 533.

¹¹⁾ Ib. p. 851 s.

¹²⁾ Ib. p. 858.

¹³⁾ In Galland. Biblioth. PP. T. 13. p. 30—90.

¹⁴⁾ Opp. T. 1. p. 529—554.

¹⁵⁾ Canis. Lectt. antiqq. ed. Basnage. T. 2. P. 1. p. 297—375.

Patriarcha Aquilejensis, *Sacrostylabus*, seu *De sanctissima Trinitate adversus Felicem et Elipandum*, et *Libri III contra eundem Felicem* ¹⁾; Alcuinus, *De Trinitate, Adversus Felicem libri VII*, et *Adversus Elipandum libri IV* ²⁾; atque Agobardus, Episcopus Lugdunensis, *Adversus dogma Felicis Urgelensis* ³⁾. — Impiae sententiae Joviniani et Helvidii, virginalem dignitatem B. Mariae negantium, opposuit Siricius P. *Epistolam adv. Jovinianum haereticum* ⁴⁾; Ambrosius *Epistolam ad Siricium P.*, in qua Joviniani errores recenset et refellit ⁵⁾, atque Hieronymus *Librum adv. Helvidium* ⁶⁾, *Libros II adv. Jovinianum* ⁷⁾, cum *Apologetico ad Pammachium* ⁸⁾.

Dum adhuc Ariani atque Macedoniani Ecclesiam in Oriente perturbabant, atque divinitatem Filii et Spiritus S. impugnando, opus redemptionis in se subvertebant: in Occidente novus doctrinae Catholicae hostis, caeterum eodem superbiae spiritu, ac illi, mysteria rationis nostrae limitatae captum transcendentia respuente, elatus, Pelagius, redemptionem, quatenus in nobis perficitur, adgressus est, quum, homini nativas liberi arbitrii vires ad finem suum consequendum sufficere, adstrueret, atque existentiam peccati originalis, et necessitatem omnem gratiae supernaturalis inficiaretur. Magnas turbas et haec haeresis in Ecclesia civit, multosque dogmatis Catholici, erroribus illis oppositi, defensores excitavit. Inter omnes autem, qui Pelagianam haeresin verbis scriptisque profligandi provinciam sibi sumserunt, primum locum tenet Augustinus. Pertinet huc ejus *Sermo De verbis Apostoli: Humanus sermo et omni acceptione dignus, etc.* ⁹⁾, et *De verbis Evang. Joan.: Nisi manducaveritis carnem, etc.* ¹⁰⁾, imprimis autem: *De praesentia Dei liber, seu Epist. 187.* ¹¹⁾, *De peccatorum meritis et remissione, et de Baptismo Parvulorum ad Marcellinum libri*

¹⁾ Opp. ed. c. nott. Madrisii, Venet. 1737.

²⁾ Opp. ed. Frobenii. T. 1. V. 2. p. 757—992.

³⁾ In Biblioth. max. PP. Lugdun. T. 14. p. 243—254.

⁴⁾ In Galland. Biblioth. PP. T. 7. p. 540—542.

⁵⁾ Epist. 42. Opp. T. 2. c. 965—970.

⁶⁾ Opp. T. 2. c. 205—230.

⁷⁾ Ib. c. 237—384.

⁸⁾ Ib. T. 1. c. 211—234.

⁹⁾ Serm. 174. Opp. T. 5. c. 830—835.

¹⁰⁾ Serm. 131. Ib. c. 640—645.

¹¹⁾ T. 2. c. 678—692.

III ¹⁾, *De spiritu et littera ad Marcellinum* ²⁾, *De natura et gratia contra Pelagium* ³⁾, *De perfectione iustitiae hominis* ⁴⁾, *De gestis Pelagii* ⁵⁾, *De gratia Christi et peccato originali libri II* ⁶⁾; *De nuptiis et concupiscentia libri II* ⁷⁾; *De anima et ejus origine* ⁸⁾, *Contra duas epistolas Pelagianorum libri IV* ⁹⁾, *Contra Julianum libri VI* ¹⁰⁾, *Operis imperfecti contra secundam Juliani responsionem libri VI* ¹¹⁾. Praeter haecce supersunt Hieronymi *Epist. 133. ad Ctesiphontem* ¹²⁾, et *Dialog. contra Pelagianos* ¹³⁾; Orosii *Apologeticus contra Pelagianos de arbitrii libertate* ¹⁴⁾; Marii Mercatoris *Commonitorium super nomine Coelestii*, et *Commonitorium adv. haeresin Pelagii et Coelestii* ¹⁵⁾; atque Gelasii I. P. *Adversus Pelagianorum haeresin* ¹⁶⁾.

Contra semipelagianismum in pugnam descendit idem Augustinus, cujus opera huc pertinentia sunt: *De gratia et libero arbitrio ad Valentinum et cum illo Monachos* ¹⁷⁾, *De correptione et gratia* ¹⁸⁾, *De praedestinatione Sanctorum* ¹⁹⁾, *De dono perseverantiae* ²⁰⁾. Porro Hilarius in *Epist. ad Augustinum* ²¹⁾; Prosper Aquit. in *Epist. ad Augustinum de reliquiis Pelagianae haeresis in Gallia* ²²⁾, *Epist. ad Rufinum, de gratia et libero arbitrio* ²³⁾, *Pro Augustino responsiones ad capitula obje-*

¹⁾ T. 10. c. 1—87.

²⁾ Ib. c. 88—126.

³⁾ Ib. c. 127—164.

⁴⁾ Ib. c. 167—190.

⁵⁾ Ib. c. 191—228.

⁶⁾ Ib. c. 230—276.

⁷⁾ Ib. c. 279—334.

⁸⁾ Ib. c. 337—408.

⁹⁾ Ib. c. 411—494.

¹⁰⁾ Ib. c. 497—710.

¹¹⁾ Ib. c. 873—1386.

¹²⁾ Opp. T. 1. c. 1025—1042.

¹³⁾ Ib. T. 2. c. 693—806.

¹⁴⁾ Opp. ed. Havercam p. p. 588 ss.

¹⁵⁾ In Galland. Biblioth. PP. T. 8. p. 613.

¹⁶⁾ Mansi Coll. Concil. T. 8. c. 101—120.

¹⁷⁾ T. 10. c. 717—748.

¹⁸⁾ Ib. c. 749—778.

¹⁹⁾ Ib. c. 789—820.

²⁰⁾ Ib. c. 821—858.

²¹⁾ Ib. c. 779—784.

²²⁾ Ib. c. 784—788.

²³⁾ Ib. Append. c. 163—170.

ctionum calumniantium Gallorum ¹⁾, *Responsiones ad capitula objectionum Vincentianarum pro Augustino* ²⁾, *Pro Augustino responsiones ad excerpta, quae de Genuensi civitate sunt missa* ³⁾, et *De gratia et libero arbitrio liber contra Collatorem* ⁴⁾; atque Coelestinus P. *Epist. de gratia Christi* ⁵⁾. Huc referri quoque possunt Fulgentii Ruspensis *Libri III ad Monimum* ⁶⁾, *Libri III ad Joannem et Venerium* ⁷⁾, et praesertim *De Incarnatione et gratia Domini nostri Jesu Christi ad Petrum Diaconum aliosque* ⁸⁾; Fausti Rhegiensis *Epist. ad Lucidum Presbyterum*, et *De gratia Dei et humanae mentis libero arbitrio libri II* ⁹⁾; praeter alia ¹⁰⁾.

Praedestinationarum errorem vero impugnarunt: Anonymus in libris tribus, qui inscribuntur *Praedestinatus, seu Praedestinationum haeresis et libri S. Augustino temere adscripti refutatio* ¹¹⁾; Rabanus Maurus in *Epist. de praedestinatione adv. Godescalcum* ¹²⁾; Hincmarus, Archiepiscopus Rhemensis, in *Libro de Praedestinatione Dei et libero arbitrio* ¹³⁾; Pardulus, Laudunensis Episcopus, in *Epist. ad Amolonem*; Amolo, Episcopus Lugdunensis, in *Libro sentent. Augustini de praedestinatione et libero arbitrio*, nec non in *Epist. ad Godescalcum*; et Joannes Erigena in *Libro de divina praedestinatione contra Godescalcum*, qui tamen omnino ab erroribus haud est vacuus ¹⁴⁾.

Ad opera illa, in quibus ab antiquis Scriptoribus, quamvis non ejusmodi, quibus nunc utimur, systemata theologica exhibentur, tamen plura dogmata artificiosa quadam methodo exponuntur, seu *Compendia theologiae* pertinent: Origenis *Libri IV de principiis* ¹⁵⁾.

¹⁾ Ib. c. 198—208.

²⁾ Ib. c. 207—214.

³⁾ Ib. c. 213—222.

⁴⁾ Ib. c. 171—198. Cf. Prosperi *Carmen de Ingratis*. Ib. 67—69.

⁵⁾ Ib. c. 131—134.

⁶⁾ Opp. p. 1—51.

⁷⁾ Ep. 15. Ib. p. 269—276.

⁸⁾ Ib. p. 286—323.

⁹⁾ In Biblioth. max. PP. Lugdun. T. 8. p. 524—545.

¹⁰⁾ Cf. Opp. Augustin. T. 10. Append.

¹¹⁾ In Galland. Biblioth. PP. T. 10. p. 363—399.

¹²⁾ Opp. T. 2. p. 1289.

¹³⁾ Opp. ed. Sirmond. Par. 1643.

¹⁴⁾ Gilb. Maguin. Vett. Auctt. qui saec. IX. de praedestin. et grat. scripserunt, Opp. et fragmen. Par. 1650.

¹⁵⁾ Opp. T. 1. p. 42—195.

Agit auctor in hoc opere primum de SS. Trinitate, deinde de creatione mundi et ejus gubernatione per Deum unum veteris et novi Testamenti, tum de Incarnatione Jesu Christi et de Spiritu S., qui idem tam in Moyse et Prophetis, quam in Apostolis locutus sit; porro de anima, resurrectione, poenis et praemiis aeternis; de libero arbitrio, diabolo adversante, mundo corruptioni obnoxio, ejusque consummatione; postremo de S. Scriptura, ejusque divina auctoritate et legendi ratione. Ex quibus facile cognoscitur, ab Origene nonnisi hic systema valde imperfectum proponi. Insuper auctor genio suo nimium indulgens, dum doctrinam Christianam philosophiae principiis adcommodare studebat, pluribus sese irretivit erroribus. — Cyrilli Hierosolymitani *Catecheses XVIII ad Illuminandos*, seu Catechumenos ¹⁾, in quibus primum de peccato, deinde de Baptismo disseritur, tum praecipua fidei capita atque omnes articuli Symboli Hierosolymitani exponuntur. — Augustini *Enchiridion ad Laurentium, seu De fide, spe et charitate*. Cujus libri in prima et maxima parte Augustinus, quae credenda sint, docet, servato Symboli ordine, ac varias haereses Manichaeorum, Apollinaristarum, Priscillianistarum, Arianorum, praecipueque Pelagianorum, tacito eorum nomine, passim refellit; secundam partem de iis, quae ad spem pertinent, in dominicae orationis expositione quam brevissima impendit; tertiam postremo, nec eam prolixam adjungit de Charitate. Huc quodammodo etiam referri possunt ejusdem *Libri IV de fide Christiana* ²⁾, licet scopus eorundem potius exegeticus seu hermeneuticus sit. Ordinem, quo hic S. Pater divinam exponit doctrinam, sequitur deinde Petrus Lombardus in suis *Sententiarum* libris. — Gennadii Massiliensis, *De ecclesiasticis dogmatibus* ³⁾, quo dogmata Ecclesiae adversus haereticos stabilita recensentur, nullo tamen nexu colligata, quemadmodum systematis justae efflagitat ratio. — Junilii Africani, *De partibus divinae legis libri duo* ⁴⁾, quorum primus de S. Scriptura, alter de doctrina divina agit. Haecce dividitur in doctrinam de Deo, de mundo praesenti, et de mundo futuro. — Fulgentii Ruspensis, *De fide, seu de regula verae fidei* ⁵⁾. In quo opere

¹⁾ Opp. p. 1—302.

²⁾ Opp. T. 3. P. 1. c. 1—92.

³⁾ Ib. T. 8. Append. c. 75—80.

⁴⁾ In Galland. Biblioth. PP. T. 12, p. 79—92.

⁵⁾ Opp. p. 500—533.

Fulgentius primum tractat doctrinam de SS. Trinitate et Incarnationis mysterio; deinde transit ad creaturas, quas in corpora dispescit et spiritus; tum agit de statu primi hominis et peccato originali, atque de iudicio et resurrectione; porro de fide, baptismo, gratia ac praedestinatione; atque tandem loquitur de Ecclesia et reprobis, qui aut extra Ecclesiam existant, aut malam vitam ducunt. — Isidori Hispalensis *Sententiarum, seu De summo bono libri III* ¹⁾, quorum primo de doctrina fidei, secundo ac tertio de praeceptis moralibus agitur, ita tamen, ut et his per multa de gratia, praedestinatione, peccato originali ex scriptis Augustini, Gregorii M. aliorumque immixta legantur. — In Ecclesia orientali Leonti Cyprii *Loci communes*, anthologia quasi dogmatica e graecis Patribus. — Praecipue vero hic commemoranda est Joannis Damasceni *ἑκδοσις ἀκριβῆς τῆς ὀρθοδόξου πίστεως*, *De fide orthodoxa, seu adcurrata fidei Catholicae expositio* ²⁾. Quod opus praestantissimum sine dubio primum systematis nomen meretur, licet in eo doctrina de gratia iustificante et Sacramentis frustra quaeratur. Joanni Damasceno, qui saeculo VIII. floruit, Graeci adhaeserunt etiam saeculis sequentibus, Latini autem potius Augustinum sunt secuti, quamvis etiam in Ecclesia occidentali Joannes Damascenus sectatores nactus est ³⁾.

§. 8. Continuatio.

Periodus secunda. Medium aevum, a saeculo XI. usque ad dimidium saeculi XV. — Inde a saeculo XI. Theologia dogmatica novam faciem induere coepit. Jam prioribus quidem saeculis in Ecclesia viri exstiterunt, qui philosophiae Aristotelicae studium suum dicarunt. Quapropter saeculo VI. jam Philoponus libros Aristotelicos insigni illustravit commentario, et Boëthius sermoni latio reddidit. Inde a saeculo VII. autem, quum ab Arabibus religio Christiana peripateticis rationibus impugnaretur et in risum verteretur, Theologi Christiani coacti erant, philosophiae illius formulas sibi familiares reddere, iisque uti in disputationibus suis atque scriptis theologicis. Usus tamen, quem usque ad saeculum XI. philosophiae et dialecticae Aristotelicae fecerunt Scriptores Christiani, ad expositionem ac defensionem singularum senten-

¹⁾ Opp. p. 414—485.

²⁾ Opp. T. I. p. 118—304.

³⁾ Cf. Permaneder. Biblioth. patr. Landsh. 1841. T. I. p. 154—157. 242—296.

tiarum revelatarum restrictus erat; ab hoc autem saeculo ad omnem fidei doctrinam extensus est. Prout enim Patres certatim taxat fidei mysteria, ab adversariis videlicet impugnata, philosophice explicarunt, ita modo Theologi scholastici id ipsum in expositione omnium dogmatum praestare, simulque ea apte disponere et inter se colligare adlaborarunt, ut systema vere scientificum Theologiae conficerent. Licet autem Scholastici philosophiam cum Theologia conflassent: Theologia tamen ipsa per omnia regina mansit, philosophia vero ancillae munus subibat, utpote cujus placita revelationi, veritati absolutae, prorsus subsint, et quae non nisi ideo in Theologiae subsidium vocetur, ut haec per illam ad scientiam evehatur. Quapropter omnes Theologi scholastici, tametsi intelligentiam maximi habent, imo negligentiae eos accusant, qui postquam in fide confirmati sunt, non studeant, quod credunt, intelligere ¹⁾, tamen ubique fidem pro fundamento philosophicae investigationis ponunt, atque illam ab hac prorsus non pendere affirmant. *Neque enim quaero, ait Anselmus, intelligere, ut credam; sed credo, ut intelligam* ²⁾. Et iterum: *Nullus Christianus debet disputare, quomodo, quod Catholica Ecclesia corde credit, et ore confitetur, non sit; sed semper eandem fidem indubitanter tenendo, amando et secundum illam vivendo, humiliter, quantum potest, quaerere rationem, quomodo sit. Si potest intelligere, Deo gratias agat: si non potest, non immittat cornua ad ventilandum; sed submittat caput ad venerandum. — Palam namque est, quia illi non habent fidei firmitatem, qui, quoniam, quod credunt, intelligere non possunt, disputant contra ejusdem fidei a sanctis Patribus confirmatam veritatem, velut si vespertilioes et noctuae non nisi in nocte coelum videntes, de meridianis solis radiis disceptent contra aquilas solem ipsum irreverberato visu intuentes. Prius ergo fide mundandum est cor, — et prius per praeceptorum Domini custodiam illuminandi sunt oculi, — et prius per humilem obedientiam testimoniorum Dei debemus fieri parvuli, ut discamus sapientiam* ³⁾. Potius fidem causam et conditionem scientiae esse adstruunt. Nimirum hoc ipsum, inquit idem Anselmus, quod dico, qui non crediderit, non intelliget. Nam qui non crediderit, non experietur, et qui expertus non fuerit, non intelliget. Nam quantum rei auditum superat experientia, tantum vincit audi-

¹⁾ Cf. Anselm. Cur Deus homo? c. 2. Opp. p. 75. et Bernard. De consid. l. 5. c. 3. Opp. T. 2. c. 452 s.

²⁾ Proslog. c. 1. Opp. p. 30. c. 2.

³⁾ De fid. Trinit. c. 2. Opp. p. 42.

entis cognitionem experientis scientia: et non solum ad intelligendum altiora prohibetur mens ascendere sine fide et mandatorum Dei obedientia; sed etiam aliquando datus intellectus subtrahitur, et ipsa fides subvertitur, neglecta bona conscientia ¹⁾). Solummodo pauci inter Scholasticos exstiterunt, qui scientiam fidei praeferentes, omnia, quae credantur, prius ratione discutienda esse, tenerent aut statuerent, et ideo etiam in varios errores lapsi sunt, uti Roscellinus, auctor nominalismi, seu sententiae, qua adstruebatur, notiones universales, uti sunt: genus, species, differentia, etc, non res vere existentes, sed mera esse nomina, et Abaelardus atque alii.

Quando autem Theologi scholastici docent, scientiam fidei superstruendam esse, eaque non nisi sustentari: de scientia, quam adpellamus internam seu speculativam, divinorum dogmatum loquuntur; nequaquam autem de scientia externa et historica sentiunt, quae cum fide saltem explicita semper conjuncta esse, eamque praecedere debet; quum potius diserte tradant, cognitiones illas, sine quibus nulla persuasio de divinae revelationis veritate, et eapropter etiam nulla prorsus rationabilis fides Christiana datur, tanquam praeambula ad fidem, hancce antecedere, atque antecedere debere. *Deum esse*, ait Thomas A., *et alia huiusmodi, quae per rationem naturalem nota possunt esse de Deo, ut dicitur Rom. 1. non sunt articuli fidei* (quamdiu scilicet ceu revalata non spectantur), *sed praeambula ad articulos. Sic enim fides praesupponit cognitionem naturalem, sicut gratia naturam, et ut perfectio perfectibile; nihil tamen prohibet illud, quod secundum se demonstrabile est, et scibile, ab aliquo accipi ut credibile, qui demonstrationem non capit* ²⁾). Sententia illa, quae statuit, omniconognitioni fidem, seu scientiam immediatam, quae tamen tantummodo sensio quaedam obscura esse potest, praecedere, Scholasticis, uti Patribus, est incognita. Qui hanc opinionem autem unicam vere Catholicam esse contendunt, oppositamque pantheismi insimulant, viderint, ne ipsi in luto pantheistico haereant, aut patronos fidei coecae ac irrationabilis agant.

Primus, qui philosophiam Aristotelicam Theologiae jungeret, erat Lanfrancus, Italus Papiensis, ex Abbate Cadomensi Archiepiscopus Cantuariensis, † 1088; parens autem Theologiae scholasticae jure censetur Anselmus, Augustae in Pedemontio na-

¹⁾ Ib.

²⁾ P. 1. q. 2. art. 2. ad. 1. Opp. ed. c. T. 20. p. 12.

tus, Lanfranci discipulus, postea Monachus et Scholasticus Becensis, atque tandem, postquam Abbas factus fuerat, pariter Archiepiscopus Cantuariensis, vir non minus vitae sanctitate, quam ingenio acerrimo et singulari doctrina celebris, qui non quidem universam fidei doctrinam, ast principales ejus partes philosophice pertractavit. Opera ejus potiora sunt: *Monologium*, in quo Dei existentia et attributa, nec non divina Trinitas philosophice demonstratur; *Proslogium*, in quo pro Dei existentia unicum argumentum, quod nullo alio indigeat, sic dictum ontologicum scilicet, exponitur, cui accedit *Liber contra insipientem*, qui est apologeticus Proslogii; *Libri duo contra Gentiles, cur Deus homo?* in quibus rationibus, e natura rei deductis, ostenditur, Filium Dei propterea hominem fieri debuisse, quia nonnisi hac conditione genus humanum a peccato liberari, Deoque satisfieri potuerit; *De conceptu virginali et de peccato originali liber*, in quo monstratur, cur Adami peccatum omnibus hominibus, infantibus quoque recens natis, insit, Christo autem inesse non potuerit; et *Tractatus de concordia praescientiae, et praedestinationis, nec non gratiae Dei cum libero arbitrio* ¹⁾. Post Anselmum scripserunt Hildebertus, Episcopus Cenomanensis, postea Turonensis, qui *Tractatus theologicos* composuit, et Robertus Pullus, qui *Sententiarum libros octo* conscripsit. At omnibus palmam praeripuit Petrus Lombardus, in agro Novarensi in Lombardia natus, Abaelardi, secundum alios Hugonis a. S. Victore discipulus, postea Theologiae in urbe Parisiensi Professor, et tandem ibidem Archiepiscopus, † a. 1164, vulgo Magister Sententiarum nuncupatus, a *Libris quatuor Sententiarum*, quas e scriptis SS. Patrum, praecipue S. Augustini, collegit, et methodo dialectica exposuit, ut, quemadmodum affirmat, orthodoxa ingenia acuerentur ad strenue revincendos haereticos, qui spinosis subtilibusque quaestionibus tunc Ecclesiam lacescebant. Quilibet quatuor librorum in multas breviores sectiones, quae distinctiones adpellantur, divisus est. In distinctionibus quaestiones ad materiam, quae tractatur, pertinentes moventur, rationes, ex rei natura, S. Scriptura, et praecipue scriptis SS. Patrum depromptae, in utramque partem proponuntur, contrariae sententiae inter se conciliantur, et secundum probatissimam, plerumque secundum S. Augustinum, deciduntur, aut etiam decisio iudicio lectoris relinquitur. Ordo autem materialium, quae per quatuor Sententiarum libros pertractantur,

¹⁾ Opp. p. 3—28. 29—36. 37—40. 74—96. 97—108. 122—134.

est sequens: In primo libro agitur de Deo, speciatim de Trinitate, et dein de scientia, providentia, praedestinatione, voluntate et potentia divina. In secundo, et quidem in parte prima de mundo rebusque creatis; in secunda de naturis intellectualibus, Angelis et hominibus; et in tertia de libero arbitrio et gratia divina, de virtutibus et vitiis. In tertio de redemptione. In quarto tandem de Sacramentis, de resurrectione caeterisque extremis. Quum itaque opus istud ex omnibus, quae hucusque in lucem prodierunt, maxime completum, optime dispositum, perspicuum, et doctrinae communiter susceptae consentaneum esset: summo applausu est exceptum, et in scholas introductum, commune Theologorum enchiridion, quod in suis publicis institutionibus sequebantur, evasit, nemoque in Theologia quidquam molitus est, qui Petrum Lombardum non esset interpretatus, ita ut, teste *Fleur y*, 244 numerari possint Theologi, qui eum commentariis illustraverint. Inter hos eminent: Alexander Halensis, Doctor irrefragabilis, cujus est *Summa universae theologiae, seu Commentarius in IV libros Sententiarum*; Albertus Magnus, *Commentarius in II. IV Sententiarum*; Thomas Aquinas, Doctor angelicus, *Comment. in libr. IV Lombardi*; Bonaventura, Doctor seraphicus, *Commentar. in IV libros Sententiarum*; Aegydius de Columna, Doctor fundatissimus, *Comment. in Magistri Sententias*; Joannes Duns Scotus, Doctor subtilis, *Comment. in libr. IV Sentent. P. Lombardi*; Raimundus Lullus, Doctor illuminatus, et magnus inventor artis universalis, *Comment. in P. Lombardi Sententias*; Guil. Durandus, Doctor resolutissimus, *Comment. in P. Lombardi Sententias*; Guil. Occamus, Doctor singularis, invincibilis, *Comment. in Lombardi Sententias*; praeter alios. Attamen viri hi alique non tantum commentarios in Sententias Lombardi scripserunt, sed et propria, quibus Theologiam explanarunt, exararunt opera, Summas, Compendia, Quodlibeta theologica, et alia ejus generis. Huc pertinent praeter alia: Alberti Magni *Compendium theologiae veritatis*, et *Summa Theologiae*; Thomae Aquinatis *Compendium Theologiae*, *Summa totius Theologiae*, *De veritate Catholicae fidei contra Gentiles*; Aegydii de Columna *Compendium Theologiae*; Joannis Duns Scoti *Quaestiones quodlibetales*; Henrici Gandaviensis *Summa theologiae*; Richardi de media villa *Octoginta quodlibeta Theologica*; Francisci Mayronii et Natalis *Quaestiones quodlibetales*; Guil. Occam *Quodlibeta*; Raymundi de Sabunde *Theologia naturalis*. In

ter quae omnia primum locum sibi vindicat *Summa* Thomae, quam plurimis commentariis illustrata, et in linguam graecam, arabicam et sinensem versa. Haec tribus constat partibus, quarum altera iterum in duas alias est divisa. Prima pars agit de Deo in se, et ad mundum relato; altera de Deo tanquam fine hominis ejusque actionum, quae nos cum ipso conjungunt, aut ab ipso separant, et quidem prima secundae de actibus humanis, peccatis et virtutibus generatim, atque secunda secundae, praemissa doctrina de justificatione, de iisdem speciatim; et tertia de Christo Redemptore, de Sacramentis, atque de resurrectione et iis, quae eam sequuntur.

Per methodum scholasticam ingenia ad cogitandum de rebus religiosis esse excitata, ad ordinate de iisdem disserendum instituta, notiones adcuratius definitas, veritates revelatas magis illustratas et explicatas, nova argumenta in medium prolata, aut jam nota majori vi instructa, inanitatemque quam plurimarum objectionum monstratam, inficias iri a nemine potest. Verumtamen methodus illa, quum omnes res humanae imperfectae sint et abusibus obnoxiae, malos quoque dedit effectus. Etenim primi Theologi scholastici et posteriores melioris notae quidem in exponendis divinis dogmatibus minime soli rationi acquiescebant, sed ubique ad effata S. Scripturae atque Traditionis divinae testimonia provocabant, porro nunquam pia animi sensa excitare atque doctrinam ad vitam et omnem agendi rationem adplicare omiserunt, atque quaestionum numerum intra justos limites restrinxerunt, aut eos saltem non multum excesserunt. Ast progressu temporis a plerisque, neglectis SS. Litteris et fontibus Traditionis, sola adhibita sunt ratiocinia et disquisitiones philosophicae, excitatio piorum sensuum ac consiliorum intermissa, atque quaestiones inutiles, curiosae ac spinosae propositae, ad quas solvendas innumerae distinctiones, eaeque subtilissimae sunt excogitatae, novaeque vocabula ac novae loquendi formulae introductae, quibus lingua latina, in scholis usitata, magnam contraxit barbariem. Quapropter statim initio viri exstiterunt, qui scholasticam Theologiam tractandi rationem improbarent, quique fidei doctrinam, quam exponebant, e fontibus revelationis, S. Scriptura et Traditione, potius haurire malebant, Theologi positivi ideo cognominati; licet, quum novitas omnis placeat, Theologia scholastica juvenibus magis adrideret, et brevi omnes ad se traheret discipulos, ita ut, quemadmodum recens natae scholasticae crevit studium atque cultus, ita sensim decreverit apud plerosque

amor veteris instituti. Nunquam tamen deerant viri, qui naevos, quos methodus scholastica praecipue ob neglectum S. Scripturae, SS. Patrum atque Synodorum studium annexos habebat, impugnarent, aut illam in melius emendatam vellent.

Penes Theologiam scholasticam tamen continuo una Theologia mystica colebatur, per quam, quod illi deerat, supplebatur, et quod justo plus excedebat, temperabatur. Prout enim Theologia scholastica potentiam animae cognitivam, ut Gersonius illam adpellat, occupabat, atque ratiocinando cognitionem rerum divinarum promovebat, mentem autem variis suis quaestionibus ac distinctionibus distrahebat et inquietabat: ita Theologia mystica potentiam affectivam exercebat, animum, Deum in se suisque operibus considerando, affectus pios excitando, ac virtutes exercendo, ad conjunctionem cum Deo per charitatem perfectam rerumque mundanarum renuntiationem evehebat, mentemque in summo honore, uno necessario, figebat atque confirmabat. Inter Theologos mysticos huius periodi primus jure Bernardus, Doctor mellifluus, censetur († 1153), ex cujus operibus potiora sunt: *Libri V de consideratione, ad Eugenium III, De conversione, Tractatus de diligendo Deo, Sermones sacri*, inter quos eminent 86 in tria priora capita Cantici Canticorum ¹⁾. Alii Scriptores mystici sunt: Hugo a S. Victore; Richardus a S. Victore; Rupertus Tuitiensis; Albertus Magnus; Thomas Aquinas; Bonaventura, *Itinerarium mentis ad Deum, Opus contemplationis, Mystica Theologia*; Adamus Scotus, *Tractatus de triplici genere contemplationis, Soliloquia de instructione animae*; Guilielmus, Monachus Claravallensis, qui reliquit *Librum meditationum de natura et dignitate amoris divini*, et *Librum de contemplando Deo*; Humbertus de Romanis, a quo sunt: *Speculum religiosorum, seu Institutionum spiritualium libri sex*, et *Epistola de tribus votis substantialibus religionis*; Gersonius, Doctor christianissimus, *De mystica Theologia practica, Considerationes de mystica Theologia speculativa*, et alia ²⁾; Henricus Harphius, *De Theologia mystica, Speculum aureum in praecepta decalogi, Speculum perfectionis, Collationes tres de perfectione vilae*; Dionysius Carhusianus; Joannes Tauler, cujus scripta germanice composita sunt: *Imitatio*

¹⁾ Opp. T. 2. c. 413—461. 483—502. 590—608. T. 3—4. p. 723—1570.

²⁾ Opp. ed. Antv. 1706. T. 3. c. 361 ss. .

*pauperis vitae Christi, Considerationes spirituales de vita et passione Christi, Medulla animae, seu de perfectione omnium virtutum, De decem coecitatibus et quatuordecim radicibus divini amoris, De novem rupibus sive gradibus Christianae perfectionis, Institutiones divinae ad unionem cum Deo per spirituales exercitationes virtutesque, et alia; Henricus Amandus Suso, Constantiensis, Ordinis Praedicatorum, Horologium divinae sapientiae, Tractatus de septem rupibus, Centum meditationes de passione Domini; Joannes Ruysbroek, Summa totius vitae spiritualis, Tractatus de septem custodiis, Tr. de septem gradibus amoris, Speculum salutis aeternae, Tr. de vera contemplatione; Bernardinus Senensis, De aspirationibus quotidianis ad Deum, De triplici statu animae, De triplici amore Magorum, De triplici Christi Domini nativitate, De tribus tormentis peccatorum, De mundana prosperitate, De pugna spirituali, De amore Dei; Laurentius Iustinianus, De disciplina et spirituali perfectione, De casto connubio Verbi et animae, De interiori conflictu, De vita solitaria, De contentu mundi, De spirituali interitu animae, et de animae resurrectione spirituali, De gradibus perfectionis; Thomas Haemmerken, a loco natali communiter a Kempis dictus, qui maxime inclauit libello *De imitatione Christi*, qui quantum plerorumque Christianorum animo congruat, ejusdem in omnes Europaeas et nonnullas Asiaticas linguas translationes, et iteratae usque ad recentissima tempora editiones testantur.*

Caeterum non cogitandum est, ac si medio aevo Theologi in excolenda disciplina per adversarios religionis Catholicae, cujus defensionem suscipere contra illos cogeantur, retardati non fuerint. Ad antiquos enim Christiani nominis hostes, Gentiles, Judaeos et Muhamedanos, atque haereticos antiquos, accesserunt haeretici recens exorti, uti Pauliciani, Priscillianistae, Bogomili, Petrobrusiani, Cathari, Albigenses, Waldenses, Wicleffitae, Hussitae, et alii. Verum contra Gentiles nonnisi paucissima sunt exarata opera, pauciora etiam contra Judaeos et Muhamedanos, frequentiora tamen contra haereticos. Argumenta, quibus pugnabatur, pro diversitate adversariorum, partim e ratione seu philosophia, partim e S. Scriptura et Traditione depromebantur. Caeterum inter Polemicos alii opera sua contra omnes rei Catholicae hostes, aut saltem plures direxerunt, alii vero contra unum vel paucos affines scripserunt. Ad priores pertinent: Euthymius Zigabenus, cujus est *Armarium dogmaticum orthodoxae fidei*, in viginti quatuor classes divisum, et Nicetas Acominatus,

qui *Thesaurum orthodoxiae* composuit, ex Graecis; e Latinis vero: Honorius, Ecclesiae Augustodunensis Scholasticus, *De haeresibus*; Alanus ab Insulis, *De fide Catholica contra Waldenses, Catharos, Judaeos et Muhamedanos*; Raymundus Martini, *Pugio fidei adversus Judaeos et Mauros*; Marsilius Ficinus, *De religione Christiana et fidei pietate*; Hieronymus Savonarola, *Triumphus crucis*; Alphonsus de Spina, *Fortalitium contra Judaeos, Saracenos, aliosque Christianae fidei inimicos*; Alvarus Pelagius, *Collyrium adversus haereses*; Guido de Perpiniano, *Summa de haeresibus omnibus et earum confutationibus*. Ad posteriores vero, et quidem contra infideles: Thomas Aquinas, *Contra Gentiles*; Petrus Mauritius, Abbas Cluniacensis, *Adversus nefandam sectam Saracenorum*, et *Tractatus adversus inveteratam Judaeorum duritiam*; Joannes de Turrecremata, *Stabilimentum fidei Catholicae*, et *Tr. contra principales Muhamedanorum errores*; Dionysius de Rykel, *Contra Alcoranum*; Joannes Cantacuzenus, *Apologia, seu quatuor assertiones pro fide Christiana adv. Saracenos et Alcoranum*; Nicolaus Cusanus, *Cribrationum Alcorani libri III*; Guibertus, Abbas Nogentiniensis infra Cuciacum, *Tractatus de Incarnatione contra Judaeos*; Rupertus Tuitiensis, *Annulus, seu Dialogus Christiani et Judaei de fidei sacramentis libri tres*; Petrus Blesensis, Vicecancellarius Regis Angliae, postea Archiepiscopus Cantuariensis, *Contra perfidiam Judaeorum*; Nicolaus Lyranus, *De Incarnatione Verbi adversus Judaeos*, et *Contra Judaeum quemdam*; Petrus Niger, *Contra perfidos Judaeos de conditione veri Messiae*; Victor de Carben, *Propugnaculum fidei Christianae*. Contra haereticos: Petrus Mauritius, *Tractatus adversus Petrobrusianos*; Eckbertus, Abbas Schoenaugiensis, *Sermones XIII adversus haereses Catharorum*; Yvenotus, *De haeresi pauperum de Lugduno*; Moneta Cremonensis, *Libri V adversus Catharos et Waldenses*; Rainerus Sacco, *Summa de Catharis et Leonistis*; Lucas, Episcopus Tudensis, *De altera vita fideique controversiis adversus Albigenisium errores libri tres*. Thomas de Bradwardino, Doctor profundus, *De causa Dei contra Pelagium, et de veritate causarum libri tres*, ex nimio tamen fervore in oppositos errores Praedestinatorum lapsus; Petrus de Pilichdorf, *Obviaciones S. Scripturae contra errores Waldensium*, *Liber contra pauperes de Lugduno*; Gersonius, *Tractatus contra haeresin de communione laicorum*

sub utraque specie, *Tractatus contra sectam Flagellantium*; Aeneas Sylvius, *Tractatus de communione sub utraque specie contra Bohemos et Taboritas*; Thomas Netter, a loco natali Waldensis dictus, *Doctrinale antiquitatum fidei Ecclesiae Catholicae adversus Wicleffitas et Hussitas*, et *Fasciculus xizaniorum Wicleffi*. Contra Schismaticos: Anselmus, Episcopus Havelbergensis, *Dialogorum adversus Graecos libri tres*; Thomas Aquinas, *Opusculum contra errores Graecorum*; Nicetas, Episcopus Thessalonicensis, *Libri VI dialogorum de processione Spiritus S.*; Nicephorus Blemmidas, Monachus in Macedonia, eruditione et pietate inter Graecos celeberrimus, *Orationes duae de processione Spiritus S.*; atque ex ipsis Graecis: Joannes Calecas, Barlaamus, Bessarion, post suum ad Latinos transitum Cardinalis factus, Joannes Argyropolus, et Georgius Trapezuntinus, Nicolao V. ab epistolis.

§. 9. Conclusio.

Periodus tertia. A dimidio saeculi XV. usque ad nostra tempora. — Studium litteraturae antiquae per Graecos fugitivos, imperio orientali a Turcis occupato, in Italia et inde etiam per alias Occidentis partes latius propagatum, non poterat non in disciplinas theologicas generatum, et Theologiam dogmaticam speciatim vim suam benignam aequae ac nocivae exserere. Amore enim litterarum elegantiorum excitato effectum est, ut studium linguae graecae, latinae et hebraicae revivisceret, artes in genuae efflorescerent, studiumque litteraturae Christianae, S. Scripturae scilicet et scriptorum SS. Patrum, impensius coleretur. Meliori itaque litterarum gustu tali ratione enato, necessario methodus scholastica sua vitiosa haud raro subtilitate, ac corrupta et inculta dictione multis displicere coepit. Quapropter surrexerunt plures viri, qui pertractatis singulis materiis, quomodo Theologia scholastica emendaretur, exemplo ostendere conati sunt, et alii iterum, qui viam hucusque tritam deserere monuerunt, melioremque methodum Theologiam tradendi, ut Melchior Canus in opere *De locis Theologicis*, multa eruditione, arte et elegantia conscripto, exhibuerunt. Neque negari potest, Theologiam revera ad meliorem frugem converti coepisse. Pauciora quidem sunt exarata opera, in quibus praecipuae partes propriis religionis fontibus, S. Scripturae et Traditioni delatae fuissent; atque pristina methodus omnia ex placitis philosophiae Aristotelicae demonstrandi, quaestiones quam plurimas in utramque

partem ventilandi, atque subtilissimas distinctiones adhibendi, etiam nunc dominans mansit: nihilominus tamen Theologia praesens illâ, quae prioribus saeculis vixit, multo praestantior fuit eo, quod majori eruditione instructa esset, S. Scripturam et Traditionem plus respiceret, atque a quaestionibus inutilibus et spinosis, a subtilitatibus ac distinctionibus sibi magis temperaret, et puriori sermone uteretur. Haec autem feliciter coepta brevi per religionis dissidia, saeculo XVI. ineunte orta, interrupta sunt. Studiis enim antiquae litteraturae multorum animi non tantum amorem litterarum elegantiorum, sed et spiritum, quo scripta Graecorum atque Romanorum exarata sunt, imbiberunt, omnia subjectivae sententiae deferentem, atque superbiam mentis voluptatumque sensualium cupidinem excitantem ac nutrientem. Hinc illa, quae, antiqua litteratura restaurata, se prodebat, atque in dies magis magisque crevit, animorum ab objectiva veritate et aliena auctoritate abalienatio, quae initio in pugnam adversus Ecclesiam in protestantismo erupit, deinde in proelium contra revelationem supernaturalem in naturalismo ac rationalismo abiit, atque tandem in bello contra ipsum Deum personalem, a mundo diversum, in pantheismo ac materialismo desiit. Tali autem ratione multi Theologi, ad veritatem Catholicam contra adversariorum insultus defendendam coacti, ab excolenda disciplina nostra detinebantur, et qui eidem operam dabant, in ea ex illa parte, ex qua doctrina divina impugnabatur, expolienda omne studium collocabant. Inde effectum est, ut, licet initio hujus periodi in tradenda Theologia methodus scholastica dominaretur, haec pedetentim positivae cederet, et quidem ita, ut philosophica dogmatum pertractatio omnino negligereetur. Nam quum adversarii continuo Ecclesiae Catholicae objicerent, eam a sua primitiva integritate defecisse, ejusque doctrinam a genuina S. Scripturae atque antiquae Ecclesiae doctrina disparem esse: Theologi, ut aditus dubio in discipulorum animos praeccluderetur, prae omnibus operam navare debebant, ut doctrinam Ecclesiae cum S. Scriptura et prima Ecclesiae Traditione revera consentientem esse ostenderent. Philosophicam autem doctrinae divinae tractationem eo facilius omittebant, quoniam haec partim apud adversarios male audiebat, partim quia philosophia, ex quo tanquam singularis disciplina coli coeperat, sese Theologiae inimicam monstrabat; unde factum est, ut illa ultimo hujus periodi saeculo e scholis prorsus exularet, donec tandem nostris diebus iterum revixerit. Caeterum innumera fere opera labente hac periodo sunt exarata, tum do-

gmatica, tum polemica, seu apologetica. Hic loci potiora tantum ex iisdem commemorari possunt. Prioris generis sunt: Thomas de Vio, Cardinalis Cajetanus, *Commentar. in Summam S. Thomae*; Franciscus de Victoria, *Comment. in 4 libros Sententiarum*; Dominicus a Soto, *Comment. in 4 libros Sententiarum*, et *De natura et gratia*; Petrus a Soto, *Institutionum Christianarum libri tres*; Canisius, *Summa doctrinae Christianae*; Jodocus Coecius, *Thesaurus theologicus*; Gabriel Vasquez, *Commentar. in Summam Thomae Aquinatis*; Franciscus Suarez, *Comment. et disputat. in Summam S. Thomae*; Martinus Becanus, *Theologia scholastica, in tres partes divisa*; Adamus Tanner, *Theologia scholastica*; Dionysius Petavius, vir magni ingenii et summae eruditionis, *De theologicis dogmatibus*, Antverp. 1700, ed. noviss. Venet. 1757, opus, quod sibi par non habet, ad finem tamen non perductum; Reddingius, *Theologia scholastica*, 1667; Haunoldus, *Theologia speculativa*, 1670; Ludovicus Thomassinus, *Dogmata theologica*, 1680—1689; C. Schrenk, *Theologia dogmatico scholastica*, 1696—1702; Guilielmus Estius, *Summa theologiae*, et *Comment. in libros quatuor Sententiarum*; Vincentius Contenson, *Theologia mentis et cordis*, Col. Agripp. 1722; Joannes Du Hamel, *Theologia speculativa et practica, juxta SS. Patrum dogmata pertractata, et ad usum scholae adcommodata*, Par. 1691, Venet. 1734; Natalis Alexander, *Theologia dogmatica et moralis*, Par. 1693; Nic. L. Hermenier, *Summa theologiae, ad usum scholae adcommodata*, Par. 1701; Jos. M. de Thomasiis, *Institutiones Theologiae antiquorum Patrum*, Rom. 1709; Casparus Ivenin, *Institutiones Theologiae*, Lugd. 1696, Par. 1700, Lugd. 1704, Venet. 1710, et *Comment. historico dogmat. de Sacramentis*, Lugd. 1717; Joan. Obstraet, *Institutiones theologicae*, Leod. 1710; Ant. Boucat, *Theologia Patrum schol. dogmatica*, Par. 1718; Ulloa, *Theologia scholastica*, 1719; P. Gabr. Antoine, *Theologia universa speculativa et dogmatica*, Par. 1713; Honor. Tournelius, *Cursus theologicus scholastico dogmaticus et moralis*, Par. 1726; Eus. Amort, *Theologia ecclectica*, Aug. Vin. del. 1752; Ren. Billuart, *Summa S. Thomae hodiernis academiarum moribus accomodata, sive Cursus theologiae universalis juxta mentem, et in quantum licuit, juxta ordinem et litteram D. Thomae*, Leod. et Wirceb. 1745—1767; Vinc. Lud. Gotti, *Theologia scholastico — dogmatica*, Ven. 1750; J. Laur. Berti, *Theologia historico — dogmatico — scholastica*, Rom. 1739; Anto-

nus Genuensis, *Elementa universae Theologiae Christianae*, Ven. 1771; Petrus Collet, *Institutiones Theologiae scholasticae, sive Theologia speculativa*, Lugd. 1768; Mart. Gerbert. *Principia Theolog. dogmaticae*, ad S. Blas. 1758, *Principia Theol. symbolicae*, 1758, *Principia Theol. scholasticae*, 1758; C. Witasse *Tractatus theolog. de attributis div., Trinitate, Incarnatione, Eucharistia, Poenitentia, Ordine*, cum reliquis tractatibus ab anonymo auctore additis; Kilber, *Theologia dogmatico — polemico — scholastica*; Thom. ex Charmes, *Theologia universa*, Aug. Vind. 1780; Lud. Habert, *Theologia dogmatica et moralis*, Aug. Vind. 1771; Petr. M. Gazzaniga, *Praelectiones de Deo, etc.* Vindob. 1780, *Theolog. dogm. in systema contracta*, Vindob. 1789, *Praelectiones Theol. universae*, Ven. 1794; Aug. Gervasius, *Praelectiones Theolog. dogm. de Incarnatione, de legibus et peccatis, de Sacramentis in gen. et in specie*, Vindob. 1763—1766; Claes, *Principia Theol. dogm.* 1781; Cuer, *Theolog. dogm. et moral.* 1792; Concinna, *Theolog. Christ. dogm. moral.* 1769; Lory, *Institut. theolog. dogmat.* 1784—86; Dom. Schramm, *Compendium Theologiae scholasticae dogmaticae et moralis, methodo scientifica propositae*; Herm. Schollinger, *Praelectiones theologicae*, Aug. Vind. 1769; Jos. Widmann, *Institutiones universae Theologiae dogmatico — polemico — speculativae et moralis*, Aug. Vind. 1775; Jos. Bertieri, *Tractatus theol. de Incarnatione, Leg. et Sacram. in genere, Baptismo et Confirmatione*, Vind. 1771—1774, *Theologiae in systema redactae P. 2.* Vindob. 1778; Ben. Stättler, *Theologia Christiana theoretica*, Ingolst. 1776, Eustad. et Günzb. 1781, *Allgemeine katholisch-christliche Religionslehre*, Monach. 1793; Steph. Wiest, *Institutiones theologicae*, Ingolst. 1782, — *Institutiones dogmaticae*, Ingolst. 1791; Fr. Gmeiner *Theologia dogmatica in systema redacta et methodo scientifica propo-* — *sita*, Graec. 1785; Simp. Schwarzhueber, *Praktisch-katho-* — *lisches Religionshandbuch für nachdenkende Christen*, Salisb. 1785; — Bern. Bauer, *Theologia univ. dogmatica, historica, critica, genio* — *priori adcommodata*, Wirceb. 1786; Bailly, *Theologia dogm.* — *et moral.* 1815; Engelb. Klypfel, *Institutiones Theologiae do-* — *gmaticae*, Vindob. 1789; 4. ed. op. et st. Greg. Th. Ziegler, 1821; Ildeph. Schwarz, *Handbuch der christl. Religion*, Bamb. et Wirceb. 1797; Bern. Galura, *Die neueste Theologie des Christenthums, wie solches von Ewigkeit im Sinne Gottes war, und in der Zeit aus dem Munde Gottes gekommen ist*, Aug. Vind. 1800; Patr. Ben. Zimmer, *Theologia Christ. specialis et theoretica*,

Landish. 1802—6; J. Mich. Sailer, Grundlehren der Religion, als Leitfaden zu seinen Vorlesungen an die akademischen Jünglinge aus allen Facultäten, Monach. 1805; Marian. Dobmayer, *Systema Theologiae Catholicae*, Salzb. 1807—19; Georg. Fejér, *Institutiones Theologiae dogmaticae*, Vien. ed. 3. 1819—1820; Fried. Brenner, Construction der kathol. speculativen Theologie, Ratisb. 1837—38; Bonif. Schnappinger, *Doctrina dogmatum Ecclesiae Christiano-Catholicae ad usum academicum*, Aug. Vind. 1816; Ign. Thanner, Wissenschaftliche Aphorismen der kathol. Dogmatik, Salzb. 1816; Fr. L. B. Liebermann, *Institutiones theologicae*, ed. 3. Mogunt. 1831; Ad Jos. Onymus, Die Glaubenslehre der kathol. Kirche, praktisch vorgetragen, Salzb. 1820—23; Dan. Tobenz, *Institutiones Theologiae dogmaticae*, Vien. 1820; Geishüttner, Versuch einer wissenschaftlichen und populären Dogmatik, 1818; Lienhardt, *Institutiones Theologiae dogmaticae*, 1821; Goldwitzer, *Compendium Dogmaticae Christianae* 1824. Al. Waibel, Dogmatik der Religion Jesu Christi, Aug. Vind. 1831; Buchner *Summa Theolog. dogmat.* 1828—9; Georg. Hermes, Christkatholische Dogmatik, Monast. 1834; Henr. Klee, Katholische Dogmatik, Mogunt. 1835; Jos. Prúnyi, *Systema Theologiae dogm. christiano-Catholicae*, Vindob. 1842; Ign. Penka, *Praelectiones ex Theol. dogmatica*, Cracov. 1844; Fr. Bittner, *De civit. Dei comment.* Mogunt. 1845; J. Perrone, *Praelectiones theologicae*, Lovan. 1838—43, *Eaedem in compendium redactae*, Vien. 1846; Conr. Martin, Lehrbuch der kathol. Religion, Mogunt. 1848, ed. 3.; E. A. Staudenmaier, Die christliche Dogmatik, Frib. 1844; J. Kuhn, Katholische Dogmatik, Tubing. 1846; Fr. A. Scharpff, Handbuch der christlichen Religion, Gieß. 1848; Berlage, System der katholischen Dogmatik, Monast. 1848; Beyr, *Institutiones Theologiae dogmaticae*, Vienn. 1847; F. Dieringer, Lehrbuch der kathol. Dogmatik, Mogunt. 1847; Fr. Baader, Vorlesungen über speculative Dogmatik, Stuttgart, et Tubing. 1828; Ant. Günther, Vorschule zur speculativen Theologie des positiven Christenthums, 2. Aufl. Vien. 1846—1848, Süd- und Nordlichter am Horizonte speculativer Theologie, Vien. 1832, Thomas a Scrupulis, Vien. 1835. Die Juste — Milieus in der deutschen Philosophie gegenwärtiger Zeit, Vien. 1838, Ertheus und Heracles, Vien. 1843; J. Henr. Pabst, Der Mensch und seine Geschichte, 2. Aufl. Vien., Adam und Christus, Vien. 1835. — Inter Theologos polemos, praeter illos, qui hac periodo adhuc scripserunt contra Judaeos, ut Petr. Galatinus, et Josephus de Voisin,

atque contra Muhamedanos, ut J. Andreas, Alb. Widmanstadius, Lupus de Obregon, Lud. Maracius, et Abrah. Hinkelmann, notatu digniores sunt: Joannes Eck, qui praeter multa alia scripsit *Enchiridium locorum communium adversus Lutherum, et alios Ecclesiae hostes*; Joan. Cochlaeus (Dobnek), auctor plurimorum scriptorum polemicorum contra Lutherum et Melanchthonem, e quibus commemorari meretur *Septiceps Lutherus, ubique sibi suisque scriptis contrarius*; Ambrosius Catharinus, *Apologia pro veritate Catholicae et Apostolicae fidei adversus Lutheri dogmata*; Stanislaus Hosius, *Propugnatio verae Christianae-Catholicae fidei contra Joannem Brentium*; Fr. Feuardentius, *Theomachia Calvinistica, XVI libris profligata, et Septem dialogi, quibus 200 Calvinianorum errores refelluntur*; Greg. de Valentia, *De rebus fidei, hoc tempore controversis*; Fr. Coster, *Enchiridion praecipuarum controversiarum nostri temporis de religione*; Rob. Bellarminus, *Disputationes de controversiis Christianae fidei adversus hujus temporis haereticos*, Rom. 1581, opt. ed. Prag. 1720, quod opus vere classicum summam nominis celebritatem auctori merito conciliavit; Mart. Becanus, *Manuale controversiarum hujus temporis*, opus pariter insigne; Petr. Cotton, *Institutio Catholica, in qua fidei veritas comprobatur contra haereses et superstitiones hujus aevi, et praecipue Calvinii institutio religionis Christianae refutatur*; Bossuetus, *Historia variationum Ecclesiarum Protestanticarum in religionis materiis*; Arnaldus, *Fides perpetua Ecclesiae Catholicae circa Eucharistiam, Eversio doctrinae Jesu Christi moralis per errores Calvinistarum, justificationem concernentes*; Vit. Pichler, *Theologia polemica, in duas partes divisa*, Aug. Vind. 1719; C. Hanneberg, *Theologia controversa*, Posn. 1723; Sebastianus a S. Christophoro, *Theologia historico-polemica pro vindicanda contra haereticos, Protestantes praesertim, Romano-Catholicae Ecclesiae gloria*, Bamb. 1751; Neubauer, *Theologia dogmat. polem. scholast.* 1766; Ign. Tentscher, *Institutiones polemicae*, Prag. 1767; Adrianus et Petrus de Wallenburg, *Tractatus de controversiis generales*, 1768; Sardagna, *Theologia dogmatico-polemica*, 1770—71; Gazzaniga *Theologia polemica*, Vindob. 1779; Car. Schwarzel, *Praelectiones Theologiae polemicae*, Vindob. 1781; Renaudotius, *Perpetuitas fidei contra calumnias et falsitates libri inscripti: Monumenta authentica religionis Graecorum*, Par. 1708, *Perpetua fides Ecclesiae Catholicae respectu Eucharis-*

stiae, Par. 1711, *Perpetua fides Ecclesiae Catholicae circa Sacramenta et caetera puncta religionis ac disciplinae, quibus primi reformatores in praetextum secessionis suae usi sunt, comprobata per consensum Ecclesiarum orientalium*, Par. 1713; Gotti, *Colloquia theologico- polemica contra Calvinistas*, Bon. 1727; Jac. Scheffmacher, *Epistolae doctoris cujusdam ad nobilem quemdam Protestantem de sex obstaculis, quae habentur in religione Lutherana*, Argent. 1748; Fr. Seedorf, *Sendschreiben über die streitigen Glaubensfragen*, Mannh. 1748; Anonymus Gallus, *Triumphus fidei Catholicae de erroribus Protestantium*, Lugd. 1749; J. A. Moehler, *Symbolik oder Darstellung der dogmatischen Gegensätze der Katholiken und Protestanten nach ihren öffentlichen Bekenntnisschriften*, Mogunt. 1832, 1833, 1834, 1835, 1838, *Neue Untersuchungen der Lehrgegensätze zwischen den Katholiken und den Protestanten*, Mogunt. 1834, 1835; B. J. Hilgers, *Symb. Theologie, oder die Lehrgegensätze des Katholicismus und Protestantismus dargestellt und gewürdigt*, Bonn. 1841; J. Buchmann, *Populärsymbolik, oder Vergleichende Darstellung der Glaubenssätze zwischen Katholiken und Protestanten nach ihren Bekenntnisschriften*, Mogunt. 1844.

Pars prima.

De Deo.

(Θεολογία)

§. 1. Momentum.

Prima pars Theologiae dogmaticae, ex divisione supra facta, complectitur doctrinam de Deo, unde et Theologia κατ' ἐξοχὴν a Scriptoribus veteribus est appellata ¹⁾).

Nulla sane disciplinae nostrae est pars, cui majus pondus inesse possit, quam tractatui huicce. Etenim

1. Deus, de quo hic agitur, est ens summum, bonum absolutum, α et ω, principium rerum omnium et finis, a quo omnia pendent, et ad quem omnia tendunt. Hinc etiam cognitio Dei est omnium cognitionum prima ac nobilissima, omnium summe necessaria ac utilissima. Unde recte ait Propheta: *Non gloriatur sapiens in (de) sapientia sua, et non gloriatur fortis in fortitudine sua, et non gloriatur dives in divitiis suis: sed in hoc gloriatur, qui gloriatur, scire, et nosse me, quia ego sum Dominus, qui facio misericordiam, et iudicium, et justitiam in terra: haec enim placent mihi, ait Dominus* ²⁾).

2. Porro prout Deus ratio et causa est rerum omnium extra se existentium, ita cognitio Dei omnis religionis, omnis sapientiae, sanctitatis et verae felicitatis principium est atque fundamentum. Sine Dei cognitione omnis scientia nostra destituitur veritate, virtus puritate, robore ac constantia, animus vero solatio et tranquillitate. Quomodo enim de rebus divinis bene ac recte iudicabit, qui de Deo male senserit? Quomodo virtuti ac sancti-

¹⁾ Cf. *Introd. in Theol. univ.* p. 7.

²⁾ Jer. 9, 23 a.

tati studebit, qui Deum, summum Bonum atque Legislatorem sanctissimum, revereri ac diligere, in eo ceu Patre benignissimo fiduciam collocare, et illum tamquam Judicem omniscium ac iustissimum timere haud didicerit? Quomodo animi quietem servabit, atque spem futurae vitae fovebit, qui Deum, mundi Rectorem sapientissimum atque Remuneratorem clementissimum, ignoraverit? Male de Deo sentire, de ejus natura et attributis falsa fingere fons est vanissimae superstitionis, omnis pravitatis et summae infelicitatis; vera autem Dei cognitio intellectum illuminat, voluntatem roborat ac confirmat, et animum solatio ac quiete replet. Unde jam Seneca ait: *Bonus vir sine Deo nemo est* ¹⁾; et ante eum Sapiens: *Nosse enim te (Deus) consummata justitia (sapientia ac justitia) est: et scire justitiam (perfectionem), et virtutem (majestatem) tuam, radix est immortalitatis (omnis felicitatis)* ²⁾. Quapropter et

3. revelatio divina Deum cognoscendi necessitatem clare edisserit. Christus Dominus enim divinam cognitionem unicam viam ad vitam aeternam declarat verbis: *Haec est autem vita aeterna: Ut cognoscant te, solum Deum verum, et quem misisti Jesum Christum* ³⁾; et post eum Apostolus eandem conditionem esse tradit, sine qua Deo conjungi prorsus non possumus, scribens: *Sine fide autem impossibile est placere Deo. Credere enim oportet accedentem ad Deum, quia est, et inquirentibus se remunerator sit* ⁴⁾.

Omnes itaque operam institutionibus hisce impendamus, in quibus, ut verbis Lactantii utamur, *non de stillicidiis, aut aquis arcendis, aut de manu conserenda, sed de Deo loquimur*; — (a quo) *mundus factus est, ut nascamur: ideo nascimur, ut cognoscamus factorem mundi, ac nostri Deum: ideo agnoscimus, ut colamus: ideo colimus, ut immortalitatem pro mercede laborum capiamus. — Haec summa rerum est, hoc arcanum Dei, hoc mysterium mundi* ⁵⁾. Verumtamen una nos mundo abdicemus, atque puritati cordis imprimis studentes Deo vivamus, ut fructum ex-

¹⁾ *Epist.* 41. Opp. ed. Amstelod. 1672. T. 2. p. 142. Cf. *Ep.* 76. p. 298.

²⁾ Sap. 15, 3.

³⁾ Joan. 17, 3.

⁴⁾ Hebr. 13, 6.

⁵⁾ *Div. instit.* l. 1. c. 1. l. 7. c. 6. Opp. T. 1. p. 4. 534.

optatum ex instituto nostro reportemus. Etenim licet cognitio Dei vitae spiritualis origo sit atque fundamentum: ipsa neque clara, neque firma ac certa evadet, nisi confestim vita accesserit, nisi amor Dei ejusque sanctissimae legis pectus nostrum repleverit. Sicut enim nulla datur vera vita sine cognitione, ita nulla est vera cognitio sine vita. Quod Christus Dominus significat, ubi ait: *Beati mundo corde: quoniam ipsi Deum videbunt* ¹⁾. *Qui ex Deo est* (i. e. qui divino spiritu praeditus est et impellitur), *verbum Dei audit. Propterea vos non auditis, quia ex Deo non estis* ²⁾. *Si quis voluerit voluntatem ejus (Patris) facere: cognoscet de doctrina, utrum ex Deo sit, an ego a me ipso loquar* ³⁾. Atque Apostolus: *Qui novit Deum* (qui Deum diligit), *audit nos: qui non est ex Deo, non audit nos: in hoc cognoscimus spiritum veritatis, et spiritum erroris* (i. e. qui agantur spiritu veritatis, et qui spiritu erroris) ⁴⁾. Et: *Omnis qui diligit, ex Deo natus est, et cognoscit Deum* ⁵⁾.

§. 2. Divisio.

Si ideam Dei adcuratius consideramus: tria momenta ejusdem facile, utpote se nobis quasi sponte obtrudentia, discernimus, scilicet absolutam ejus existentiam, essentiam et vitam. Quapropter tractatum praesentem de Deo dividimus in tres sectiones, in quarum

1. agemus de Dei notione atque existentia; in
2. de Dei infinite perfecta essentia, seu de attributis divinis; atque in
3. de Dei absolute perfecta vita, seu de Deo triuno.

¹⁾ Matth. 5, 8.

²⁾ Joan. 8, 47. Cf. 5, 40.

³⁾ Joan. 7, 17.

⁴⁾ Joan. 4, 6.

⁵⁾ 1. Joan. 4, 7.

SECTIO I.

De Dei notione atque existentia.

§. 3. Notio Dei.

Quemadmodum facillimum est Deum invenire, ita dicere quid ille sit, difficillimum. *Ecce Deus*, ait S. Scriptura, *magnus, vincens scientiam nostram*¹⁾. Lactantius: *Cujus* (Dei parentis nostri dominique) *nec virtus aestimari potest, nec magnitudo perspicui, nec principium comprehendere. Cum ad illum mentis humanae intentio et acumen et memoria pervenerit, quasi subductis et consumatis omnibus viis, subsistit, haeret, deficit; nec est aliquid ulterius, quo progredi possit*²⁾. Et Augustinus: *Quaeris, quid sit* (Deus)? *Quod oculus non vidit, nec auris audivit, nec in cor hominis ascendit. Quid quaeris, ut ascendat in linguam, quod in cor non ascendit*³⁾. Atque rursus, *Facilius dicimus, quid non sit* (Deus), *quam quid sit*⁴⁾. Verum quamvis neque cogitatione comprehendere, neque verbis exprimere valeamus supremi Numinis naturam ac majestatem: sufficientem tamen Dei notionem mente concipere valemus, eum necessario ens, vel potius spiritum perfectissimum a se, totius mundi Creatorem ac Conservatorem omnipotentem et Moderatorem sanctissimum ac sapientissimum cogitantes.

Haec est autem ea ipsa notio, quam nobis de Deo revelatio divina subministrat; quod facili negotio tum ex SS. Litteris, tum ex Traditione demonstrari potest.

Nam 1. Deum esse spiritum,

a) docent SS. Litterae tam A. quam N. T., quum eum

α) expresse spiritum adpellant. *Spiritus Dei ferebatur super aquas*⁵⁾, voluntate sua et omnipotentia molem indige-

¹⁾ Job. 36, 26.

²⁾ *Dir. Instit. l. 1. c. 7. Opp. T. 1. p. 32.*

³⁾ *Enarr. in Ps. 85. n. 12. Opp. T. 4. c. 909.*

⁴⁾ *Ib.*

⁵⁾ Gen. 1, 2.

stam secernens, evolvens ac vivificans. *Spiritus Dei fecit me, et spiraculum Omnipotentis vivificavit me* ¹⁾. *Spiritus est Deus, et eos, qui adorant eum, in spiritu et veritate oportet adorare* ²⁾. *Genus ergo cum simus Dei, non debemus aestimare auro et argento, aut lapidi, sculpturae artis et cogitationis hominis* (artis et ingenii humani ope sculpto), *divinum esse simile* i. e. cum Deo simus similes atque anima rationali constemus, Deum quoque necessario spiritum mente concipere debemus ³⁾.

β) Quum Dei infinitam scientiam ac sapientiam, porro omnipotentiam atque summam libertatem, sanctitatem ac benignitatem, seu infinitum intellectum atque perfectissimam voluntatem praedicant.

b) Ecclesiam autem semper Deum spiritum professam esse, omnes admittunt. Quapropter in re tam manifesta testimonia SS. Patrum omittimus, ad Concilium Lateran. IV. solummodo provocantes, quod definit: *Tres quidem personae, sed una essentia, substantia seu natura simplex omnino* ⁴⁾.

2) Porro pari modo aequae SS. Litterae, SS. Patres atque Ecclesia tradunt, Deum esse ens infinite perfectum, i. e. omnibus perfectionibus, quae dari aut cogitari possunt, sine ulla limitatione aut ullo defectu in infinito gradu praeditum. Huc pertinent:

a) omnia S. Scripturae loca, in quibus Deus exhibetur ceu ille, cujus *magnitudinis non est finis* ⁵⁾, *qui magnus est, et non habet finem: excelsus et immensus* ⁶⁾, *qui indiget nullo, cum ipse det omnibus vitam, et inspirationem et omnia* ⁷⁾, *cui non est similis* ⁸⁾, *qui est Deus deorum, et Dominus dominantium* ⁹⁾, *altissimus super omnem terram, nimis exaltatus super omnes deos* ¹⁰⁾, *coram quo sunt omnes gentes, quasi non sint, et quasi nihilum, et inane reputatae sunt*

¹⁾ Job. 33, 4.

²⁾ Joan. 4, 24.

³⁾ Act. 17, 29. Cf. Jud. 6, 34. 11, 29. 13, 25. 1. Reg. 11, 6. Psal. 50, 13. Sap. 12, 1. Agg. 2, 6. Zach. 4, 6. Is. 48, 16. 40, 13. Rom. 1, 19. ss.

⁴⁾ Capit. 1. De fide Cath. Mansi, Coll. Conc. T. 22. c. 981—982.

⁵⁾ Ps. 144, 3.

⁶⁾ Bar. 3, 25.

⁷⁾ Act. 17, 25.

⁸⁾ Exod. 15, 11. Ps. 88, 7—16.

⁹⁾ Deut. 10, 17. Ps. 95, 4. ss.

¹⁰⁾ Ps. 96, 4.

ei, et insulae, quasi pulvis exiguus ¹⁾; qui est *incomprehensibilis cogitatione* ²⁾, atque *super omnes* ³⁾; nec non porro testimonia illa fere innumerabilia, quae Deo perfectiones quascunque speciatim attribuunt, et ita quidem, ut ipse ex perfectione naturae habeat, quidquid perfecti cogitari possit. Dicitur enim *solus aīos, sanctus* ⁴⁾, *solus potens* ⁵⁾, *solus sapiens* ⁶⁾, *solus bonus*, seu perfectus ⁷⁾, proinde et (solus) *Legislator et Judex* ⁸⁾; quae infra explicatius exponuntur, ubi de perfectionibus divinis singillatim agemus.

b) Veteres Patres autem et universam Ecclesiam in hac sententia semper stetisse, rursus a nemine in dubium vocatur. Unde illorum testimonia recensere et hic superfluum ducimus ⁹⁾, idque eo magis, cum mens humana indole sua coacta, Deum alium, quam perfectissimum cogitare haud queat. Quod pulchre eloquitur Augustinus, scribens: *Nam cum ille unus cogitatur deorum Deus, ab his etiam, qui alios suspicantur et vocant et colunt deos, sive in coelo sive in terra, ita cogitatur, ut aliquid, quo nihil melius sit atque sublimius, illa cogitatio conetur attingere. — Omnes certatim pro excellentia Dei dimicant; nec quisquam inveniri potest, qui*

¹⁾ Is. 40, 17. 15. Cf. Sap. 11, 23

²⁾ Jer. 32, 19.

³⁾ Eph. 4, 6.

⁴⁾ Apoc. 4, 6.

⁵⁾ 1. Tim. 6, 15.

⁶⁾ Rom. 16, 27.

⁷⁾ Matth. 19, 17.

⁸⁾ Jac. 4, 12.

⁹⁾ Cf. Clem. Alex. *Paedag.* l. 1. c. 8. Opp. T. 1. p. 135. ss. — Athanas. *Or. cont. Gent.* n. 39. Opp. T. 1. P. 1. p. 39. *Epist.* 2. ad Serap. n. 5. T. 1. P. 2. p. 686. etc. — Gregor. Naz. *Or.* 12. Opp. T. 1. c. 178. s. — Dionys. Areop. *De div. nom.* c. 13. Opp. T. 1. p. 873. — Cyrill. Alex. *De Trinil. dial.* 1. Opp. T. 2. p. 240. c. 1. C. D. — Joan. Damasc. *De orthod. Ad. l.* 1. c. 8. 9. 14. Opp. T. 1. p. 131. 142. 152. — Hilar. *De Trinit.* l. 1. n. 5—7. Opp. T. 2. c. 4. ss. *In Ps.* 2. n. 13. T. 1. c. 37. etc. — Hieronym. *Comm. in Ep. ad Ephes.* c. 3. Opp. T. 7. c. 601. *Ep.* 14. ad Damas. n. 4. T. 1. c. 40. — Augustin. *De Trinit.* l. 5 c. 1. n. 2. Opp. T. 8. c. 832. s. — Bernard. *De consider.* l. 5. c. 7. n. 13. Opp. V. 1. c. 457. — Anselm. *Proslog.* c. 2. Opp. p. 30. e. 2. B. *Cont. Gaudil.* p. 37. ss. — Thom. *Adv. Gent.* l. 1. c. 28. Opp. T. 18. p. 28. — Idem quoque gentiles Philosophi testati sunt, ut Cicero, Sextus Empiricus, Plutarchus. Cf. Petav. *De Deo Deique propr.* l. 1. c. 2. n. 9. *De theol. dogm.* Antv. 1700. T. 1. p. 37. s.

hoc Deum credat esse, quo melius aliquid est ¹⁾). Et ante Augustinum Tertullianus: *Nemo negabit, Deum summum magnum quid esse*. Paulo ante dixerat: *Quantum humana conditio de Deo definire potest, id definitio, quod et omnium conscientia agnoscet: Deum summum esse magnum, in aeternitate constitutum, innatum, infectum, sine initio, sine fine* ²⁾). Omnium tamen loco audiatur Joannes Damasceus, qui ita scribit: *Credimus igitur in unum Deum, principium unum principio carentem, increatum, ingenitum, interitus ac mortis nescium, aeternum, immensum, incircumscriptum, nullis terminis definitum, infinitae potentiae, simplex (simplicem), incompositum, incorporeum, a fluxu, passione omniique mutatione et alteratione liberum, invisibilem, omnis bonitatis ac justitiae fontem, lucem intellectualem et inaccessam, potentiam nulla mensura comprehensam, quamque sola voluntas (βουλήμα) sua metiatur (potest enim quidquid vult), rerum omnium conditricem, tam visibilium, quam invisibilium effectricem; omnium conservatricem, omnibus providentem, omnia continentem ac regentem, perpetuumque ac immortale regnum in omnia obtinentem; nihil contrarium habentem, omnia implentem, a nulla re comprehensam, imo vero ipsam universa complectentem et continentem ac praehabentem, substantias omnes sine pollutione penetrantem, ultra res omnes et essentias longe proveciorem, ut quae supersubstantialis est, omnibusque entibus sublimior; divinitate, bonitate, plenitudine superiorem, principatus omnes atque ordines statuentem, super omnem principatum atque ordinem positam; essentia, vita, sermone, et cogitatu altiore; quae Lux ipsa est, bonitas ipsa, ipsa et vita, ipsa et essentia; utpote quae nec esse suum, nec quidquam eorum, quae est, ab alio habeat; verum ipsa iis, quae sunt, essentiae; illis, quae vivunt, vitae; et illis, quae ratione utuntur, rationis fons existat; bono-*

¹⁾ De doctr. Christ. l. 1. c. 7. n. 7. Opp. T. 3. P. 1. c. 7.

²⁾ Adv. Marcion. l. 1. c. 3. Opp. V. 2. p. 148 a.

rum omnium cunctis parentem, intuentem omnia, priusquam fiant; unam substantiam, unam divinitatem, unam virtutem, unam voluntatem, unam operationem, unum principatum, unam potestatem, unam dominationem, unum regnum; ut tamen in tribus perfectis personis noscatur, et adoratione una adoretur, credaturque, et colatur ab omni rationali creatura; quippe quod illae citra permisionem et confusionem unitae sint, et sine distantia (quod cogitationem omnem superat) discretae: in Patrem et Filium et Spiritum S., in quorum etiam nomine baptizati sumus ¹⁾).

3. Esse autem Deum ens a se, seu per se, ens absolutum ac necessarium, ad cuius essentiam rō esse pertineat, seu quod sua natura ad existendum cogatur, ita ut non existere prorsus non possit.

a) Deus ipse ad Moysen loquens effatus est his verbis: *Ego sum, qui sum*, אֲנִי אֶהְיֶה אֲשֶׁר אֶהְיֶה. — Sic dices filiis Is-

rael: *Qui est, misit me ad vos* ²⁾, i. e. ego sum ille, qui verē est, qui esse habet a se ipso, quum caetera omnia ita sint, quasi non sint, non enim habent in se, ut, existant. Unde et LXX verterunt: *Εγὼ εἰμι ὁ ὢν*. Quae deinde a Prophetis saepius repetuntur. Sic Isaias ait: *Haec dicit Dominus, rex Israel, et redemptor ejus, Dominus exercituum: Ego sum primus, et ego novissimus, et absque me non est Deus*, i. e. ego sum, qui a nemine sum et pendeq, a quo autem omnia sunt et pendent ³⁾. Et rursus: *Ego sum Dominus*, אֲנִי יְהוָה

hoc est nomen meum; gloriam meam alteri non dabo ⁴⁾. In libro Job autem legitur: *Ipsa enim solus est, et nemo avertere potest cogitationem ejus* ⁵⁾. — In N. T. vero Deus pariter appellatur *primus et novissimus*, α ἐστὶν ὁ πρῶτος καὶ ὁ ἔσχατος, i. e. qui semper ac necessario, adeoque per se est ⁶⁾. Insuper dicitur Deus *θεὸς ζωὴ καὶ ἀληθεία* ⁷⁾, qui *habet vitam a semet ipso* ⁸⁾, et est fons omnis vitae ⁹⁾, qui *est*

¹⁾ De fide orthod. l. 1. c. 8. Opp. T. 1. p. 131 s.

²⁾ Exod. 3, 14. Cf. 6, 2. 3. 6. Deut. 6, 4. 32. 39.

³⁾ Is. 44, 6.

⁴⁾ Is. 42, 8. Cf. 41, 4. 43, 10—13; 48, 12. Ps. 110, 26—29.

⁵⁾ Job. 23, 13.

⁶⁾ Apoc. 1, 4. 8. 17. 22, 13.

⁷⁾ 1. Thess. 1, 9. Joan. 17, 3. 1. Joan. 5, 20.

⁸⁾ Joan. 5, 26.

⁹⁾ Joan. 6, 58. 1. Joan. 5, 20.

lux ¹⁾, et fons omnis lucis seu perfectionis ²⁾; *charitas* ³⁾, et fons omnis charitatis ⁴⁾. Quae omnia praedicata non sunt tam attributa divinae essentiae, quam potius essentia ipsa, pro qua ipse, quum sit per se ac necessarius, etiam est infinite perfectus, atque omnis finitae perfectionis fons et origo. Unde naturae creatae comparatae cum Deo, qui est existendi plenitudo et necessitas, nihil esse dicuntur. *Substantia mea*, ait Psalmista, *tamquam nihilum ante te* ⁵⁾.

b.) SS. Litteris consonant SS. Patres, qui aut ex iisdem verbi divini, aut etiam naturae fontibus, Dei proprietatem illam hauserunt, pro qua ipsi soli essentiam et existentiam, h. e. *ὁ εἷς*, vel *ὁ ὁὐλός* et *ἡ ἀγαθή* vindicarunt, caetera esse et existere negantes. Sic Clemens Alex. nomen illud *ὁ ὡς* idcirco Dei maxime proprium esse putat, quoniam illum exprimit, *qui vere solus est, qui fuit, et est, et erit. In quibus tribus temporibus*, inquit, *ponitur unum nomen, nempe Qui est* ⁶⁾. Quod egregie confirmat Justinus his verbis: *Nemo praexistit, qui Deo nomen imponeret, nec se ipse nominandum esse duxit, cum unus et solus sit.* — „Ego enim” inquit, „sum existens ille”, *se ipsum existentem non existentibus opponens* ⁷⁾. Atque Gregorius Naz., qui ait *Quantum ergo nobis assequi concessum est, Ens, et Deus magis quodammodo essentiae nomina sunt, ex hisque etiam entis vox ad eam indicandam aptior est, non hoc solum nomine, quod ipse, cum Moysi in montem (monte) oraculum ederet, quaereretque ille, quo nomine vocaretur, ita se ipsum appellavit, edicens videlicet ei, ut ad populum his verbis uteretur: „Qui est, misit me”; sed etiam, quia nomen illud magis proprium esse comperimus.* — *At nos naturam ejusmodi exquirimus, quae ipsum esse per se habeat, ac non cum alio quopiam copulatum. Ens vero proprium sane est Dei, ac totum nec priore aliqua re, nec posteriore (nec enim erat aut erit) definitum ac circumcissum* ⁸⁾.

¹⁾ 1. Joan. 1, 5. Cf. 1. Tim. 6, 16.

²⁾ Jac. 1, 17. coll. 13.

³⁾ 1. Joan. 4, 8.

⁴⁾ 1. Joan. 4, 9. 12. 13. 16. 1. Cor. 12, 30. coll. 13, 1 ss.

⁵⁾ Ps. 38, 6.

⁶⁾ *Paedag. l. 1. c. 8. Opp. T. 1. p. 140. Cf. Strom. l. 1. c. 26. p. 420. et l. 6 c. 26. T. 2. p. 810.*

⁷⁾ *Cohort. ad Graec. n. 21. Opp. p. 21.*

⁸⁾ *Or. 36. Opp. T. 1. c. 322, c. D.*

Omnia autem praestantissime Dionysius explicavit, qui docet, id primum, et antiquissimum, et maxime proprium habere Deum, ut sit; quem ideo vocat *ens vere existens, et omnia, quae sunt, existere faciens* (ὅτιως ὄν, τὸ τῶν ὄντων ἀπάντων οὐσιονοιόν) atque *et τὸ esse temporum, et saeculum eorum, quae existunt* (τὸ χρόνον ὀντότης, τὸ αἰὼν τῶν ὄντων)¹⁾, et ait: *Deus enim non quovis modo (οὐ πῶς aliquo modo) est ens (ὄν), sed simpliciter et infinite totum esse in se pariter complexus et anticipans; quamobrem etiam Rex saeculorum nominatur, utin quo et penes quem cujuslibet esse et sit et constet, et in quo nec erat, nec erit, neque factum est, neque fit, neque fiet, imo nec est* (scilicet datur, utpote qui supra esse finitum ac superessentialis existit); *sed ipse est esse rebus* (causa existendi), *et non tantum ea, quae sunt, sed ipsum esse rerum, ex proaeterno ente; ipse est enim aeternum aevorum, existens ante omne aevum. — Et ante alias ejus participationes* (πρὸ τῶν ἄλλων αὐτοῦ μετοχῶν, quae simul possidet) *praesupponitur ipsum esse, et est ipsum per se esse antiquius, quam esse per se vitam, et per se sapientiam, etc.*²⁾. Hanc Dionysii doctrinam ac sententiam illustrat affirmatque Maximus, ejus interpres, qui το σῶναι praecipuam et praestantissimam divinitatis notam esse asserit, a qua sibi nomen adscivit. *Hoc nomen, ait, imposuit sibi Deus, cum dixit: „Ego sum, qui sum“: a quo idcirco consentanee laudatur ante alia, quae de ipso dicuntur, qualia sunt, nomen vitae, sapientiae et alia ejusmodi. Dicendo autem prius esse et supra esse, declaravit esse Dei carere principio, et penitus intelligentia comprehendendi non posse, ut qui praedestinatione cognitionis suae ineffabilis praeproduxerit omnino esse omnia: hoc enim esse statim prima notione mens cogitat, postea hoc aut alio modo illis esse contemplatur*³⁾. Id ipsum edisserit Cyrillus Alex., quum docet, in Deo nil accidens dari, nam solummodo in ente necessario omnia necessaria sunt. *Simul ac intelligitur Deus, inquit, etiam omnia, quae illius sunt intelliguntur, neque ullum accidens in ipso potest intelligi*⁴⁾. Egrege de re nostra disputat quoque Hilarius, qui adductis

¹⁾ De div. nomin. c. 5. §. 4. Opp. T. 1. p. 690.

²⁾ De div. nomin. c. 5. §. 4—5. T. 1. p. 690. s.

³⁾ Schol. ad Dionys. Areop. De div. nomin. c. 5. §. 5. lb p. 708.

⁴⁾ De Trinit. Dial. 2. Opp. T. 5. P. 1. p. 421.

verbis S. Scripturae: *Ego sum, qui sum*; et: *Haec dices filiis Israel: Misit me ad vos, qui est: Admiratus sum*, inquit, plane tam absolutam de Deo significationem, quae naturae divinae incomprehensibilem cognitionem aptissimo ad intelligentiam humanam sermone loqueretur. Non enim aliud proprium magis Deo, quam esse, intelligitur; quia id ipsum quod est, nec desinentis est aliquando, neque coepti: sed id, quod cum incorruptae beatitudinis potestate perpetuum est, non potuit aut poterit aliquando non esse; quia divinum omne neque abolitioni, neque exordio obnoxium est ¹⁾. Et iterum: *Deus et ubique est, et totus ubicunque est. Ita regionem intelligentiae excedit, extra quem nihil est, et cui est semper, ut semper sit* ²⁾. Quibus consona sunt, quae habet Hieronymus scribens: *Loquitur in Exodo Dominus: „Ego sum, qui sum“. — Numquid solus Deus erat, et caetera non erant? Utique Angeli, coelum, terra, vel maria, et ipse Moses, cui Dominus loquebatur, et Israel, et Aegyptii, ad quos, et contra quos princeps et adversarius mittebatur, erant. Et quomodo nomen commune substantiae sibi proprium vindicat Deus? Illa, ut diximus, causa: quia caetera ut sint, Dei summere beneficio. Deus vero, qui semper est, nec habet aliunde principium, et ipse sui origo est, suaeque causa substantiae, non potest intelligi aliunde habere, quod subsistit* ³⁾. Ambrosius non tam nomen Dei, quam rem seu essentiam in illo Exodi loco expressam esse putat. *Moses*, inquit, *volens proprium Dei, et aliquid de eo speciale cognoscere, quod non esset commune cum coelestibus potestatibus, interrogavit: Quod est nomen tuum? Denique cognoscens mentem ejus Deus, non respondit nomen, sed negotium; hoc est, rem expressit, non appellationem dicens: „Ego sum, qui sum,“ quia nihil tam proprium Dei, quam semper esse* ⁴⁾. Idem tradit non semel Augustinus, qui Deum proprie dici vult essentiam, non substantiam. *Est tamen (Deus), ait, sine dubitatione substantia, vel si melius hoc appellatur, essentia, quam Graeci οὐσία vocant. Sicut enim ab eo,*

¹⁾ De Trinit. l. 1. n. 5. Opp. T. 2. c. 4.

²⁾ In. l. 2. n. 6. T. 2. c. 30.

³⁾ In Epist. ad Ephes. 3, 14—15. Opp. T. 7. c. 600 s. Cf. Epist. 15. ad Damas. n. 4. T. 1. c. 40 s.

⁴⁾ Enarr. in Ps. 43. n. 19. Opp. T. 1. c. 896.

quod est sapere, dicta est sapientia, et ab eo, quod est scire, dicta est scientia: ita ab eo, quod est esse, dicta est essentia. Et quis magis est, quam ille, qui dixit famulo suo Moysi: „Ego sum, qui sum“; et dices filiis Israel: „Qui est, misit me ad vos“¹⁾. Ac paulo post: Quod enim mutatur, non servat ipsum esse; et quod mutari potest, etiam si non mutetur, potest, quod fuerat, non esse: ac per hoc illud solum, quod non tantum non mutatur, verum etiam mutari omnino non potest, sine scrupulo occurrit, quod verissime dicatur esse²⁾. Et alio loco: Quid est, quod est? Quod aeternum est. Nam quod semper aliter, atque aliter est, non est, quia non manet. Non omnino non est, sed non summe est³⁾. Tandem idem docet Gregorius Mag., qui ad verba Jobi: „Ipse enim solus est“, quaerit, cur cum omnia creaverit Deus, ut essent, solus esse dicatur; ac respondet: Sed aliud est esse, aliud principaliter esse; aliud mutabiliter, atque aliud immutabiliter esse. Sunt enim haec omnia, sed principaliter non sunt; quia in semet ipsis minime subsistunt, et nisi gubernantis manu teneantur, esse nequaquam possunt⁴⁾. Quin imo eadem non tantum apud Judaeos, sed et gentiles philosophos, qui illa, etsi non invenerunt, tamen lubenter admiserunt, deprehenduntur⁵⁾. — Quando autem antiqui Patres Deum οὐσολαν esse negant: solummodo id asserere volunt, Deum non, ut caetera, quae dicuntur esse, definitam ac determinatam rationem entis obtinere, sed supra omnia, quae in mundo existunt, et omnem essentiam creatam

¹⁾ *De Trinit. l. 5. c. 2. n. 3. Opp. T. 6. c. 833. Sub substantia Augustinus cum aliis veteribus Scriptoribus intelligit id, quod accidentibus subiectum quoddam, ut esse valeant, subministrat. Unde cum in Deo nullum sit accidens: ideo propria substantiam illi non tribuendam esse, sed potius essentiam docet. Cf. De Trinit. l. 7. c. 5. n. 10. T. 8. c. 860 s. Enarr. in Ps. 134. n. 4. T. 4. c. 1494 s. Enarr. in Ps. 101. Serm. 2. n. 10. c. 1107. De cognit. ver. vit. c. 3. Inter opp. Augustin. T. 6. Append. c. 170.*

²⁾ *De Trinit. l. 1. c.*

³⁾ *Cf. Serm. 6. n. 4. 7. n. 7. T. 5. c. 38. 40. Cf. Tract. 39. in Joan. n. 105. T. 3. P. 2. c. 559 s. De fid. et Symb. c. 4. n. 6—7. T. 6. c. 154 s. etc.*

⁴⁾ *Moral. l. 16. c. 37. n. 45. Opp. T. 1. c. 518. Cf. l. 18. c. 50. n. 82. c. 596. Bernard. De consider. l. 5. c. 6. Opp. V. 1. c. 456. In Cant. Serm. 31. n. 1. lb. c. 1384.*

⁵⁾ *Cf. Petav. De Deo Deiq. propr. l. 1. c. 6. n. 4—6. De theol. dogm. Antverp. 1700. T. 1. p. 51 s.*

eminere, non intra illa contineri. Ita manifeste intelligendus est Dionysius, cum ait: *Supra substantias est illa supersubstantialis infinitas; et supra mentes illa supra mentem unitas; et omnibus ratiocinationibus inscrutabile est illud supra ratiocinationem unum; omnique verbo ineffabile est illud supra verbum unum; unitas effectrix universae unitatis, et substantia supra substantiam, et mens non cadens sub intelligentiam, ratio non effabilis, ratione, intelligentia nomineque vacans, nullius rei similitudinem habens: quae quidem causa est, ut omnia sint, ipsa vero non est, ut quae quiescit extra omnia, quae sunt, quemadmodum etiam ipsa de se proprie sciteque haec effari potest.* ¹⁾ Nec non Maximus, cum inquit: *Si essentia, ovola, dicatur ab esse, esse autem inserat sensum cujusdam derivationis, utique essentia non proprie de Deo dici poterit; quoniam Deus omnem superat essentiam, cum nihil sit eorum, quae sunt, sed supra illa, quae sunt, utpote ex quo existunt.* ²⁾ Et rursus: *Cum ens de Deo dicitur, est supra totum id, quod est, collective sumtum; hoc enim vocat supraessentiale, pro supra ens creatum; ens enim est essentia, quoniam ab esse nomen essentiae deducitur. Deus itaque, tamquam qui sit supra ipsum esse (quoniam esse declarat (Dionysius), ab aliqua causa in rerum naturam productum esse) superessentialiter existere intelligitur.* ³⁾ Idem confirmat Joannes Damascenus, qui, quid Deus sit secundum essentiam ac naturam, comprehendere non posse, scribit ⁴⁾, atque deinde definite ait: *Neque enim aliquid est eorum, quae sunt; non ut nullatenus sit, sed quia supra omnia, quae sunt, atque etiam supra ipsummet esse ipse sit.* ⁵⁾ Atque etiam Augustinus, qui pari modo essentiae seu substantiae finitae de Deo omnem affirmationem excludit, cum ait: *Excedat cor vestrum omnia usitata, et excedat intentio universas cogitationes vestras solemnes ex carne, educas e sensibus carnis; et imaginantes nescio quae phantasmata. Totum ab animo rejicite, quidquid occurrerit, negate; cognoscite infirmitatem cordis vestri, et quidquid occurrerit,*

¹⁾ *De div. nomin. c. 1. §. 1. Opp. T. 1. p. 439.*

²⁾ *Schol. in c. 1. §. 1. Dionys. De div. nomin. lb. p. 456. Cf. In. c. 5. §. 1. p. 702.*

³⁾ *In c. 5. §. 4. De div. nomin. p. 705.*

⁴⁾ *De Ad. orthod. l. 1. c. 4. Opp. T. 1. p. 127.*

⁵⁾ *Ib. p. 127 s.*

quod cogitare possetis, dicite: Non est illud; non enim, si illud esset, mihi jam occurrisset ¹⁾. Clarissime autem omnium edisserit Gregorius Naz., qui habet: *Reputantes Deum omnium, quae sunt, pulcherrimum et sublimissimum esse (nisi quis tamen malit eum supra omnem essentiam ponere, aut in ipso, quidquid est, collocare: utpole a quo alia quoque (quaeque), ut sint, acceperint* ²⁾. Hinc et velut *pelagus quoddam essentiae immensum et interminatum* Deum adpellat ³⁾; quod universe infiniteque ipsum esse, non ejus formam aliquam aut particulam possideat, atque vere ac proprie sit, non autem ut res creatae existat, quae ex nihilo sunt, et in nihilum abeunt, ac solo Dei beneficio consistunt, atque ideo proprie ac vere non sunt. — Quamvis autem essentia et substantia, cum de creatis rebus usurpantur, illis omnibus notionibus ac proprietatibus implicatae sint, quae imperfectum aliquid habent, indignumque Deo: nihil tamen prohibet, quominus utrumque vocabulum, absolutum ab illa faece, ac sincerum Deo possit attribui; ut nec derivationem ac manationem intelligamus ullam, neque certum definitumque genus entis, quod in essentiae nomine cavendum veteres arbitrati sunt; neque porro mutationem ex vicissitudine accidentium, quam iidem in substantiae voce reformidant. Sed in essentiae quidem usu nil sumamus praeter simplicem exstantiam rei, et ab eo, quod est nihil, sejunctionem ac recessum. In substantia vero, hoc solum, quod est esse per se, neque alienis adminiculis, ut sit, indiget. Ita non solum proprie Deo, sed excellenti quadam ratione ambo congruent; quia solus ita est, ut cum nihilo commercium habeat nullum, et caetera, quae ab nihilo ducta, et in nihilum reditura sunt, si Deus siverit, infinite superat, quum a nullo ente pendeat, sed ita sit, ut plane non esse non possit. Quod pulchre enunciat Anselmus, ubi ait: *Deus enim est id, quo majus cogitari non potest. Quod qui bene intelligit, utique intelligit, id ipsum sic esse, ut ne cogitatione queat non esse. Qui ergo intelligit sic esse Deum, nequit eum non esse cogitare* ⁴⁾. Quamobrem quod in caeteris proprietatibus usuvenit, quae creatis ex rebus mutuata similitudine

¹⁾ *Enarr. 2. in Ps. 26. n. 8. Opp. T. 4. c. 122.*

²⁾ *Or. 12. Opp. 1. c. 178. D.*

³⁾ *Or. 38. Ib. c. 546. B.*

⁴⁾ *Proslog. c. 4. Opp. p. 31. c. 1. Cf. Thom. Aq. Cont. Gent. l. 1. c. — 22. Opp. T. 18. p. 22. ss. et 1. q. 3. art. 4. T. 20. p. 17. s. Richard. a S. — Vict. De Trin. l. 1. c. 4. Opp. Rothom. 1650. p. 218. c. 2.*

quadam in Deum transferuntur: id etiam in essentia substantiaque fieri convenit, uti pro eo, ac divinitate dignum est, huic illa tribuantur, omni et mutationis et accidentis conditione detracta ¹⁾).

4. Denique Deum ceu mundi universi, tam physici quam moralis, auctorem omnipotentem, atque sanctissimum ac sapientissimum Rectorem a revelatione Christiana tum juxta SS. Litteras, utpote quae hanc doctrinam in quavis fere pagina continent ac inculcant ²⁾), tum ex fide Ecclesiae, quae illam ubique in libris suis symbolicis aequae, ac in suo cultu publico palam profitetur, exhiberi, a nemine in dubium vocatur, quin imo tamquam dogma religionis Christi quam maxime proprium ab omnibus admittitur.

Inde autem patet, quam exigui nos simus et viles, quantamque debeamus reverentiam tanto Numini, cum infinitam ejus majestatem consideramus. Seraphim alis velant faciem coram eo, nec cessant unquam laudare nomen ejus. Quanto magis nos oportet cum multo tremore ad eum accedere, et magno studio in laude ejus versari. *Illius magnitudo*, ait Augustinus, *sine fine est, et tua laudatio sine fine sit* ³⁾? *Nihil nobis sit*, ut quidam alius scribit, *supra Deum, nihil praeter Deum, nihil post Deum; sed omnia tantum propter Deum aestimemus diligamusque*.

Observatio. 1. Notionem Dei in libris N. T. perfectissimam dari, certum est; ast etiam notionem Dei in libris A. T. exhibitam perfectam esse, negari non potest, atque notionibus, quas philosophi proposuerunt, longe superiorem. Occurrere autem in S. Scriptura imprimis A. T. anthropomorphismos et anthropopathias, i. e. descriptiones a nostro corpore, aut affectibus humanis

¹⁾ Cf. Petav. *De theol. dogm. De Deo. l. 1. c. 6.* Antv. 1700. T. 1. p. 51. ss.

²⁾ Gen. 1, 1. 14, 19. Exod. 20, 11. 1 Paral. 29, 11. Ps. 88, 12. 13. 95, 5. 101, 26. 103, 1 ss. 113, 15. 120, 2. 123, 8. 135, 6. Eccli. 1, 8. Is. 37, 16. 40, 12—14. 40, 26. 28. 42, 5. 44, 24. 45, 7. 12. 18. 48, 13. 51, 13. Ier. 10, 12—16. 32, 17. 14, 22. Bar. 3, 32. Jon. 1, 9. Zach. 12, 1. 2. Mach. 1, 25. 6, 28. Matth. 11, 25. 19, 4. Marc. 10, 6. Joan. 1, 3. Act. 4, 24. 14, 17. 24. Rom. 11, 36. 1. Cor. 8, 6. Eph. 3, 9. 4, 6. Coloss. 1, 16. Hebr. 1, 2. 10. 3, 4. 11, 3. Ap. 4, 11. 10, 6. 14, 16. — Gen. 45, 5. Deut. 8, 18. Job. 12, 13 ss. Ps. 102, 19. 113, 3. 126, 1. Prov. 10, 22. 16, 4. 9. 19, 21. 20, 24. 21, 1. 30. Eccli. 3, 15. Sap. 12, 13. Is. 26, 15. 45, 7. Jer. 10, 23. 27, 5. Dan. 2, 21. 5, 18. Matth. 6, 33. 11, 26. 20, 14. Luc. 12, 31. Joan. 5, 17. Rom. 9, 16. 2. Cor. 3, 5. Philipp. 2, 13. Hebr. 13, 21. etc.

³⁾ In Ps. 144. v. 5. Opp. T. 4. c. 1613.

mutatasque, easque crassas, pariter, haud negamus; neque id mirum ei videri potest, qui perpenderit, revelationem gradui culturae hominum, quibus proxime destinatur, se accommodare debere. Verumtamen cum in primis statim S. Scripturae libris omnis imago ac similitudo a rebus finitis sumta tamquam Deo inadaequata rejiciatur: clare colligitur, Scriptores sacros ejusmodi dicendi formulis sensuallibus Deum limitibus circumscribere haudquaquam voluisse, sed hasce tamquam imagines ac symbola ab illo ipso bene distinxisse. Porro ipsae notiones in SS. Litteris exhibitae sat arguunt, descriptiones illas minime proprie esse accipiendas. Accedit, eas haud raro per ipsos SS. Scriptores directe tolli ac rescindi. Sic e. g. saepius legimus, Deum alicujus rei poenituisse; e contrario autem iterum expresse declaratur, *non esse Deum, quasi hominem, ut mentiatur: nec ut filium hominis, ut muletur* ¹⁾. Et sic porro ²⁾.

Observ. 2. Moysen nequaquam Deum tradidisse solum formidabilem, neque ad populum Israeliticum tantummodo pertinentem, ex locis citatis atque adhuc citandis clare cognoscitur, uberius autem in Archaeologia biblica ostenditur ³⁾.

Observ. 3. Quoad quaestionem, quam movent, in quonam proprie essentia Dei sit reposita, putamus distinguendum esse inter essentiam physicam et metaphysicam. Essentia physica Dei sine disceptatione in toto eo, quod in Deo est, seu in cumulo omnium perfectionum divinarum reponenda est; quum in Deo, ut ente necessario, nil dari possit accidens, Metaphysica autem Dei essentia, seu id, quod a nobis primum in Deo concipitur, et ex quo tamquam fonte caeterae perfectiones omnes profluunt, in asseitate, seu existendi necessitate consistere videtur. Nam in SS. Litteris haecce Deo tribuitur non eodem modo, quo alia perfectiones, sed velut character expressus et differentia constitutiva. Porro etiam Patres communiter docent, verba Exodi: *Ego sum*, etc. explicantes, effato hoc Dei naturam imprimis significari. Et sane asseitas est, qua non tantum quam maxime Deus ab omni alio ente discernitur, sed et quae prima, atque ceu omnium perfectionum divinarum fons et radix concipitur ⁴⁾. Alii tamen essentiam quoque metaphysicam in-

¹⁾ Num. 23, 19.

²⁾ Cf. Job. 10, 4; Ps. 120, 4. etc. V. Ruß, *Kathol. Dogmatik*. Tüb. 1841. B. p. 307 ss.

³⁾ Cf. Perrone, *Prael. theol.* ed. Lovan. 1838 ss. T. 2: p. 47 ss.

⁴⁾ Cf. Thom. 1. q. 4. art. 2. T. 20. p. 23 a. 1. q. 3. art. 6. p. 19.

congerie perfectionum, alii vero iterum in intellectione actuali, vel etiam radicali (i. e. intelligendi potentia infinita) reponendam esse censent ¹⁾. Caeterum quidquid sit, esse a se seu esse necessarium ad essentiam Dei physicam certo pertinet.

§. 4. Existentia Dei.

Exposita notione Dei, quam nobis revelatio divina in suo utroque fonte exhibet, restat, ut doctrinam de ejusdem Dei existentia, ejus unitate ac a mundo diversitate exponamus, atque contra atheos, si qui sint mentis adeo nefariae, vindicemus. Etenim num revera athei dentur, inter Theologos litigatur. Verumtamen certum esse videtur, et ab omnibus admissum, atheos practicos utique dari, i. e. qui ita nequiter vivant, ac si Deus non esset, quemque vellent non esse, quum ipsum suorum criminum justum vindicem ex intimo conscientiae sensu reformident. Porro evictum est, esse atheos speculativos indirectos, qui scilicet de Deo asserunt, quae cum ejus natura stare non possunt, vel idolis ac puris rebus creatis concedunt, quae soli Deo competunt ac propria sunt. Atheos autem speculativos directos, qui non tantum externe et contra intimum conscientiae sensum, sed interne et ex animo Deum esse negent, qui proinde vel ita sint mente perdit, ut vel nullum omnino in se religionis sensum habeant, vel saltem morum perversitate ita obscuratum, ut nulla vi naturae, nulla argumentorum efficacia ad Deum agnoscendum moveantur, nonnisi perpaucos dari, qui asserunt, sino dubio a vero haud procul absunt. *Sicut enim*, ut bene observat Augustinus, *magna pietas paucorum, ita et magna impietas nihilominus paucorum est* ²⁾. Quando autem S. Scriptura loquitur de hominibus, *in quibus non subest scientia Dei* ³⁾, *qui sine Deo fuerunt in hoc mundo* ⁴⁾, *qui non noverunt Deum* ⁵⁾: apertum est, de gentilibus sermonem esse, qui ignorarunt Deum verum et unicum, et iis servierunt, qui natura non sunt dii ⁶⁾. Apud Ethnicos vero atheismi accusati fuerunt, quicunque a populari deorum cultu recesserunt. Hae causa damnatus est ab Atheniensibus Socrates, et Anaxa-

¹⁾ Cf. Wies t, *Inst. theol.* Ingolst. 1788. T. 4. p. 39 s. et Tournel, *theol.* Col. Agripp. 1722. T. 1. p. 58 s.

²⁾ *Serm. 70. de verb. Evang. c. 2. n. 3. Opp. T. 5. c. 381.*

³⁾ Sap. 13, 1.

⁴⁾ Ephes. 2, 12.

⁵⁾ 2. Thess. 1, 8.

⁶⁾ Cf. Gal. 4, 8.

goras impietatis postulatus, quod sublati vulgaribus diis et religionibus popularibus, unum supremum Deum praedicarent, rerum omnium opificem et moderatorem. Quin et ipsi Christiani a gentilibus athei vocati sunt eo, quod falsos eorum deos colere recusarent.

Sententia jam, Deum existere, est dogma fidei Catholicae certissimum. Licet enim revelatio divina directe, eum dari, tam parum tradere queat, quam nobiscum colloquens affirmare, se existere; cum quilibet, qui revelationem admittit, jam aliunde de Dei existentia persuasus esse debeat: tamen nihilo secius revelatio saltem indirecte existentiam divinam docere potest, atque etiam reapse docet. Quod

A. vario modo praestant SS. Litterae, in quibus

1. diserte insipiens declaratur, qui Deum esse negat. *Dixit insipiens in corde suo: Non est Deus* ¹⁾.

2. Docetur, Deum in suis operibus, seu rerum natura cognosci posse. *Interroga jumenta, ait Jobus, et docebunt te: et volatilia coeli, et indicabunt tibi. Loquere terrae, et respondebit tibi: et narrabunt pisces maris. Quis ignorat, quod omnia haec manus Domini fecerit? In cujus manu anima omnis viventis, et spiritus universae carnis viventis* ²⁾. Psalmista: *Coeli enarrant gloriam Dei, et opera manuum ejus annuntiat firmamentum. Dies diei eruclat verbum, et nox nocti indicat scientiam* ³⁾. Atque: *Scitote (omnis terra), quoniam Dominus ipse est Deus: ipse fecit nos, et non ipsi nos* ⁴⁾. Sapiens: *Vani autem sunt omnes homines, in quibus non subest scientia Dei: et de his, quae videntur bona, non potuerunt intelligere eum, qui est, neque operibus attendentes agnoverunt, quis esset artifex. — A magnitudine speciei, et creaturae cognoscibiliter (gr. analogice) poterit creator horum videri, i. e. ex magnitudine ac pulchritudine rerum creaturarum poterit, comparando creatorem cum creatura, effectum cum sua causa, auctor earum conspici, et in notitiam nostram venire, atque quanto sit ipse major, pulchrior, sapientior, etc., qui res ipsas fecit, cognosci* ⁵⁾. Atque Paulus ad Lystren-

¹⁾ Ps. 13, 1. Cf. Anselm. *Prosl. c. 3. Opp. p. 30. c. 2.*

²⁾ Job. 12, 7—10.

³⁾ Ps. 18, 2—3.

⁴⁾ Ps. 90, 3. Cf. 96, 6.

⁵⁾ Sap. 13, 1. 5. Cf. Estius, *In 1. Sent. d. 3. §. 1.*

ses loquens: *Et nos mortales sumus, similes vobis homines, annuntiantes vobis ab his vanis converti ad Deum vivum, qui fecit coelum, et terram, et mare, et omnia, quae in eis sunt: qui in praeteritis generationibus dimisit omnes gentes ingredi vias suas. Et quidem non sine testimonio semetipsum reliquit benefaciens de coelo, dans pluvias, et tempora fructifera, implens cibo et laetitia corda nostra ¹⁾*. Et iterum in Areopago disputans: *Deus, qui fecit mundum; et omnia, quae in eo sunt, hic coeli et terrae cum sit Dominus, non in manufactis templis habitat, nec manibus humanis colitur indigens aliquo, cum ipse det omnibus vitam, et inspirationem, et omnia: fecitque ex uno omne genus hominum inhabitare super universam faciem terrae, definiens statuta tempora, et terminos habitationis eorum, quaerere Deum, si forte attrectent eum, aut inveniant, quamvis non longe sit ab unoquoque nostrum. In ipso enim vivimus, et movemur, et sumus ²⁾*. Atque tandem in epistola ad Romanos, ubi scribit, neminem excusari, qui Deum ignoret, utpote cum per mundum creatum necessario ad Deum ascendatur. *Quia quod notum est Dei, inquit, manifestum est in illis. Deus enim illis manifestavit. Invisibilia enim ipsius, a creatura mundi, per ea quae facta sunt, intellecta, conspiciuntur: sempiterna quoque ejus virtus et divinitas: ita ut sint inexcusabiles ³⁾*.

3. Dei attributa, tum absoluta tum relativa, nec non ejusdem opera fere in quavis linea proponuntur, ut cuilibet SS. Litteras inspicienti patulum est.

4. Deum nonnisi unum esse, traditur ⁴⁾, ut statim ostendetur. Et tandem

5. diversae Dei adparitiones, miracula ab ipso patrata, et vaticinia edita narrantur, atque eum multifariam multisque modis olim loquentem patribus in Prophetis, novissime locutum esse nobis in Filio, hujusque discipulis, neque tali ratione modo extraordinario hominibus indubitate cognoscendum exhibuisse, docetur. Nam si homo non potest certius existentiam suam probare, quam quum se praesentem exhibet, aut ea

¹⁾ Act. 14, 14—16.

²⁾ Act. 17, 24—28.

³⁾ Rom. 1, 19—20. Cf. etiam 2, 24 s.

⁴⁾ Cf. Deut. 6, 4, 31, 15 ss. Ps. 113, 1 ss. Sap. 13, 1 s. Róm. 1, 21.

agit, quae praeter eum agere potest nemo: etiam Deus, quum variis modis cum hominibus communicavit, et opera patravit, quae nemo alius potest patrare, luculentissimum nobis praebuit suae existentiae testimonium.

B. Ita quoque Ecclesia semper, Deum eumque unum esse firmissime tenuit, atque palam docuit; SS. Patres autem ac Theologi insuper varia argumenta quaesierunt, quibus fidem in Christianis confirmarent, vel vero infideles convincerent. Et quidem omnia argumenta, quae posterioribus temporibus a Theologis ad existentiam Dei evincendam sunt excogitata, apud veteres, jam adcuratius exposita, jam solummodo adumbrata, deprehendimus. Sic

1. idea, Deum, utpote ens perfectissimum, necessitate existendi naturae suae interna existere, ita ut ne cogitatione quidem existentia ab ejus essentia seu natura separari possit, SS. Patribus minime fuit incognita, quamvis eadem ad argumentum, ut ajunt, ex professo construendum usque ad Anselmum Cantuariensem usus sit nemo. Huc pertinent testimonia Clementis Alex., Gregorii Naz., Dionysii, Maximi, Hilarii, Hieronymi, Augustini atque Gregorii M., supra laudata, quibus edisserunt, Deum eumque solum *vere, simpliciter, summe ac principaliter esse*, seu *esse per se habere*, ita ut *mutari omnino non possit*, imo *ipsum sic esse, ut neque potuerit, neque futurum sit, ut possit non esse*.

2. Maxime usitatum Patribus est illud argumentum, quod ex universitatis adspectu et ejus partium dispositione, ac rata et constanti illius administratione sumitur. Sic scribit Athanasius, ut Theophilum Antioch. ¹⁾ omittamus, quemadmodum ex operibus saepe artifex, etiam absens, neque visus, agnoscatur, sic etiam ex mundi ordine et gubernatione ejus opificem Deum et conditorem intelligi, etsi corporis oculis usurpari nequeat, quod ipsum tradidisse Paulum Apostolum, tum ad Romanos scribentem, tum apud Lycaonas verba facientem, dicit. *Ecquis enim, inquit, coeli ambitum solisque et lunae cursum, aliorumque siderum positiones et circumvectiones, contrarias quidem ac dissimiles, sed in ipsa dissimilitudine aequalem ordinem ab omnibus simul servatum intueret*

¹⁾ Ad Antioch. l. 1. n. 5—6. Opp. Justin. etc. p. 363 s. Cf. Quaestio—Graec. q. 3. lb. p. 581.

potest, quin secum cogitet, haec non a semetipsis, sed ab alio, nempe ab auctore, administrari et regi? Quis solem die exoriri et lunam nocte apparere, immutabilique lege per aequalem omnino dierum numerum decrescere et crescere, atque ex sideribus alia quidem discurrere cursusque varie immutare, alia vero inerrantia constanter moveri adspiciens, non intelligat, illa necessario ab opifice aliquo gubernari¹⁾. Addit contemplationem inferiorum mundi partium, velut elementorum contrarias inter se qualitates et efficientias, annuarum tempestatum, quae admirabili et nunquam interrupta vicissitudine sibi succedunt invicem, contrariarumque rerum, ex quibus inferior hic potissimum mundus textitur, concentum et harmoniam, cujus tanta vis sit, ut, etsi contrariis ac perpetuo secum pugnantibus qualitatibus naturisque constent, ac se invicem infestent, perseverent tamen, in omnem temporum longinquitatem, nec altera consumat alteram et exstinguat. Atqui non res illae, pergit, quae inter se pugnant, et contrariae sunt, se ipsas simul copularent, nisi aliquis superior et dominus eas colligeret, cui et ipsa elementa, tamquam servi hero, tam prompte parent, cedunt et obtemperant, ut nullum eorum propriam naturam spectans alteri adversetur; sed singula Dominum colligantem agnoscentia, concordiam erga se servant, et quantumvis contraria sint natura, gubernantis voluntate ineant amicitiam²⁾. Quod nisi esset, addit subinde, nullus ordo (κόσμος), sed nil nisi confusio (ἀνομοία) videretur: nil locum suum servaret, sed omnia perturbata forent; nihil consisteret, sed cuncta essent instabilia³⁾. Cum igitur tanta sit rerum non modo diversarum, sed etiam inimicissimarum consentiens et continuata temperatio; cum nihil in universo incondite et turbide, sed omnia concinne compositaeque et quam aptissime cohaereant: necesse est dominum, qui illa una congregavit, constrinxit et conciliavit, mente et cogitatione attingamus. Nam tametsi oculis non conspicitur, ex ordine tamen et concordia rerum contrariarum, earum moderator, rector et imperator intelligi facile potest. Etenim quemadmodum si civitatem ex multis atque diversis hominibus, pusillis et magnis, divitibus et pauperibus, senibus et adolescentibus, viris et mulieribus compo-

¹⁾ *Con. Gentil.* n. 35. *Opp. T. 1.* p. 31.

²⁾ *Ib.* n. 36—37. p. 31 s.

³⁾ *Ib.* n. 37. p. 36.

tam, praeclare administrari et regi cerneremus, illosque, qui eam componunt, tametsi diversos, concordēs tamen inter se esse, neque divites adversus pauperes, neque majores contra minores, aut juniores contra senes pugnare, sed omnes aequaliter pacem habere: si haec, inquam, videremus, plane intelligeremus principis praesentiam hujus concordiae causam esse, etiamsi eum oculis non intueremur. Enimvero ubi ordo non est, sed confusio, argumento est, nullum ibi moderatorem esse; at ordo ducis et rectoris evidens signum est. Similiter cum in corpore membrorum inter se concordiam observamus, nec oculum auri adversari, nec manum cum pede dissidere, sed singula membra propria officia absque seditione persolvere: inde concludimus necessario animam in corpore esse, quae illa regat, quamvis eam non videamus. Ita ergo ex ordine et harmonia universitatis Deum mundi gubernatorem cogitemus necesse est ¹⁾. — Brevius Gregorius Naz. sic illa omnia complexus est: Etenim quod Deus sit, inquit, ac princeps quaedam causa, quae res omnes procreavit, atque conservet, tum oculi ipsi, tum lex naturalis docet: illi, dum rebus in aspectum cadentibus aciem affigunt, easque et pulchre fixas et stabiles esse, et progredi, atque immote, ut ita dicam moveri, ubique perspiciunt; haec autem, dum per res oculis subjectas ac recto ordine collocatas, auctorem earum conjectura quadam colligit atque assequitur. Quoniam enim modo universa haec rerum moles vel producta unquam fuisset, vel consisteret, nisi Deus omnia in rerum naturam protulisset atque conservaret? Quemadmodum enim quispiam citharam pulcherrime confectam et elaboratam conspiciens, ejusque concinnitatem et constitutionem, aut etiam ipsius citharae cantum audiens, nihil aliud, quam ipsius citharae conditorem atque citharoedum mente reputat, atque ad eum cogitatione fertur, etiamsi de facie ignotum, eodem quoque modo qui res effecit, effectasque movet atque conservat, manifestus est, etiamsi mente minime comprehendatur. Ac nimis profecto hebes et stolidus est, quisquis non hucusque sponte progreditur, naturaliumque demonstrationum vestigiis insistit ²⁾. — Gregorius Nyss. eum, qui Deum non esse dicat, docet, ex iis, quae artificiose et sapienter in mundo administrantur, inductum iri, ut per ea fateatur, esse

¹⁾ Ib. n. 38. p. 36 s.

²⁾ Or. 34. Opp. T. I. c. 476. C. D.

quandam vim, quae in iis ostenditur, superior universitate¹⁾. — Joannes Damascenus, Deum esse, ex rerum mutabilitate, conservatione et gubernatione; atque ordinato situ demonstrat. Omnia quae sunt, ait, aut creata sunt aut increata. Si creata, utique et mutabilia sunt. Quorum enim esse a mutatione incipit, ea mutationi quoque subsint necesse est, sive intereant, sive per voluntatis actus alia atque alia fiant. Sin autem increata, sequitur profecto, ut et mutari nequeant. Quorum enim esse contrarium est, horum etiam modus, quo sunt, proprietatesve contrariae sunt. Ecquis ergo hoc nobis non assentietur, omnia quae sunt, mutabilia esse? — Cum ergo mutabilia sint, sane etiam creata esse oportet. Si vero creata, haud dubium, quin ab aliquo opifice sint condita. Atqui creatorem increatum esse necessum est. Nam si ipse quoque creatus est, a quodam profecto creatus erit, siquæ donec ad aliquod increatum venerimus. Increatus igitur cum sit ille conditor, omnino nec mutabilis est. Hoc autem quid aliud nisi Deus fuerit? Porro ipsa quoque rerum creaturarum compages, conservatio atque gubernatio nos docent, Deum esse, qui universum hoc coagmentavit, sustentet, et conservet ei que provideat. Qui enim fieri potuisset, ut inter se pugnales naturae, ignis, inquam, et aquae, aëris, et terrae, ad finis mundi constitutionem coirent, tenacique adeo nexu cohaererent, ut nulla ratione solvi possint; nisi omnipotens vis aliqua ea compaginasset, ac perpetuo a dissolutione servaret. — Quid est, quod ea, quae in coelo; et quae in terra existunt; quaeque aërem pervagantur, et quae in aquis degunt; imo etiam quae his anteriora sunt, coelum, terram et aërem; ignis quoque et aquae naturam certis disposuit locis? a quonam commixta haec sunt et distributa? quid est, quod motum his impressit, perennique, nec ulla re cohibito cursu ea versat? Annon eorum artifex, qui rebus omnibus rationem modumque, quo universum hoc agatur, et regatur, indiderit? At quis horum artifex? Annon is, qui ea condidit, inque rerum naturam produxit? Nec enim τῷ αὐτομάτῳ, seu casui, eam vim facultatemque tribuerimus. Sit enim sane casus, quod exstiterint: at cujus tandem erit ea disposuisse? Verum illud quoque, si habet, concedamus: cujus autem erit

¹⁾ Praef. Or. cat. Opp. T. 3. p. 44.

eadem juxta illas, quibus primum condita sunt leges conservare et custodire? Alterius profecto, quam casus; atque hoc quidnam aliud sit, nisi Deus? ¹⁾ — Basilius, jam consideratione ipsius hominis, ex anima et corpore constantis, Deum cognosci, docet, tametsi nullis discernatur sensibus. *Diligens tui ipsius, inquit, contemplatio satis te deducet in Dei cognitionem. Nam si attenderis tibi ipsi, nil opus erit ex universorum structura ipsum opificem investigare, sed in teipso, velut in concinno quodam rerum summario, magnam conditoris tui sapientiam contuebere* ²⁾. — Ex consideratione generis humani existentiam Dei colligit Theodorus Abucara, Joannis Damasceni, ut quidam opinantur, discipulus. *Omnis numerus, ait, qui recipit accessionem, finem quoque recipit, numerus igitur hominum accessionem recipiens, finitus est, quamvis nos, quantus sit, ignoremus, sed ponamus brevitatis et declarationis gratia, omnes homines esse centum, fieri non potest, ut hi omnes fuerint geniti, alii quidem ex aliis ortum ducunt, sed mens rationem ortus et originis sursum revocans, omnino ad unum non genitum evadit, cum enim ad primum devenerit, non potest dicere, ex alio ortum esse, quia et ille alius ex alio item generatus esset, donec in primo mens consistat fixa, necesse igitur est ex terra natum esse hunc instar arborum, aut aeternum esse, aut ab aliquo creatore factum esse. Sed si e terra ortus fuisset, adhuc usque in hodiernum diem alios terra procrearet, sicut fit in genere arborum et herbarum, at quia hoc non fieri videmus, manifestum est, neque primum procreasse. Sed nec aeternus erat. Si enim principio caruisset, essetque aeternus, nunquam mortuus fuisset, neque interisset. Quod enim principium non habet, neque finem habet. Relinquitur igitur, ut factus fuerit, quod factum est, auctorem habet, est igitur creator, et auctor hominum Deus* ³⁾. — Tertullianus ait: *Habet Deus testimonia, totum hoc, quod sumus, et in quo sumus* ⁴⁾. — Lactantius: *Nemo est tam rudis, tam feris moribus, qui oculos suos in coelum tollens, tametsi nesciat, cujus Dei providentia regatur hoc omne, quod cernitur, non aliquam tamen esse intelligat ex ipsa rerum magnitudine, motu,*

¹⁾ *De fid. orthod.* l. 1. c. 3. Opp. T. 1. p. 126.

²⁾ *Hom. in illud: Attende tibi n. 7.* Opp. T. 2. p. 23.

³⁾ *Opusc. 3. Bibl. max. PP. Lugd. T. 16. p. 733. D. E.*

⁴⁾ *Adv. Marcion, l. 1. c. 10.* Opp. V. 2. p. 156. Cf. c. 13 s. p. 158 s.

dispositione, constantia, utilitate, pulchritudine, temperatione; nec posse fieri, quin id, quod mirabili ratione constat, consilio majori aliquo sit instructum ¹⁾. — Augustinus: *Mundus ipse*, ait, *ordinalissima sua mutabilitate et mobilitate et visibilibus omnium pulcherrimaspecte quodam modo tacitus, et factum se esse, et non nisi a Deo ineffabiliter atque invisibiliter magno, et ineffabiliter atque invisibiliter pulchro fieri se potuisse, proclamat* ²⁾. Et alio loco, irridens eos, qui, quae sensibus non attrahant, nolunt credere, praesertim Deum, qui non oculis, sed ex operibus videatur: *Non video*, ait, *inquit* (incredulus): *quid crediturus sum? Anima enim tua videtur, ut opinor? Stulte, corpus tuum videtur: animam tuam quis videt? Cum ergo corpus tuum solum videatur, quare non sepeliris? Miratur, quia dixi: Si corpus tantum videtur, quare non sepeliris? Et respondet* (sapit enim ad hoc): *Quia vivo. Unde scio, quia vivis, cujus animam non video? Unde scio? Respondebis: Quia loquor, quia ambulo, quia operor. Stulte, ex operibus corporis agnosco viventem, ex operibus creaturae non potes agnoscere Creatorem?* ³⁾. — Boëthius: *Mundus hic ex tam diversis, contrariisque partibus in unam formam minime convenisset, nisi unus esset, qui tam diversa conjungeret; conjuncta vero naturarum ipsa diversitas, invicem discors dissociaret atque divelleret; nisi esset unus, qui quod nexuit, contineret. Non tam vero certus naturae ordo procederet, nec tam dispositos motus, locis, temporibus, efficientiis, spatiis, qualitatibus explicaret, nisi unus esset, qui has mutationum varietates manens ipse disponeret. Hoc quidquid est, quo condita manent, atque agitantur, usitato cunctis vocabulo Deum nomino* ⁴⁾. — Idem argumentum postea quoque Theologi scholastici tractarunt, quorum omnium loco solus Richardus Victorinus audiatur, qui Deum existere demonstrat ad hunc fere modum. Omne, quod est, vel ab aeterno est, vel ex tempore coepit esse. Itemque vel a semetipso est, vel ab alio. Ex quo triplex

¹⁾ *Div. instit. l. 1. c. 2.* Opp. T. 1. p. 8 a.

²⁾ *De civ. D. l. 11. c. 4. n. 2.* Opp. T. 7. c. 274. Cf. *l. 8. c. 6. c. 194 a.*

³⁾ *Enarr. in Ps. 73. n. 25.* Opp. T. 4. c. 781.

⁴⁾ *De consol. l. 3. pros. 12.* p. 70.

oritur modus, quo est aliquid. Aut enim est ab aeterno, et a se ipso, aut e contrario neque ab aeterno, neque a se ipso; aut ab aeterno, sed non a se ipso. Nam quod tertio huic oppositum est, a se ipso esse non ab aeterno, nihil omnino est. Quippe *nihil omnino potest esse a semetipso, quod non sit ab aeterno. Quidquid enim ex tempore esse coepit, fuit, quando nihil fuit. Sed quamdiu nihil fuit, omnino nihil habuit, et nihil potuit. Nec sibi ergo, nec alteri dedit, ut esset, vel aliquid posset. Alioquin dedit, quod non habuit, et fecit, quod non potuit.* Jam vero ex illis tribus generibus, quod secundum est, ut nec ab aeterno sit, nec a semetipso, quotidie oculis videmus. Nam innumerabilia nascuntur et intereunt. Primum autem, quod ex aeterno est a semetipso, id est a nullo alio, certa ratione conficitur. *Nam si nihil a semetipso fuisset, non esset omnino, unde ea existere potuissent, quae suum esse a semetipsis non habent, nec habere valent. Convincitur itaque, aliquid esse a semetipso, et eo ipso (uti jam dictum est) et ab aeterno; alioquin fuit, quando nil fuit.* Porro illud, quod ex aeterno est et a semetipso, esse Deum, sic deinde concludit: *In tanta multitudine rerum existentium, et tam multiplici differentia graduum esse oportet aliquid summum. Summum vero omnium dicimus, quo nihil est majus nihil melius. Absque dubio autem melior est natura rationalis, quam natura irrationalis. Oportet itaque ut aliqua rationalis substantia sit omnium summa. — Non potest autem hoc ipsum, quod est, a suo inferiori accipere. Quare a se ipsa, non ab alia, habet, ut sit. Proinde summum illud, quod a nullo habet, ut sit, sed a semetipso est, et a quo sunt omnia, summum est esse, h. e. summa essentia, adeoque omnis essentia, omnis potentia, omnis sapientia, quoniam ab illo, ceu fonte, manant omnia ¹⁾.*

Quapropter et quum revelatio divina *humanae mentis aciem*, ut loquitur Catechismus Rom. ²⁾, *ita exacerit, ut in coelum nullo labore penetrare possit, atque divino splendore collustrata, primum quidem aeternum ipsum luminis divini fontem, deinde quae infra ipsum posita sunt, intueri; dum ratio, sibi relictæ, ab iis, quae sensibus percipiuntur, paulatim progressa non nisi post longos labores, et tandem invisibilia Dei contemplatur, primamque omnium rerum causam et auctorem agnoscit atque intelligit: recte*

¹⁾ De SS. Trinit. l. 1, c. 6—12. Opp. Rothom. 1650. p. 219—220.

²⁾ Ed. Vienn. 1833, p. 13.

fideles, se vocatos esse de tenebris in admirabile lumen, quod est apud Apostolorum Principem, cum summa animi iucunditate experientes, primo se in Deum credere profitentur; atque recte ab Ecclesia docente in omnibus Symbolis, sive in Conciliis oecumenicis sive extra eadem confectis, primus fidei articulus: Credo in Deum, collocatus occurrit.

C. Revelationi quoque rationem prorsus assentiri, atque summa, quae postulari potest, certitudine ac evidentia ex notione seu natura entis perfectissimi, porro ex existentia contingentis utriusque mundi, atque ordinis in hoc conspicui, physici scilicet et moralis, nec non ex consensu omnium gentium ac populorum existentiam Dei demonstrare, in Theologia generali ¹⁾ ostendimus.

Observ. 1. In Theologia generali pariter adnotavimus, Theologos inter se haud convenire, utram cognitio Dei nobis ingenita sit, et a natura intime impressa, seu immediate ab uno naturae auctore Deo animis nostris indita, ita ut ex sola terminorum seu notionum apprehensione mens sana et attenta intelligat, Deum esse, eo ipso modo, quo statim ac sine praevio discursu e. g. concipimus veritatem, impossibile esse, ut idem simul sit, et non sit, atque illud: alteri ne feceris, quod tibi fieri non vis; an vero nonnisi praevio discursu ac ratiocinio, facili quidem, et unicuique obvio, cognitio Dei haberi queat. Neque controversia haec ad fidem spectat. Nos pro concessa nobis in eiusmodi rebus libertate arbitramur, ideam Dei, licet menti nostrae valde prope adsit, tamen eidem a natura impressam non esse; quum ipsa manifeste intuitiva non sit, sed potius abstracta; atque quia cognitioni a natura insitae nemo dissentit ac reluctatur, quod tamen in idea Dei obtinere experientia contestatur. Qui autem sententiam contrariam ²⁾ in locis S. Scripturae supra laudatis deprehendisse sibi videntur: aperte oculis, hac opinione praeoccupatis, nimium indulgent ³⁾. Patrum vero testimonia ⁴⁾ facile de mediata quoque Dei cognitione intelligi possunt, idque eo magis, quum et ipsi illa hoc sensu exponant.

¹⁾ Cf. P. 1. §. 3—14. p. 14—33.

²⁾ Cf. Kuhn, Kathol. Dogmatik. Tüb. 1846. p. 301 s. 318 s.

³⁾ Ita quoque Eccl. 1, 16. ubi de timore Dei concreto cum fidelibus Scriptor sacer loquitur, huc non pertinere, per se patulum est.

⁴⁾ Cf. Tertull. Cont. Marcion. l. 1. c. 10. Opp. V. 2. p. 156. — Theophil. Antioch. Ad Antol. l. 1. n. 5. Opp. Justin. p. 363. — Tatian. Cont. Graec. n. 4. lb. p. 280. — Hieronym. Comm. in Epist. ad Gal. c. 1. Opp. T. 7. P. 1. c. 391. et c. 3, 2. c. 419. — Augustin. ll. s. cc,

Observ. 2. Porro ibidem quoque observavimus, quid sentien-
dum sit de sententia illa, demonstrationem de Dei existentia stricte
talem fieri non posse, aut saltem nullam esse instituendam ¹⁾; si-
mulque errores sententiae nostrae oppositos, atheismum, ideotheis-
mum, autotheismum, pantheismum ac deismum, quos modo, do-
gmate Catholico demonstrato, totidem sententias haereticas esse con-
spicimus, confutavimus ²⁾. Ex iis autem, quae hic atque etiam ibi
jam diximus, quoque colligitur, quam falso adstruatur, sententiam,
quae negat, Dei existentiam posse demonstrari, in SS. Litteris tra-
di, atque etiam ab Ecclesia teneri; quum illae, ut ex testimoniis lau-
datis patet, recte contrarium doceant, atque haec pari ratione sem-
per id ipsum professsa est. Et sane, si inficias itur, Dei existentiam
demonstrari posse: statui debet, et revera etiam a patronis hujus
sententiae statuitur, ante revelationem admissam solo libero volunta-
tis decreto existentiam Dei credendam esse ³⁾, aut mentem nostram
veritatem sententiae, Deum existere, immediate perspicere, aut vero
sibi immediate Dei esse consciam. Ast sententia prima admissa, erro-
res omnes, etiam absurdissimi, pro veris haberi debebunt; alterum
certo, ut cuilibet sensus intimus testatur, non obtinet; et tertium
pantheismum sapit, quum aperte 'mens nonnisi sui ipsius, vel quod
secum unum idemque est, immediate conscia esse queat. Accedit sen-
tentiam, Deum ab intellectu humano per solas naturae vires videri
posse, in Conc. Viennensi esse proscriptam ⁴⁾. — Ex altera
parte autem certissimum est, quod item alia occasione fassi sumus ⁵⁾,
ideam seu cognitionem Dei in mente hominis immediata ac superna-
turali revelatione divina excitatam, et per historiam seu traditionem
propagatam esse ⁶⁾.

§. 5. Unitas Dei.

Probata existentia Dei, sponte sua ac necessario consequitur
ejus unitas, seu non plures, sed unum tantum natura et substan-

¹⁾ Ib. §. 14. Obs. 1. p. 33 s.

²⁾ Ib. §. 15—18. p. 35—41.

³⁾ Cf. Rußn, op. c. p. 444.

⁴⁾ De haeret. n. 5. Cf. Bail, Summ. Conc. Par. 1659. T. I. p. 342. Adeo-
que non tam manifeste a vero aberrant (Cf. Rußn, op. c. p. 450) Per-
rone, Günther, Baltzer etc., qui sententiam de immediata Dei
cognitione pantheismi nomine suspectam habent.

⁵⁾ Cf. Theol. gener. P. 1. §. 14. Obs. 1. p. 34 s.

⁶⁾ Cf. Etquedenmaier, Die christliche Dogmatik, Freib. 1844. I. Th. p. 7.

tia esse Deum; nam ut recte Tertullianus scribit, *Deus si non unus est, non est, quia dignius credimus non esse, quodcumque non ita fuerit, ut esse debeat* ¹⁾. Dicimus autem unum Deum in ea strictissima significatione, quae cujuslibet aequalis consortium excludit, ita ut Deus non tantum specie naturae ejusdem, sed et numero unus ac singularis sit.

Unitatis Dei infenai hostes exstiterere Gentiles et inter Christianos haeretici nonnulli. *Gentiles*, idolorum cultui addicti, innumeros fere venerabantur deos. Ex haeticis, alii, ut *Gnostici*, plures induxerant deos, quos *Aeones* vocabant, genealogias et conjugia eorumdem fingentes ²⁾. Alii vero, ut *Manichaei*, duos deos admittebant, seu duplex rerum omnium principium, bonum et malum, utrumque ingenitum, aeternum, attamen alterum alteri adversum, illud boni omnis ac rerum invisibilium auctorem, hoc omnis mali atque rerum sensibilibus et materialium causam, porro hoc veteris, atque illud novae Legis conditorem. Hinc duo regna, alterum lucis, tenebrarum alterum; indeque continuae in hominum vita bonorum malorumque vicissitudines ³⁾. Alii tandem tres divinas personas non solum relatione, sed natura ac substantia realiter distinctas affirmarunt, *Tritheistae* propterea dicti.

Esse autem unum et unicum natura Deum, solum verum, solum vivum et immortalem, non tantum

a.) innumera SS. Litterarum, tum V. tum N. T., loca praedicant, sed hoc primum et fundamentale dogma est utriusque, tam Mosaicae, quam Christianae, religionis. Hinc

1) *Moses* statim ab initio Pentateuchi et deinceps Deum unum exhibet Creatorem coeli et terrae, eundemque solum cuncta pro suo liberrimo ac sapientissimo consilio regentem ac moderantem. Porro primum Legis praeceptum est: *Ego sum Dominus Deus tuus. — Non habebis deos alienos. Non facies tibi sculptile, neque omnem similitudinem, quae est in coelo desuper, et quae in terra deorsum, nec eorum, quae sunt in aquis sub terra* ⁴⁾. Inprimis autem Deuteronomio id ipsum *Moses* gravius et crebrius inculcat, ne ipso vita defuncto Judaei communi populorum depravatione corrumpereantur. Postquam enim

¹⁾ *Adv. Marcion. l. 1. c. 3. Opp. V. 2. p. 138.*

²⁾ *Cf. Frig, Regenerirton Würzb. 1828. 2. B. 2. X. p. 17 ss.*

³⁾ *Cf. Id. 3. B. 1. X. p. 275 ss.*

⁴⁾ *Exod. 20, 2—4. Cf. 3, 14.*

prohibuerat, ne Israelitae hominum imagines haberent, aut animalium, atque ab astrorum cultu absterruerat, paucis interjectis, ita concludit: *Scito ergo hodie, et cogitato in corde tuo, quod Dominus ipse sit Deus in coelo sursum, et in terra deorsum, et non sit alius* ¹⁾. Quod inferius his verbis repetit: *Audi Israel, Dominus Deus noster, Dominus unus est* ²⁾. Atque inde officium, Deum ex toto corde super omnia diligendi, eique omnem vitam mancipandi infert ³⁾. Et iterum nomine Dei ad populum Israeliticum ait: *Videte, quod ego sim solus et non sit alius Deus praeter me* ⁴⁾. Huc quoque pertinent varia instituta, ut una urbs sancta, unum templum, unum altare, unum sacerdotium, etc., ideo tantum a Moyse ordinata, quo certius fides in unum Deum inter Israelitas conservaretur.

2) Id ipsum tradiderunt Prophetae, quorum una vox erat, unum esse Deum vivum et verum, et vana esse numina gentium omnia. Quod in illorum scriptis, quemadmodum et in Psalmis, aliisque V. T. libris, centies repetitur, ita ut nihil sit apertius. *Quoniam quis Deus, ait Psalmista, praeter Dominum? aut quis Deus praeter Deum nostrum* ⁵⁾? Et rursus: *Quoniam magnus es tu, et faciens mirabilia: tu es Deus solus* ⁶⁾. Siracides: *Unus est altissimus Creator omnipotens, et Rex potens, et metuendus nimis, sedens super thronum illius; et dominans Deus* ⁷⁾. Isaias: *Ego primus et novissimus, et absque me non est Deus* ⁸⁾.

3. Idem tandem docuit Christus, idem gentibus praedicarunt Apostoli. Legisperito enim interroganti, quodnam esset primum omnium mandatum, respondit divinus Salvator: *Quia primum omnium mandatum est: Audi Israel, Dominus Deus tuus, Deus unus est: et diliges Dominum Deum tuum ex toto corde tuo, etc.* ⁹⁾. Et alia occasione ait: *Haec est vita aeterna: Ut*

¹⁾ Deut. 4, 15—39.

²⁾ Ib. 6, 4.

³⁾ Ib. 6, 5. Cf. 6, 1—3. 4, 23 ss. 7, 9 ss.

⁴⁾ Ib. 32, 39.

⁵⁾ Ps. 17, 32.

⁶⁾ Ps. 85, 10. Cf. 82, 19. 113, 3 ss. Sap. 12, 13. 13, 1—15. 19. 1. Reg. 5, 1 ss. 2. Reg. 7, 22. 3. Reg. 8, 60. 18, 37. Tob. 8, 19. 13, 4.

⁷⁾ Eccl. 1, 8. Cf. 11, 4, 36, 5.

⁸⁾ Is. 41, 6. Cf. 44, 24. 36, 16. 43, 10. 11. 45, 5—7. 46, 9. Jer. 2, 26 ss. 10, 1 ss. Os. 13, 4. Mal. 2, 10.

⁹⁾ Marc. 12, 28 s.

cognoscant te, solum Deum verum, et quem misisti Jesum Christum ¹⁾. Paulus autem scribit: *Scimus, quia nihil est idolum in mundo, et quod nullus est Deus, nisi unus* ²⁾.

B) Hanc porro veritatem nullo non tempore omnium Christianorum animis fuisse impressam, atque a magisterio Ecclesiastico traditam, res tam certa est, ut probatione vix indigeat. Etenim

1) SS. Patres non tantum ubique Deum unum profitentur, sed et adversus Gentiles nullum argumentorum genus omitunt, ut quos ex fidei principiis convincere haud poterant, ratione ad Deum verum adducerent. Et quidem

a) unitatem Dei ex ipsa eiusdem idea, quae nobis insit, quaeque non tantum idea Dei, sed Dei unius est, demonstrant. Et revera mens nostra, quae pro sua indole necessario ad unitatem tendit, omnem deorum pluralitatem respuit. Nam ipsa sine sufficiente ratione nil potest admittere, et hic insuper sibi ipsi aperte repugnaret; quum ens non necessarium, quale manifeste omnis alter et quivis ulterior Deus esset, pro ente necessario haberet ³⁾. Quapropter et unius Dei cognitionem servatam apud omnes gentes in media deorum adulterinorum coluvieprehendimus. SS. Patres hancce unius Dei cognitionem seu ideam, menti nostrae unice convenientem, et eatenus nobis insitam, naturae oraculum vocant, aut insitum animae testimonium, quod se vario modo in homine, etiam vanis deorum superstitionibus ac publicis erroribus occupato; atque ipso invito, prodatur; quum homines instinctu naturae eo ferantur, ut unicum Deum agnoscant, ac communi sermone fateantur. *Vultis, ait Tertullianus ex animae ipsius testimonio (Deum unum esse) comprobemus? quae licet carcere corporis pressa, licet institutionibus pravis circumscripta, licet libidinibus ac concupiscentiis evigorata, licet falsis deis exancillata, cum tamen resipiscit, ut ex crapula, ut ex somno, ut ex aliqua valetudine, et sanitatem suam potitur, Deum nominat, hoc solo nomine, quia proprio Dei veri. Deus magnus, Deus bonus, et: Quod Deus dederit, omnium vox est; judicem quoque contestatur illum, Deus videt, et Deo commendo, et Deus mihi reddet. O testimonium animae natura-*

¹⁾ Joan. 17, 3. Cf. Matth. 10, 17. Marc. 10, 18.

²⁾ 1. Cor. 8, 4. Cf. Act. 14, 14. 17, 22 ss. Rom. 3, 29 s. Ephes. 4, 6. Gal. 3, 20. 1. Tim. 1, 17. 2. 5, 6, 15—16. Hebr. 1, 1.

³⁾ Cf. Anselm, *Monol.* c. 3. Opp. p. 5. c. 1.

liter Christianae ¹⁾. Similia habent Irenaeus ²⁾, Athenagoras ³⁾, Minutius Felix ⁴⁾, Cyprianus ⁵⁾, Arnobius ⁶⁾, Lactantius ⁷⁾.

b) Huic adfines est alterum argumentum Patribus usitatum, inde proxime deductum, quod altero praeter unum Deum admissio, numerus deorum infinitus admitti deberet; infinitus autem entium existentium numerus prorsus dari non potest, recte propterea, quoniam numerus entium possibilium infinitus est, et ideo nunquam exauriri potest. Quo sensu scribit Tertullianus: *Quaecunque ratio plura summa magna non patitur admitti; eadem nec duo, ut ipsa plura post unum; post unum enim numerus. Quae potuit duo admittere, eadem potuit et plura; post duo enim multitudo, unione jam excessa* ⁸⁾.

c) Tertium porro argumentum a Patribus petitur ex notione infinitae Dei perfectionis, quae numero deorum adsumto tollitur. Nam

a) si duo aut plures essent dii: nullus eorum vere esset ens summum ac supremum; quum hoc par habere non possit, summum quippe non est, cui aliquid adaequatur. Ita fere Tertullianus: *Deum autem, ait, unum esse oportet; quia quod summum sit, Deus est; summum autem non erit, nisi quod unicum fuerit. Unicum autem esse non potest, cui aliquid adaequabitur* ⁹⁾. Quod etiam alibi urget, scribens: *Deus, si non unus est, non est: quia dignius credimus, non esse, quodcunque non ita fuerit, ut esse debeat. Deum autem, ut scias, unum esse debere, quaere quid sit Deus, et non aliter invenies. Quantum humana conditio de Deo definire potest, id definio, quod et omnium conscientia agnoscel, Deum summum esse magnum, in aeternitate constitutum, innatum, infectum, sine initio, sine*

¹⁾ *Apolog. c. 17.* Opp. V. 1. p. 42 s. Cf. *De testim. anim. c. 2.* p. 122 ss. *Ad Scapul. c. 2.* p. 128.

²⁾ *Cont. haer. l. 2. c. 6. n. 1.* p. 122. c. 1.

³⁾ *Legat. pro Christ. n. 7.* Opp. Justin. p. 302.

⁴⁾ *Octav. c. 18.* Galland: *Bibl. PP. T. 2.* p. 391. B.

⁵⁾ *De idol. vanit. c. 5.* Opp. V. 2. p. 109.

⁶⁾ *Adr. Gent. l. 2. c. 2.* p. 46.

⁷⁾ *Div. instit. l. 2. c. 1.* Opp. T. 1. p. 114.

⁸⁾ *Adr. Marcion. c. 5.* V. 2. p. 150 s. Cf. Prudentius, *Apotheos. Cont. Union. Poëm. 2.* vv. 186—189. In Galland, *Bibl. PP. T. 8.* p. 471.

⁹⁾ *Adr. Hermog. c. 4.* V. 1. p. 352.

fine. — Cum de isto conveniat apud omnes — quae erit jam conditio ipsius summi magni? nempe ut nihil illi adaequetur, id est, ut non sit aliud summum magnum: quia si fuerit, adaequabitur; et si adaequabitur, non erit jam summum magnum, eversa conditione, et ut ita dixerim, lege, quae summo magno nihil simil adaequari. Porro summum magnum unicum sit necesse est. Ergo et Deus unicus erit, non aliter Deus, nisi summum magnum; nec aliter summum magnum, nisi parem non habens; nec aliter parem non habens, nisi unicus fuerit¹⁾.

β. Si plures assumerentur dii: perfectiones divinae inter plures distribuerentur, ita ut nullus esset infinite perfectus, nullus itaque Deus; alioquin enim, si in quovis statueretur infinita perfectio ac virtus, superflui essent, quicunque praeter unum assumerentur. Quod respicit Athanasius, ubi ait, *multos deos nullos deos esse* ²⁾. Cyprianus autem: *Unus*, inquit, *igitur omnium dominus est Deus. Neque enim illa sublimitas potest habere consortem, cum sola omnem teneat potestatem* ³⁾. Atque Lactantius: *Satis (ut opinor) ostendimus in nostris Institutionibus, deos multos esse non posse; quod divina vis ac potestas si distribuatur in plures, diminui eam necesse sit: quod autem minuitur, utique et mortale est; si vero mortalis non est, nec minui nec dividi potest. Deus igitur unus est; in quo vis et potestas consummata, nec minui potest nec augeri. Si autem sunt multi, dum habent singuli potestatis aliquid ac numinis, summa ipsa decrescit; nec poterunt singuli habere totum, quod est commune cum pluribus: unicuique tantum deerit, quantum caeteri possidebunt* ⁴⁾. Inde, quod ens summum par habere non possit, unitatem Dei porro probare satagunt Irenaeus ⁵⁾, Tertullianus ⁶⁾, Abaelardus ⁷⁾, Thomas Aq. ⁸⁾, Richardus a S. Vict. ⁹⁾, Duns Scotus ¹⁰⁾.

¹⁾ *Adv. Marcion. l. 1. c. 3. Opp. V. 2 p. 148 s. Cf. Iren. Cont. haer. l. 2. c. 1. n. 4. p. 116.*

²⁾ *Adv. Gentil. n. 38. Opp. T. 1. P. 1. p. 37.*

³⁾ *De idol. vanit. c. 5. Opp. V. 2. p. 109.*

⁴⁾ *De ira Dei. c. 11. Opp. T. 2. p. 151. Cf. Div. inst. l. 1. c. 3. T. 1. p. 9 s.*

⁵⁾ *Cont. haer. l. 2. c. 1. n. 5. p. 116.*

⁶⁾ *Adv. Marcion. l. 1. c. 5—6. Opp. V. 2. p. 151 s.*

⁷⁾ *Epit. Theol. Christ. ed. Reinwald. Berol. 1835. p. 53.*

⁸⁾ *Cont. Gent. l. 1. c. 42. n. 3. Opp. T. 18. p. 36. c. 2.*

⁹⁾ *De Trinit. l. 1. c. 14. Opp. p. 221. c. 1.*

¹⁰⁾ *L. 1. dist. 2. q. 4. art. 4. Quaest. reform. in 4. H. Sentent. Col. 1635. p. 14.*

7. Accedit, jam in se absurdum esse, Deum, qui veritas, sapientia, sanctitas, etc. absoluta est, multiplicem cogitari; quum veritas, sapientia, etc. non nisi una esse queat, atque omnem multiplicationem prorsus repudiet. Ita Fulgentius: *Vera, ait, religio in unius constat veri Dei servitio. Ipsa namque veritas unus est Deus, et sicut excepta una veritate non est alia veritas, sic absque uno Deo vero non est alius verus Deus: ipsa enim una veritas est naturaliter una vera divinitas. Et ita non possunt duo veri dñi veraciter dici, sicut ipsa una veritas naturaliter non potest dividi* ¹⁾.

d. Quantum argumentum sumserunt Patres ex admirabili mundi dispositione et administratione. Nam omnes partes, sive totum sive res singulas consideraverimus, tam apte connexae sunt, ut appareat, unicum esse rerum opificem, unicum quoque rerum cunctarum moderatorem. De his egregie disserit Athanasius. *Si quidem, inquit, ipse dispositionis ordo, omniumque partium concors conspiratio non multos, sed unum mundi ducem et moderatorem Verbum esse, manifeste ostendit. Nam si plures mundo praessent, ordo ille servari non posset, sed omnia confusione et perturbatione plena essent. — Siquidem firmisimum, pergit inferius, illud argumentum est, unum universi esse auctorem, quod scilicet non multi sed unus sit mundus. Nam si multi essent dñi, multos et diversos mundos esse oporteret. Neque enim decet vel multos unum mundum construere, vel unum a multis aedificari: hinc enim non pauca absurda sequerentur. Primum si unus mundus a multis factus esset, id auctorum imbecillitatem argueret, utpote cum a multis unum opus fuisset confectum: nec leve profecto id esset signum imperfectae singulorum ad faciendum scientiae. Enimvero si unus sufficebat, non multi mutuum inopiam explerent. Atqui in Deo aliquid deesse non solum dictum impium est, sed omne nefas superat. — Id etiam silendum non est, si a multis factus est mundus, diversos et sibi ipsi dissimiles motus habuisse. Nam fieri non potuit, quin ad singulos auctores respiciens varios motus habuerit. In illa autem varietate, ut supra dictum est, nullus rursus ordo in mundo servari posset, sed confusa et perturbata omnia forent. Nam neque navis a multis gubernata*

¹⁾ Epist. 8. ad Donat. c. 4. n. 10. p. 201. Cf. Richard a S. Vict. *De Trin.* l. 1. c. 14. 17. Opp. 221.

recto cursu ferri potest, nisi ejus clavum unus gubernator tenuerit: nec lyra a multis pulsata perfectum concentum perficiet, nisi musicus unus eam percusserit ¹⁾. Nec non Origenes ²⁾, Joannes Damasc. ³⁾, Minucius Felix ⁴⁾, Cyprianus ⁵⁾, Lactantius ⁶⁾, Ambrosius ⁷⁾, Thomas Aquinas ⁸⁾.

e. Tandem insuper id ipsum insignium poëtarum ac philosophorum, nec non Sibyllarum testimoniis, iisque quam plurimis comprobare satagunt, ut Orphei, Aeschili, Sophoclis, Hesiodi, Arati, Pythagorae, Platonis, Menandri, et aliorum. Quod praestant Justinus M. ⁹⁾, Athenagoras ¹⁰⁾, Theophilus Antioch. ¹¹⁾, Clemens Alex. ¹²⁾, Eusebius ¹³⁾, Cyrillus Alex. ¹⁴⁾, Minucius Fel. ¹⁵⁾, Lactantius ¹⁶⁾, Prudentius ¹⁷⁾, Paulus Orosius ¹⁸⁾.

2. Attamen non tantum Patres singuli unitatem Dei docuerunt, atque contra infideles et haereticos defenderunt, sed et universa Ecclesia docens semper ac ubique eandem fidelibus tenendam proponebat. Nunquam autem fundamentale dogma hoc apertius Ecclesia professus est, quam quum asserenda esset distinctio personarum divinarum contra haereticos, ne scilicet Trinitatem adstruendo, unitatem tollere videretur. Hinc expresse in

¹⁾ *Or. cont. Gent. c. 38—39. Opp. T. 1. P. 1. p. 37 s.*

²⁾ *Cont. Cels. l. 1. c. 23. Opp. T. 1. p. 340.*

³⁾ *De orth. fid. l. 1. c. 5. Opp. T. 1. p. 129.*

⁴⁾ *Octav. c. 18. Galland. Biblioth. PP. T. 2. p. 390 s.*

⁵⁾ *De idol. punit. n. 5. Opp. V. 2. p. 109.*

⁶⁾ *Div. instit. l. 1. c. 3. Opp. T. 1. p. 9 ss.*

⁷⁾ *De fid. l. 1. c. 4. n. 31. Opp. T. 2. c. 449.*

⁸⁾ *Cont. Gent. l. 1. c. 42. n. 6. Opp. T. 18. p. 36 s.*

⁹⁾ *Cohort. ad Graec. n. 18—19. Opp. p. 20 s. De Monarch. n. 2 ss. p. 37 ss.*

¹⁰⁾ *Legat. pro Christian. n. 5—7. Opp. Justin. p. 300 ss.*

¹¹⁾ *Ad Autol. l. 2. n. 36. Ib. p. 400 ss.*

¹²⁾ *Cohort. ad Gent. n. 6—7. Opp. T. 1. p. 61 ss. Cf. Strom. l. 5, c. 14.*

T. 2. p. 714 ss.

¹³⁾ *De praepar. Evang. l. 13. c. 13. p. 678 ss. l. 11. c. 13. p. 530.*

¹⁴⁾ *Cont. Julian. l. 1. Opp. T. 6. P. 2. p. 23 ss.*

¹⁵⁾ *Octav. c. 19. Galland. Bibl. PP. T. 2. p. 391 s.*

¹⁶⁾ *Div. instit. l. 1. c. 5—6. Opp. T. 1. p. 14—29. De ira D. c. 11. T. 2. p. 152 ss.*

¹⁷⁾ *Apoth. cont. Unionit. Poëm. 2. In Galland. Bibl. PP. T. 8. p. 471 s.*

¹⁸⁾ *Hist. l. 6. c. 1. Ib. T. 9. p. 121. Cf. Huet. Quaest. Aetn. l. 2. c. 2. n. 13. Ven. 1761. p. 64 s. Petav. De Deo, Deiq. propr. l. 1. c. 3. n. 2—3. De theol. dogm. Antv. 1700. T. 1. p. 39.*

Symbolo Nicaeno-Constantinopolitano dicitur: *Credimus in unum Deum, πρὸς ἑνὸς ὡς ἱνα Θεὸς*. Quod Symbolum in oecumenica Synodo Ephesina a. 431. prout et in posterioribus comprobatum est. Concilium Lateran. IV. a. 1215. autem habet: *Firmiter credimus et simpliciter confitemur, quod unus solus est verus Deus* ¹⁾. Atque Symbolum Athanasianum: *Fides autem Catholica haec est, ut unum Deum in Trinitate et Trinitatem in unitate veneremur*. Et ita quoque expressus invenitur hic fidei articulus in Symbolis particularium Ecclesiarum fere omnium, imprimis Orientis, ut Ecclesiae Caesareensis, Hierosolimitanae, Antiochenae, Smyrnenis, Alexandrinae ²⁾, porro in Symbolo Synodi Antiochenae contra Paulum Samosatenum a. 264. celebratae ³⁾, quod citatur in Concilio Ephesino ⁴⁾, et Concilii Toletania. 400. ⁵⁾, necnon in regula fidei Ecclesiae universalis, prout ab Irenaeo ⁶⁾, Tertulliano ⁷⁾, Origene ⁸⁾, et in Constitutionibus Apostolicis ⁹⁾ describitur.

Quapropter et Ecclesia semper non tantum gentilismum, sed et doctrinam tam Gnosticorum, quam Manichaeorum oppugnavit atque rejecit.

Fideles autem statim ab initio veritatem, non nisi unum dari Deum, tenuisse, jam inde adparet, quoniam a plebe superstitiosa recte propter huncce fidei articulum athei et religionis adversarii vulgo nuncupabantur.

C. Unitatem Dei denique quoque a ratione doceri, quum idea Dei veri simul sit idea unius Dei, ex rationibus, quibus SS. Patres monotheismum propugnabant, supra allatis, colligitur.

Observ. Monotheismum originalem religionis generis humani formam fuisse, utpote ex supernaturali revelatione profectam, ex SS. Bibliis certum est atque exploratum. — Quod ad sententiam ad-

¹⁾ Capit. 1. De Ad. Cathol. Mansi, Coll. Conc. T. 22. c. 981 et 982.

²⁾ Cf. Fahn, Bibliothek der Symbole und Glaubensregeln der apost. kathol. Kirche. Bresl. 1842. p. 42—59.

³⁾ Mansi, Coll. Conc. T. 1. c. 1033—34.

⁴⁾ Ib. T. 5. c. 176 s.

⁵⁾ Ib. T. 3. c. 1003.

⁶⁾ Cont. haer. l. 1. c. 10. n. 1. p. 48. et l. 3. c. 4. n. 2. p. 178.

⁷⁾ De veland. virg. c. 1. Opp. V. 2. p. 25. Cf. Adv. Prax. c. 2. 13. p. 204. 217. De praescript. haeret. c. 13. V. 1. p. 306

⁸⁾ De princip. l. 1. praef. n. 4. Opp. T. 1. p. 47.

⁹⁾ L. 6. c. 14. PP. apost. ed. Coteler. Amstel. 1724. V. 1. p. 346.

versariorum attinet, contendendum, polytheismum ante diluvium viguisse, idque jam ex nomine אֱלֹהִים et phrasibus, quibus plures dii loquentes proferuntur, ut: *Faciamus hominem ad imaginem, et similitudinem nostram*, etc. ¹⁾, adparere: pluralis ille numerus aut majesticus est, aut vero tres in Deo personas exprimens; nomen אֱלֹהִים autem etiam apud Scriptores alios, quorum aevo certo fides in unum Deum in populo Israëlitico vigeat, et speciatim apud Isaiam, patheticum monotheismi praeconem, occurrit ²⁾. Et sane Moyses, qui legislationem suam Genesi quasi fundamento imposuit, monotheismi, qui totius antiquae oeconomiae caput est, periculum in illo nomine haud vidit, neque Scriptores Hebraei eo polytheismum significari crediderunt. Omnis autem difficultas disparet per declarationem populo Israëlitico factam: *Scito ergo hodie et cogitato in corde tuo, quod Dominus ipse sit Deus, יְהוָה הוּא ה' אֱלֹהִים, in caelo sursum et in terra deorsum, et non sit alius* ³⁾. Hinc illa tam frequens compellatio *Jehova - Elohim* ⁴⁾ — Qui vero asserunt, primam hominum religionem fuisse fetichismum, seu cultum rerum creaturarum sensibilem, et idololatriam: a priori historiam confingunt, et gratis sumunt, homines in cognitionibus semper proficere, et nunquam regredi; quod universa historia, et praesertim historia religionis falsum esse ostendit.

§. 6. Deus a mundo diversus.

Quando autem revelatio divina, quoad substantiam unum esse Deum docet: longe abest, quin cum Pantheistis nonnisi unam substantiam statuatur, atque Deum, in semetipso subsistentem, cum mundo contingentem confundatur; sed potius diversitatem Dei ab universo ubique clarissime ac verbis definitis asserit, pantheismumque omnem respuat, sive crassiorem seu materialem Anaximandri, Phe-

¹⁾ Gen. 1, 26. 3, 22. 11, 7.

²⁾ Cf. Jud. 1, 7. 3, 20. 4, 23. 6, 20. 36. 39. 40. 7, 14. 8, 3. 9, 7. 9. 13. 23. 46. 57. 13, 5—22. 15, 20. 16, 17. 17, 5. 18, 5. 20, 2. 18. 27. 21, 2. 2. Sam. 2, 27. 3, 9. 35. 6, 2. 3. 4. 6. 12. 7, 2. 22. 23. 24. 25. 26. 28. 9, 3. 12, 7. 14, 13. 14. 16. 17. 20. 15, 24. 16, 23. 19, 14. 28. 21, 14. 22, 48. Ps. 58, 11. Job. 35, 9. Is. 25, 1.

³⁾ Deut. 4, 39.

⁴⁾ Exod. 9, 30. 1. Sam. 6, 20. 2. Sam. 7, 22. 26. 1. Reg. 18, 21. 1. Paral. 17, 16—26. Jon. 4, 6. Ps. 84, 9. 12. etc.

recydis¹⁾ et Sansimoniorum, quo materia $\epsilon\lambda\eta$, infinita Dei essentia statuitur, sive subtiliorem Pythagorae, Xenophanis, Zenonis Eleatis, Neoplatonicorum, Spinozae²⁾, Schellingii³⁾ atque Hegelii⁴⁾, qui licet in diversas partes abeant, tamen in eo conveniunt, ut uni illi substantiae, quam assumunt, tum vim cogitandi, tum extensionem tribuant, sive tandem subtilissimum seu idealisticum Fichtei⁵⁾, qui praeter το $\epsilon\gamma\omega$ nil admittit, et omnia solummodo eatenus existere, quatenus a nobis mente concipiuntur, contendit. Etenim

A. licet juxta SS. Litteras Deus rerum omnium principium sit immanens, iisdemque praesentissimum, in quo vivamus et moveamur et simus: eadem tamen ubique tradunt,

a. mundum huncce, tum physicum, tum spiritualem, a Deo e nihilo solo voluntatis suae omnipotentis nutu esse productum, ita ut ex non existenti existens factus sit, *quoniam ipse dixit, et facta sunt, et mandavit, et creata sunt*⁶⁾, ejusque sapientia ac omnipotentia conservari ac gubernari⁷⁾.

b. Deum esse, qui cordibus nostris legem suam inscribat⁸⁾, nos sua gratia adjuvet atque sanctificet⁹⁾, et post mortem ac in fine saeculorum judicaturus sit, *ut referat unusquisque propria corporis, prout gessit sive bonum sive malum*¹⁰⁾.

¹⁾ Cf. Tennemann, Grundriß der Geschichte der Philosophie, herausgegeb. v. Wendt. §. 89 ss.

²⁾ Cf. Spinoza, *Ethic. Prop. 15—18*. Opp. ed. Paul. Jenae 1802—3. V. 2. p. 46 ss. *Prop. 5*. p. 37 s. *Epist. 23*. V. 1. p. 513. *Epist. 39*. p. 528.

³⁾ Cf. Schelling, *Denkmal der Schrift von den göttl. Dingen*. S. 6—8. 77—113. — Paulus, *Die endlich offenbar gewordene Philosophie der Offenbarung* u. Darmst. 1843. X. 2. 3. 1844. Nr. 11.

⁴⁾ Cf. Hegel, *Encyclopädie der philos. Wissenschaften*. 2. Aufl. Heidelberg. 1827. p. 58. 99. 570. *Geschichte der Philosophie*. 3. B. p. 46. — Strauß, *Die christliche Glaubenslehre*. Tüb. 1840. 1. B. p. 523 s.

⁵⁾ Cf. Fichte, *Grundlage der gesamt. Wissenschaftslehre*. Weim. 1794. Cf. Wegscheider, *Instit. theol. Chr. dogm.* L. 1844. ed. 8. p. 251 ss.

⁶⁾ Ps. 32, 9. Cf. Gen. 1, 1. 2. Machab. 7, 28. Joan. 1, 1 ss. Act. 14, 14. Rom. 11, 36. Hebr. 11, 3.

⁷⁾ Cf. Ps. 103, 8 ss. 118, 90 s. Sap. 11, 25 s. 12, 13. Is. 41, 4. Matth. 6, 26 ss. Col. 1, 17.

⁸⁾ Eccli. 11, 15. 17, 5—6. Jer. 31, 33. Ps. 93, 12. Rom. 2, 14—15. 1. Cor. 3, 6—7.

⁹⁾ Ps. 27, 11. Joan. 15, 4—5. Philipp. 2, 13. 2. Cor. 3, 4—5. 1. Cor. 12, 3. Heb. 13, 21. Act. 11, 18. Rom. 3, 22—25. Tit. 3, 3 ss. etc.

¹⁰⁾ 2. Cor. 5, 10. Cf. Matth. 12, 36. Rom. 2, 5—6. 14, 10. — Matth. 24, 50 s. Hebr. 9, 27. — Matth. 16, 27. 25, 31 ss. Act. 17, 31.

c. Deum nobis modo extraordinario multifariam multisque modis esse locutum olim in Prophetis, novissime in Filio suo ¹⁾, qui nostram naturam sibi univit, in similitudinem hominum factus, et habitu inventus ut homo ²⁾. Quae omnia absolutam Dei a mundo diversitatem manifeste docent. Insuper

d. ubique in SS. Litteris supponitur, ac disertis verbis docetur:

α. Deum, spiritum purissimum et simplicem omnino, solum esse, qui vere sit ³⁾, qui sit primus et novissimus, seu aeternus ⁴⁾, utpote *qui est, qui erat, et qui venturus est*, atque *semper idem* seu immutabilis ⁵⁾; res vero omnes ad mundum pertinentes in tempore atque cum tempore esse ortas ac corruptibiles, nonnisi ipsius voluntate existere, propria ac vera existentia destitutas. *Priusquam montes fierent*, ait Psalmista, *aut formaretur terra, et orbis: a saeculo et usque in saeculum tu es Deus* ⁶⁾. Atque iterum: *Initio tu Domine terram fundasti: et opera manuum tuarum sunt coeli. Ipsi peribunt, tu autem permanes: et omnes sicut vestimentum veterascent: et sicut opertorium mutabis eos et mutabuntur. Tu autem idem ipse es, et anni tui non deficient* ⁷⁾. Atque Sapiens: *Quomodo posset aliquid permanere, nisi tu voluisses? aut quod, a te vocatum non esset, conservaretur* ⁸⁾?

β. Deinde, res omnes finibus suis esse circumscriptas, quas Deus sua immensitate excedat et contineat. *Quando*, ait sapientia divina, *praeparabat coelos, aderam: quando certa lege, et gyro vallabat abyssos: quando aethera firmabat sursum, et librabat fontes aquarum: quando circumdabat mari terminum suum, et legem ponebat aquis, ne transirent fines suos: quando appendebat fundamenta terrae, cum eo eram cuncta componens* ⁹⁾. Isaias: *Quis mensus est pugillo*

¹⁾) Hebr. 1, 1. 2.

²⁾ Phillipp. 2, 5—7.

³⁾ Exod. 3, 14.

⁴⁾ Is. 41, 4. 44, 6.

⁵⁾ Apoc. 1, 4. Cf. 1, 8. 11, 17.

⁶⁾ Ps. 101, 28.

⁷⁾ Ps. 101, 26—27. Cf. Gen. 1, 1. 2. Machab. 7, 28. Prov. 8, 22. Joan. 1, 3. 17, 5.

⁸⁾ Sap. 11, 26.

⁹⁾ Prov. 8, 27—30.

*aquas, et coelos palmo ponderavit? quis appendit tribus digitis molem terrae, et libravit in pondere montes, et colles statera? — Ecce gentes, quasi stilla situlae, et quasi momentum staterae reputatae sunt: ecce insulae, quasi pulvis exiguus. — Omnes gentes, quasi nonsint, sicut corameo, et quasi nihilum et inane reputatae sunt ei ¹⁾. Auctor libri Job: *Excelsior coelo est, — profundior inferno. Longior terram mensurae ejus, latior mari* ²⁾. Sapiens: *Quoniam tanquam momentum staterae, sic est ante te orbis terrarum, et tanquam gutta roris antelucani, quae descendit in terram* ³⁾. Atque Salomon Rex: *Si coelum et coeli coelorum te capere non possunt, quanto magis domus haec, quam aedificavi* ⁴⁾?*

γ. Tum solum Deum esse infinite perfectum, utpote unum bonum ⁵⁾, solum potentem ⁶⁾, solum immortalem ⁷⁾, solum fortem et sanctum ⁸⁾, solum justum ⁹⁾, solum omnipotentem et aeternum ¹⁰⁾, solum, qui noverit cor omnium filiorum hominum ¹¹⁾, atque solum pium ¹²⁾, omnia autem in mundo esse inania ac vana. *Transit*, ait Apostolus, *mundus et concupiscentia ejus* ¹³⁾. Atque Ecclesiastes: *Vanitas vanitatum, et omnia vanitas* ¹⁴⁾.

B. Haec autem porro omnia Ecclesia uti totidem dogmata semper et ubique professa est atque profitetur, prout apud omnes in confesso est. Quapropter non poterat non veritatem nostram quoque, quae dogmatibus illis fundamento est, necessario admittere, atque sententiam contrariam necessario respuere. Quae quum ab omnibus prorsus admissa sint, et negari prorsus nequeant: ab excitandis testimoniis SS. Patrum abstinere nos

¹⁾ Is. 40, 12—17.

²⁾ Job. 11, 8—9.

³⁾ Sap. 11, 23.

⁴⁾ 3. Reg. 8, 27. 2. Par. 6, 18.

⁵⁾ Matth. 19, 17. Luc. 18, 19.

⁶⁾ 1. Tim. 6, 15.

⁷⁾ Ib.

⁸⁾ 1. Reg. 2, 2.

⁹⁾ 1. Machab. 1, 25.

¹⁰⁾ Ib. Cf. Ps. 89, 2. Joan. 17, 5. Ephes. 1, 4. Prov. 8, 23.

¹¹⁾ 3. Reg. 8, 39.

¹²⁾ Apoc. 15, 4.

¹³⁾ 1. Joan. 2, 17. Cf. Eccli. 14, 18 s.

¹⁴⁾ Eccl. 2, 2. 12, 8.

posse censemus, solummodo unum alterumve locum proferentes, ubi error Pantheistarum definitis verbis negatur, atque Deum a mundo secerni statuitur. Huc pertinent verba Origenis, qui ait: *Haec* (Deum figura corporea non circumscribi, cum dicatur esse in coelis) *me decuit disputare ad illa verba: „Pater noster, qui es in coelis,“ ut Dei essentiam a rebus omnibus genitis secernam* ¹⁾. Porro quae scribit Maximus: *Quoniam duobus modis laudatur Deus, aut tanquam similis omnibus, omnia enim in ipso consistunt; aut tanquam dissimilis, nihil enim est eorum, quae sunt* ²⁾. Atque Augustinus: *Deus ineffabilis est. Facilius dicimus, quid non sit, quam quid sit. Terram cogitas, non est hoc Deus: mare cogitas, non est hoc Deus: omnia quae sunt in mari, quae volant per aërem, non est hoc Deus: quidquid lucet in coelo, stellae, sol et luna, non est hoc Deus: ipsum coelum, non est hoc Deus: Angelos cogita, Virtutes, Potestates, Archangelos, Thronos, Sedes, Dominationes, non est hoc Deus. Et quid est? Hoc solum potui dicere, quid non sit. Quae-ris quid sit? Quod oculus non vidit, nec auris audivit, nec in cor hominis ascendit* ³⁾. Et: *Neque enim tanquam substantia ejus sic in eo sumus, quemadmodum dictum est, quod habet vitam in semetipso: sed utique cum aliud simus, quam ipse, non ob aliud in illo sumus, nisi quia id operatur* ⁴⁾.

¹⁾ *De orat.* n. 29. Opp. T. 1. p. 236. A.

²⁾ *Schol. in Dionys. De coel. hierarch.* c. 2. §. 3. Opp. Dionys. T. 1. p. 27.

³⁾ *Enarr. in Ps. 85.* n. 12. Opp. T. 4. c. 909. Cf. *Tract. in Joan.* 23. n. 9. T. 3. P. 2. c. 477.

⁴⁾ *De gen. ad litt.* l. 4. c. 12. n. 23. T. 3. P. 1. c. 168. Cf. Justin. *Dial. c. Tryph.* n. 5. Opp. p. 111 s. — Tatian. *Cont. Graec.* n. 5. 12. Ib. p. 261 s. 268. — Athenagor. *Leg. pro Christian.* n. 4. 15. 19. Ib. 300. 309. 313 s. — Jren. *Cont. haer.* l. 2. c. 10. n. 4. p. 127. — Athanas. *De incarn. Verb.* n. 2—3. Opp. T. 1. P. 1. p. 48 s. — Basil. *Hexaëm.* l. 2. n. 2. Opp. T. 1. p. 13 s. — Cyrill. Alex. *Thesaur. Assert.* 5. Opp. T. 5. P. 1. p. 41. *Assert.* 15. p. 168. E. *Assert.* 32. p. 313. Es. — Joan. Chrysost. *Hom. 2. in Gen.* n. 2. Opp. T. 4. p. 9. — J. Damasc. *De orth. fid.* l. 2. c. 2. 3. 5. Opp. T. 1. p. 154. 155. 160. — *Constit. Apost.* l. 6. c. 11. Cotelier. *PP. Apostol.* Amstel. 1721. V. 1. p. 312. — Tertullian. *Adv. Hermogen.* n. 4 ss. Opp. V. 1. p. 351 ss. *Adv. Marcion.* l. 5. c. 1. Opp. V. 2. p. 317. — Lactant. *Div. instit.* l. 2. c. 9. Opp. T. 1. p. 142 ss. — Am-

Concilium Lateranense IV. autem pantheismum expresse damnavit. Nam non tantum definivit: *Firmiter credimus, et simpliciter confitemur, quod unus solus est verus Deus, aeternus et immensus, omnipotens, incommutabilis, incomprehensibilis et ineffabilis, Pater, et Filius, et Spiritus S.; tres quidem personae, sed una essentia, substantia, seu natura simplex omnino. Pater a nullo, Filius autem a solo Patre, ac Spiritus S. ab utroque pariter, absque initio semper et fine. Pater generans, Filius nascens, et Spiritus S. procedens; consubstantiales et coaequales, coomnipotentes et coaeterni, unum universorum principum, Creator omnium invisibilium et visibilium, spiritualium et corporalium, qui sua omnipotenti virtute simul ab initio temporis utramque de nihilo condidit creaturam, spiritualem et corporalem, angelicam videlicet et mundanam, ac deinde humanam quasi communem, ex spiritu et corpore constitutam* ¹⁾. Sed et insuper *perversissimum*, uti ait, dogma Almarici reprobavit atque ceu doctrinam non tam haereticam, quam insanam rejecit, qui inter alia docuerat, *Deum non videri in se, sed in creaturis, sicut lumen in aëre, et omnes creaturas in fine in Deum redire, et in ipsum converti, ut sint unum individuum cum ipso* ²⁾, atque sententiam, teste Gersonio ³⁾, proposuerat: *Omnia sunt Deus; cum in ipso sint omnia, imo ipse sit omnia*. Concilium autem Constantiense damnavit sententiam Wicleffi: *Quaelibet creatura est Deus. Ubique omne ens est, cum omne ens sit Deus* ⁴⁾.

C. Quin imo ipsa jam sana ratio systema pantheisticum tanquam secum pugnans, atque omne studium virtutis ac sanctitatis prorsus evertens improbat ac rejicit. Etenim

a. pantheismus discrimen illud necessarium inter spiritum et materiam respuit, unam nonnisi substantiam admittens, contra

bros. *Hexaëm. l. 1. c. 1—6*. Opp. T. 1. c. 1—15. — Augustin. *Confess. l. 12. c. 8. n. 8*. Opp. T. 1. c. 211 s. l. 7. c. 10. n. 16. c. 139. — l. 11. c. 4. c. 197. *De civ. D. l. 11. c. 4—6*. T. 7. c. 274—276. — Gregor. M. *Mor. l. 16. c. 23. n. 45*. Opp. T. 1. c. 519. — Isidor. *Hisp. Sentent. l. 1. c. 10*. Opp. p. 416. *Etymol. l. 7. c. 1. p. 54. D.* — Fulgent. *Cont. Fabian. fragm. l. 10. fr. 36*. Opp. p. 652 ss. — Boëthius, *De consol. philos. l. 3. pros. 6. p. 118 ss.*

¹⁾ *Capit. 1. De fide. Cat'.* Mansi, *Coll. Conc. T. 22. c. 981 et 982*.

²⁾ *Capit. 2. lb. c. 986 et 1080*.

³⁾ *De concord. metaphys. c. log.* Opp. Antv. 1706. T. 4. p. 826. A.

⁴⁾ *Sess. 15. Mansi, Coll. Conc. T. 27. c. 751*.

testimonium sensus intimi, pro quo nos diversos a mundo externo et etiam nostro corpore novimus;

b. ideam Dei destruit, et loco entis infiniti ens solummodo potentia infinitum, actu autem finitum constituit;

c. mundum limitatum ac finitum una absolutum seu necessarium, adeoque infinitum esse defendit;

d. liberum hominis arbitrium et moralem merendi facultatem vel aperte inficiatur, vel nomine retinet, reapse autem tollit, tradens hominem, etsi sponte sua, necessario tamen facere, quaecunque facit, atque Deum esse vere auctorem seu causam efficientem omnium, quae fiant, et etiam huncce haud libere agere, sed inevitabili velut fato compulsum, atque omnia ad suum finem, qui tamen omnibus, sive bonis sive malis unus idemque sit, necessario protrudere; atque

e. immortalitatem animae, dum contendit, hominem post hanc vitam a substantia divina absorptum, et existentiam singulorum propriam cum vita extinctum iri, negat.

Sic ergo pantheismus fundamentum verae in Deum pietatis sustollens, legem moralem omni auctoritate exuens, vel potius prorsus evertens, atque possibilitatem virtutis ac honestatis negans, fatalismum inducit, omnemque omnino, qui facinorosos cohibere posset, obicem removet et destruit, nec non hominem omni solatio, tranquillitate ac felicitate privat. Quos revera effectus morales pantheismus producat, manifestum reddit, ut morum vel publicorum perversitatem et animi abjectionem apud Indos, polytheismo systemati pantheistico cognato addictos, silentio praetereamus, exemplum recentium discipulorum comitis H. de St. Simon, qui in hac vitae civilioris cultura, in ipsa politiorum morum urbe principe, viri utique humanis litteris et scientiis probe exculti, et honoris sui ac gloriae minime pertaesi eo devenerunt, ut non tantum haereditatis, dominii privati ac matrimonii jura, quae societatis civilis columnae et necessariae conditiones sunt, studio et aperte negaverint, sed et uxorum seu potius foeminarum communionem, prolium commixtionem ac vesanae libidinis actus tamquam optimum divini cultus exercitium et sermone et opere commendarint, ita ut, nisi obstitisset publica indignatio, et magistratuum adversio, et praesertim pecuniarum post insanam prodigientiam inopia, societas brevi evasisset omnium obscoenitatum colluvies et quasi pandaemonium.

SECTIO II.

De absoluta Dei essentia seu natura.

§. 7. Transitio. Natura Dei neque plene intelligi, neque explicari potest.

Non satis est, quod noverimus, Deum existere, *cumque natura* unum et a mundo diversum, seu supermundanum esse, et in cumulo quasi sciamus, quae notio cum voce Dei conjungenda sit; sed quo nostra Dei cognitio clarior, amor in eum intensior et efficacior, atque tranquillitas firmior evadat, oportet ulterius ideam Dei, quantum id fieri potest, evolvere et in singulis suis quasi partibus considerare; quanto accuratius enim illa explicetur, tanto majorem in omnem cogitandi, sentiendi et agendi rationem exeret influxum. Sed obstat magnitudo divina, quominus, quid proprie sit Deus, seu quae propria ejus sit conditio, mente assequi aut sermone explicare valeamus. Deus enim incomprehensibilis et ineffabilis est.

Eunomius et Aëtius saeculo IV. eo superbiae et deventiae devenerunt, ut contenderent, se Deum tam perspicue cognovisse, ac tantam illius notitiam esse consecutos, ut ne se ipsos quidem melius, quam Deum nossent, imo Deus ipse se cognoscat, atque ejus essentiam nobis ex ipsius nomine innotescere, quum id nominibus in universum proprium sit, ut internam rerum naturam nobis manifestent, utpote iisdem a Deo inditis, idque propterea, quo facilius, SS. Litteris (?) Deum Patrem *ἀγνοήτων* adpellantibus, divinitatem Filii negare possent ¹⁾. Quem errorem postea saeculo XIV., saltem ex parte, renovarunt Beguardi et Beguinae a Concilio Viennensi a. 1311. proscripti.

Verumtamen error hic adeo absurdus est, ut confutationem haud mereatur. Neque est aliquid aliud, quod SS. Litterae apertius doceant, SS. Patres et Ecclesia clarius tradant, atque ratio ipsa facilius perspiciat, quam dogma, neque intellectum finitum, etiam lumine gloriae adjutum, plene ac distincte naturam divi-
nam percipere et exaequare, neque linguam nostram effari valere.

¹⁾ Cf. *Epiphani. Haer. 76. n. 4.* Opp. T. 1. p. 916. *Gregor. Nyss. Cont. Eunom. l. 1.* Opp. ed. Par. 1638. T. 2. p. 324. A. p. 327. B. Or. 3. p. 552. A. Or. 6. p. 605. D. p. 612. A. B. Or. 10. p. 670. B. 697. B. Or. 12. P. 2. p. 784. A. 817. C.

A. In SS. Litteris enim dicitur *Deus magnus, vincens scientiam nostram* ¹⁾, *Deus vere absconditus* ²⁾, *qui lucem inhabitat inaccessibilem* ³⁾, quem *nemo vidit unquam*, sed *unigenitus Filius, qui est in sinu Patris, ipse enarravit* ⁴⁾, quemque nemo, nisi ipse solus possit cognoscere, *quae enim Dei sunt*, scribit Apostolus, *nemo cognoscit, nisi Spiritus Dei* ⁵⁾. — Huc quoque pertinent ea loca, quae toties in S. Scriptura leguntur de incomprehensibilitate consiliorum et operum Dei. *Judicia tua*, ait Psalmista, *abyssus multa* ⁶⁾. Et Apostolus: *Quam incomprehensibilia sunt judicia ejus, et investigabiles viae ejus* ⁷⁾. — Porro praedicatur ille, cui nomen non sit, quemque nemo enarrare aut praedicare, uti est, queat. *Quod nomen*, legitur in Proverbiis, *est ejus (Dei)*, *et quod nomen filii ejus (sapientiae), si nosti* ⁸⁾? Et Siracides: *Terribilis Dominus*, inquit, *et magnus vehementer, et mirabilis potentia ipsius. — Ne laboretis, non enim comprehendetis. Quis videbit eum, et enarrabit? et quis magnificabit eum, sicut est ab initio* ⁹⁾? — Haec Deum, nobis omnino incomprehensibilem et ineffabilem esse ostendunt. — Imperfectionem autem cognitionis, quam in hac vita habemus, clare S. Paulus describit his verbis: *Videmus nunc per speculum in aenigmate: tunc autem facie ad faciem. Nunc cognosco ex parte: tunc autem cognoscam, sicut et cognitus sum* ¹⁰⁾. Itaque cognitio nostra obscura et imperfecta est, et perfectior, licet etiam haec non comprehensiva, ut ajunt, utpote cujus ens finitum capax prorsus non est, futuro statui reservatur, ut aurora veluti contenti, meridiem in altera vita exspectemus.

B. Id ipsum ore unanimi tradunt SS. Patres, qui docent, neminem, et quidem non tantum oculis corporis, sed vel ipsa mente, licet sit purissima ac limpidissima, Deum videre posse,

¹⁾ Job. 36, 26. Cf. 11, 7—10. Ps. 144, 3.

²⁾ Is. 45, 15. Cf. 40, 28.

³⁾ 1. Tim. 6, 16. Cf. Exod. 33, 20—23.

⁴⁾ Joan. 1, 18. Cf. 6, 46. 1. Joan. 4, 12. Matth. 11, 27.

⁵⁾ 1. Cor. 2, 11. Cf. 13, 9. 2. Cor. 5, 7.

⁶⁾ Ps. 45, 7.

⁷⁾ Rom. 11, 33. Cf. Sap. 9, 13. 16. Ps. 146, 5.

⁸⁾ Prov. 30, 4.

⁹⁾ Eccli. 43, 35.

¹⁰⁾ 1. Cor. 13, 12. Cf. 1. Joan. 3, 2. 2. Cor. 5, 7.

quum sit infinitus ac incapabilis, ut Ireneus ¹⁾, Origines ²⁾, Gregorius Naz. ³⁾, Cyrillus Alex. ⁴⁾, Hilarius Pictav. ⁵⁾, Augustinus ⁶⁾; illius comprehensionem non solum

¹⁾ *Cont. haer. l. 4. c. 20. n. 5. p. 254. Secundum magnitudinem quidem ejus, et mirabilem gloriam „nemo videbit Deum et vivet“: incapabilis enim Pater. Cf. l. 2. c. 13. n. 4. p. 130.*

²⁾ *De princip. l. 1. n. 5. Opp. T. 1. p. 51. c. 1. e. Sicut enim si videamus, aliquem vix posse scintillam luminis, aut brevissimae lucernae lumen aspicere: et eum, cujus acies oculorum plus luminis capere, quam supra diximus, non valet, si velimus de claritate ac splendore solis edocere: nonne oportebit ei dicere, quia omni hoc lumine, quod vides, ineffabiliter et inaeestimabiliter melior ac praestantior est solis splendor? Ita mens nostra, cum intra carnis et sanguinis claustra concluditur, et pro talis materiae participatione hebetior atque obtusior redditur, licet ad comparisonem naturae corporeae praecellens habeatur, tamen dum ad incorporea nititur, atque eorum rimatur intuitum, tunc scintillae alicujus aut lucernae vix obtinet locum. Quid autem in omnibus intellectualibus, id est incorporeis, tam praestans omnibus, tam ineffabiliter atque inaeestimabiliter praecellens, quam Deus? Cujus utique natura acie humanae mentis intendi atque intueri, quamvis ea sit purissima mens ac limpidissima, non potest.*

³⁾ *Or. 34. Opp. T. 1. c. 475. Ego ita potius dicendum censeo, Dei naturam nullis quidem verbis explicari posse, animo autem atque intellectu comprehendendi multo minus posse. Nam quod quis animo et ratione complexus fuerit, id fortasse sermone quoque declarare queat, si non satis dilucide ac perspicue, at saltem obscure. — At rem tantam unimo comprehendere omnino impossibile est, non modo ignavis et languidis deorsumque vergentibus, sed magnis etiam et excelsis viris, Deique amore praeditis, ac mortalibus peraeque omnibus, quibus ad veri cognitionem caligo haec et carnis crassities tenebras offundit. Cf. Ib. c. 480. B. Or. 38. c. 546. D. Or. 49. c. 660. Carm. jamb. 18. T. 2. c. 185.*

⁴⁾ *Thesaur. Assert. 31. Opp. T. 5. P. 1. p. 267. Nos autem, cum mensuram, quae nobis data est, excedere non possumus, veluti in speculo et aenigmate Deum incomprehensibilem cernimus.*

⁵⁾ *De Trinit. l. 2. n. 6. Opp. T. 2. e. 29 s. De divinis sermonem instituens: Verborum significantiam rei ipsius natura consumit, sensus contemplationem inperspicabile lumen obcoecat, intelligentiae capacitatem, quidquid fine nullo continetur, excedit. Et paulo post, n. 6. c. 30. Deus, inquit, invisibilis, ineffabilis, infinitus; ad quem et eloquendum sermo sileat, et investigandum sensus hebetetur, et complectendum intelligentia coarctetur. Cf. l. 11. n. 47. c. 404. In Ps. 56. n. 9. 10. T. 1. c. 137. Ps. 129. n. 1. c. 490 s. Ps. 144 n. 2. c. 527. etc.*

⁶⁾ *Epist. 147. ad Paulin. n. 9. Opp. T. 2. c. 481. Non Dei plenitudinem quisquam, non solum oculis corporis, sed vel ipsa mente aliquando comprehendit. Aliud est enim videre, aliud est totum videndum*

mentem humanam, sed omnem naturam ratione praeditam superare, ipsum sibi soli notum, atque Angelos et Beatos Deum quidem videre, sed tantum, quantum capaces sunt, ut Clemens Alex.¹⁾, Basilius²⁾, Cyrillus Hieros.³⁾, Epiphanius⁴⁾, Gregorius Nyss.⁵⁾, Joannes Damascenus⁶⁾,

comprehendere. Quandoquidem id videtur, quod praesens utcumque sentitur: totum autem comprehenditur videndo, quod ita videtur, ut nihil ejus lateat videntem, aut cujus fines circumspici possunt. Cf. Sermon. 117. De verb. Dom. c. 3. n. 5. T. 5. c. 582. c. 5. n. 7. c. 584. De Trinit. l. 7. c. 4. n. 7. T. 8. c. 858.

¹⁾ Strom. l. 5. n. 12. Opp. T. 2. p. 695.

²⁾ Adv. Eunom. l. 1. n. 14. Opp. 1. p. 228. *Ego vero ipsius comprehensionem non homines solum, sed omnem etiam rationalem naturam excedere arbitror. Nunc autem cum dico rationalem, creatam dico. Nam soli Filio notus est Pater, et Spiritui S. Cf. Hom. 15. De fid. n. 1. T. 2. p. 130. s.*

³⁾ Cat. 6. n. 6. Opp. p. 89 s. *Quid igitur, inquiet aliquis, nonne scriptum est: Angeli parvulorum vident semper faciem Patris mei, qui in coelis est? Verum Angeli vident, non sicut est Deus, sed quantum ipsi capere possunt. — Vident igitur Angeli, quantum capaces sunt; et Archangeli, ut possunt; et Throni et Dominationes excellentius, quam illi primi, tamen rei dignitate multo inferiorius.*

⁴⁾ Haer. 70. n. 7 s. Opp. T. 1. p. 818 et 819. *Neque vero dubium est, quin Deus videri comprehendique nequeat. — Porro cum invisibile illud et infinitum aspiciat (humana natura), non quatenus infinitum est, illud intuetur; sed quantum illius, quod imbecillum est, natura capere potest. Quod quidem duplici comparatione explicat, hominis scilicet, qui e sublimiori speculo mare intuetur, aut coelum per angustum foramen conspiciat: ille quidem mare videt et coelum, sed non totum, nec quantum ad omnem maris et coeli extensionem.*

⁵⁾ Cont. Eunom. l. 12. Opp. T. 2. p. 755. *Numen quomocunque se habeat, secundum naturam omnem fugit tactum sensumque, et intellectum superat, omni que comprehensione, quae rationibus constat, sublimior est et altior: humana autem intelligentia curiose et sollicitè pervestigans et perscrutans, quibus potest argumentationibus inaccessam et excelsam expetit et attingit naturam, neque tam acule cernens, ut clare et evidenter, quod inaspectabile est, queat intueri, neque omnino illa ab accessu et propinquatione sejuncta, ut nullam possit ejus, quod quaeritur adumbratam imaginem capere; sed partem aliquam de eo, quod quaeritur per ratiocinationem tactum, conjectura assecuta est, partim vero ex eo, quod nequeat ipsum perspicere, quodammodo cognovit, velut cognitionem evidentem, quod super omnem scientiam sit, id quod quaeritur, statuens. Et. al. saep.*

⁶⁾ De fid. orthod. l. 1. c. 4. Opp. T. 1. p. 127. *Quod itaque sit Deus, liquido constat: quid autem secundum essentiam et naturam sit, nullo pro-*

Chrysostomus ¹⁾, Minucius Felix ²⁾, Tertullianus ³⁾, Cyprianus ⁴⁾, Ambrosius ⁵⁾, Gregorius M. ⁶⁾; et illi propterea nullum nomen imponi posse, utpote qui, uti omni ratione ac cognitione, ita et omni sermonis eloquentia sit elatior, sed esse ipsum inenarrabilem et inexplicabilem, nosque solum posse dicere, quid non sit Deus, non autem quid sit, ut

sus modo comprehendendi vel etiam cognosci potest. Et c. 13. p. 150. Solus incomprehensus ipse (Deus) est, nullis definitis terminis, et a nemine cognitus, qui solus ea vi polleat, qua se plane contempletur.

¹⁾ Hom. 3. cont. Anom. Opp. T. 1. p. 463. Vocemus itaque ipsum ineffabilem, inintelligibilem Deum, invisibilem, incomprehensibilem, humanae linguae vim superantem, mortalis mentis comprehensionem excedentem, Angelis non vestigabilem, Seraphinis invisibilem, Cherubinis inintelligibilem, inaspectabilem principalibus, potestatibus, virtutibus, ac simpliciter omni creaturae: a solo autem Filio et a Spiritu S. cognitum. Quod deinde uberius explanat ac demonstrat.

²⁾ Octav. c. 18. In Galland. Bibl. PP. T. 2. p. 391. c. 1. Hic (Deus) nec videri potest, visu clarior est; nec comprehendipotest, tactu purior est; nec aestimari, sensibus major est, infinitus, immensus, et soli sibi, tantus quantus est, notus. Nobis vero ad intellectum pectus angustum est: et ideo sic eum digne aestimamus, dum in aestimabilem dicimus.

³⁾ Apolog. c. 17. Opp. V. 1. p. 42. Invisibilis est, etsi videatur: incomprehensibilis, etsi per gratiam repraesentetur: in aestimabilis, etsi humanis sensibus aestimetur: ideo verus et lantus est. Caeterum, quod videri communiter, quod comprehendendi, quod aestimari potest, minus est oculis, quibus occupatur, et manibus, quibus contaminatur, et sensibus, quibus invenitur: quod vero immensum est, soli sibi notum est: hoc est, quod Deum aestimari facit, dum aestimari non capit: ita eum vis magnitudinis et notum hominibus objicit et ignotum.

⁴⁾ De idolor. vanit. c. 5. Opp. V. 2. p. 111. Hic nec videri potest; visu clarior est: nec comprehendendi; tactu purior est: nec aestimari; sensu major est. Et ideo sic eum digne aestimamus, dum in aestimabilem dicimus.

⁵⁾ De Ad. l. 1. c. 16. n. 106. Opp. T. 2. c. 465. De Incarn. Dom. sacr. c. 9. n. 94. T. 2. c. 724.

⁶⁾ Moral. l. 10. c. 8. n. 13. Opp. T. 1. c. 345. — In retributionis culmine reperiri Omnipotens per contemplationis speciem potest, sed tamen ad perfectum non potest: quia etsi hunc quandoque in claritate sua conspiciamus, non tamen ejus essentiam plene cognoscimus. Angelica etenim vel humana mens cum ad incircumscriptum lumen inhiat, eo ipso se, quo est creatura, coangustat; et super se quidem per propectum tenditur, sed tamen ejus fulgorem comprehendere nec dilatata sufficit, qui et transcendendo et portando omnia, et implendo concludit. Cf. l. 18. c. 54. n. 93. c. 602. a.

Justinus M. ¹⁾, Dionysius ²⁾, Hermas ³⁾, Clemens Alex. ⁴⁾, Theophilus Antiochenus ⁵⁾, Gregorius Na-

¹⁾ *Apolog. I. n. 61. Opp. p. 82. Nemo est enim, qui nomen dicere non enarrabili Deo possit; aut si quis dicere audeat, nomen illi inesse, is perdit insani. Et Dial. c. Tryph. n. 4. p. 110. Hoc ipsum, quod supra omnem essentiam est; non enarrabile, non explicabile, solum pulchrum et bonum, animis a natura bene informatis ob cognitionem et videndi cupiditatem illico affulgens. Cf. Apol. I. c. 10. p. 47. et Apolog. II. c. 6. p. 95. s.*

²⁾ *De div. nomin. c. 13. §. 1. Opp. T. 1. p. 876. Quamobrem ipsi quoque ascensum illum per negationes praetulerunt, ut qui animam a cognatis rebus avocans, ad omnes divinas intelligentias viam sternat, quibus excipitur id, quod omni nomine omnique ratione ac cognitione sublimius existit.. Cf. c. 1. §. 5. p. 444 s. Et De coel. Hierarch. c. 2. §. 3. p. 18. Atque hoc (quando significatur non, quid Deus sit, sed quid non sit) ut arbitror, magis ipsi proprium est: nam uti arcana illa sacerdotulisque Traditio insinuavit, vere dicimus, eum non esse secundum quidquam eorum, quae sunt, licet ejus superessentialem et invisibilem et ineffabilem infinitatem ignoremus.*

³⁾ *Pastor. l. 2. mand. 1. Coteler. PP. Apost. Amstel. 1724. V. 1. p. 85. Primum omnium, credere quod unus est Deus, qui omnia creavit, et consumavit, et ex nihilo omnia fecit. Ipse capax universorum, solus immensus est. Quia nec verbo definiri, nec mente concipi potest.*

⁴⁾ l. c.

⁵⁾ *Ad Autol. l. 1. n. 3. 4. Opp. Justin. M. p. 361 s. Audi o homo: forma Dei nec dici, nec narrari potest, nec oculis corporeis videri. Nam nec ejus gloria animo capi, nec magnitudo comprehendi potest, nec altitudo cogitari, nec ejus robor in comparisonem vocari, nec sapientia assimilari; nec ejus benignitas imitabilis, nec beneficentia enarrabilis. Nam si lucem eum dicam, opus ejus dico: si Verbum dicam, ejus principatum dico: si mentem dicam, ejus prudentiam dico: si spiritum dicam, ipsius respirationem dico: si sapientiam dicam, ejus progeniem dico: si robor dicam, ejus potentiam dico: si virtutem dicam, ejus operationem dico: si providentiam dicam, ejus benignitatem dico: si regnum dicam, ejus gloriam dico: si dominum dicam, judicem dico: si judicem dicam, justum eum dico: si patrem dicam, omnia eum dico: si ignem dicam, iracundiam ejus dico. Dices igitur mihi: Irascitur Deus? Maxime: irascitur enim male agentibus, bonus vero et benignus et misericors est in eos, qui eum amant ac timent. Est enim magister piorum ac pater justorum, judex vero et vindex impiorum. Caret principio, quia ingenuus est: immutabilis est, quatenus immortalis. Deus dicitur διὰ τὸ τεθεωκέναι, id est, quia omnia in sua ipsius stabilitate posuit, et διὰ τὸ θέειν, quod idem est, ac currere, et movere, et operari, et nutrire, et providere, et vivificare omnia. Dominus est, quia omnibus dominatur: pater, quia ante omnia: conditor et creator, quia omnia condidit et creavit: altissimus, quia supra omnia: omnipotens, quia omnia tenet et complectitur. Nam et alta coelorum et profunda abyssorum et termini orbis terrae sunt in manu ejus: nec est locus, in quo moretur et quiescat. Est enim coelum ejus opus, terra et mare ejus opificium, homo ejus figmentum et imago. Sol, luna et stellae sunt ejus elementa, in signa et tempora, et dies et annos condita, ut ministrent et serviant hominibus. Atque omnia Deus fecit, cum antea non essent, ut ex operibus cognoscatur et intelligatur ejus majestas.*

zianzenus ¹⁾, Joān. Damascenus ²⁾, Novatianus ³⁾, Arnobius ⁴⁾, Lactantius ⁵⁾, Augustinus ⁶⁾ et alii ⁷⁾.

¹⁾ Or. 34. Opp. T. 1. c. 475.

²⁾ De orth. fid. l. 1. c. 1. Opp. T. 1. p. 123. — *Deus nec oratione ulla explicari, nec ullo modo comprehendi potest.*

³⁾ De Trinit. c. 4. In Galland. Biblioth. PP. T. 3. p. 290. c. 1. C. D. *Nec nomen Dei proprium potest edici, quoniam non potest nec concipi. Id enim nomine continetur, quidquid etiam ex naturae suae conditione comprehenditur. Nomen enim significantia est ejus rei, quae comprehendere potuit ex nomine. At quando id, de quo agitur, tale est, ut condigne nec ipsis intellectibus colligatur; quomodo digne appellationis vocabulo pronuntiabitur, quod dum extra intellectum est, etiam supra appellationis significantiam sit necesse est? c. 2. p. 288 c. 1. D. De hoc ergo, ac de eis, quae sunt ipsius, et in eo sunt, nec mens hominis, quae sint, quanta sint, et qualia sint, digne concipere potest, nec eloquentia sermonis humani aequabilem majestati ejus virtutem sermonis exprimit. Ad cogitandam enim et ad eloquendam illius majestatem, et eloquentia omnis muta est, et mens omnis exigua est: major est enim mente ipsa, nec cogitari possit, quantus sit; ne si potuerit cogitari, mente humana minor sit, qua concipi possit. Major est quoque omni sermone, nec edici possit: ne si potuerit edici, humano sermone minor sit, quo, quum edicitur, et circumiri et colligi possit. Quidquid enim de illo cogitatum fuerit, minus ipso erit: et quidquid enuntiatum fuerit, minus illo comparatum circum ipsum erit. Sentire enim illum taciti aliquatenus possumus; ut autem ipse est, sermone explicare non possumus. — Quidquid omnino de illo retuleris, rem aliquam ipsius magis et virtutem, quam ipsum explicaveris. Quid enim de eo condigne aut dicas, aut sentias, qui omnibus sermonibus et sensibus major est? Nisi quod uno modo — quid sit Deus mente capiemus; si cogitaverimus, id illum esse, quod, quale et quantum sit, non possit intelligi, nec in ipsam quidem cogitationem possit venire. Et c. 7. p. 291. c. 2. Id enim, quod est, secundum id, quod est, nec humano sermone edici, nec humanis auribus percipi, nec humanis sensibus colligi potest.*

⁴⁾ Adv. Gent. l. 2. n. 19. p. 118. *Quidquid de Deo dixeris, quidquid lactae mentis cogitatione conceperis, in humanum transilit et corrumpitur sensum: nec habet propriae significationis notam, quod nostris dicitur verbis atque ad negotia humana compositis. Unus est hominis intellectus de Dei natura certissimus, si scias et sentias, nihil de illo posse mortali oratione de promi.*

⁵⁾ Div. instit. l. 1. c. 8. Opp. T. 1. p. 33. *His igitur tot et tantis testibus comprobatur unius Dei potestate ac providentia mundum gubernari; cujus vim majestatemque tantam esse dicit in Timaeo Plato, ut eam neque mente concipere, neque verbis enarrare quisquam possit, ob nimiam ejus et inestimabilem potestatem.*

⁷⁾ Enarr. in Ps. 85. n. 12. Opp. T. 4. c. 909. *Hoc solum potui dicere, quid non sit (Deus). Quaeris, quid sit? Quod oculus non vidit, nec in cor hominis ascendit. Quid quaeris, ut ascendat in linguam, quod in cor non ascendit? Cf. De Trinit. l. 7. c. 4. n. 7. T. 8. c. 857 a.*

⁶⁾ Cf. Tatian. Cont. Graec. c. 4. Opp. Justin. M. p. 260. — Athenag.

Consulto adversus Eunomii errorem calamum strinxerunt: Basilius ¹⁾, Gregorius Nyssenus ²⁾, Gregorius Naz. ³⁾, et Chrysostomus ⁴⁾.

C. Solemniter definitum est dogma nostrum in Concilio Lateranensi IV. quod statuit: *Firmiter credimus, et simpliciter confitemur, quod unus solus est verus Deus, aeternus, et immensus, omnipotens, incommutabilis, incomprehensibilis et ineffabilis, Pater, et Filius, et Spiritus S. ⁵⁾*. Nec non in Concilio Viennensi, quod errorem contrarium Beguardorum et Beguinarum condemnavit.

D. Tandem ratio ipsa, quae se finitam esse novit, atque infirmitatem in ipsis rebus creatis cognoscendis ubique sentit, facile intelligit, divinitatem, quae non gradu, sed ipsa natura ac essentia ab omnibus rebus distat, esse mysterium, quod neque homo, neque quaevis alia natura intelligens finita cognitione perfecta et adaequata assequi possit. Ut Deum comprehendere valeamus, aut Deus non posset esse Deus, aut nos desinere debemus esse homines.

§. 8. Offert tamen revelatio et ratio sufficientem Dei notitiam.

Verum licet non valeamus divinam substantiam, vim atque maiestatem comprehendere: multa tamen de Deo ejusque perfectionibus, seu attributis per revelationem, nec non per rationem ipsam cognoscere valeamus. Etsi non ex toto, tamen ex parte cognoscimus, atque saltem per speculum in aenigmate videmus; nam, ut bene observat Fulgentius, *non est ignorabilis Deus, cum sit inenarrabilis, sed a fidelibus cognoscitur, ut ametur, quamvis nec humanis linguis, nec angelicis enarretur ⁶⁾*.

Legat. pro. Christian. c. 10. lb. p. 304. — Theodoret. In Ps. 12, 6. Opp. T. 1. p. 442. Eranist. Dial. 1. T. 4. p. 15. C. — Alexand. Alex. ap. Theodoret. H. E. l. 1. c. 3. T. 3. p. 528 ss. — Caesar. Dial. 3. Interr. 140. In Galland. Bibl. PP. T. 6. p. 93. E. — Maxim. Schol. in Dionys. De div. nomin. c. 1. §. 5. Opp. Dionys. T. 1. p. 465. — Hieronym. In Js. 1, 14. Opp. T. 4. c. 21. Cf. Thom. 3. q. 10. art. 2. Opp. T. 24. p. 76. Cont. Gentil. l. 3. c. 56. T. 18. p. 274 s.

¹⁾ *Libri V adv. imp. Eunomium. Opp. T. 1. p. 207—322.*

²⁾ *Libri XII adv. Eunom. Opp. ed. Par. 1638. T. 2.*

³⁾ *Or. V de Theolog. Opp. T. 1. c. 467—513.*

⁴⁾ *Hom. V de incomprehens. cont. Anom. Opp. T. 1. p. 444—491.*

⁵⁾ *Capit. 1. De fld. Cathol. Mansi, Coll. Conc. T. 22. c. 981 et 982.*

⁶⁾ *Cont. Arian. Resp. ad obj. 2. Opp. p. 53.*

Unde sicut non magni ingenii, sed magnae stultitiae argumentum foret, ea scrutari curiosius, quae omnem mentis nostrae aciem effugiunt, ita esset ingrati et hebetis animi, ne illud quidem intelligere, quod nosse datum est nobis. Sane enim, si sparsos in S. Scriptura et Traditione, atque rerum natura radios diligentius colligimus, eam assequi possumus divini Numinis cognitionem, quae peregrinantibus in hac terra sufficit, tum ad mentem illustrandam, tum ad virtutis studium promovendum, tum ad cor tranquillandum. Et quamvis claram omnino nobis notionem Dei efformare, atque neque consiliorum ambitum, neque internam rationem prorsus perspicere valeamus: tamen intelligimus, qualis Deus cogitandus, vel potius, qualis cogitandus non sit. Quod

A. revelatio divina non tantum eo tradit, quoniam nobis notionem Dei ejusque attributorum suppeditat, *cui bene facimus attendentes, quasi lucenti in caliginoso loco* ¹⁾, et quae manifeste inanis esset ac vana, si mens nostra ad Deum cognoscendum prorsus non esset apta; sed et definitis verbis docet, hominem, etiam supernaturali revelatione destitutum, ad cognitionem Dei ex consideratione ejus operum pervenire posse, atque nonnisi mentem pravitate obcoecatam in opere artificem non deprehendere, ita ut propterea nemo sit excusabilis. Docet hoc

a. Paulus, gentiles reprehendens, *qui veritatem Dei in injustitia delineant: quia quod notum est Dei, manifestum est in illis. Deus enim illis manifestavit. Invisibilia enim ipsius a creatura mundi, per ea, quae facta sunt, intellecta, conspiciuntur: sempiterna quoque ejus virtus et divinitas: ita ut sint inexcusabiles* ²⁾. Atque pariter in Areopago disputans, quum ait: *Fecitque (Deus) ex uno omne genus humanum inhabitare super faciem terrae, definiens statuta tempora, et terminos habitationis eorum, quaerere Deum, si forte attrectent eum, aut inveniant, quamvis non longe sit ab unoquoque nostrum. In ipso enim vivimus, movemur et sumus* ³⁾. Docent porro idem

b. SS. Patres. Sic Clemens Alex: *Universo, inquit, generi humano, praecipue vero illis, qui in studiis litterarum versati sunt, divina quaedam semina sunt instillata: a quibus fateri vel inviti et reluctantes coguntur, quod unus si-*

¹⁾ 2. Petr. 1, 19.

²⁾ Rom. 1, 18—20.

³⁾ Act. 17, 26—28. Cf. Ps. 13, 1, 52, 1.

Deus interitus ortusque expers ¹⁾. — Origenes: *Distingui etiam oportet istud, Deum nominari non posse. Nam si intelligit verba aut res verbis significatas non esse, quae Dei proprietates repraesentent, verum dicit; si quidem multae quoque sunt qualitates, quae verbis exprimi non possunt. Quis enim exprimat discrimen, quod interest dulcedinem palulae inter et dulcedinem caricae? Quo nomine distinguas et significes propriam rei cuiusque qualitatem? Nihil ergo mirum, Deum nominari non posse. Si autem velis nominare nihil esse aliud, quam aliquas virtutes ejus verbis indicare, ut auditor ad quidpiam de illis cognoscendum, quantum humanae naturae licet, adjuvetur, non absurdum fuerit dicere illum nominari posse* ²⁾. — Eusebius: *Eximium illud esse ac salutare inprimis, quod Dei nomen essentiamque significat, ipsius naturae ductu, impressisque animo per sese notionibus, vel divinitus potius inspiratis, nemo non intelligit: hoc enim omnes populi communi quodam rationis sensu praecepere, cum id omni in animo ratione et intelligentia praedito, idem hujus universitatis artifex naturalibus quibusdam cogitationibus inseverit* ³⁾. — Athanasius: *Neque, ut est ipse Deus supra omnia, ita via, quae ad illum ducit, foris et procul a nobis est: verum in nobis ipsis est, ejusque initium haud est difficile a nobis reperire, ut et Moyses his verbis docuit: „Verbum fidei intra cor tuum est.“ Quod idem Salvator declaravit et confirmavit dicens: „Regnum Dei intra vos est.“ Quia enim intus in nobismetipsis fidem regnumque Dei habemus, facile possumus universitatis rectorem, Patria salutare Verbum, intelligere et contemplari. Addit gentiles excusari non posse. Siquidem omnes in eam viam sumus ingressi, omnes eam habemus, licet non omnes illam sequi et pergere, sed plerique, exteris vitae voluptatibus allicientibus deserere velint* ⁴⁾. — Gregorius Nyss. *Humana autem intelligentia curiose et sollicitè pervestigans et perscrutans, quibus potest argumentationibus, inaccessam et excelsam expetit et attingit naturam, neque tam acute cernens, ut clare et evidenter quod inaspectabile est queat intueri, neque omnino ita ab accessu et propinquatione sejuncta, ut nullam possit ejus, quod quaeritur, adumbratam imaginem capere: sed partem aliquam*

¹⁾ Cohort. ad Gent. n. 6. Opp. T. 1. p. 59.

²⁾ Cont. Cels. l. 6, n. 65, Opp. T. 1. p. 682. B. C.

³⁾ Praepar. Evang. l. 2. c. 6. p. 72. D.

⁴⁾ Or. cont. Gent. n. 30. Opp. T. 1. p. 29.

de eo, quod quaeritur, per ratiocinationem lactum, conjectura assecuta est, partim vero ex eo, quod nequeat ipsum perspicere, quodammodo cognovit, velut cognitionem evidentem, quod super omnem scientiam sit, id quod quaeritur, statuens ¹⁾. — Tertulianus: Haec est summa delicti nolentium recognoscere, quem ignorare non possunt ²⁾. Et iterum: Magistra natura, anima discipula. Quidquid aut illa edocuit, aut ista perdidicit, a Deo traditum est, magistro scilicet ipsius magistrae ³⁾. — Hieronymus verba illa: „Lux vera, quae illuminat omnem hominem venientem in hunc mundum“, commentans: Ex quo perspicuum fit, natura omnibus inesse Dei notitiam, nec quemquam sine Christo nasci, et non habere semina in se sapientiae, et iustitiae reliquarumque virtutum ⁴⁾. — Augustinus: Qui (Deus) ubique secretus est, ubique publicus; quem nulli licet, ut est, cognoscere, et quem nemo permittitur ignorare ⁵⁾. — Gregorius M. De se conditor, per quod ametur, ostendit; sed visionis suae speciem amantibus subtrahit. Sola ergo ejus vestigia conspicientes gradimur, qui hunc per donorum suorum signa sequimur, quem necdum videmus. — In retributionis culmine reperiri omnipotens per contemplationis speciem potest, sed tamen ad perfectum non potest: quia etsi hunc in claritate sua quandoque conspiciamus, non tamen ejus essentiam plene contuemur ⁶⁾. Et sic alii ⁷⁾.

c. Ita quoque Theologi scholastici, ut alia occasione demonstravimus, sentiebant.

d. Nostis autem diebus Gregorius XVI. non tantum Bautainium ad subscribendum thesi, sibi ab Episcopo propositae, rationem existentiam Dei, ejusque perfectiones cum certitudine demonstrare posse, adegit, sed et scripta Hermesii inter alia propterea condemnavit, quod hic argumenta ad existentiam Dei adhiberi solita repudiaverit, et praeterea asseruerit, rationem

¹⁾ Cont. Eunom. l. 12. Opp. ed. Par. 1638. T. 2, p. 755. D.

²⁾ Apolog. n. 17. Opp. V. 1, p. 42.

³⁾ De testim. anim. n. 5. Opp. V. 1, p. 126.

⁴⁾ Comm. in Ep. ad Gal. 1, 16. Opp. T. 7, c. 301.

⁵⁾ Enarr. in Ps. 74. n. 9. Opp. T. 4, c. 788. Cf. In Ps. 4. n. 8. c. 15. In Ps. 41. n. 7. ss. c. 357. ss. In Joan. Tr. 106. n. 4, T. 3. P. 2, c. 765.

⁶⁾ Moral. l. 10. c. 8. Opp. T. 1, c. 345.

⁷⁾ Justin. M. Apolog. II. n. 6. p. 96. — Gregor. Naz. Or. 21. Opp. T. 1, c. 337. s. Or. 34. c. 476 s. — Joan. Damascen. De orth. fid. l. 1. c. 1. Opp. T. 1, p. 123. D. — Cyprian. De idolor. vanit. n. 5. Opp. V. 2. p. 109. — Arnob. Cont. Gent. l. 1. n. 33. et l. 2. n. 2, p. 20. 46.

sibi relictam ad infinita divina attributa probanda haud sufficere. Quin imo

B. ratio nostra non solum cognitionis Dei, rerumque divinarum, etsi haud perfectae et adaequatae, tamen sufficientis pro hac vita terrestri, sibi conscia est, sed et haud difficulter perspicit, illa facultate sibi denegata, revelationem non tantum esse superfluum, sed prorsus inutilem atque impossibilem, utpote quam ipsa neque percipere, neque de ejus divina origine sibi persuadere posset.

Observ. 1. Quemadmodum ergo ad cognitionem omnium sic dictorum mixtorum dogmatum et per revelationem et per rationem pervenire possumus: ita hisce duabus viis Deum utcunque hac in vita intelligimus. Nam quod ad revelationem attinet: certo nemo major ac fide dignior est interpret, quam Deus ipse, Deique Filius, *qui est in sinu Patris* ¹⁾. Sed et ratio, dummodo non velit a divina revelatione dissidium facere, et vias sibi quaerere novas et insolitas, multa potest praeclara de Deo ejusque attributis statuere, partim singulas perfectiones ex idea entis perfectissimi deducendo, quod fit, quando, quodcunque perfectum in rerum natura, et praecipue in nostra mente deprehenderit, ad summum gradum elevans, Deo tribuit, et omne imperfectum ab eo removet, partim, praeexistentibus SS. Litteris ²⁾ et SS. Patribus ³⁾, ex effectis et a Deo creatis ad causam effectricem concludendo. Hunc triplicem attributa divina per rationem cognoscendi modum antiquiores Theologi pro tribus distinctis ad cognitionem divinam perveniendi viis habuerunt, quas viam eminentiae, viam negationis atque causalitatis cognominarunt. Ast quis non videt, a via causalitatis, quam dicunt, vias eminentiae et negationis nunquam posse abesse, et ita etiam notiones agentes, quas per viam eminentiae nanciscimur, nonnisi negatione perfici, et notiones

¹⁾ Joan. 1, 18.

²⁾ Sap. 13, 1. Rom. 1, 19. 20.

³⁾ Cf. Origen. *De princ. l. 1. n. 6.* Opp. T. 1. p. 51. c. 1. C. D. *Interdum oculi nostri ipsam naturam lucis, id est, substantiam intueri non possunt: splendorem vero ejus, vel radios, fenestris forte et quibuslibet luminum brevibus receptaculis infusos, intuentes, considerare possumus, fomes ipse ac fons quantus sit corporei luminis. Ita ergo quasi radii quidam sunt Dei naturae opera divinae providentiae et ars universitatis hujus, ad comparisonem ipsius substantiae ac naturae. Quia ergo mens nostra ipsum per seipsam Deum, sicut est, non potest intueri, ex pulchritudine operum et decore creaturarum, parentem universitatis intelligit.* — Gregor. Naz. *Or. 34.* Opp. T. 1. c. 484. — Basil. *In Hexaem. Hom. 7. n. 11.* Opp. T. 1. p. 62. *Hom. 9. n. 5. p. 86. etc.*

negantes, quas via negationis obtinemus, nonnisi affirmatione expleri ¹⁾? — Porro quum Deum duntaxat notionibus a rebus creatis mutuatis cogitare, atque de eo disserere valeamus: patet omnem nostram Dei cognitionem esse analogicam et symbolicam, atque nostram cogitandi loquendique rationem de Deo non raro esse anthropopatheticam, aut etiam anthropomorphisticam, quando scilicet notiones aut designationes ab affectibus, aut plane a corpore humano mutuamus; *homines enim carnalibus sensibus dediti*, ut ait Fulgentius, *etiam ipsum Deum non possunt, nisi carnaliter cogitare* ²⁾. — Quin imo illud non tantum de cognitione Dei per rationem nobis subministrata valet, sed etiam de cognitione Dei, quam nobis S. Scriptura seu revelatio divina exhibet. Deus enim veritates religiosas nobis manifestans, se ad nostram cogitandi rationem demittere, atque humano sermone uti debet, seu *Deus*, ut ait Hilarius, *non sibi, sed nobis locutus, et in tantum ad intelligentiam nostram eloquii sui temperavit sermonem, quantum comprehendere ad sentiendum naturae nostrae possit infirmitas* ³⁾. *Quemadmodum enim*, ut loquitur Gregorius Nyss., *surdis signis et gestibus, quid agere debeant, indicamus, non quia ipsae vocem non habeamus, cum hoc facimus; sed quia omnino sit non audientibus inutilis, quae fit verbis enarratio: sic natura humana cum sit quodammodo surda, et nihil excelsum et sublimius audiat. Dei gratiam dicimus, multifariam multisque modis in Prophetis loquentem, pro captu nostro et secundum id, quod nobis est consuetum et familiare, SS. Prophetarum linguas conformantem, per haec nos ad sublimium cognitionem velut manu ducere, non vero secundum suam magnitudinem et sublimitatem doctrinam facere. Quomodo enim in exiguo, quod magnum est, caperetur? Sed quia ad parvitatem nostram se vis divina demittit* ⁴⁾. Atque Gregorius Naz. *Quemadmodum nulla ratione fieri potest, ut quispiam, quamlibet gressum urgeat, umbram suam praetereat (quantum enim eam as-*

¹⁾ Cf. Dionys. *De myst. Theolog.* c. 2. Opp. T. 2. p. 25 s. — Joan. Damascen. *De orth. fid.* l. 1. c. 4. Opp. T. 1. p. 127 s.

²⁾ *Cont. serm. Fastidios.* c. 5. Opp. p. 345.

³⁾ *De Trinit.* l. 8. n. 43. Opp. T. 2. c. 192. Cf. Exod. 33, 18. ss. 1. Cor. 13, 9—12. — Tertullian. *Adv. Marcion.* l. 2. n. 27. Opp. V. 2. p. 206. qui ait: *Deum non potuisse humanos congressus inire, nisi humanos et sensus et affectus suscepisset, per quos vim majestatis suae, intollerabilem utique humanae mediocritati, humilitate temperasset, sibi quidem indigna, homini autem necessaria; et ita jam Deo digna, quia nihil tam Deo dignum, quam salus hominis.* — Cyrill. Alex. *Thesaur. Assert.* 31. Opp. T. 5. P. 1. p. 264. E.

⁴⁾ *Cont. Eunom.* l. 12. Opp. ed. Par. 1638. T. 2. p. 779.

sequeris, tantum etiam illa semper antvertit), aut oculus rebus in aspectum cadentibus citra intermediam lucem et aërem conjungatur, aut pisces extra undas volvantur: ita etiam impossibile est iis, qui corporibus inclusi sunt, sine corporearum ac sensilium rerum adminiculo, rebus iis, quae animo ac ratione intelliguntur, omnino conjungi, semper enim obiter sensile aliquid incidit, quantumvis maxime nostra mens ab iis rebus, quae in aspectum cadunt, abstracta, atque in seipsam collecta, cum rebus cognatis atque oculorum aciem fugientibus commercium habere conetur ¹⁾.

Observatio 2. Ex disputatis quoque facile ad quaestionem, numne definitio Dei detur, nec ne, responderi potest. Nam si sub definitione talis rei descriptio intelligatur, ut per eandem illius natura ac essentia plene ac distincte ob oculos quasi ponatur: talis definitio Dei certo non datur, nec dari potest. Quo sensu, ut bene advertit Hermas, Deus *nec verbo defuiri, nec mente concipi potest* ²⁾. At quatenus definitione enuntiatur notae ad informandam aliquam notionem necessariae: ideam Dei negative saltem et relative, i. e. ad humanae cognitionis fines accomodate describi posse, recte dixerimus, et ideo etiam eatenus nomine, quod nonnisi notionis interpretis est insigniri. Quapropter et in §§. Litteris revera varia Dei nomina occurrunt; quae hic adicere non abs re erit. Adpellatur autem Deus, et quidem

a. in Scriptura A. T. אֱלֹהִים (apud LXX Θεός), quod nude positum nonnisi in libris poëticis ³⁾ occurrit, alibi vero semper cum aliquo adjectivo aut genitivo conjunctum deprehenditur, atque proprie *fortem, potentem, principem* denotat. Ejusmodi genitivi et adjectiva sunt: אֱלֹהֵי שָׁמַיִם (LXX ó παντοκράτωρ, Allherrschter, Allgewaltiger, Allmächtiger, πανός *sufficiens*, κυριός, *Dominus*) ⁴⁾; אֱלֹהֵי עֶלְיוֹן (LXX ó ὑψιστος, *altissimus*) ⁵⁾; אֱלֹהֵי הַשָּׁמַיִם, *Deus coelorum* ⁶⁾; אֱלֹהֵי חַי, Θεός ζών, *Deus vivus* ⁷⁾; אֱלֹהֵי הַיָּם, *Deus aëtorum* ⁸⁾. De falsis diis אֱלֹהִים nonnisi raro adhibetur ⁹⁾.

¹⁾ Or. 34. Opp. T. 1. c. 481.

²⁾ Pastor. l. 2. mand. 1. Coteler. PP. apostol. Amstelod. 1724. V. 1. p. 85. c. 1.

³⁾ Job. 40, 19. Is. 44, 10. Ezech. 31, 11.

⁴⁾ Gen. 17, 1. 35, 11.

⁵⁾ Gen. 14, 18—20. Ps. 77, 35. Cf. Luc. , 35.

⁶⁾ Ps. 136, 26.

⁷⁾ Ps. 84, 3. 41, 3.

⁸⁾ Ps. 50, 1.

⁹⁾ Exod. 34, 14.

b. אֱלֹהִים, plerumque in numero plurali אֱלֹהִים, (ab אלה attonitus fuit, stupuit, deinde coluit), *Numen tremendum*, das staunenswerthe, höchstverehrungswürdige Wesen. Usurpatur autem non tantum de falsis diis ¹⁾, sed et de Angelis ²⁾, atque etiam de Regibus, iudicibus ac magistratibus, Dei vice fungentibus ³⁾. Unde et ad verum Deum indicandum non raro alia quaedam vox, ut אֱלֹהֵי מָרוֹם, *Deus excelsus* ⁴⁾, אֱלֹהֵי הַשָּׁמַיִם, ⁵⁾ אֱלֹהֵי, vel אֱלֹהֵי שָׁמַיִם, θεὸς τοῦ οὐρανοῦ ⁶⁾, אֱלֹהֵי צְבָאוֹת, *Dominus coelestium exercituum, Angelorum et siderum*, seu *Dominus universi*, παντοκράτωρ ⁷⁾, et ejusmodi additur. Numerus pluralis autem nominis אֱלֹהִים inde explicatur, quod Scriptores inspirati aut ad perfectiones singulas stupendas et adorandas, quas Deus unitas in se possidet, aut vero ad tres personas in divina substantia respiciebant.

c. אֱדֹנָי, *supremus Dominus*, quod in hac forma solummodo de vero Deo adhibetur ⁸⁾; in numero singulari autem non tantum deos gentium, sed et quemvis dominum et δεσπότην designat ⁹⁾, atque solummodo per excellentiam supremo Domino, seu Domino dominantium tribuitur.

d. Nomina hucusque exposita Numen divinum in relatione ad mundum generatim spectatum exprimunt, nomen vero יְהוָה, quod abbreviatum יי est, Deum, quatenus semetipsum Israëlitis manifestavit, ergo Deum verum, Israëlis redemptorem ac benefactorem specialem ¹⁰⁾. Porro nomina priora sunt ab uno alterove attributo divino sumta, hocce autem, quod omnibus est commune, τὸ absolutum, et ideo etiam perfectissimum *esse* significat. Nam licet, quomodo hoc sacrum τετραγράμματον pronuntiandum sit, nesciamus; quum

¹⁾ Deut. 10, 17. Ps. 49, 1.

²⁾ Gen. 32, 28. 30.

³⁾ Exod. 7, 1. Ps. 82, 6. cell. Joan. 10, 34—36.

⁴⁾ Mich. 6, 6.

⁵⁾ Gen. 24, 7. 2. Par. 36, 23. Ezr. 1, 2. Neh. 1, 4. 5. 2, 4. 20. Jon. 1, 9.

⁶⁾ Dan. 2, 18. Cf. Apoc. 11, 13.

⁷⁾ 2. Sam. 5, 10.

⁸⁾ Cf. Hengstenberg, *Aufstieg des Pentateuchs*. 1. B. p. 251—263.

⁹⁾ Num. 32, 25. 27.

¹⁰⁾ Exod. 6, 2—8. 24, 6. 7. Is. 12, 2. 26, 4. Hos. 12, 6. — Maimonides, *More Nebuch*. l. 1. c. 41. — A ben — Esra, *Comment. in Exod.* 3, 13.

Judaei ab ejus pronuntiatione religionis et reverentiae causa abstinerint ¹⁾: tamen ex verbis Moysis, quibus origo ejusdem refertur, liquet, Deum hac denominatione se tanquam eum, qui vere, adeoque per se ac necessario existit, et propterea immutabilis, sibi constans est, ostendere voluisse ²⁾; ita ut illud Apostoli $\acute{o} \acute{\omega}\nu$, $\acute{o} \acute{\eta}\nu$, $\acute{o} \epsilon\rho\chi\acute{o}\mu\epsilon\nu\omicron\varsigma$ ³⁾ tantum imitatio nominis יהוה sit.

e. Tandem etiam appellatur $\epsilon\sigma\tau\iota$ vel $\epsilon\sigma\tau\iota\eta$, simili sensu scilicet *ens* κατ' ἐξοχήν ⁴⁾.

B. In N. T. autem Deus dicitur:

a. *Θεός*, quod alii derivant a *θεᾶσθαι* ⁵⁾, vel a *θεωρεῖν* ⁶⁾, *intueri*, *contemplari*, utpote qui intueatur conspiciatque omnia; alii ab *οἶδω*, *urere*, *absumere*, quum Deus ignis sit consumens omnem malitiam ⁷⁾; alii a *τιθέναι* *ponere*, quod posuerit, seu effecerit omnia ⁸⁾; alii a *θέω*, *currere*, *permeare*, quod ubique praesens adsit, omniaque pervadat ac vivificet ⁹⁾; alii tandem ab *εὖς*, quod idem est ac *ἀγαθός*, ut Germanorum *Gott* a *gut*, quoniam sit bonum originarium ¹⁰⁾. A *Θεός* natum est *Θεῖον* ¹¹⁾ et *Θεότης*, *divinitas* ¹²⁾.

¹⁾ Cf. Euseb. *Praepar. Evang.* l. 2. c. 6. — Clem. Alex. legit *Ιαού*. *Strom.* l. 5. n. 6. Opp. T. 2. p. 666. Origenes *Ιάω*. In *Joan.* T. 2. Opp. T. 4. p. 49. Alii legunt *Ιαβὲ*. Theodoret. *Quaest.* 15. in *Exod.* Opp. T. 1. p. 86. Pseud. Hieronym. *Lexic. nom. hebr.* Opp. Hieron. T. 3. c. 651. s.

²⁾ Exod. 3, 14.

³⁾ Apoc. 1, 4.

⁴⁾ Lev. 24, 11. Deut. 28, 58. Cf. Act. 4, 12. Ephes. 1, 21.

⁵⁾ Gregor. Nyss. *Hom.* 5. in *Cantic.* Opp. T. 1. p. 539. B. *Cont. Eunom.* l. 12. T. 2. p. 427. E. — Joan. Damascen. *De orth. fid.* l. 1. c. 9. Opp. T. 1. p. 143. *De Trinit.* n. 5. T. 1. p. 476. — Basil. *Epist.* 8. n. 11. Opp. T. 3. p. 88. E. — Ps. Athanas. *De defn.* n. 6. Opp. Athanas. T. 2. p. 243.

⁶⁾ Ps. Athanas. *Quaest. al. q.* 2. Ib. p. 335.

⁷⁾ Ps. Athanas. *De defn.* n. 6. Ib. p. 243. — Gregor. Naz. *Or.* 36. Opp. T. 1. c. 522. — Joan. Damascen. *De orth. fid.* l. c.

⁸⁾ Theophil. *Ad Autol.* l. 1. n. 4. Opp. Justin. etc. p. 362. — Clem. Alex. *Strom.* l. 1. c. 29. Opp. T. 1. p. 427. — Basil. l. c. — Joan. Damascen. *De Trinit.* n. 5. Opp. T. 1. p. 476.

⁹⁾ Ps. Athanas. *Quaest. al. q.* 2. Opp. T. 2. p. 335. *De defn.* n. 6. T. 2. p. 243. Gregor. Naz. *Or.* 36. l. c. — Joan. Damascen. — *De orth. fid.* l. c. *De Trin.* l. c. — Theophil. *Ad Autol.* l. c.

¹⁰⁾ Cf. Greiburg. *Zeitschrift für Theologie*, Jahrg. 1843. 1. §.

¹¹⁾ Act. 17, 29.

¹²⁾ Rom. 1. 20. Col. 2, 9.

- b. Porro dicitur *κύριος*, *δύσποτης*, seu *Dominus* ¹⁾;
- c. *βασιλεὺς*, seu *Rex* ²⁾;
- d. *κτίστης πάντων* seu *Creator omnium* ³⁾;
- e. *ὑψίστος*, seu *Altissimus* etc.; atque praecipue
- f. *πατήρ*, quatenus hominibus et omnibus creaturis optime providet ⁴⁾.

Nomina autem haec, in SS. Litteris Deo tributa, ut ex eorum consideratione facile colligitur, quemadmodum et quaecunque alia, ab hominibus excogitata, ipsam, cujusmodi in se est, naturam Dei haud proprie declarant, sed tantum existendi modum, aut aliquam perfectionem, aut aliquam actionem vel relationem (*χέρις*), seu, ut ait Gregorius Naz. *aliquid eorum, quae circa Deum praedicantur* ⁵⁾, idque valde imperfecte, secundum nostrum concipiendi modum expriment ⁶⁾. Attamen hoc non obstante, quando nomina illa adhibemus, Deum ipsum, seu divinam substantiam significamus ⁷⁾. Est itaque nostra de Deo loquendi ratio, prout ejusdem cognitio quidem imperfecta, verumtamen nihilo secius recta ac sincera, ita ut post revelationem divinitus nobis communicatam humilis et rudis Christianus melius de Deo sentiat et disserat, quam celeberrimi antiqui philosophi.

§. 9. **Attributa divina.**

Attributa divina, quorum adcuratori expositione ad clariorem ipsius divinae naturae ac essentiae cognitionem eluctamur, sunt perfectiones absolutae, seu, ut ajunt, simpliciter simplices, quae divinam substantiam secundum varios ejus se habendi et agendi modos

¹⁾ Luc. 2, 39. Act. 4, 24.

²⁾ 1. Tim. 6, 15.

³⁾ 2. Machab. 1, 24. 1. Petr. 4, 19.

⁴⁾ Matth. 5, 45. 48. 6, 6. 9, 7, 11. 18, 14. 23, 9. Rom. 8, 15. 1. Cor. 8, 4—6. Ephes. 3, 15.

⁵⁾ Or. 34. Opp. T. 1. c. 478. D. Cf. Gregor. Nyss. *Quod non sint tres dii*. Opp. T. 2. p. 451. B. *Cont. Eunom.* l. 6. T. 2. p. 198. l. 12. p. 330. 425. D. ss.

⁶⁾ Cf. Basil. *Adv. Eunom.* l. 2. n. 9. Opp. T. 1. p. 245. *Epist.* 189. n. 8. T. 3. p. 281. — Gregor. Naz. *Or.* 36. Opp. T. 1. c. 522 s. — Nicet. *Comment. in Or.* 42. Gregor. Naz. In ej. Opp. T. 2. c. 953 s. — Joan. Damascen. *De orth. fide.* l. 1. c. 9. Opp. T. 1. p. 142 s.

⁷⁾ Cf. Athanas. *De decret. Nic. Syn.* n. 22. Opp. T. 1. P. 1. p. 228.

definiunt, et propterea de illa, in se considerata, necessario praedicari debent. Ab attributis hisce, quae Scriptoribus ecclesiasticis ἀρεταί, ἀξιώματα, νοήματα, etiam attributa absoluta dicuntur, differunt proprietates, seu attributa relativa, ἰδιώματα, quae characteres trium in SS. Trinitate personarum significant, et praedicata Dei relativa, quae rationem ipsius ad mundum indicant.

In attributis divinis, quae nostro intelligendi more ad essentiam divinam velut formas et affectiones adjungimus, mente concipiendis duo vitiosi errores, sibi oppositi, peraeque vitandi sunt. Alter est eorum, qui nihil, ne cogitatione quidem et intelligentia nostra, differre volunt tum a se invicem attributa ista, tum a natura et essentia; alter vero eorum, qui attributa divina a se invicem et ab essentia re ipsa distingui seu separari contendunt.

Prior error in Aëtio et Eunomio notatus et damnatus est a Patribus, qui ambo attributa omnia, quae de Deo praedicantur, absoluta et multo magis relativa, ut ἀγεννησίαν in Patre, nullo prorsus modo, ac ne cogitatione quidem discrepare putabant ab essentia, ut eo ipso Filium a verae propriaeque divinitatis communione excluderent, quod ἀγεννησίαν careret, quam ipsam statuebant esse divinitatem ¹⁾. Quibus accenseri possunt recentiores Pantheistae, qui tamen ulterius progressi, Deum in se spectatum, nonnisi κατὰ δύναμιν admittentes, prout infinitum, ita et indefinitum esse, tradunt ²⁾.

Error oppositum tenebat Gilbertus Porretanus, Episcopus Pictaviensis, qui docebat, magnitudinem, sapientiam, justitiam, et tandem divinitatem non esse ipsum Deum, sed esse formam, qua ipse magnus, sapiens, justus, qua Deus sit ³⁾. Error hic, cui jam Theodorus Mopsuestenus praelusisse fertur, et quem postea Sociniani resuscitarunt, statuantes, in Deo accidentia dari, condemnatus est in Concilio Rhemensi a. 1148, sub Eugenio III. celebrato, quod statuit: *Credimus et confitemur, simplicem naturam Divinitatis esse Deum, nec aliquo sensu Catholico posse negari, quin Divinitas sit Deus, et Deus Divinitas. Sicubi vero dicitur: Domini sapientia sapientem, magnitudine ma-*

¹⁾ Cf. Gregor. Nyss. *Adv. Eunom.* l. 12. Opp. Par. 1615. T. 2. p. 203. D. s. — Basil. *Adv. Eunom.* l. 1. n. 4—5. Opp. T. 1. p. 212. 215 s.

²⁾ Cf. Hegel *Logik*. I. 28. p. 77 s. *Encyclop.* §. 86 s. p. 100 s.

³⁾ Cf. Otto Frisigen. *De gestis Friderici*. l. 1. c. 50. — Bernard. *Serm.* 80. in *Cantic.* n. 8. Opp. V. 1. c. 1551.

gnum, Divinitate Deum esse, et alia hujusmodi: credimus, nonnisi ea sapientia, quae est ipse Deus, sapientem esse; nonnisi ea magnitudine, quae est ipse Deus, magnum esse; nonnisi ea aeternitate, quae est ipse Deus, aeternum esse; nonnisi ea unitate unum, quae est ipse; id est, se ipso sapientem, magnum, aeternum, unum Deum. Cum de tribus personis loquimur, Patre et Filio et Spiritu S., ipsas unum Deum, unam Divinam substantiam esse, fatemur. Et e converso cum de uno Deo, una divina substantia loquimur: ipsum unum Deum, unam divinam substantiam esse tres personas confitemur ¹⁾.

Quamvis enim Deus, tanquam ens absolutum, simplicissimus, atque neque ex partibus, neque ex accidentibus seu adventitiis qualitatibus, vel affectionibus ullis compositus sit; quoniam tamen non est res inanis, sed qua spiritus aequè perfectissimus ac necessarius potius complexus atque plenitudo omnis perfectionis, et propterea, licet sit infinitus, certe non est simul indefinitus: possumus in eo comparate, vel potius oppositè ac relate ad entia finita, praecipue mentem nostram, quae, quamvis sit a Deo, non gradu, sed essentia diversa, tamen ejus imaginem refert, diversos se habendi et agendi modos discernere, atque ipsum modo hoc, modo illo respectu considerare, sicque varias *ἐννοίας* de eo mente formare et verbis exprimere; prout et alia innumera, re unum idemque existentia, diverso respectu considerando diversa quodammodo facimus; quodque quoad Deum eo magis est necessarium, quum intellectus noster sit angustior, quam ut uno aspectu naturam Dei integram intueri possit. Hinc divina attributa sunt nonnisi ipsa divina substantia diverso sub respectu considerata; atque licet *κατὰ πρόγµα* ab hac minime differant, tamen *κατὰ ἐννοιαν*, et cum ea et secum invicem, minime sunt confundenda ²⁾. Re ipsa autem, seu *κατὰ πρόγµα* attributa a divina essentia et se invicem discerni, seu dividi haud possunt; quoniam de Deo, tamquam ente necessario, nihil praedicari potest, quod in ipso absoluta necessitate non adsit, et hinc ipse non sit, seu ad ipsius essentiam non pertineat ³⁾.

¹⁾ *Fid. Symb. cont. err. Gilbert. Mansi, Coll. Conc. T. 21. c. 712 s.*

²⁾ *Cf. Basil. Adv. Eunom. l. 2. n. 32. Opp. T. 1. p. 268. D. Cf. s. 7. p. 242 s. — Gregor. Nyss. Cont. Eunom. l. 12. Opp. T. 2. p. 304. B.*

³⁾ *Cf. Augustin. De Trinit. l. 6. c. 7. n. 8. Opp. T. 8. c. 848. c. 10. n. 11. c. 850. l. 7. c. 1. n. 1. c. 852 s. Auctor L. de Incarnat. l. 2. Opp. Augustin. T. 8. Append. c. 59. D.*

Ad not. Si cum Theologis antiquioribus loqui vellemus: distinctio illa inter attributa divina inter se et inter substantiam seu essentiam divinam virtualis dicenda esset. Sub qua intelligunt distinctionem a diversis sumtam virtutibus, quae in una eademque re pro diversitate effectuum cogitantur, et quarum mens nostra in re contemplanda modo hanc, modo illam explicite, missis reliquis, apprehendit; et eam quasi in medio collocant inter distinctionem realem, inter ea intercedentem, quae a se reapse separantur, vel separari possunt, aut sibi relate ad invicem opponuntur, et inter distinctionem nominalem, in sola nominum diversitate sitam.

§. 10. Divisio attributorum divinatorum.

Attributa divina a diversis diverso modo dividuntur. Quamvis censeamus, illa non tam in certas classes distribuenda, quam potius ordine systematico, qui in ipsa divina natura fundatur, proponenda esse: propter rei tamen notitiam principaliores divisiones enumerabimus.

1. Alii ergo attributa divina dispertuntur in affirmativa et negativa. Affirmativa sunt iis illa, quae per viam affirmationis; et terminis affirmativis de Deo praedicantur, ut, esse eum omniscium, omnipotentem, etc.; negativa vero ea, quae per modum negationis ac terminis negativis, ut esse infinitum, immensum, vel etiam terminis positivis enuntiantur, qui tamen in sua notione negationem involvunt, sine qua a nobis ne cogitari quidem possunt, ut simplicitas, i. e. cujuscunque compositionis absentia. Attamen omnia attributa in Deo, in se considerata, reipsa sunt affirmativa; modus autem, quo a nobis concipiuntur, vel vero exprimuntur, accidentalis est, nullumque solidum dividendi fundamentum exhibere potest.

2. Alii divina attributa dividunt in communicabilia et incommunicabilia, prout cum entibus finitis aliquo modo communicari possunt, aut non possunt. Veruntamen omnia attributa aliquo respectu, semota scilicet eorum interna necessitate atque infinita perfectione, cum entibus finitis communicantur, alio respectu autem, si tanquam absoluta atque infinita considerantur, cum iisdem communicari omnino non possunt. Caeterum divisio, ut prior, non est ex ipsa indole attributorum divinatorum reapse mutuata, sed accidentali tantum ea cogitandi rationi superstructa.

3. Alii distinguunt inter attributa quae *essentia*, seu *immanentia*, (*ἀνεξέχρητα*), et *operativa* seu *transeuntia*,

(ἐνσπρηγμένα), prout eis notio efficientiae deesse aut inesse cogitatur. Ad priora pertinent simplicitas, immutabilitas, etc.; ad posteriora omniscientia, omnipotentia, etc. Sed misso illo, nomen attributorum quiescentium in Deo, vita ac efficacia absoluta, offendere, et nomen transeuntium ad omniscientiam, libertatem, etc. haud quadrare, etiam hac divisione nobis aperte conspectus attributorum divinorum facilius haud praebetur.

4. Alii iterum discernunt inter attributa divina metaphysica seu physica, quae ad Dei substantiam infinitam, vel potius ad existentiam absolutam spectant, et inter moralia, vel vero, ut alii volunt, inter intellectualia et moralia, quae ad ejus intelligentiam et voluntatem referuntur. Attamen et haec divisio notionem entis absoluti ac perfectissimi haud exhaurit, quum summa beatitas et omnipotentia ad attributa moralia, ad quae tamen a patronis hujusce divisionis referuntur, haud pertineat ¹⁾.

Abstinentes itaque ab omni divisione attributorum divinum instituenda, quum nulla ex hucusque in medium prolatis probari queat, sequentes SS. Litteras, quae descriptioni Dei analogiam hominis substernunt, primo Deum quoad ejus existentiam, deinde quoad cognitionem, tum quoad voluntatem, et tandem quoad statum internum, ex perfectissima cognitione, ac voluntate necessario oriundum, considerabimus, et quidem ostendemus, eum esse:

A. quoad existentiam;

1. simplicem, seu spiritum purissimum;
2. immutabilem;
3. aeternum; et
4. immensum ac omnipraesentem;

B. quoad cognitionem:

5. omniscium; et
6. sapientissimum;

C. quoad voluntatem:

¹⁾ Silentio praetermittimus divisionem attributorum divinorum, a Deo **o** mayer **o** excogitatum, in perfectiones metaphysicas, quae ratione possibilitatis (Deum esse ens verum et vivum, ens a se et necessarium ens entium, aeternum, independentem, et immutabilem) physica quae rationem existentiae (intellectus infinite perfectus, voluntas infinite omnipotentia, omnipraesentia et immensitas), et morales, quae rationem finis ultimi exprimunt (sapientia, sanctitas, bonitas et justitia), ut pote quae prorsus omni veritate, ac ideo etiam omni usu destituitur.

7. omnipotentem;
8. liberrimum;
9. sanctissimum;
10. benignissimum;
11. veracissimum;
12. fidelissimum;
13. justissimum; atque
- D. quoad statum internum
14. sibi sufficientissimum;
15. summa maiestate ac gloria conspicuum;
- atque
16. beatissimum.

**§. 11. 1. Deus est, et quidem quoad existentiam:
a) spiritus purissimus, seu simplex omnino.**

Simplicitas est negatio seu absentia compositionis, compositio autem distinctorum unio. Si itaque revelatio docet, Deum esse spiritum simplicem omnino, sensus dogmaticus hujus doctrinae est, Deum prorsus ex nullis partibus, quae nexae invicem et conjunctae ipsum efficiant, constare, omnisque compositionis esse expertem, sive quae fit ex materia et forma, corpore et anima, sive quae ex partibus quantitativis, ut ajunt, aut integrantibus, sive quae ex substantia et accidente, aut ex potentia et actu, ex essentia et existentia, ex natura et personalitate seu *ὕποστασι* oritur.

Simplicitatem Dei impugnare, praeter Idololatrias, qui deos humana specie, aut certe corporibus praeditos finxerunt, atque philosophos gentiles illos, qui censuere, Deum esse aut substantiam rerum universam, aut universalem mundi animam, aut ignem, etc., nec non Saducaeos, qui nullam pure spirituales substantiam admittebant, antiqui Manichaei, qui, teste Augustino ¹⁾ docebant, Deum infinita mole esse diffusum, non tamen undique, sed tribus *quadris* infinitum, porro quidam Monachi Aegypti saec. IV., Antropomorphitae propterea dicti, qui Deo formam hominis

¹⁾ *De haeres. Haer.* 46. Opp. T. 8. c. 13 ss. *Cont. Epist. Fundam.* c. 28.

²⁾ 25. T. 8. c. 165. *Confess. l. 5. c. 10. n. 19 s.* T. 1. c. 116. *Cont. Faust. l. 25. c. 1.* T. 8. c. 431 ss.

affinixerunt ¹⁾, gracci Palamitae, qui virtutem divinam ²⁾, Gilbertus Porretanus et Sociniani, qui, ut supra commemoravimus, divina attributa, et Joachimus Abbas, qui divinas personas a divina substantia reipsa distinguebant ³⁾; nec non Pantheistae recentiores, qui Deum cum mundo confundunt. Accusantur etiam anthropomorphismi Melito Sardensis ⁴⁾, Tertullianus ⁵⁾, Lactantius ⁶⁾ et ipse Epiphanius, quos tamen alii ab hoc errore vindicare student ⁷⁾.

Dogma autem Catholicum, Deum videlicet omnis omnino compositionis expertem esse, certo ac lucide demonstratur:

A. ex SS. Litteris. Etenim

a. Christus Dominus disertis verbis, Deum spiritum purum esse, asserit, quum ait: *Spiritus est Deus: et eos, qui adorant eum, in spiritu et veritate oportet adorare* ⁸⁾. Quo loco vocabulum *spiritus* sensu proprio de substantia immateriali ac pure spirituali accipiendum esse, non tantum inde colligitur, quod Salvator alia occasione expresse declarat, *quia spiritus carnem et ossa non habet* ⁹⁾, sed et jam ex ejusdem consilio verbis allatis monstrandi, verum cultum Dei non certo loco adstrictum esse, ad eumque imprimis requiri, ut ex internis animi procedat, atque sincerus sit. Ait itaque Christus: Cum Deus spiritus sit, isque immensus, etiam in spiritu atque ubique adorandus est.

b. Porro talia Deo in libris divinis adscribuntur, quae cum physica compositione nullo prorsus modo consistere, atque dun-

¹⁾ Cf. Epiphanius. *Haer.* 70. Opp. T. 1. p. 811 ss. — Augustinus. *De haeres.* *Haer.* 50. Opp. T. 8. c. 18. — Cassianus. *Coll.* 10. c. 2. Opp. p. 532 ss. Theodoretus. *H. E.* l. 4. c. 10. ed. Reading. Augustinus. Taurin. 1748. p. 141. — Socrates, *H. E.* l. b. c. 7. Eusebius et Sozomenus. *H. E.* ed. Reading. Augustinus. Taurin. 1748. p. 269. — Sozomenus. *H. E.* l. 8. c. 11. *Ib.* p. 315.

²⁾ Cf. Griß, *Seegerlexikon*, Würzb. 1828. 2. B. 2. Abth. p. 85 s.

³⁾ Cf. Griß, *Ib.* p. 14 ss.

⁴⁾ Cf. Origenes, *Select. in Gen.* 1, 26. Opp. T. 2. p. 25.

⁵⁾ Cf. *Adv. Prax.* n. 7. Opp. V. 2. p. 408 ss. *De carn. Christ.* n. 11. *V.* 2. p. 56 s. *Adv. Marcion.* l. 2. n. 16. *V.* 2. p. 194 s. *Adv. Hermog.* n. 3 *V.* 1. p. 374.

⁶⁾ *De ira D. c.* 2. Opp. T. 2. p. 130. c. 18. p. 168.

⁷⁾ Cf. Petavius. *De Deo Deique propriet.* l. 2. c. 1. n. 4 ss. *De theol. dogm.* Antv. 1700. T. 1. p. 86 ss. et Tournellus. *Curs. theol.* Col. Agrip. 1752. T. 1. p. 71 ss.

⁸⁾ Joan. 4, 24.

⁹⁾ Luc. 24 39.

taxat in spiritum, eumque infinitum cadere possunt. Praedicatur enim ibidem: α) immensus, qui coelum et terram impleat ¹⁾, et quem coelum et coeli coelorum capere non possint ²⁾; β) mutationi nulli obnoxius, qui non mutetur ³⁾, et apud quem non sit transmutatio, nec vicissitudinis obumbratio ⁴⁾; γ) immortalis, qui solus habeat immortalitatem ⁵⁾, atque incorruptibilis, cujus gloriam gentiles mutaverint in similitudinem imaginis corruptibilis hominis ⁶⁾; atque δ) invisibilis, qui nullis lineamentis, imagine nulla possit delineari ⁷⁾. *Cui ergo, ait Isaias, similem fecistis Deum? aut quam imaginem ponetis ei?* — Et sane nonnisi simplicitas Dei causa erat, cur Judaei prohiberentur, quominus formam Dei adumbrarent. *Non facies tibi sculptile, neque omnem similitudinem, quae est in coelo desuper, et quae est in terra deorsum, nec eorum, quae sunt sub terra in aquis* ⁸⁾.

B. Simplicitem Dei quoque SS. Patres unanimiter docent. Nam

a. non tantum sententiam contrariam declarant stultam, ut Theodoretus ¹⁰⁾, manifeste impiam, ut Origenes ¹¹⁾, stultissimam haeresin, ut Hieronymus ¹²⁾, aut ineptam haeresin, gravem errorem, qui in perpetuae mortis discrimen injiciat, et gentilem blasphemiam detestandam, ut Cassianus ¹³⁾, cogitationem turpiter vanam, quandam idololatriam, et sacrilegium, ut Augustinus ¹⁴⁾, atque Anthropomorphitas, qui pervicaciter huic errori adhaerere voluerunt, inter haereticos recensent, ut Augustinus ¹⁵⁾, Phi-

¹⁾ 3. Reg. 8, 27.

²⁾ Jer. 23, 24.

³⁾ 3. Reg. 8, 27.

⁴⁾ Mal. 3, 6.

⁵⁾ Jac. 1, 17.

⁶⁾ 1. Tim. 1, 17. 6, 16. Rom. 1, 23. Cf. Act. 17, 29.

⁷⁾ Rom. 1, 20. Col. 1, 15. 1. Tim. 1, 17. 6, 16. Deut. 4, 12.

⁸⁾ Is. 40, 18. Cf. 40, 25. 46, 5.

⁹⁾ Exod. 20, 4. Cf. Deut. 4, 16. 27, 15. Ps. 96, 7. Jer. 8, 19. Dan. 11, 8. Mich. 5, 12. Act. 7, 43.

¹⁰⁾ *Haer. fab. l. 4. c. 10.* Opp. T. 4. p. 211.

¹¹⁾ *In Gen. Hom. 1. n. 13.* Opp. T. 2. p. 57. c. 1. E.

¹²⁾ *Cont. Joan. Hieros. n. 11.* Opp. T. 2. c. 418. B.

¹³⁾ *Coll. 10. c. 2. 4. 5.* Opp. 532 et 536.

¹⁴⁾ *Epist. 120. (122). c. 2. n. 7.* Opp. T. 2. c. 349. *De fid. et symb. c. 7.*

¹⁵⁾ *14. T. 6. c. 157. De Trinit. l. 12. c. 7. n. 12. T. 8. c. 918.*

¹⁶⁾ *De haer. Haer. 50.* Opp. T. 8. c. 18. Cf. *Haer. 76. c. 23.*

lastrius ¹⁾, et Isidorus ²⁾, eisque resistunt atque illos universae Ecclesiae denuntiant; sed

b. veritatem orthodoxam tanquam solam rationi et revelationi consonam proponunt, eamque una variis rationibus demonstrare conantur. Sicut Irenaeus: *Deus simplex et non compositus, — totus cum sit — spiritus et — tota ratio* ³⁾. — Origenes: *Non ergo aut corpus aliquod, aut in corpore esse putandus est Deus, sed intellectualis natura simplex, nihil omnino in se conjunctionis admittens: uti ne majus aliquid et inferius in se habere credatur, sed ut sit ex omni parte πωρὰς, et ut ita dicam, ἐνὰς, et mens, ac fons, ex quo initium totius intellectualis naturae, vel mentis est* ⁴⁾. — Gregorius Naz. *An corpus eum dices? Quonam ergo modo immensus, infinitus, figurae expers est, ac denique ejusmodi, ut nec tangi, nec oculis cerni queat? An haec quoque in corpora cadunt? — Quid enim afferri potest, cur colatur atque adoretur, si circumscriptus est? aut quid causae esse dicemus, quin ex elementis constatus sit, atque in eadem denuo redigatur, ac prorsus intereat? Compositio quippe pugnae initium est, pugna autem dissidii, dissidium solutionis, solutio porro nullo modo in Deum ac primam illam naturam cadit. Quocirca nullum dissidium admittendum est, ne solutio consequatur: nec pugna, ne dissidium oriatur: nec compositio, ne pugna existat. Ac proinde ne corpus quidem est, ne alioqui compositum quoddam eum esse necesse sit* ⁵⁾. — Cyrillus Alex. *Deus omnem creaturam excedit, neque corpus est, neque figura sive forma corporis continetur, cum sit simplex, materiae et formae expers: neque compositus ex partibus, vel membris, ut nos, constans, imo Spiritus, secundum Scripturas; et omnia intuens, ubique existens, omniaque implens, et a nullo abens. Implet enim coelum et terram* ⁶⁾. Et alibi: *Quo, ait, pacto igitur Pater (si ex essentia et cogitatione compositus est) cense-*

¹⁾ *De haeres. Haer. 17.* In Galland. *Bibl. PP.* T. 7. p. 489. c. 1.

²⁾ *Origin. l. 8. c. 5.* Opp. p. 65. c. 2. H.

³⁾ *Adv. haer. l. 2. c. 13. n. 2.* p. 130. c. 2. Cf. c. 17. n. 7. p. 139. c. 2. c. 28. n. 5. p. 157. c. 2. l. 4. c. 11. n. 2. p. 240. c. 1.

⁴⁾ *De princ. l. 1. c. 1. n. 6.* Opp. T. 1. p. 51. c. 1. D. E. Cf. *Cont. Cel.* l. 6. n. 69. T. 1. p. 685. A. et al. pass.

⁵⁾ *Or. 34.* Opp. T. 1. c. 477, B. s.

⁶⁾ *Epist. ad Calosyr.* Opp. T. 6. P. 2. p. 364. D. E. Cf. *Adv. Anthropol.* lb. p. 366 s.

bitur esse omnium principium, quum sit compositus secundum vos, et non simplex? Atqui principio nihil prius intelligi potest. Quum vero nihil prius principio intelligi possit, nulla certe ratione compositus dici potest. Siquidem congressus quidam simplicium compositum efficit ¹⁾. — Theodoretus, qui data opera refellit eos, qui imaginem Dei, ad quam homo factus dicitur, in corpore collocabant: *Samaritanae Dominus dixit: Deus spiritus est. — Si autem Deus spiritus est, simplex igitur, incompositus, et figuram non recipiens* ²⁾. — Joannes Damascenus: *Quo enim modo corpus esse queat, quod infinitum et interminatum est, quod figura caret, quod nec tangi, nec oculis cerni potest; quod denique simplex est, nec compositum* ³⁾. — Ambrosius: *Deus Spiritus est, et nihil habet in sua substantia corporale, sed totus est Spiritus* ⁴⁾. Et alibi: *Deus naturae simplicis est, non conjunctae atque compositae, cui nihil accedat, sed solum, quod divinum est, in natura habeat sua: complens omnia, nusquam ipse confusus: penetrans omnia, nusquam ipse penetrandus: ubique totus, eodemque tempore vel in coelo, vel in terris, vel in novissimo maris praesens: visu incomprehensibilis, fatu ininterpretabilis, sensu inaeestimabilis, fide sequendus, religione venerandus; ut quidquid religiosius sentire potest, quidquid praestantius ad decorem, quidquid sublimius ad potestatem, hoc Deo intelligas convenire* ⁵⁾. — Prudentius:

*Tu, me praeterito, meditaris numina mille,
Quae simules parere meis virtutibus, et me
Per varias partes minuas: cui nulla recidi
Pars, aut forma potest: quia sum substantia simplex,
Nec pars esse queo. Solis divisio rebus
Compositis, factisque subest: me nemo creavit,
Ut scindi valeam, cunctorum conditor unus* ⁶⁾.
Et ita alii ⁷⁾.

¹⁾ Thesaur. Assert. 13. T. 5. P. 1. p. 134. E. s.

²⁾ Quaest. 20. in Genes. Opp. T. 1. p. 15. B.

³⁾ De orthod. fide. l. 1. c. 4. Opp. T. 1. p. 127.

⁴⁾ Enarr. in Ps. 43. n. 65. Opp. T. 1. c. 914. Cf. Serm. 8. in Ps. 118. n. c. 1061. Hexaem. l. 6. c. 7. n. 40. c. 127.

⁵⁾ De fide. l. 1. n. 106. T. 2. c. 465. Cf. Epist. 81. n. 8. c. 1099.

⁶⁾ Cont. Symmach. l. 2. sect. 2. v. 236—242. In Galland. Biblioth. PP. T. 8. p. 512.

⁷⁾ Cf. Cyrill. Hieros. Cat. 9. n. 1. Opp. p. 126. — Gregor. Nyss.

*stitula, sed vivens ipsa per totum*¹⁾). — Leo M.: *Nemo hominum veritas, nemo sapientia, nemo iustitia est: sed multi participes sunt veritatis et sapientiae atque iustitiae. Solus autem Deus nullius participationis indigus est: de quo quidquid digne utcumque sentitur, non qualitas est, sed essentia. Incommutabili enim nihil accedit, nihil deperit: quia esse illi, quod est sempiternum, semper est proprium.*²⁾

2. Porro non datur in Deo compositio, quae oritur ex potentia et actu, ex eadem ratione, quoniam videlicet in ente necessario ac perfectissimo nil potest concipi, cui aliquid adveniat, quoque perficiatur. Unde recte advertit Maximus: *Ipsa per se supraquam bonitas, quae est mens et tota actus, ad se ipsam conversa, in actu est, non potestate prius sine mente, postea mens actu: unde est etiam solum mens pura, quae non intelligit intelligentia extrinsecus introducta, sed ex se ipsa penitus intelligit. Si enim substantia ejus alia est, quae autem intelligit alia ab ipsa, non intelligetur ipsa, id est substantia ejus. Si quid vero habet, a se habet, non ab alio: si autem a se et ex se intelligit, ipsa est ea, quae intelligit*³⁾.

¹⁾ De Trinit. l. 8. n. 43. Opp. T. 2. c. 254.

²⁾ Epist. 15. c. 5. Opp. T. 1. p. 228. c. 1. Cf. Iren. Adv. haer. l. 1. c. 12. n. 2. p. 57. l. 2. c. 13. n. 3. p. 130. l. 2. c. 28. n. 4. p. 157. l. 4. c. 11. n. 2. p. 240. — Clem. Alex. Strom. l. 7. c. 7. Opp. T. 2. p. 853. l. 5. c. 12. p. 695. — Athanas. Cont. Arian. Or. 4. n. 2. Opp. T. 1. P. 1. p. 618. De decr. Syn. Nic. n. 22. T. 1. P. 1. p. 142. Epist. ad Afros. n. 8. T. 1. P. 2. p. 897 s. — Gregor. Naz. Or. 34. Opp. T. 1. c. 477. — Cyrill. Alex. In Joan. (5, 19.) l. 2. c. 6. Opp. T. 4. p. 219. (13, 35.) l. 9. p. 753. C. ss. De spir. et verit. l. 9. T. 1. p. 299. A. Thesaur. Assert. 34. T. 5. P. 1. p. 347. D. p. 350. D. E. p. 353. C. ss. De Trinit. dial. 7. T. 5. P. 1. p. 655. — Cyrill. Hieros. Cat. 6. n. 7. Opp. p. 91. — Ps. Justin. Quaest. et respons. ad Orthod. q. 144. Opp. Justin. etc. p. 542. — Ps. Athanas. De S. Trinit. dial. 1. n. 3. Opp. Athanas. T. 2. p. 474. — Ambros. De fid. l. 1. c. 16. n. 106. Opp. T. 2. c. 465. — Mar. Victor. Adv. Arianum. l. 1. n. 9. In Galland. Biblioth. PP. T. 8. p. 155. l. 3. n. 1. p. 179. c. 2. D. — Gregor. M. Mor. l. 18. c. 30. n. 46. Opp. T. 1. c. 552 — Anselm. Proslog. c. 12, 14, 18. Opp. p. 32. c. 2. p. 33. c. 2. Monolog. c. 17. p. 10. De fid. Trinit. c. 3. p. 43. c. 1 ss. — Thom. 1. p. q. 3. art. 3—4. Opp. 2. T. 0. p. 16 ss. Cont. Gentil. l. 1. c. 21—22. T. 18. p. 21 ss.

³⁾ Schol. in Dionys. De div. nomin. c. 5. Opp. Dionys. T. 1. p. 709. Cf. Maxim. Ap. Euthym. Panopl. 1. tit. 3. Bibl. maz. PP. Lugdun. T. 11. p. 27. — Basil. Epist. 8. n. 2. Opp. T. 3. p. 82. — Gregor.

3. Etiam illa compositio in Deo haud obtinet, quae ex natura et *ὑπόστασις* nascitur; quum in ipso, utpote spiritu necessario ac infinito, *ὑπόστασις* quoque, eaque trina, ut inferius ostendatur, ad ejus essentiam necessario pertineat, et minime cum eadem tanquam accidens conjungatur. *Simplex itaque*, ait Cyrillus Alex., *et incompressa est illa omnium suprema natura, hypostaseon quidem proprietatibus, et personarum ac nominum differentiis dilata, et in S. tendens Trinitatem, verumtamen unitate naturali, et omnimoda identitate, ad unum quiddam concurrens, Dei nimirum nomen et rem: ita ut in unoquoque tota intelligatur natura, una cum ejus proprietate, hypostatica nimirum. Manet enim unumquodque id, quod est, unione cum aliis naturali, illa quoque possidens in sua natura* ¹⁾. — Bernardus: *Personarum proprietates non aliud, quam personas, ipsasque non aliud, quam unum Deum, unam divinam substantiam, unam divinam naturam, unam divinam et summam majestatem, fides Catholica confitetur. Numera ergo, si potes, aut sine substantia personas, quae ipsae sunt; aut sine personis proprietates, quae ipsae sunt. Aut si dividere quis conetur vel personas a substantia, vel proprietates a personis, nescio quomodo Trinitatis se profleri cultorem possit, qui in tantam rerum numerositatem excesserit* ²⁾. — Sed neque inde, quod tres in

Nyss. *Or. catech.* c. 1. Opp. T. 2. p. 478. B. C. — Chrysostom. *Hom.* 5. in *Joan.* n. 3. Opp. T. 8. p. 39. — Augustin. *De Trinit.* l. 6. c. 6. n. 8. Opp. T. 8. c. 848. l. 7. c. 1. col. 851. l. 15. c. 5. n. 7. S. c. 970. *Tract.* 48. in *Joan.* n. 6. T. 3. P. 2. c. 616. *Tr.* 99. n. 4. c. 745. etc. — Richard. a S. Vict. *De Trinit.* l. 2. c. 10. Opp. Rothomag. 1650. p. 228.

¹⁾ *De Trinit. Dial.* 7. Opp. T. 5. P. 1. p. 641. A. B.

²⁾ *De Consider.* l. 5. c. 8. Opp. V. 1. c. 458. Cf. Jren. *Adv. haer.* l. 2. c. 13. n. 3. p. 130. — Clem. Alex. *Paedagog.* l. 1. c. 8. Opp. T. 1. p. 136. — Athanas. *De decret. Nic. Syn.* n. 22. 23. Opp. T. 1. P. 1. p. 227 s. *Or.* 4. *Cont. Arian.* n. 1. 2. Opp. T. 1. P. 1. p. 617 s. — Basil. *Cont. Euanom.* l. 1. n. 19. Opp. T. 1. p. 231. *De Spir. S.* c. 18. T. 3. p. 37 ss. — Gregor. Naz. *Or.* 39. T. 1. c. 559. B. Or. *ad Evagr.* c. 637. ss. — Maxim. Ap. Euthym. *Panopl.* 1. tit. 2. *Biblioth. maz. PP.* Lugdun. T. 19. p. 19. — Joan. Damascen. *De fide orthod.* l. 1. c. 10. Opp. T. 1. p. 143. — Ambros. *Epist.* 8. n. 81. Opp. T. 2. c. 1099. — Augustin. *Epist.* 120. c. 3. n. 13. Opp. T. 2. c. 351. *De Trinit.* l. 5. c. 5. n. 16. c. 13. l. 15. c. 15. n. 24 s. c. 985 s. l. 8. c. 1. n. 2. c. 865 s. *Ad Maxim.* l. 3. c. 10. n. 1. T. 8. c. 697 s. Et al. s. — Hilar. *De Trinit.* l. 8. c. 41. Opp. T. 2. c. 243.

Deo dentur personae, in ipso fit compositio. Nam tres personae divinae eadem et simplicissima constant substantia, *unum in tribus*, ut ait S. Gregorius Naz., *divinitas est, et tria unum, ea inquam, in quibus divinitas est, vel, ut magis proprie dicam, quae divinitas est* ¹⁾, suntque nonnisi tres diversi unius ejusdemque substantiae exstandi modi necessarii, qui prout a substantia nonnisi *en/roux* separari, ita quidem relative sibi mutuo opponi, sed pariter a se invicem reipsa sejungi haud possunt, ita ut igitur Deus sit necessario Pater et Filius et Spiritus S., non autem neque ex tribus componatur quasi substantiis, neque ex substantia et tribus ad se per accidens concurrentibus existendi modis. Hinc et Augustinus unam personam sine altera videri non posse dicit. *Cum enim inquit, unus Deus videtur, Trinitas videtur, Pater et Filius et Spiritus S.* — *Ipsius Filii visio tribuet nobis beatitudinem, et nihil interest inter visionem ipsius et visionem Patris* ²⁾.

4. Neque tandem in Deo compositio admitti potest, quae est ex genere et differentia; nam Deus, qui quoad naturam ac substantiam unus est, non genere aut specie, sed numero, si ex genere et specie compositus assumeretur: in numerum entium finitorum detraheretur, a quibus sola aliqua nota adventitia distingueretur; quod autem aperte tum cum ejus infinita perfectione, tum cum ejus absoluta necessitate pugnat. *A recta ratione longe alienissimum est*, scribit Cyrillus Alex., *genus de Deo nominare, cum nulla res est cum ipso, aut ante ipsum* ³⁾. Et rursus: *Videmus itaque, quod quidquid suscipit differentiam, compositum est, et non simplex. Quum vero universum genus humanum, Deum simplicem et non compositum esse, fateatur, cerle*

¹⁾ Or. 39. Opp. T. 1. c. 559. Cf. e. 560. — Gregor. Nyss. In verb. Faciam. hom. Opp. ed. Par. 1615. T. 1. p. 141. B. C.

²⁾ Enarr. in Ps. 84. n. 9. Opp. T. 4. c. 895. Cf. De Trinit. l. 1. c. 4 - n. 7. T. 8. c. 753. c. 12. n. 25. c. 765. l. 2. c. 5. n. 9. c. 776. — Iren. Adv. haer. l. 1. c. 22. n. 1. p. 98. — Athanas. Adv. Arian. Or. 4. 1-2. Opp. T. 1. p. 617 s. Cont. Sabell. gregal. n. 5 ss. T. 2. p. 41 ss. — Basil. Epist. 8. n. 3. Opp. T. 3. p. 82. — Gregor. Naz. Or. 13. Opp. T. 1. c. 189 ss. — Cyrill. Alex. Thesaur. Assert. 14. Opp. T. 5. P. 145. — Maxim. Ap. Euthym. Pan. 1. tit. 2. Biblioth. max. Lugd. T. 19. p. 19. — Epiphani. Haer. 57. n. 4. Opp. T. 1. p. 483. D. Haer. 62. n. 3-4. p. 514 s. — Joan. Damascen. De fid. orth. 1. c. 10. Opp. T. 1. p. 143.

³⁾ De Trinit. Dial. 2. Opp. T. 5. P. 1. p. 426. E.

Ingenitus differentia esse non potest ¹⁾. Hinc et vocabula *ens* et *spiritus* nonnisi sensu eminenti ac improprio de Deo adhibentur, utpote qui ab omnibus entibus et spiritibus existentibus essentialiter differat, adeoque revera longe aliud sit, quam quodcunque ens, aut quicunque spiritus. Eapropter SS. Patres, ut supra vidimus, Deum *ὁὐσια* esse, si scilicet sensu consueto accipitur, negant, eumque superessentialem ac supersubstantialem adpellant ²⁾.

Est itaque Deus omnis compositionis expers, simplex omnino, sua essentia, suum esse, actus purissimus, seu totus actus, atque ita simplicissimus, ut ei nihil comparari possit, quum, quidquid Deus non est, aliqua compositione saltem, uti loquuntur, metaphysica et logica constet.

Observ. 1. Si in SS. Litteris Deo extensio ³⁾, situs ⁴⁾, solium excelsum ⁵⁾, porro membra corporis humani, ut oculi ⁶⁾, aures ⁷⁾, odoratus ⁸⁾, os ⁹⁾, brachium ¹⁰⁾, manus ¹¹⁾, digiti ¹²⁾, pedes ¹³⁾, affectiones animi, ut poenitentia ¹⁴⁾, ira ¹⁵⁾, zelus ¹⁶⁾, vindicta ¹⁷⁾, etc. tribuuntur: haec manifeste omnia sensu improprio ac metaphorico accipienda sunt. Hic enim est mos S. Scripturae, ut de Deo humano modo loquatur, quo sese nostro cogitandi et loquendi modo adcommodet. Nam nos sic facti sumus, ut pro infirmitate nostra non possimus, quae pure spiritualia sunt, nisi sub involucro corporali cujusdam imaginis concipere. Neque praecise ad litteram i. e. non quoad affectum et interiorem animi motum, sed quoad effectum sumenda esse, illa, quae in SS. Litteris de Deo affirmantur, de-

¹⁾ *Thesaur. Assert.* 31. T. 5. P. 1. p. 262. C. Cf. Clem. Strom. 1. 5. n. 12. Opp. T. 2. p. 695.

²⁾ Cf. §. 3. n. 3. pag. 60 ss.

³⁾ Job. 11, 8.

⁴⁾ Is. 3, 13.

⁵⁾ Is. 6, 1. Ps. 7, 7.

⁶⁾ Exod. 33, 13. Deut. 32, 10. Is. 1, 15. Ps. 33, 16.

⁷⁾ Ps. 16, 6. 129, 2.

⁸⁾ Gen. 8, 21.

⁹⁾ Is. 1, 20. Ps. 32, 6.

¹⁰⁾ Exod. 6, 6. Ps. 43, 3. 4. Is. 25, 11.

¹¹⁾ Job. 10, 8.

¹²⁾ Exod. 31, 18. Ps. 8, 4.

¹³⁾ Is. 66, 1. Ezech. 40, 3. Ps. 98, 5.

¹⁴⁾ Gen. 6, 7.

¹⁵⁾ Ps. 6, 1.

¹⁶⁾ Num. 26, 11. Ps. 78, 5.

¹⁷⁾ Tob. 3, 3. Ps. 149, 7.

monstrant jam ea loca, in quibus aliquando Deus dicitur leo ¹⁾, ignis lux ²⁾, etc. aut ei alae ³⁾, scutum et arma ⁴⁾, tribuuntur, quae certo figurate intelligenda esse, nemo sanus diffitebitur. Insuper Scriptura, ut omnem errandi occasionem amoveat, docet, quae materialia et corporea Deo tribuantur, minime sensu carnali accipienda esse. *Numquid*, inquit Job, *oculi carnei tibi sunt? aut, sicut videt homo, et tu videbis* ⁵⁾? Pariter affectus et passiones humanae procul a Deo Scriptura removet ⁶⁾. — Hinc magnitudo extensionis immensitatem Dei, situs immobilitatem, solii celsitudo majestatem, oculi scientiam, cui omnia patent ⁷⁾, manus potentiam, operationem ⁸⁾, aures benignitatem et misericordiam, os mandatum divinum, facies notitiam, qua innotescit, pedes ubique praesentem, ira poenam et vindictam, poenitentia peccati gravitatem et poenae ultionis severitatem significat ⁹⁾.

Observat. 2. Quum Deus Spiritus purissimus sit: eum haud in rebus externis quaeramus aut colamus, sed per res creatas ad Creatorem supersensualem ascendamus, cultumque ei verum ac spiritualem impendamus ¹⁰⁾, ne similes simus Judaeis illis, qui labiis quidem Deum honorabant, quorum cor tamen, ut Propheta ¹¹⁾ et Christus Dominus ¹²⁾ iis exprobrant, longe ab eo aberat.

¹⁾ Is. 5, 29. Os. 13, 8.

²⁾ Deut. 4, 24. Ps. 4, 7. 1. Joan. 1, 5.

³⁾ Ps. 16, 8.

⁴⁾ Ps. 34, 2.

⁵⁾ Job. 10, 4. Cf. 3. Reg. 8, 27. Is. 66, 1. Jer. 23, 24. Sap. 1, 7.

⁶⁾ Malach. 3, 6. Rom. 11, 29. Jac. 1, 17.

⁷⁾ Cf. Job. 34, 21. 2. Paral. 6, 40. 16, 9. Ps. 32, 18. 33, 17. Eccli. 17, 16. 34, 19. Prov. 15, 3. 22, 12. Jer. 16, 17. 32, 19. Amos. 9, 8.

⁸⁾ Cf. Exod. 6, 6. 15, 16. Deut. 4, 34. 5, 15. 11, 2. 33, 27. Ps. 80, 22. 97, 1. Sap. 5, 17. 11, 22. Eccli. 36, 7. Is. 33, 2. 40, 10. 11. 51, 5. 52, 10. Jer. 27, 5. 32, 17. Act. 13, 17.

⁹⁾ Cf. Origen. *Hom. 3. in Gen. n. 2—4.* Opp. T. 2. p. 67. c. 1. D. E. p. 72. c. 2. B. C. — Gregor. Naz. *Or. 37.* Opp. T. 1. c. 537. — Cyrill. *Cont. Julian. l. 5.* Opp. T. 6. P. 2. p. 173. C ss. — Dionys. Areop. *De div. nomin. c. 1. §. 2. c. 9.* Opp. T. 1. p. 439. 798 ss. — Joan. Damascan. *De fide orth. l. 1. c. 11.* Opp. T. 1. p. 144 s. — Ambros. *De Noë et arca. c. 4. n. 9.* Opp. T. 1. c. 231. — Augustin. *Epist. 148. ad Fortun. c. 4. n. 13 s.* Opp. T. 2. c. 501 s. *Quaest. 83. q. 52. T. 6. c. 21. etc.* — Hieronym. *Comm. in Is. 46, 3. 4.* Opp. T. 4. c. 345 ss. — Witsasse, *Tract. theol. q. 5. art. 1. sect. 2.* Ven. 1738. T. 1. p. 174.

¹⁰⁾ Cf. Joan. 4, 24.

¹¹⁾ Is. 29, 13.

¹²⁾ Matth. 15, 8.

§. 12. 2. b. Immutabilis.

Ex simplicitate Dei, quatenus ipsa omnem accidentem affectionum vicissitudinem excludit, necessario fluit ejus immutabilitas.

Intelligitur autem sub immutabilitate illa Dei perfectio, qua ipse idem semper est, et in eodem semper statu permanet, omnino incapax, qui in melius vel deterius verti queat. Hoc attributo itaque in Deo negatur omnis transitio de uno modo se habendi ad alium, tum respectu sui ipsius, tum respectu rerum externarum quarumcunque, et priori intuitu tam quoad Dei substantiam, quam quoad ejus infinitam scientiam et voluntatem perfectissimam.

Stoici, Deum mutationi obnoxium esse, cogitabant. Socii autem in Deo mutationem, non quidem ratione substantiae, sed decretorum admittunt, quum haecce a Dei natura distincta essentiant. Attamen utraque haec sententia falsa est, genuinam Dei notionem destruens. Quod

A. probatur auctoritate S. Scripturae, quae immutabilitatem Dei frequenti ac diserto testimonio commendat. Sic canit Psalmista quoad naturam Dei, generatim spectatam: *Ipsi (coeli et terra) peribunt, tu autem permanes: et sicut vestimentum velerascent: et sicut opertorium mulabis eos, et mutantur. Tu autem idem ipse es, et anni tui non deficient* ¹⁾; i. e. interprete S. Chrysostomo et Theodoreto: Tu vero immobilem habes naturam, et mutatione longe praestantior. — Quoad Dei scientiam ait Sapiens: *Et cum sit una (sapientia), omnia potest: et in se permanens omnia innovat* ²⁾. — Quoad voluntatem vero divinam legitur: *Non est Deus quasi homo, ut mentiatur: nec ut filius hominis, ut mutetur* (hebr. *ut poenitentia ducatur*). *Dixit ergo, et non faciet? locutus est, et non implebit* ³⁾? Porro: *Triumphator in Israël non parcat, et poenitudine non flectetur: neque enim homo est, ut agat poenitentiam* ⁴⁾. — Et: *Ego Dominus, et non mutor* ⁵⁾. Omnia autem comprehendit Jacobus his verbis: *Omne datum optimum, et omne donum perfectum desursum est, descendens a*

¹⁾ Ps. 101, 27—28.

²⁾ Sap. 7, 27.

³⁾ Num. 23, 19.

⁴⁾ 1. Reg. 15, 29.

⁵⁾ Mal. 3, 6. Cf. Prov. 19, 21. Is. 46, 10. Hebr. 6, 16—17.

Patre luminum, apud quem non est transmutatio, nec vicissitudinis obumbratio ¹⁾. Quem fontem auctoremque lucis, ac velut solem esse significaverat, eum nulla infusari vicissitudine, et obscuritatis perstringi particula nunc dicit.

B. Probatur id ex Traditione, et quidem

a. communi SS. Patrum suffragio; nam ne ullus quidem est, qui veritati Catholicae, tam clare in SS. Litteris expressae, adversetur, et non potius illam adserat atque comprobet. Sic

α. Deum immutabilem esse ex fide Ecclesiae universali ostendunt, ut Origenes, qui ait: *Sed Judaeorum Christianorumque doctrina, quae Deum mutationis omnis variationisque expertem profleitur, quae suis ad Deum precibus dicit: Tu autem idem es; quae Dei dictum hoc esse docet: Non mutator; haec inquam doctrina impia judicatur* (Stoicis), *quia ab eorum societate, qui de Deo impia sentiunt; abhorret* ²⁾. Et Tertullianus: *Caeterum Deum immutabilem et informabilem credi necesse est, ut aeternum. — Deus neque desinit esse, neque aliud potest esse* ³⁾.

β. Et absoluta Dei necessitate, et in hac fundata simplicitate. Sic ait S. Methodius: *Τὸ ἀγέννητον, αὐτοτελὲς καὶ ἀτεκνον πατρὶν, καὶ ἀπροσθεὲς* (nullius egens) *καὶ ἀφθορον ἵσται* ⁴⁾. — Cyrillus Alex. *Firma atque immutabilis supernaturalis illa natura est, eodemque modo se semper habens, propriis semper dignitatibus aequaliter abundat* ⁵⁾. — Joan. Damasc. *Nam cum (Deus) nec patibilis, nec fluxae naturae sit; quippe simplex est, nec compositus: certe nec passionem, nec fluxum, vel in generando, vel in creando subire potest* ⁶⁾. — Arnobius: *Divinitas, quae immutabilis perseverat, nihil in se ex accidenti aliquid recipit. Hoc enim est hodie, quod semper fuit* ⁷⁾. Augustinus: — *Est ita-*

¹⁾ Jac. 1, 17.

²⁾ *Cont. Cels. l. 1. n. 21.* Opp. T. 1. p. 339. B. Cf. *l. 4. n. 14.* p. 510. C. *l. 6. n. 62.* p. 680. C. — Joan. Damascen. *De fide orth. l. 1. c. 8.* Opp. T. 1. p. 131.

³⁾ *Adv. Prae. c. 27.* Opp. V. 2. p. 437.

⁴⁾ *De creat. excerpt. n. 5.* In Galland. *Bibl. PP.* T. 3. p. 801.

⁵⁾ In Joan. *l. 1. c. 9. ad 1, 14.* Opp. T. 4. p. 97. C. Cf. *De rect. fide. T. 5. P. 2. p. 9 s. Adv. Nestor. l. 1. T. 6. p. 4. E. Tit. Bostr. Cont. Manich. l. 1. n. 9. 32.* In Galland. *Biblioth. PP.* T. 5. p. 273. 289. B.

⁶⁾ *De fide orth. l. 1. c. 8.* Opp. T. 1. p. 133.

⁷⁾ *Conflict. c. Serap. In Biblioth. max. PP. Lugdun. T. 8. p. 206. c. 1. II.*

que bonum solum simplex, et ob hoc solum incommutabile, quod est Deus. Ab hoc bono creata sunt omnia bona: sed non simplicia, et ob hoc mutabilia ¹⁾. Alibi: *Itaque tanto minus (homo) se stabilem sentit, quanto minus haeret Deo, qui summe est: et ideo illum summe esse, quia nulla mutabilitate proficit seu deficit* ²⁾ Et: *Illam est vera aeternitas, quae vera immortalitas, hoc est illa summa incommutabilitas, quam solus Deus habet, qui mutari omnino non potest* ³⁾. — Fulgentius Ruspens: *Qui (Deus) non solum summe bonus, sed etiam summum atque incommutabile bonum est: quia aeternum bonum est* ⁴⁾. Et alibi: *Qui (Deus) nec melioribus rebus, nec deterioribus commutatur. Neque enim habet, ubi proficiat ipse in melius, aut unde in deterius deficiat. Ille quod est, semper est, et sicut est, ita est, non in se habet non esse posse, quod est; quia nec in se habet esse posse, quod non est. Et hoc, quod sic est, non initio praeventitur, non fine concluditur, non temporibus volvitur, non locis continetur, non aetatibus variatur. Nihil ibi deest, quia totum in illo est: nihil ibi superest, quia nihil praeter illum est* ⁵⁾. — Prosper: *Vera aeternitas, et vera immutabilitas non est, nisi in deitate Trinitatis: cui quod est esse, perpetuum est: quia natura initio carens, incremento non indigens, sicut nullum finem, ita nullam recipit mutabilitatem* ⁶⁾.

γ. Ex Dei infinitate, ac bonis omnibus cumulatissima perfectione. Ita Gregor. Nyss. ait, Deum *neque maiorem, neque minorem accessione vel subtractione fieri. Nam quod in majus sit incrementum, in infinito locum non habet. Quod enim secundum naturam impatibile est, notionis, quae sit secundum decrementum, non est capax* ⁷⁾. — *Sola divina na-*

¹⁾ De civ. D. l. 11. c. 10. n. 1. Opp. T. 7. c. 279.

²⁾ Epist. 118. ad Dioscor. n. 15. T. 2. c. 335.

³⁾ De nat. bon. c. 39. T. 8. c. 511. Cf. Confess. l. 11. c. 4. n. 6. c. T. 1. 197. l. 13. c. 16. n. 19. c. 231. Tract. 38. in Joan. n. 10. T. 3. P. 2. c. 559. Serm. 6. c. 3. n. 4. T. 5. c. 35. De Trinit. l. 4. proem. T. 8. c. 810.

⁴⁾ De fid. ad Petr. l. 1. c. 3. n. 25. Opp. p. 511. Cf. Theophil. Antioch. Ad Autol. l. 1. n. 4. Opp. Justin. p. 362.

⁵⁾ Epist. 6. ad Theodor. c. 4. n. 4. p. 187. Cf. Antipater Bostrensis ap. Jo an. Damasc. Ecclog l. 1. et 2. litt. α tit. 2. Opp. T. 2. p. 747.

⁶⁾ Sent. 3. Opp. c. 543.

⁷⁾ Cont. Eunom. Or. 12. Opp. ed. Par. 1615. T. 2. p. 312. C. ed. Par. 1618. T. 2. p. 740. C.

tura omnis conversionis et mutationis experta est: non enim est, ad quod mutatione utatur, cum in universum non sit capax mali; ad id vero, quod melius est, transmutari nequeat: nam nullum bonum est, propter quod in eam mutatio cadat: non enim reperitur ullum bonum, ad quod transeat¹⁾. — Hilarius, rationem praecedentem cum praesenti conjungens: Nihil enim in aeternam illam et perfectam naturam novum incidit: neque qui ita est, ut qualis est, talis et semper sit, ne aliquando non idem sit, potest effici aliquid aliud esse, quam semper est. — Deus autem beatus atque perfectus profectu non eget, cui nil deest: demutatione non novus est, qui origine caret. Ipse est²⁾. Et Augustinus: Jam illud attendite, quid vocatur „est“. Nostis quid vocatur. „Est“ quod vocatur, et non solum vocatur, sed vere est, incommutabile est: semper manet, mutari nescit, nulla ex parte corrumpitur: nec proficit, quia perfectum est, nec deficit, quia aeternum est³⁾.

b. Praeter testimonium SS. Patrum habemus totius Ecclesiae vocem generalium Synodorum decretis editam. Sanxit autem immutabilitatem Dei jam in Nicaeno consessu primo, ubi contra Arium, qui Filium Dei et eundem Deum, alterius a Patre conditionis et naturae esse docuerat, ac sic mutabilem fecerat, definivit: *Eos, qui dicunt: Erat aliquando, quando non erat, etc. vel mutabilem vel convertibilem Filium Dei; anathematizat Catholica et Apostolica Ecclesia⁴⁾*. Et iterum postea in Conc. Lateran. IV. statuens: *Firmiter credimus et simpliciter confitemur, quod unus solus est verus Deus, aeternus et immensus, omnipotens, incommutabilis⁵⁾*.

C. Probatur idem tandem per ipsam rationem. Nam

a. cum Deus sit sua natura absolute necessarius, in quo nil detur accidens, nec dari possit: fieri non potest, ut ipse non sit aut alio modo sit, uti est; et ideo *ὀνσιωδῶς* immutari prorsus nequit⁶⁾. Ut Deus mutari posset, deberet alius esse, ac est, i. e.

¹⁾ *Tract. alt. in Ps. c. 4. T. 1. p. 298. B.*

²⁾ *In Ps. 2. n. 13. T. 1. c. 37 s.*

³⁾ *Tract. 4. in 1. Joan. c. 3. n. 5. Opp. T. 3. P. 2. c. 852. Cf. Tract. in 1. Joan. 4. n. 3. c. 872. De nat. bon. cont. Manich. c. 1. T. 8. c. 501.*

⁴⁾ *Mansi, Coll. Conc. T. 2. c. 667.*

⁵⁾ *Capit. 1. De Ad. Cath. Ib. T. 22. c. 981—982.*

⁶⁾ *Cf. Richard. a S. Vict. De Trinit. l. 1. c. 4. Opp. p. 218. c. 2.*

deberet prius mutari, antequam mutaretur, quod est absurdum. — Verum non tantum quoad substantiam Deus mutationi nulli est obnoxius, sed et quoad scientiam atque voluntatis decreta, quum

b. sit perfectissimus, quo nihil melius dari aut excogitari possit. Omnis quippe mutatio imperfectionem involvit; namque fit vel in melius, vel in pejus, vel in aequale. In melius Deus mutari non potest, quia non esset optimus; non in pejus, quia desineret esse perfectissimus; non in aequale, quia infinito nihil par datur, et insuper tam incrementum et decrementum quoad intellectum, quam inconstantia quoad voluntatem imperfectionem manifeste arguit.

Hinc in Deo immutatio est omnino impossibilis, et quidem quoad substantiam et cognitionem divinam absoluta impossibilitate physica, et quoad decreta absoluta impossibilitate morali.

Si vero Deus quoad suam substantiam mutari prorsus nequit: eo minus corrumpi aut perire potest, seu Deus, quia est absolute immutabilis, est quoque absolute incorruptibilis. Unde et in SS. Litteris expresse ἀφθαρτος θεὸς dicitur ¹⁾, atque *beatus, et solus potens, Rex regum, et Dominus dominantium: quia solus habet immortalitatem*, praedicatur ²⁾, quatenus scilicet per se ac necessario immortalis est, et ab ipso solo entia finita immortalitatem nanciscuntur. Atque Cyrillus Alex. inquit: *Deus qui mente omni superior est, a generatione et corruptione substantiam exemptam ac valentior habens, mutatione etiam omni praestantior est* ³⁾. Ambrosius: *Non enim dividitur unitas, nec scinditur; et ideo nec corruptelae subditur, nec aetati* ⁴⁾. Novatianus: *Et ideo quia unum (simplex) est, dissolvi non potest* ⁵⁾.

Observ. 1. Immutabilitati non obstant, ut quibusdam antiquis haereticis ⁶⁾ visum est, et recentioribus Pantheistis etiam nunc videtur, neque creatio mundi, neque revelatio supernaturalis, neque ipsa

¹⁾ Rom. 1, 23.

²⁾ 1. Tim. 6, 15—16.

³⁾ Cont. Nestor. l. 1. Opp. T. 6. P. 1. p. 4. E.

⁴⁾ De fid. l. 1. c. 1. n. 11. Opp. T. 2. c. 446.

⁵⁾ De Trinit. c. 6. In Galland. Bibl. PP. T. 3. p. 291. c. 2. B.

⁶⁾ Cf. Cyr. Alex. De S. Trinit. Dial. 2. Opp. T. 1. P. 1. p. 458. — Zachar. Mitylen. De mund. opif. In Galland. Bibl. PP. T. 11. p. 270. E. 271. B. — Tertull. Adv. Hermog. c. 3. Opp. V. 1. p. 350. — Augustin. De civ. D. l. 12. c. 17. Opp. T. 7. c. 315 s.

Incarnatio, neque ira, poenitentia, et aliae animi motiones, quarum haud infrequens mentio est in SS. Litteris. Etenim quod creationem attinet: non mutatur idcirco Deus, quum, quod hactenus nondum exstiterat, mundus aut res aliqua creatur. Nam res nova, quae creatur, haud quaquam novum consilium, seu novum voluntatis actum in Deo postulat, sed optime cum voluntate aeterna, qua Deus vult, ut res externae suo tempore oriantur, componitur. Creavit itaque Deus mundum in tempore non novo consilio, neque nova voluntate, sed consilio ac voluntate aeterna. Mutata est creatura, non mutatus est Deus ipse. Quam rationem optime attigit Augustinus, refellens eos, qui contendebant, Deum aliter affectum fuisse, cum ab aeterno velut otiosus ab omni actione vacavit; et aliter, cum subinde operatus est. *Nobis, ait, fas non est credere, aliter Deum affici, cum vacat, aliter cum operatur: quia nec affici dicendus est, tanquam in ejus natura fiat aliquid, quod ante non fuerit. — Non itaque in ejus vacatione cogitetur ignavia, desidia, inertia; sicut nec in ejus opere labor, conatus, industria. Novit quiescens agere, et agens quiescere. Potest ad opus novum, non novum, sed sempiternum adhibere consilium; nec poenitendo, quia prius cessaverat, coepit facere, quod non fecerat. Sed elsi prius cessavit, et posterius operatus est, (quod nescio quemadmodum ab homine possit intelligi) hoc procul dubio, quod dicitur, prius et posterius, in rebus prius non existentibus, et posterius existentibus fuit. In illo autem non alteram praecedentem altera subsequens mutavit, aut abstulit voluntatem, sed una eademque sempiterna et immutabili voluntate res, quas condidit, et ut prius non essent egit, quamdiu non fuerunt, et ut posterius essent, quando esse coeperunt ¹⁾. — Ante omnia meminimus, non temporalibus quasi animi sui aut corporis motibus operari Deum, sicut operatur homo vel Angelus, sed aeternis atque incommutabilibus et stabilibus rationibus coaeterni sibi Verbi sui, et quodam, ut ita dixerim, *potu* (al. *flatu*) pariter coaeterni S. Spiritus sui ²⁾. Pulchre etiam in rem nostram scribit Abaelardus. Cum dicimus, inquit hicce, eum (Deum) ali-*

¹⁾ De civ. D. l. 12. c. 17. n. 2. Opp. T. 7. c. 316 s. Cf. l. 22. c. 2. c. 656. l. 12. c. 20. n. 4. c. 320 s. l. 11. c. 4. n. 2. c. 274 s. In Ps. 72. n. 7. T. 5. c. 758.

²⁾ De Gen. ad litt. l. 1. c. 18. n. 36. T. 3. P. 1. c. 128 s. Cf. Cyrillex. Alex. De Trinit. Dial. 2. Opp. T. 5. P. 1. p. 459. Thesaur. Assert. 4. lib. p. 32. — Dionys. Areop. De eccl. Hierarch. c. 3. §. 3. Opp. T. 1. p. 28.

*quid facere, non aliquem in operando motum illi inesse intelligimus: sed ejus sempiternae voluntatis novum aliquem significamus effectum. — Ita etiam post rei completionem, sicut ante, in eodem proposito dispositionis consistens, ut ita id velit completum, sicut ante voluerat complendum. Sicut ergo sol, cum ex calore ejus aliqua calefieri contingit, nulla hinc in ipso, vel in calore ejus mutatio fit, quamvis res inde calefacta sit mutata: ita nec Deus, cum aliqua ejus nova fuerit disponere, ideo mutari dicendus est, quamvis novi operis vel mutationis rerum quaedam ipse sit causa vel auctor ¹⁾. Hinc et illas adpellationes Creatoris, Domini, etc. Deus non demum mundo creato acquisivit, sed, quum huncce inde ab aeterno creaturus, vel potius creans esset, etiam ab aeterno Creator ac Dominus etc. erat, licet mundus ab aeterno non sit conditus, uti noster Judex est, et quidem pariter inde ab aeterno, quamvis nondum simus ab ipso judicati ²⁾. Insuper adpellationes illae nonnisi *σχέσις* externae sunt, quae Deo nullam perfectionem important, ita ut, etiamsi statueretur, illas ad divinam substantiam accessisse, Deus per eas perfectior factus dici haud posset, prout Augustinus docet hisce verbis: *Quomodo obtinebimus, nihil secundum accidens dici Deum, nisi quia ipsius naturae nihil accidit, quo mutetur, ut ea sint accidentia relativa, quae cum aliqua mutatione rerum, de quibus dicuntur, accidunt. — Nummus cum dicitur pretium, relative dicitur, nec tamen mutatus est, cum esse coepit pretium: neque cum dicitur pignus, et si qua sunt similia. Si ergo nummus potest nulla sui mutatione toties dici relative, ut neque cum incipit dici, neque cum desinit, aliquid in ejus natura vel forma, qua nummus est, mutationis fiat: quanto facilius de illa incommutabili Dei substantia debemus accipere, ut ita dicatur relative aliquid ad creaturam, ut quamvis temporaliter incipiat dici, non tamen ipsi substantiae Dei accidisse aliquid intelligatur, sed illi creaturae, ad quam dicitur ³⁾. — Neque porro per Incarnationem Deus immutatus est; quoniam mutatio in aliud fieri non potest, nisi esse desinat, quod prius fuerat; in Incarnatione autem Deus sic**

¹⁾ *Introd. in Theol. l. 3. c. 6.* Opp. Par. 1616. p. 1125.

²⁾ Cf. Cyrill. Alex. *Thesaur. Assert. 4.* Opp. T. 5. P. 1. p. 32. — Zachar. Mityl. *De mund. opific.* In Galland. *Biblioth. PP.* T. 11. p. 285. B. C. — Maxim. *Centur. 4. De carit. n. 3.* Bibl. PP. max. Lugdun. T. 12. p. 434.

³⁾ *De Trinit. l. 5. c. 16. n. 17.* Opp. T. 8. c. 842. Cf. *Confess. l. 1. c. 4. n. 4.* T. 1. c. 71. *De civ. D. l. 12. c. 14.* T. 7. c. 312. c. 17. n. 2. c. 316 a. — Ps. Justin. *Quaest. ad Orthod. q. 113.* Opp. Justin. p. 525 a.

assumsit nostra, ut non dimitteret sua. Verbum enim factum est homo per assumptionem humanitatis in unitatem personae, sustentando, perficiendo ac supplendo propriam humanitatis subsistentiam, non autem per conversionem vel per acquisitionem novae alicujus perfectionis. Itaque mutata est humanitas, et quidem in melius, quando assumpta est a Verbo in unitatem suppositi; at divinitas nihil novi acquisivit, cum omnem humanitatis perfectionem eminenter in se contineat, nihil etiam amisit ac perdidit, ut sol, qui nubem interpositam illustrat, per ipsam obscurari videtur, in se autem idem manet ¹⁾. — Denique quod ad iram et alias animi motiones, Deo in SS. Litteris tributas, attinet: hae, ut supra jam monstravimus, Deo nonnisi spectato effectui, non autem affectui tribui possunt, et revera tribuuntur. Eadem videlicet Dei substantia immota in se manens, prout refertur ad hominem justum, illum diligere, eique favere dicitur, prout vero refertur ad peccatorem, eum odio habere, ac ipsi irasci, pro vario nimirum statu, in quo homines sunt, sicut unus et idem sol pro varia dispositione rei, in quam agit, ceram liquefacit, et lutum indurat, oculos sanos vegetat, et lippos cruciat. *Quid est*, ait Augustinus, *perversus eris cum perverso? Perversum te putabit perversus. Non quod ullo modo pervertatur Deus. Absit; quod est, est. Sed quemadmodum sol oculos puros, sanos, vegetos, fortes habenti tranquillius adparet, in oculos autem lippos quasi tela aspera jaculatur; intuentem illum vegetat, hunc excruciat non mutatus, sed mutatum: sic cum coeperis esse perversus, et tibi Deus perversus videbitur; tu mutatus es, non ille. Erit ergo tibi poena, quod bonis gaudium ²⁾. Et: Quis est hominum, cui non occurrat in Deo cuncta praesciente poenitentiam esse non posse? — Quapropter cum legimus etiam Deum dicentem: *Poenitet me, consideremus, quod esse soleat in hominibus opus poenitendi. Procul dubio reperitur voluntas mutandi; sed in homine cum dolore animi est; reprehendit enim in se, quod temere fecerat. Auferamus ergo ista, quae de humana infirmitate atque ignorantia veniunt, et remaneat solum velle, ut non ita sit aliquid, quemadmodum erat: sic potest aliquantum intimari menti nostrae, qua regula intelligatur, quod poenitet Deum. Cum enim poenitere dicitur, vult non esse aliquid, quod**

¹⁾ Cf. Ps. Ambros. *Tr. de fid. orthod. cont. Arian.* c. 8. Opp. Ambros. T. 2. append. c. 354 ss. — Augustin. 83 *quaest. q.* 73, Opp. T. 6. E. 64 s.

²⁾ In Ps. 72. n. 7. T. 4. c. 758.

fecerat, ut esset: sed tamen et cum ita esset, ita esse debebat; et cum ita esse jam non sinitur, jam non debet ita esse, perpetuo quodam et tranquillo aequitatis iudicio, quo Deus cuncta mutabilia immutabili voluntate disponit¹⁾.

Observ. 2. Cum Deus sit immutabilis:

1. Promissis divinis confidentes, *solatium habeamus, qui confugimus ad tenendam propositam spem, quam sicut anchoram habemus animae tutam, ac firmam, et incidentem usque ad interiora velaminis²⁾.*

2. Bonis caducis hujus terrae nunquam inhiemus, *praeterit enim figura hujus mundi³⁾, thesaurizantes nobis thesauros in coelo: ubi neque aerugo, neque tinea demolitur, et ubi fures non effodiunt, nec furantur⁴⁾; id enim, quod in praesenti est momentaneum, et leve tribulationis nostrae, supra modum in sublimitate aeternum gloriae pondus operatur in nobis. Non contemplantibus nobis, quae videntur. Quae enim videntur, temporalia sunt: quae autem non videntur, aeterna sunt.⁵⁾.*

3. Arundini vento agitatae nunquam simus similes, qui Deum immutabilem adoramus; sed animi constantiae ac firmitati omnibus viribus studeamus.

§. 13. 3. c) Aeternus.

Immutabilitatis, quam exposuimus, comes ac complementum est aeternitas. Aeternum autem vel sempiternum ex communi usu loquendi proprie dicitur, quod neque initium, ut esset, habuit, neque cessare potest unquam esse. Quando enim nonnunquam loco *semper* seu *tempus omne*, quo res aliqua perse-

¹⁾ *Ad Simplic.* q. 2. n. 2. et 4. T. 6. c. 112. 114. Cf. *De cir. D. l. 22. c. 2. n. 1. T. 7. c. 656. l. 15. c. 25. c. 409 s. Enchirid. c. 33. n. 10. T. 6. c. 209. Cont. Adimant. c. 11. 13. T. 8. c. 122 s. Cont. Advers. Leg. et Prophet. l. 1. c. 20. n. 40. T. 8. c. 571. etc. — Origen. Exhort. ad martyr. n. 9. Opp. T. 1. p. 280. Cont. Cels. l. 4. n. 15 s. p. 510 s. Hom. 8. in Exod. n. 5. T. 2. p. 159 s. — Ps. Justin, Quaest. ad orthod. q. 36. Opp. Justin. p. 488. — Tertull. Cont. Marcion. l. 2. c. 24. Opp. V. 2. p. 202 ss. — Theodoret. In Gen. q. 52. Opp. T. 1. p. 43. — Hilar. In Ps. n. 2. n. 12—13. 17—18. Opp. T. 1. c. 37. s. 39 ss. — Isidor. Hispal. Sent. l. 1. c. 5. Opp. p. 415. — Gregor. M. Moral. l. 12. c. 10. n. 14. Opp. T. 1. c. 398. l. 20. c. 32. n. 62—63. c. 665 ss.*

²⁾ Hebr. 6, 17. 18.

³⁾ 1. Cor. 7, 31.

⁴⁾ Matth. 6, 20.

⁵⁾ 2. Cor. 4, 17. 18.

veratura est, vel vero etiam de breviori temporis spatio in affectu per hyperbolen adhibetur ¹⁾, sensu nonnisi improprio sumitur. Ad propriam significationem accedit, si de felicitate sine caritura, initium tamen habente, usurpatur. — Ad plenam tamen aeterni notionem adhuc pertinet, quod illud non evolvatur per partes, sed omnem motionem ac successionem affectionum una excludat; non enim praeteriti, praesentis, ac futuri differentiam habet, sed in puncto ac momento consistens, mutationem ac vicissitudinem ignorat. Est itaque aeternum constans et fixa temporis omnis, principii atque exitii expers praesentia. Atque aeternitas in Deo est illa perfectio, qua ipse uti limitum temporis, initii et finis, ita et successionis ac motionis ejusdem est expers; seu aeternitas est *interminabilis existentiae, vel potius vitae plenitudo*, ut ait Boëthius ²⁾, vel *interminabilis vitae tota simul et perfecta possessio*, ut habet S. Thomas ³⁾.

Pro hocce attributo itaque in Deo unicum instans est, semper praesens et subsistens. *Aeternitas*, ait Augustinus, *ipsa Dei substantia est, quae nihil habet mutabile; ibi nihil est praeteritum, quasi jam non sit; nihil est futurum, quasi nondum sit. Non est ibi nisi Est; non est ibi, fuit et erit; quia et quod fuit, jam non est: et quod erit, nondum est: sed quidquid ibi est, nonnisi est* ⁴⁾.

Sociniani quidem fatentur, Deum aeternum esse, qui nec principium, nec finem habeat; verum, aeternitatem ejus successionem et variis temporum differentiis obnoxiam esse, sentire videntur. Aeternitatem tamen, sensu supra exposito Deo tribuendam esse, docent:

A. SS. Litterae. Nam eadem non tantum Deum expresse

¹⁾ Gen. 13, 15, 17, 8, 49, 26. Lev. 3, 17.

²⁾ *De consid. Philos. l. 5. pros. 6.* Patav. 1611. p. 118. Inferius ait: *Quod igitur interminabilis vitae plenitudinem totam pariter comprehendit, ac possidet; cui neque futuri quidquam absit, neque praeteriti fuerit, id aeternum esse jure perhibetur: idque necesse est compos praesens sibi semper assistere, et infinitatem mobilis temporis habere praesentem.* p. 119.

³⁾ *1. q. 10. art. 1.* Opp. T. 20. p. 45 s. Cf. Richard. a S. Victo *De Trinit. l. 2. c. 4.* Opp. p. 221. c. 2.

⁴⁾ *Serm. 2. in Ps. 101. n. 10.* Opp. T. 4. c. 1107. Cf. *Confess. l. 9. 10. n. 24. T. 1. c. 166. l. 11. c. 13. n. 16. c. 200.*

aeternum ¹⁾, atque viventem in sempiternum ²⁾ adpellant, porro eum praedicant, cujus justitia sit *justitia in aeternum* ³⁾, misericordia *misericordia in saeculum* ⁴⁾, sapientia *candor lucis aeternae* ⁵⁾, potestas et regnum *potestas aeterna, quae non auferetur, et regnum sempiternum, quod non corrumpetur* ⁶⁾, *aeterna virtus et divinitas* ⁷⁾, *qui regnabit in aeternum, et in saeculum saeculi* ⁸⁾, cujus *consilium atque verbum manet in aeternum* ⁹⁾, *nomen est in aeternum* ¹⁰⁾, atque *sedes in saeculum saeculi* ¹¹⁾; sed et expresse omne initium ac finem, nec non omnem successionem ac differentiam ab illo excludunt. *Priusquam montes fierent, canit Psalmista, aut formaretur terra, et orbis: a saeculo et usque in saeculum tu es Deus. — Quoniam mille anni ante oculos tuos, tanquam dies hesternae, quae praeierunt, i. e. cui, utpote in suo esse constanter ac stabiliter permanenti, omnia mundana sunt praesentia* ¹²⁾. Et rursus: *In generationem, et generationem anni tui. Initio, tu Domine, terram fundasti: et opera manuum tuarum sunt coeli. Ipsi peribunt, tu autem permanes: et omnes sicut vestimentum, veterascent: et sicut opertorium mutabis eos, et mutabuntur. Tu autem idem ipse es, et anni tui non deficient* ¹³⁾. Idem paucis edisserit Propheta Isaias, quum nomine Dei ait: *Ego Dominus primus, et novissimus, ego sum; et quum dicit: Dominus Deus: qui est, et qui erat, et qui venturus est* ¹⁴⁾. Quod Apostolus ita exprimit: *Ego sum α et ω, principium, et finis*, i. e. a tempore minime comprehensus, tempus potius omne superans et quasi absorbens, ejusque Do-

¹⁾ Gen. 21, 33. Js. 40, 28. Jer. 10, 10. Bar. 4, 22. 2. Mach. 1, 25. Rom. 16, 26.

²⁾ Deut. 32, 40. Ps. 9, 8. Eccli. 18, 1. Dan. 4, 31.

³⁾ Ps. 118, 142. 144. 153, 13.

⁴⁾ Ps. 137, 8.

⁵⁾ Sap. 7, 26.

⁶⁾ Dan. 7, 14. 27. 4, 31.

⁷⁾ Rom. 1, 20.

⁸⁾ Ps. 9, 16. Exod. 15, 18.

⁹⁾ Ps. 32, 11. 118, 89. 1. Petr. 1, 25.

¹⁰⁾ Ps. 134, 13.

¹¹⁾ Ps. 44, 7.

¹²⁾ Ps. 89, 2—4. Cf. Habac. 1, 12.

¹³⁾ Ps. 101, 25—28.

¹⁴⁾ Is. 41, 4. 44, 6. 48, 12.

minus ¹⁾, unde et *Rex saeculorum* a Paulo cognominatur *Regi autem saeculorum immortalī, invisibili, soli Deo honor, et gloria in saecula saeculorum* ²⁾. *Qui solus habet immortalitatem*, i. e. qui solus vere est, ita ut non possit non esse, vel etiam alio modo esse, ac est ³⁾. Quod pariter verba Petri edisserunt: *Unus dies apud Dominum sicut mille anni, et mille anni sicut dies unus*, utpote apud quem nulla temporis fluxio ac differentia datur ⁴⁾.

B. Traditio. Certissima est haec et pervulgata SS. Patrum doctrina. Gregorius Naz. ait: *Deus et erat semper, et est, et erit: vel ut rectius loquar, semper est. Nam erat, et erit, nostri temporis, fluxaeque naturae segmenta sunt. Ille autem semper est, atque hoc modo seipsum nominat, cum in monte Mosi oraculum edit. Universum enim id, quod est, in se complectitur; nec principium habens, nec finem habiturum, velut pelagus quoddam essentiae immensum et interminatum, omnem tum temporis, tum naturae cognitionem superans* ⁵⁾. — Gregorius Nyss. de aeternitate Dei longam et eruditam instituit orationem in libris suis adversus Eunomium, ac supra αἰῶνας omnes in infinitum eum porrigi, ait, intervalli omnis et extensionis expertem, ac demum ita concludit: *At vero illa nullius egens, et sempiterna, et quae omnia suo complexu comprehendit natura, neque in loco est, neque in tempore. Sed ante haec et supra haec inenarrabili quadam ratione, ipsa in seipsa sola fide conspicitur, neque saeculis circumscripta neque cum tempore decurrens, sed in se ipsa consistens et in se ipsa fundata et solidata, in qua neque praeteritum, neque futurum invenias: nihil enim ipsius extra ipsam* (i. e. non necessarium) *est, quo transeunte, aliud quidem praetercat, aliud vero futurum sit* ⁶⁾. — Dionysius Areop. passim idem praedicat. *Deus enim, inquit, non quovis modo est ens, sed simpliciter et infinite totum esse in se pariter complexus et anticipans; quamobrem etiam Rex saeculorum*

¹⁾ Apoc. 1, 8. 17. 21, 6. 22, 13.

²⁾ 1. Tim. 1, 17.

³⁾ 1. Tim. 6, 16. Cf. Augustin. Tr. 23. in Joan. n. 9. Opp. T. 3. P. 2. c. 477. G.

⁴⁾ 2. Petr. 3, 8.

⁵⁾ Or. 38. Opp. T. 1. c. 546. A. B.

⁶⁾ L. 1. Opp. Par. 1638. T. 2. p. 362. D.

nominalur, ut in quo et penes quem cujuslibet esse et sit et constet, et in quo nec erat, nec erit, neque factum est, neque fit, neque fiet, imo nec est; sed ipse est esse rebus: et non tantum ea, quae sunt; sed ipsum esse rerum, ex proaeterno ente. Ipse enim est aevum aevorum, existens ante omne aevum? ¹⁾. — Zacharias Mitylen. tradit, propriam divinitatis notam esse aeternitatem. Jam vero, ait, quatenam (notatio) fuerit dignior admiratione, et aptior beatæ naturæ, quam existimare, eam ab aeterno existere, et solam immutabilem, nullius egentem eorum, quae suspecta sunt, quod ipsa perfecta sit et per se efficiens (ἀντάρχη), sempiternæque eodem modo se habentem simpliciter, et neque principium ullum habentem neque finem, eam autem propter solam bonitatem condere, si condit: cætera vero genita esse et mutabilia, temporarium habere principium; ita ut solius Dei sit sempiternitas annexumque ipsi sit uniformiter esse, et solum, et immutabiliter ²⁾. — Boëthius: Deum aeternum esse, scribit, cunctorum ratione degentium commune iudicium est ³⁾. — Tertullianus: Quantum humana conditio de Deo definire potest, id definitio, quod et omnium conscientia agnoscet; Deum summum esse magnum, in aeternitate constitutum, innatum, infectum, sine initio, sine fine. Hunc enim statum aeternitati censendum, quæ summum magnum Deum efficiat, dum hoc est in Deo ipsa, atque ita et cætera ⁴⁾. Et inferior: Non habet tempus aeternitas. Omne enim tempus ipsa est. Quod facit, pati non potest. caret ætate, quod non licet nasci. Deus si est vetus, non erit: si est novus, non fuit. Novitas initium testificatur, vetustas finem comminatur. Deus autem tam alienus ab initio et fine est, quam a tempore, arbitro et metatore initii et finis ⁵⁾. — Ambrosius: Nihil tam proprium Dei, quam semper esse ⁶⁾. — Augustinus: Summum bonum, quo superius non est, Deus est: ac per hoc incommutabile bonum est; et ideo vere aeternum est, et vere

¹⁾ De div. nom. c. 5. §. 4. Opp. T. 1. p. 690. s. Cf. Maxim. Schol. ad h. l. Ib. p. 705 s.

²⁾ De mund. opif. In Galland. Bibl. PP. T. 11. p. 284. B.

³⁾ De consol. Philos. l. 5. p. 6. p. 118.

⁴⁾ Adv. Marcion. l. 1. n. 3. Opp. V. 2. p. 148 s. Cf. Adv. Hermog. n. 4. V. 1. p. 351 s.

⁵⁾ Adv. Marcion. l. 1. n. 8. V. 2. p. 153.

⁶⁾ In Ps. 43. n. 19. Opp. T. 1. c. 896. B.

immortale ¹⁾. Non enim aliud anni Dei, et aliud ipse Deus: sed anni Dei, aeternitas Dei est: Aeternitas ipsa Dei substantia est, quae nihil habet mutabile ²⁾. — Et de aeterna increataque sapientia loquens: Per quam, inquit, sunt omnia ista, et quae fuerunt, et quae futura sunt; et ipsa non fit, sed sic est, ut fuit, et sic erit semper; quin potius fuisse, et futurum esse non est in ea, sed esse solum, quoniam aeterna est. Nam fuisse et futurum esse non est aeternum ³⁾. — Gregorius M.: Dies et anni hominis a diebus et annis discrepant aeternitatis: quia vitam nostram, quae tempore incipitur, tempore finitur, dum intra sinus sui latitudinem format, aeternitas devorat. Cujus nimirum immensitas, quia ultra citraque super nos tenditur, sine inchoatione et termino ejus aeternum esse dilatur: eique nec transacta praetereunt, nec adhuc ventura, quasi quae non appareant, desunt: quia is, qui semper esse habet, cuncta sibi praesentia conspiciit: cumque aspiciendo post et ante non tenditur, nulla intuitus mutatione variatur ⁴⁾. — Isidorus Hispal.: Omnia tempora praecedit divina aeternitas: nec in Deo praeteritum, praesens, futurum aliquod creditur: sed omnia praesentia in eo dicuntur, quia aeternitate sua cuncta complectitur: alioqui mutabilis est Deus credendus, si ei successiones temporum adscribantur ⁵⁾. — Mar. Victorin. Quod a se vivit, ex aeterno et in aeternum vivit: nunquam enim se deserit, quod sibi causa est, ut hoc ipsum sit, quod existit ⁶⁾. — Et simili modo disserunt reliqui ⁷⁾. Quoad Ecclesiae universalis praedicationem provocamus ad Conc. Lateran. IV. saepius jam laudatum, et ad Symbolum Athanasianum, quod habet: *Aeternus Pater*,

¹⁾ De nat. bon. contr. Manich. c. 1. Opp. T. 8. c. 801. A. Cf. c. 39. c. 511.

²⁾ In Ps. 101. Sermon. 2. n. 10. T. 4. c. 1107.

³⁾ Confess. l. 9. c. 10. n. 24. T. 1. c. 166. Cf. l. 11. c. 11. n. 13. c. 199. et al. pass.

⁴⁾ Moral. l. 9. c. 47. n. 72. Opp. T. 1. c. 321. Cf. l. 16. c. 43. n. 54. c. 521. l. 20. c. 32. n. 63. c. 667. l. 27. c. 7. n. 10. c. 857. etc.

⁵⁾ Sent. l. 1. c. 8. Opp. p. 415. c. 2.

⁶⁾ Cont. Arium. l. 4. n. 6. In Galland. Bibl. PP. T. 8. p. 188. c. 2. Cf. l. 4. n. 9. p. 189.

⁷⁾ Cf. Origen. Cont. Cels. l. 2. n. 51. Opp. T. 1. p. 426. D. Basil. Cont. Eunom. l. 2. n. 17. Opp. T. 1. p. 252 a. — J. Damasc.

aeternus Filius, aeternus Spiritus S.; et tamen non tres aeterni, sed unus est aeternus.

C. Ex ratione. Quum Deus sit infinite perfectus, ac necessarius, seu entis plenitudo ac totalitas: etiam aeternus sit necesse est; alias enim, si Deus initium aut finem haberet, aut in eo vicissitudinis successio daretur, posset ipso ens perfectius, scilicet aeternum excogitari, atque ipse posset etiam non esse, aut aliter esse, ac est, i. e. neque esset perfectus, neque necessarius, seu non esset Deus.

Observ. 1. In SS. Litteris quidem non raro Deo tempus tribuitur; ast haec nonnisi improprie, juxta nostrum tenuem cogitandi et loquendi modum dicta sunt. Etenim nos, qui a temporis flumine ferimur, non possumus nobis non partes in aeternitate fingere, similes illis, qui secundo fluvio descendunt, litora et arbores sursum versus moveri imaginantur.

Observ. 2. Cum Deus solus sit perfectissimus ac necessarius, omniaque extra Deum sint, et esse debeant finita ac contingentia: patet, Deum non modo aeternum esse, sed etiam solum aeternum esse, atque omnia entia extra ipsum existentia nonnisi per liberum ejusdem creationis actum ex nihilo, adeoque in seu cum tempore esse producta. Quod enim non necessario existit, hoc etiam aliquando non exstitit, sed in tempore est ortum. Haec quoque communis est veterum Patrum, qui de hoc tractarunt, sententia, nullam rem a Deo ex aeterno creari potuisse; qua adversus Arianos saepe ac libenter usi sunt. Sic Athanasius: *Quodsi, ait, scrutari velint, cur, cum Deus semper possit opera facere, non semper facit: sane insanientium hominum temeritas ista est. Quis enim cognovit sensum Domini, aut quis consiliarius ejus fuit? Aut quomodo figmentum dicet fictori: Quid me fecisti sic? Verum ne vel levi objecta ratione, silentio utamur, audiant illi, res factas aeternas esse non potuisse, etiam, si eas semper potuerit facere Deus. Illae enim ex nihilo sunt, nec erant, antequam fierent: quae autem non erant, antequam fierent, quomodo simul cum Deo, qui semper est, possint existere?* ¹⁾ — Basilus:

De fid. orth. l. 1. c. 8. Opp. T. 1. p. 131. — Cassian. *De Incarn.* l. 5. c. 8. Opp. p. 1029. — Prosper. *Epigr.* 41. Opp. p. 638. — Petr. Damian. *Opusc.* 36. c. 8. 15. Opp. T. 3. p. 313. 319. C. — Bernard. *Serm.* 31. in Cant. Opp. V. 1. c. 1384. — Anselm. *Monolog.* c. 24. 28. Opp. p. 13. c. 2 s. p. 15. c. 1. *Proslog.* c. 20—22. p. 33 s. *De Incarn.* c. 9. p. 48. c. 2. A. B.

¹⁾ *Or. 1. cont. Arian.* n. 29. Opp. T. 1. P. 1. p. 433 s,


Nos autem et creaturis aeternitatis testimonium praere, et creaturarum Dominum hac confessione privare, ejusdem esse amentiae arbitramur ¹⁾. — Amphilochius: *Quod sine tempore, et ab aeterno est, increatum est: quod autem est increatum, etiam est aeternum: Deus autem solus aeternus est* ²⁾. — Zachar. Mityl. *Caetera, ait, genita esse et mutabilia, temporarium habere principium; ita ut solius Dei sit sempiternitas, annexumque ipsi sit uniformiter semper esse, et solum, et immutabiliter. Nullum igitur eorum, — quae natura obnoxia sunt mutationibus et varietatibus, et omni motui et statui, Deo coaeternum arbitreris. Sic enim quod solum ipsius est proprium, et singulariter, et semper, summam ejus divinitatem non tollemus, fingentes communicare cum ipso aliquid eorum, quae natura mutabilia sunt, neque revera existunt* ³⁾. — Fulgentius: *Sicut omne Creatoris opus sine initio non potuit, nec potest fieri: sic illa sempiterna voluntas ejus, nunquam mutabilitati subjacet, quia initium existendi non habet* ⁴⁾. — Simulque tradunt inter Deum seu Creatorem et creaturam nihil interjectum ac medium, ut quidquid increatum sit, id non sit aliud, quam Deus. *Catholica fides*, ait Augustinus, — *a Deo summo atque incommutabili bono universam conditam dicit esse creaturam, naturasque omnes bonas, quamvis impares Creatori, quia ex nihilo creatas, ideoque mutabiles: ita ut omnino nulla natura sit, quae non aut ipse sit, aut ab ipso facta sit* ⁵⁾. — Unde patet, falsa esse, quae

¹⁾ *Adv. Eunom.* l. 2. n. 17. Opp. T. 1. p. 253.

²⁾ *Ex element. Damasc. Rupefaculd.* In Galland. *Bibl. PP.* T. 6. p. 496.

³⁾ *Disput. de mund. opific.* Ib. T. 11. p. 284. B. C.

⁴⁾ *Ad Monim.* l. 1. c. 12. Opp. p. 10. Similia habent: Methodius, *De creat.* n. 2—5. ap. Phot. In Galland. *Bibl. PP.* T. 3. p. 799 ss. — Gregor. Nyss. *Cont. Eunom.* l. 12. Opp. Par. 1615. T. 2. p. 344, et 1638. T. 2. p. 360 s. — Cyrill. Alex. *Thes. Assert.* 32. Opp. T. 5. P. 1. p. 302. A. *De Trinit. Dial.* 2. Ib. p. 460. — Maxim. ap. Euthym. *Panopl. pan.* 1. tit. 3. In *Bibl. max. PP.* Lugd. T. 19. p. 27 s. — Joan. Damascen. *De fide orth.* l. 1. c. 3. 8. Opp. T. 1. p. 126. 142. C. l. 2. c. 2. p. 154. — Tertullian. *Adv. Hermog.* c. 4. Opp. V. 1. p. 351 s. — Augustin. *De civ. D.* l. 12. c. 15. n. 1. Opp. T. 7. c. 313. Auctor *L. cont. Feliciun.* c. 7. Opp. Augustin. T. 8. append. c. 42. — Anselm. *Monolog.* c. 24. Opp. p. 13. c. 2 s.

⁵⁾ *Cont. Julian.* l. 1. c. 8. n. 36. Opp. T. 10. c. 520. Cf. *In Ps. 58.* n. 5. T. 4. c. 692 s. *De Trinit.* l. 5. c. 2. n. 3. T. 8. c. 833. l. 8. c. 2. 

somniarunt haeretici, materiam, *ὕλην*, aeternam assumentes, nec non Palamitae, lucem divinam a Deo aeterno emicantem, instar splendoris radiorum e sole, eamque aspectabilem atque corpoream, Deo coaeternam, et ab ipso diversam statuentes. — Cum rebus creatis nonnisi immortalitas, non autem ipsa aeternitas communicari potest. Differt tamen immortalitas in Deo ab immortalitate in hisce, quod Deus immortalitatem a se habet, nec eam alteri debet, qui ipsi eam, si velit auferre possit, et quia immortalitas in illo, recte eo, quod sit necessaria, est cum immutabilitate conjuncta ¹⁾).

Observ. 3. Cum Deus solus aeternus, solus bonum incommutabile ac perenne sit: :

a, solum ipsum quaeramus, spernamusque bona peritura et fallacia, ne amittamus aeterna; atque

b. praetereuntia mala patienter feramus, nam breve est tempus tribulationis nostrae, et *non sunt condignae passionēs hujus temporis ad futuram gloriam, quae revelabitur in nobis* ²⁾); nec non

c. tempori parcamus, illoque ad salutem nostram consequendam utamur, quum quovis ejus momento bonum infinitum lucrari valeamus.

§. 14. 4. d. Immensus.

Praeter immutabilitatem ac aeternitatem, quae est aevi ac temporis immensitas, in simplicitate Dei porro continetur altera immensitas, quae spatium ac locum spectat, omnemque ejusdem terminum ac extensionem excludit.

Duplex videlicet affectio omnem rem existentem necessario sequitur, locus et aetas; quippe tum alicubi esse id, quod est, oportet, tum aliquando. Quorum finita circumscriptaque est substantia, eorum definitum est spatium, in quo existunt, esseve coeperunt. Nam quod coepit, antequam inciperet, non fuit; ita-

3. c. 866 s. *De nat. bon. c. 1. c. 501.* — Method. l. c. — Gregor. Nys s. *Cont. Eunom. l. 12.* Opp. T. 2. p. 344.

¹⁾ Ps. Justin. *Quaest. ad Graec. q. 9.* Opp. Justin. p. 582. *Quaest. et resp. ad orthod. q. 61.* Ib. p. 498. — Theodoret. *Eran. Dial. 3.* Opp. T. 4. p. 116 ss. — Method. *De creat. n. 5.* Ap. Phot. *cod. 235.* In Galland. *Bibl. PP. T. 3.* p. 801. — Novatian. *De Trinit. c. 4.* Ib. T. 3. p. 289, c. 2 s. — Prosper. *Sent. ex Augustin. Sent. 183.* Opp. c. 569. — Augustin. *De Trinit. l. 15. c. 5. n. 7.* Opp. T. 8. c. 971. l. 1. c. 1. n. 2. c. 750. *Serm. 65. de verb. Ev. Matth. c. 3. n. 4.* T. 5. c. 369. *Serm. 213.* In trad. *Symb. l. n. 1. c. 937.* In Ps. 146. n. 11. T. 4. c. 1644. etc. — Gregor. M. *Moral. l. 12. c. 33. a. 38.* Opp. T. 1. c. 406. l. 25. l. 6. n. 9. c. 791. l. 32. c. 7. n. 9. c. 1051 s.

²⁾ Rom. 8, 18.

que certo in temporis aevique spatio initium habuit, et in eodem certo temporis aevique spatio, quoad manet, perseverat. Quod idem de loco, ubi sit, dicere convenit. Siquidem non potest non esse alicubi, si est aliquid limitibus circumscriptum, et ideo sibi inclusam habet causam et principium movendi et quiescendi; quod utrumque determinatum et tempus et locum requirit. At vero quod infinitum est, id certum ac definitum neutrum habet, sed omnem possibilis, uti temporis, ita et loci immensitatem exhaurit. Ejusmodi jam, quem vera et Catholica religio colit, Deus est.

Est itaque immensitas Dei, de qua hic nobis sermo est, nil aliud, quam illimitata ejus in rebus omnibus in-existentia seu praesentia, vel, ut adcuratius loquamur, illa perfectio, qua Deus omni termino spatii ac loci, nec non extensione, seu concretione (*des Reibeneinanderseins*) carens, res omnes pervadit ac penetrat, iisque non tantum sua potentia ac operatione, sed et sua substantia intime praesens est, et quidem totus, et absque ulla limitatione ac termino.

Hinc non est Deus in singulis rebus atque singulis loci partibus praesens per divisionem, vel multiplicationem, vel per contactum 'physicum corporis instar, sed tanquam simplex omnino, ubique totus, modo simplicissimo. Verum etiam porro rebus omnibus ac locis non adest instar entis alicujus simplicis finiti, seu spiritus creati, qui totus est in loco, ac totus in qualibet parte loci, et tamen loco clauditur ac continetur. Nam quemadmodum Deus pro sua aeternitate nullis temporis spatiis continetur, ita etiam pro sua immensitate nullis locorum limitibus includitur, verum prout ipse in tempore non est, sed tempus in ipso, ita etiam in rebus non est, sed res in ipso, et sicut ipse omni successione caret, neque per partes evolvitur, ita quoque caret omni extensione, nec per spatia dividitur. Unde potius cum loco vel tempore, quam in loco vel tempore Deus est, ut ait Anselmus ¹⁾, atque non tam hocce contineri, quam locum ipsum continere dicendus, ita ut, assumpta infinita rerum ac locorum multitudine, omnibus adesset. Modus itaque, quo Deus immensitate sua omnia replet ac continet, quin tamen ab omnibus contineatur, prorsus singularis est, atque a mente nostra, phantasmatibus et corporeis imaginibus assueta, nec vere concipi nec explicari potest.

¹⁾ *Monol. c. 22. Opp. p. 12 s.*

Adversus immensitatem Dei peccaverunt praeter antiquos Platonicos; qui Deum intra sphaeram quandam igneam commorari existimabant ¹⁾, et illos philosophos, qui Deum in coelis duntaxat esse asseruerunt ²⁾, e veteribus haereticis Valentiniani, Gnostici, Manichaei, qui cum duo rerum principia agnoscerent, unum bonum, alterum malum, illud in regione lucis, et istud in regione tenebrarum collocabant, ne videlicet bonum a malo contaminetur ³⁾, nec non omnes illi, qui Deum corporeum finxerunt. Inter recentiores haereticos huc pertinent Sociniani, qui contendunt, Deum tantummodo quoad virtutem et operationem rebus omnibus adesse, quoad substantiam autem solo coelo contineri ⁴⁾. Eandem opinionem erroneam saec. XVI. Steuchus Eugubinus tenebat.

Doctrina autem vera ac catholica est, Deum immensum esse, rebusque omnibus ac locis non tantum cognitione et operatione, sed essentia intime, summo in gradu ac immediate presentem adesse. Quam

A. S. Scriptura pulcherrime et in infinitis fere locis exponit. Ex quibus tantum principaliora adferemus. Ex Scriptoribus A. T. jam Moyses, loquens ad populum Israëliticum, ait: *Scilo ergo hodie, et cogitato in corde tuo, quod Dominus ipse sit Deus in coelo sursum, et in terra deorsum* ⁵⁾. Et in libro Job legitur: *Excelsior coelo est, et quid facies? profundior inferno, et unde cognosces? Longior terra mensura ejus, et latior mari* ⁶⁾. Quo utroque loco modo populari Deus ubique praesens, nullisque spatiis finitus describitur. Simili modo Salomon in inauguratione templi immensitatem Dei profitetur, cum orans ait: *Si enim coelum, et coeli coelorum te capere non possunt, quanto magis domus haec, quam aedificavi?* ⁷⁾. Cui consonant Isaiae verba: *Haec dicit Dominus: Coelum sedes mea, terra autem scabellum pedum meorum: quae est ista domus, quam aedificabitis mihi? et quis est iste locus quietis*

¹⁾ Cf. Justin. M. *Cohort. ad Graec.* n. 5—6. Opp. p. 10 s.

²⁾ Cf. Id. l. c.

³⁾ Cf. Augustin. *Cont. Epist. fundam.* c. 11. 15. n. 16. 49. Opp. T. 8. c. 159. 161. *Cont. Faust.* l. 25. c. 1. T. 8. c. 433. *Confess.* l. 5. c. 10. n. 20. T. 1. c. 116. etc.

⁴⁾ Cf. Crellius, *De ver. relig.* l. 1. c. 27.

⁵⁾ Deut. 4, 39.

⁶⁾ Job. 11, 8. 9.

⁷⁾ 3. Reg. 8, 27. Cf. 2. Paral. 6, 18.

meae ¹⁾? — Jeremias autem Deum loquentem inducit sequentem in modum: *Putasne Deus e vicino ego sum, dicit Dominus, et non Deus de longe? Si occultabitur vir in absconditis: et ego non videbo eum? dicit Dominus: numquid non coelum, et terram ego impleo? dicit Dominus* ²⁾. Sensus est: Deus ubique praesens est, et quidem substantia, quum replendi vox ad mentis ac voluntatis actionem restringi nequeat; et propterea nihil coram eo est absconditum ³⁾. — Eodem prorsus sensu canit Psalmista: *Quo ibo a spiritu tuo? et quo a facie tua fugiam? Si ascendero in coelum, tu illic es; si descendero in infernum, ades. Si sumsero pennas meas diluculo, et habitavero in extremis maris. Elenim illuc manus tua deducet me: et tenebit me dextera tua. Et dixi: Forsitan tenebrae conculcabunt me: et nox illuminatio mea in deliciis meis. Quia tenebrae non obscurabuntur a te, et nox sicut dies illuminabitur: sicut tenebrae ejus, ita et lumen ejus* ⁴⁾ — Atque Baruch: *Magnus est, inquit, (Deus,) et non habet finem: excelsus, et immensus* ⁵⁾. In his omnibus locis manifeste de essentiali Dei ubique praesentia sermo est, quum illae dicendi formulae, licet metaphoricae, nonnisi illi, nequaquam autem cognitioni tantum aut efficaciae virtutis divinae adcommo-
dari possint.

Non minus autem porro ex N. T. colligitur, Deum ubique, et quidem substantia, non vero in coelo tantum, aut aliqua hujus parte praesentem esse. Nam Christus Dominus docet, coelum esse thronum Dei, terram autem scabellum pedum ejus ⁶⁾, ad verba Isaiae respiciens, cujusmodi verborum figura tota rerum universitas, extremarum partium mentione facta, exprimitur. Atque Paulus apud Areopagitas disserens: *Deus, ait, non longe est ab unoquoque nostrum. In ipso enim vivimus, movemur, et sumus* ⁷⁾. Quem in locum pulchre adnotat Chrysostomus: *Papae, inquit,*

¹⁾ Ib. 66, 1.

²⁾ Jer. 23, 23. 24.

³⁾ Cf. Anastas. Sin. Or. 2. de Incircumscrip. n. 5. In Galland. Bibl. PP. T. 12. p. 245.

⁴⁾ Ps. 138, 7—12.

⁵⁾ Baruch 3, 25. Cf. Amos 9, 2—3. Sap. 1, 7—8.

⁶⁾ Matth. 5, 34—35. Cf. Act. 7, 49.

⁷⁾ Act. 17, 27—28. Cf. Ephes. 4, 6.

omnibus prope esse dicit, qui sunt in orbe terrarum. Quid hoc majus? Vide quomodo partitos ¹⁾ *(qui in parte aliqua collocant Deum) confulet. Quid dico procul? Ita prope est, ut sine ipso non vivatur. In ipso enim vivimus, et movemur, et sumus. Quasi corporeo exemplo hujusmodi quidpiam dicit: sicut impossibile est ignorare, aërem, ubique diffusum, non procul ab unoquoque nostrum esse, imo et in nobis esse; ita etiam omnium creatorem. Et mox etiam illud observat, non dixisse Apostolum per illum, sed in illo nos moveri, quo magis illius intimam praesentiam ostenderet* ¹⁾.

B. Eandem doctrinam de immensitate Dei quoque Ecclesia semper professsa est. Quod probatur

a. ex communi SS. Patrum sententia. Sic Hermas: *Ipse, inquit, capax universorum, solus immensus est* ²⁾. — Theophilus Antiochen. arguit Gentiles, qui deos suos et eorum supremum Jovem certis affixos sedibus putabant, *cum Dei altissimi et omnipotentis et veri Dei est non solum ubique esse, sed etiam inspicere, omnia audire, neque loco contineri* ³⁾. — Clemens Alex. de bono et sancto viro sermonem faciens: *Talis, ait, est, cui est persuasum, Deum ubique adesse, non autem certis ac definitis locis esse conclusum: ut, cum se absque eo esse aliquando existimaverit, noctu et interdium intemperantiae se dedat et libidini. Per totam ergo vilam diem festum agentes, ubique et omni ex parte Deum adesse persuasi, laudantes agros colimus etc.* ⁴⁾. — Origenes: *Deus omni loco melior omnia comprehendit, nec ulla re comprehenditur* ⁵⁾. — Anonymus commentarii in Job, de verbis Jobi agens: „*Venerunt Angeli Dei, ut starent ante Deum.*“ *Humana, ait, usus consuetudine — alque locutione dicit: Venerunt ante Deum, qui omnia replet, qui ubique praesens est, et non est locus, neque in coelo, neque in terra, neque in excelsis, neque apud inferos, ubi non sit praesens Deus* ⁶⁾. —

¹⁾ Hom. 38. in Act. n. 3. Opp. T. 9. p. 290.

²⁾ Pastor. l. 2. mand. 1. Cotelier. PP. apost. Amstel. 1721. V. 1. p. 85.

³⁾ Ad. Autol. l. 2. n. 3. Opp. Justin. M. p. 372. Cf. l. 1. n. 4. p. 362.

⁴⁾ Strom. l. 7. n. 7. Opp. T. 2. p. 851. Cf. l. 2. n. 2. T. 1. p. 431. l. 5. n. 11—12. T. 2. p. 689. 695.

⁵⁾ Cont. Cels. l. 7. n. 34. Opp. T. 1. p. 717. T. Cf. l. 6. n. 71. p. 686.

⁶⁾ Hom. 12. in Genes. n. 2. T. 2. p. 92. c. 1. B. C.

⁶⁾ In Job. l. 1. Opp. Origen. T. 2. p. 860. c. 2. C.

— Auctor orationis contra gregales Sabellii: *Ne quaeratis loci magnitudinem tantam, ut quae possit Dei magnitudinem capere. Non enim immensum in menso est. — Non enim eo Deus omnia implevit, quod ad omnium spatia extendatur, nam illud corpori solum competit: — sed quasi vis quaedam omnia continet: vis enim incorporea, invisibilis est, non circumdat, nec circumdatur ¹⁾.*

— Athanas. scribit: *Ubique Filius est, cum in Patre sit, et Pater in ipso. — Creaturae autem in divisis sunt locis: sol quidem et luna caeteraque luminaria in firmamento, in coelo Angeli, et homines in terra. Quodsi Filius, cum non sit in divisis locis, sed in Patre sit, ubique est, et cum extra omnia sit, non est creatura, consequenter nec Spiritus S. erit creatura, cum non sit in divisis locis, sed omnia impleat, ac extra omnia sit ²⁾.* Et alibi ait: *Deus, qui per se vere est, omnia continet, et a nulla re ipse continetur: in omnibus est sua bonitate et potentia; at extra omnia est propria natura (i. e. ab iis tamen omnibus natura sua diversus ³⁾.* — Eusthatus apud J. Damasc.: *Deus universa replet, nullo circum termino definitus. Qui enim a loco minime circumscribitur, is prorsus, ut Davidis cantico fertur, in omni loco erit. Qui si enim extra locum aliquem esset, oporteret ipsum illo terminari, a quo destitueretur. Cum ergo totus in universo existat, nequaquam ex aliis in alia loca migrat, a quo replentur omnia ⁴⁾.*

— Cyrillus Alex. Deum, de immensitate ejus agens, vocat ἄτονον, i. e. illocalem, magnitudinis et circumscriptionis penitus expertem ⁵⁾. — Basilius: *Neque Pater, inquit, in loco, neque Filius in ambitu ullo, aut certa circumscriptione comprehenditur: sed infinitus (ἄπαιτος) Pater, infinitus est Filius. Quidquid cogitaveris, et quocunque spiritu tuo perrexeris, omne id Deo plenum invenies: ubique offendes pariter coextensam Filii hypostasim ⁶⁾.* —

¹⁾ n. 10. Opp. Athanas. T. 2. p. 44. D. s.

²⁾ Epist. ad Serap. n. 4. Opp. T. 1. P. 2. p. 693.

³⁾ De decr. Syn. Nic. n. 11. T. 1. P. 1. p. 217. Cf. Cont. Arian. Or. 3. n. 22. Ib. p. 572.

⁴⁾ Ecclog. litt. α. tit. 47. Opp. T. 2. p. 751.

⁵⁾ Cont. Julian. l. 4. Opp. T. 6. P. 2. p. 139. A. Cf. l. 2. p. 72. E. Contra in Joan. l. 1. c. 9. T. 4. p. 76 s. l. 6. c. 1. p. 600. D. l. 11. c. 9. p. 977.

⁶⁾ Hom. in illud: In princ. erat Verb. n. 4. Opp. T. 2. p. 137. Cf. Spir. S. c. 6. n. 15. T. 3. p. 12. C.

Gregorius Nyss.: *Quis est adeo puerili animo et ingenio, ut ad universitatem aspiciens, in universitate non credat esse Deum, eam inducentem (ἐνδύον), et continentem; et ei insidentem? Ab eo enim, quod est, pendent omnia, neo fieri potest, ut sit aliquid, quod in eo, quod est, non habeat essentiam, τὸ σὺν ᾧ ἔσται¹⁾*. Et hinc etiam ex substantiali praesentia Dei in rebus omnibus, Incarnationem Verbi, qua Deus inest in natura nostra, nihil novum et insolens habere, demonstrat. — Jo an. Damasc.: *Deus, ut, qui materiae capax sit, et in circumscriptus, in loco, non est. Ipse enim sui ipsius locus est, omnia implens, ac supra omnia existens, omniaque ipse complectens. Attamen in loco esse dicitur, Daique appellatur locus, ubi ejus virtus et operatio sunt?* — Prae omnibus autem ex graecis Patribus laudari meretur Anastasius, Patriarcha Antiochenus, qui librum de incircumscripta Dei essentia exaravit, atque Deum non solum actione, ut quidam suo tempore contendebant, sed etiam substantia praesentem esse, et ubique inesse, demonstrat; et quidem primum ex eo, quod inseparabilia est a natura Dei energia ejus; *si quidem, ut ait, operatio est conservatio; conservatur vera, et continetur universum; circa universum versatur energia. Ab hac autem non est substantia separabilis; est igitur circa universum, et in universo substantia Dei*. Deinde vero inde, quod alioqui certo spatio terminata ac definita illius esset substantia. *Etenim si ab uno solo, licet minimo (loco), arceatur, modus circumscriptionis est; siquidem ab altero terminari substantiam, terminati circumscriptam esse demonstrat³⁾*. — Ex latiniis Patribus Cyprianus ait: *Quod templum habere possit Deus, cujus templum totus est mundus? et cum homo latius maneat, intra unam aediculam vim tantae majestatis includam?* — *Unus est, et ubique totus diffusus est⁴⁾*. — Ambro-

¹⁾ Catech. c. 25. Opp. Par. 1638. T. 3. p. 83. Cf. *De prof. Christ.* Ib. p. 273. A. B.

²⁾ *De fide orth.* l. 1. c. 13. Opp. T. 1. p. 149.

³⁾ *Or. 2. De Incircumscripto.* In Galland. *Bibl. PP.* T. 12. p. 244 s. Cf. Basil. *Adv. Eunom.* l. 5. *Quod Spir. creator est.* Opp. T. 1. p. 298. — Fulgent. *Ad Monim.* l. 2. c. 6. Opp. p. 32 s. — Anselm. *Monol.* c. 13. Opp. p. 8. c. 2. — Hugo Victor. *Erud. theol.* l. 7. c. 19. Opp. *Rothomag.* 1648. T. 3. p. 47. s.

⁴⁾ *De vanit. idol.* n. 5. Opp. T. 2. p. 109.

sus: *Complens omnia (Deus)*, inquit, *nusquam ipse confusus: penetrans omnia, nusquam ipse penetrandus: ubique totus, et eodem tempore vel in coelo, vel in terris, vel in novissimo mari praesens* ¹⁾? — Hieronymus: *Deus ubique est, et totus ubique est, a quo quis potest separari, cum in eo sint omnia* ²⁾? — Hilarius: *Nullus sine Deo, neque ullus non in Deo locus est. In coelis est, in inferno est, ultra maria est. Inest interior, excedit exterior. Ita cum habet, atque habetur, neque in aliquo ipse neque non in omnibus ipse est* ³⁾. — Augustinus: *Nusquam absens est, qui coelum et terram implet; nec spatiis includitur parvis, magnisque diffunditur, sed ubique totus est, et nullo continetur loco* ⁴⁾. — Alibi: *Est ergo Deus per cuncta diffusus. — Sed sic est Deus per cuncta diffusus, ut non sit qualitas mundi; sed substantia creatrix mundi; sine labore regens, et sine onere continens mundum. — Non tamen per spatia locorum, quasi mole diffusa, ita ut in dimidio mundi corpore sit dimidius, et in alio dimidio dimidius, atque ita per totum totus; sed in solo coelo totus et in sola terra totus, et in coelo et in terra totus, et nullo contentus loco, sed in seipso ubique totus* ⁵⁾. Atque rursus: *Veritas est Deus. Veritas nec quadra est, nec rotunda, nec longa. Ubique praesens est* ⁶⁾. — Gregorius M.: *Ponamus ergo ante oculos mentis, quae illa natura sit, quae tenet*

¹⁾ *De fid. l. 1. c. 16. n. 106. Opp. T. 2. c. 465. Cf. In Ps. 118. n. 38 s. T. 1. c. 1219 s. De Cain et Abel. l. 1. c. 8. n. 30. c. 197. De Spir. S. l. 1. c. 7. T. 2. c. 617 s. — Ps. Ambros. Tr. de Trin. s. de Symb. Apost. c. 22. Ib. Append. c. 335 s. De dignit. cond. hum. c. 2. lb. c. 611. De fid. orth. c. 6. lb. c. 352 s.*

²⁾ *In Epist. ad Ephes. 2, 13—14. Opp. T. 7. c. 580. Cf. In Is. c. 66. T. 4. c. 798. E. s.*

³⁾ *De Trinit. l. 1. n. 6. Opp. T. 2. p. 5. Cf. l. 8. n. 24. c. 230, et al. saepiss.*

⁴⁾ *Epist. 147. c. 12. n. 29. Opp. T. 2. c. 485.*

⁵⁾ *Epist. 187, quae est tota de hoc argumento, c. 4. n. 14. c. 682. Cf. Epist. 222. n. 2. c. 362.*

⁶⁾ *In Ps. 30. Eun. 2. n. 7. T. 4. c. 149. Serm. 52. de verb. Ev. Matth. c. 5. n. 15. T. 5. c. 306. Serm. 53. c. 8. n. 7. c. 314. Confess. l. 7. c. 1. T. 1. c. 131 s. Gen. ad lit. l. 8. c. 26. n. 48. T. 3. P. 1. c. 242. Cont. epist. fundam. c. 15. n. 20. T. 8. c. 161. De Trinit. l. 5. c. 1. n. 2. c. 833. Etc.*

omnia, implet omnia, circumplectitur omnia, superexcedit omnia, sustinet omnia. Neque alia ex parte sustinet, atque alia superexcedit: neque alia ex parte implet, atque alia circumplectitur: sed circumplectendo implet, implendo circumplectitur, sustinendo superexcedit, superexcedendo sustinet ¹⁾. — Anselmus: *Idem est esse Dei, et potestas ejus, Sicut itaque potestas Dei est semper et ubique: ita quidquid est Deus ubique et semper est* ²⁾. — Praeter aliquos ³⁾, quos tamen in re certa et clara silentio praetermittimus, solummodo versus Abaelardi, quibus pulchre immensitatem divinam canit, adhuc afferentes:

Super cuncta, subtilus cuncta, extra cuncta, intra cuncta.

Intra cuncta nec inclusus, extra cuncta nec exclusus,

Subter cuncta nec subtractus, super cuncta nec elatus.

Super totus possidendo, subter totus sustinendo.

Extra totus complectendo, intra totus ex implendo.

Intra nusquam coarctaris, extra nusquam dilataris,

Subtus nullo fatigaris, super nullo sustentaris ⁴⁾.

¹⁾ L. 1. hom. 8. in *Ezech.* n. 16. Opp. T. 1. c. 1241. B. C.

²⁾ *De fid. Trinit. et de Incarn. Verb.* c. 4. Opp. p. 45. D.

³⁾ Cf. Theophil. Antioch. *Ad Autol.* l. 1. n. 4. Opp. Justin. p. 302. C. l. 2. n. 3. p. 372. — Ps. Justin. *Quaest. ad orthod.* q. 144. Ib. p. 542. — Titus Bostr. *Cont. Manich.* l. 1. n. 5. In Galland. *Bibl. PP.* T. 5. p. 271. E. — Zachar. Mityl. *Disp. de mund. opific.* Ib. T. 11. p. 291. E. — Didym. *De Spir. S.* n. 6. Ib. T. 5. p. 265. c. 2. — Gregor. Naz. *Or.* 34. Opp. T. 1. c. 477 s. *Or.* 38. c. 546. D. — Dionys. Areop. *De div. nom.* c. 1. §. 6. Opp. T. 1. p. 446. — Maxim. *In schol. ad h. l.* Ib. p. 468 s. Theodoret. *In Ps.* 138, 8. Opp. T. 1. p. 947. *De provid. Or.* 10. T. 4. p. 444. *De haer.* l. 5. c. 1. T. 4. p. 250 ss. — J. Chrysost. *In Ps.* 112. n. 2. Opp. T. 5. p. 290. *In Ps.* 33. n. 3. p. 33. *Ps.* 143. n. 3. p. 462 s. — J. Damascen. *De fid. orth.* l. 1. c. 13. Opp. T. 1. p. 150. — Prosper. *Sent.* 123. Opp. c. 560. — *Confess.* c. 770. C. — Fulgent. *Cont. serm. Fastidos.* c. 4—6. Opp. p. 342 ss. *Ad Monim.* l. 2. c. 6. p. 32 s. *De fid. ad Petr.* c. 3. n. 27. p. 312. — Ephrem. Syr. *Adv. Scrut. Serm.* 4. Opp. T. 3. p. 7. D. — Tertullian. *Adv. Prax.* n. 5. Opp. V. 2. p. 407. — Paschas. *De Spir. S.* l. 1. c. 12. In *Bibl. max. PP.* Lugd. T. 9. p. 812 s. — Petr. Damian. *Opusc.* 36. *De omnip.* c. 6. Opp. T. 3. p. 312 s. — Vigil. Taps. *Cont. Eutyech.* l. 1 n. 6. In *Bibl. max. PP.* Lugd. T. 8. p. 723. — Bernard. *De consid.* l. 5. c. 6. c. 457. A. — Richard. a S. Vict. *De Trinit.* l. 2. c. 22. Opp. p. 230.

⁴⁾ *Rith. de Trinit.* v. 3 ss.

b. Ex solenni definitione Concil. Lateran. IV., qua discernitur, Deum immensum credendum atque confitendum ¹⁾; nec non ex Symbolo Athanasiano, quod habet: *Immensus Pater, immensus Filius, immensus Spiritus Sanctus.*

c. Verum etiam ratione immensitas Dei demonstrari potest. Sequitur enim illa

a. necessario ex summa et infinita Dei perfectione, ac ejus aseitate. Nam cum immensitas sit perfectio simpliciter simplex, quae omnem imperfectionem sua notione arcet: enti perfectissimo tribui necessario debet; atque si non tribueretur, eo ipso ens illud perfectissimum nec esse, nec concipi posset. Porro omne ens circumscriptum necessario, uti finitum, ita et haud necessarium est; et ideo sublata Dei immensitate, non tantum infinita ejusdem perfectio, sed et aseitas tolleretur.

b. Deus vel alicubi est, vel nullibi, aut ubique. Deum substantia sua nullibi esse, ipsi Sociniani haud concedunt. Ergo necessario *καὶ οὐστὴν* alicubi esse debet. Si vero alicubi est: ubique sit necesse est; cum sit simplex, neque reddi possit ratio, quare in uno potius, quam in altero loco existat, seu praesens sit.

c. Quum Deus rebus omnibus, quae in universo mundo existunt, jugiter esse det: necessario, eum ubique agere atque operari, statuendum est. At Deus non agit per operationem ab essentia divulsam et distinctam, istud quippe non patitur, quae summa est ejus simplicitas, sed per operationem a sua natura indistinctam; atque hinc; Deum in rebus omnibus non solum secundum suam operationem, verum etiam naturam et substantiam intime praesentem esse, intelligitur. Verumtamen non tantum rebus omnibus existentibus Deus inexistit, sed etiam ad existendum in rebus omnibus possibilibus ex eadem causa est aptus, quum hae tantum per eum existere possint. Est itaque Deus intra omnia, et implet omnia, ita tamen, ut locis haud contineatur, sed ea omnia contineat atque complectatur, seu est, ut illum Dionysius ²⁾ appellat *ἐγκόσμιος, περικόσμιος, υπερέκσμιος* seu *ὑπερουράνιος*.

Observ. 1. Licet Deus sit ubique totus substantia sua simplici praesens; sua efficacia tamen diverso modo in diversis locis ac rebus adest. Hinc sedem suam in coelo habere dicitur, et speciali ratione coeli inhabitare ac inesse, quia nempe ibi potentiae

¹⁾ Capit. 1. De. fid. Cath. Mansi, Coll. Conc. T. 22. col. 981—982.

²⁾ De div. nom. c. 1. §. 6. Opp. T. 1. p. 446.

ac munificentiae suae explicat divitias ¹⁾. Ita etiam in justis speciali ac nobiliori ratione per inhabitantem gratiam, non autem per exclusionem praesentiae suae in aliis locis, praesens est ²⁾. Simili sensu porro dicitur descendere et ascendere, accedere et recedere; et quidem descendere, et ad nos accedere dicitur, quando propitius beneficia largitur, aut modo singulari se per miraculum manifestat, recedere vero, quando impios impietati suae permittit ³⁾. Sunt itaque hae diversae dicendi rationes nonnisi merae phrasēs, humano modo adornatae.

Observ. 2. Quum Deus simplex omnino sit: nequaquam nobis, quando de ejus extensione loquimur, eum cogitare licet extensum extensione materiali, sed tantum virtuali. De extensione hac materiali loquuntur Patres, quando negant, Deum permeare rerum substantias ⁴⁾; ad mentem scilicet Stoicorum, qui contendebant, Deum rebus omnibus tamquam partem vel animam mundi immisceri; porro quum Deum nusquam esse asserunt ⁵⁾, nempe instar corporis inclusum, utpote qui omnia repleat et contineat; atque quando docent, esse tantum in loco per solam operationem, et nonnisi ex abusu dici eum esse in loco, videlicet circumscripte, instar corporis, aut definite, instar spiritus finiti, non autem quatenus ipse ubique modo incircumscripto et immenso *ὀνσώδῳς* inexistit ⁶⁾.

Observ. 3. Dogmā de immensitate Dei

a. nos in rebus jucundis modestos et temperatos efficit, in adversis autem consolatur ac erigit;

b. a peccatis avocat, etiam occultis, quoniam tenebrae non operiunt, et nox sicut lux coram omnipraesente; atque

c. nos ad studium virtutis quam maxime excitat.

¹⁾ Cf. Is. 66, 1. Ps. 10, 5. J. Damascen. *De fide orth.* l. 1. c. 13. Opp. T. 1. p. 149. C.

²⁾ Cf. Augustin. *Epist.* 187. c. 5. n. 16. s. Opp. T. 2. c. 683. c. 3. n. 10. c. 681.

³⁾ Cf. Gen. 11, 5. Deut. 23, 11. Joan. 14, 23. Augustin. *De civ. D.* l. 16. c. 5. Opp. T. 7. c. 420. *Epist.* 187. c. 5. n. 16. T. 2. c. 683. — Ps. Augustin. *Serm.* 5. *de trib. vir. etc.* Ib. T. 5. Append. c. 12.

⁴⁾ Cf. Tatian. *Or. cont. Graec.* n. 4. Opp. Justin. p. 280. — Clem. Alex. *Strom.* l. 2. n. 2. Opp. T. 1. p. 431.

⁵⁾ Cf. Chrysost. *Hom.* 5. in *Epist. ad Col.* n. 3. Opp. T. 11. p. 361. F. — Augustin. *L.* 83. *quaest.* q. 20. Opp. T. 6. c. 5.

⁶⁾ Cf. Chrysost. l. c. Joan. Damascen. *De fide orth.* l. 1. c. 13. Opp. T. 1. p. 149 s. — Augustin. *De Symb. Serm.* 2. n. 2. Opp. T. 6. c. 576. et ll. s. cc.

§. 15. Intellectus divinus.

Cum Deus sit spiritus, spiritus autem vis in intellectu et voluntate consistat: de hoc ipso intellectu et voluntate, postquam attributa seu perfectiones existentiae divinae exposuimus, sermo modo est instituendus, videndumque, quomodo tam ille, quam haec in Deo se habeat.

Et quidem quod attinet intellectum: sub eo communiter venit facultas cognoscendi, quae nonnisi rationem possibilis cognitionis in se continet, porro incrementi et decrementi capax est, atque in sua efficacia nisum et conamen conjunctum habet; quae omnia, utpote in se imperfecta, in Deum infinitum cadere non possunt. Unde quando de Dei intellectu loquimur: intelligimus, omnibus illis limitibus semotis, vim Dei infinitam, qua ipse, vel potius substantiam divinam, quatenus haec omnia cognoscibilia uno intuitu simultaneo, aeterno et infallibili exhaurit. Dicimus substantiam divinam, non enim differt intellectus divinus a substantia seu essentia divina, neque est qualitas aliqua vel actio adveniens; quum Deus pro sua infinita perfectione, prouti necessario existit, ita et necessario intelligit atque cognoscit; hinc et *νόσις*, prout, omnis reliqua absoluta perfectio, ipsius *οὐσία* est ¹⁾. Unde et SS. Litterae ubique ²⁾ Deum intelligentem docent, atque Ecclesia universalis uno ore per omnia saecula tradidit.

§. 16. Quoad intellectum 2. Deus est: a. Omniscius.

Scientiam perfectissimam tam sui, quam rerum reliquarum, seu omniscientiam nemo nisi extreme amens Deo denegandam esse sentire potest. Facilius est enim, ut divinitatem funditus

¹⁾ Cf. Jren. *Adv. haer.* l. 2. c. 28. n. 5. p. 157. — Cyrill. Alex. *Thes. Assert.* 31. Opp. T. 5. P. 1. p. 267. In Joan. l. 1. c. 9. T. 4. p. 73 s. — Didym. *Enarr. Epist. can. Joan.* 3, 2. In Galland. *Bibl. PP.* T. 6. p. 299. A. B. — Maxim. ap. Euthym. *Panopl. pan.* 1. tit. 3. In *Bibl. max. PP.* Lugdun. T. 19. p. 28. *Schol. ad Dion. c. 5. de div. nom.* §. 6. Opp. Dionys. T. 1. p. 709. — Nemes. *De nat. hom. c. 44.* In Galland. *Bibl. PP.* T. 7. p. 422. B. — Augustin. *De Trinit. l. 15. c. 13—14. n. 22—23.* Opp. T. 8. c. 983 s. *De Gen. ad litt. l. 1. c. 5. n. 10.* T. 3. c. 120. — *De civ. D. l. 11. c. 10. n. 2—3.* T. 7. c. 280 s. — J. Damasc. *De fide orth. l. 1. c. 14.* Opp. T. 1. p. 153. B.

²⁾ Cf. Exod. 3, 7. 2. Paral. 6, 30. Job. 14, 13. Ps. 114, 1—2. Sap. 1, 6. Is. 46, 10. 64, 9. Jer. 14, 10. Hab. 3, 2. 1. Joan. 3, 20. Apoc. 2, 23. etc.

negare aliquis audeat, quam ut, eam intelligentem ac scientem non esse, suspicetur.

Potest autem paucis omniscientia describi ceu ea Dei perfectio, qua ipse omnia cognoscibilia perfectissime cognoscit ac scit.

Scit itaque Deus qua omniscius

A. semetipsum;

B. omnia extra se; et quidem

a. omnia existentia, eaque

α. sive necessaria sive libera, interna et externa, atque

β. sive praesentia, sive praeterita, sive futura;

b. omnia possibilia; nec non

c. omnia conditionate futura.

Porro quoad modum scientia divina est absoluta, et proinde immutabilis ac aeterna, non successiva, sed simultanea, simplicissima ac indivisibilis, adaequatissima seu verissima, certissima ac distinctissima, essentiam rerum penetrans, ac comprehendens visio seu intelligentia; et ideo in Deo nulla datur reflexio, abstractio aut ratiocinatio, nulla memoria aut oblivio, nullumque dubium ac nullus error.

Deo infinitam et universa comprehendentem ac penetrantem cognitionem inesse,

A. per omnes utriusque Testamenti paginas expressum, declaratumque legitur. Ex quibus pauca delibare sufficiat. *Apud ipsum*, legitur in libro Job, *est sapientia*, (scientia scilicet absoluta), *et fortitudo, ipse habet consilium, et intelligentiam* ¹⁾. Porro: *Ipse fines mundi intuetur: et omnia, quae sub coelo sunt, respicit* ²⁾. Atque: *Scio, quia omnia potes, et nulla te latet cogitatio* ³⁾. In Baruch: *Qui scit universa, novit eam* (sapientiam) ⁴⁾. In Psalmis: *Et sapientiae* (scientiae) *ejus non est numerus* ⁵⁾. Et alibi: *Ecce, Domine, tu cognovisti omnia, novissima et antiqua. — Mirabilis facta est scientia tua ex me:*

¹⁾ Job. 12, 13.

²⁾ Job. 28, 14.

³⁾ Job. 42, 2.

⁴⁾ Bar. 3, 32.

⁵⁾ Ps. 146, 5. Cf. Is. 40, 28. Dan. 2, 21—22.

confortata est, et non potero ad eam ¹⁾. In libris Regum, in cantico Annae: *Deus scientiarum Dominus est, et ipsi praeeparantur cogitationes* ²⁾. In libro Esther, quae orans ad Deum, ait: *Adjuva me, nullum aliud auxilium habentem, nisi te Domine, qui habes omnium scientiam* ³⁾. In Ecclesiastico: *Cognovit enim Dominus omnem scientiam, et inspexit in signum aevi, annuntians, quae praeterierunt, et quae superventura sunt, revelans vestigia occultorum* ⁴⁾. In Epist. ad Hebr.: *Et non est ulla creatura invisibilis in conspectu ejus: omnia autem nuda, et aperta sunt oculis ejus, ad quem nobis sermo est* ⁵⁾. Et in 1. Epist. Joannis: *Major est Deus corde nostro, et novit omnia* ⁶⁾. Praeter haec et innumera alia S. Scripturae loca, quae disertis verbis testantur, Deum nosse omnia, neque quidquam eum latere, dantur adhuc alia, in quibus Deus per se perque Prophetas fidem ejusdem faciens inducitur; quae tamen afferre, utpote omnibus nota, opus haud est.

B. Sed nec Patrum hic loci necesse est proferre sententias. Quod non magis infinitum, quam supervacaneum in re manifesta ac ab omnibus admissa foret. Aliqua tamen eorum testimonia in ulteriori veritatis nostrae expositione inferius occurrent.

Quod autem attinet ipsam Ecclesiam universalem: haec non tantum veritatem nostram de divina omniscientia fidelibus tanquam articulum fidei semper ac ubique tradit, sed fidem in eandem omni sua vita profitetur.

C. Quemadmodum vero revelatio, ita etiam ipsa ratio infinitam Dei scientiam indubitate docet. Nam cum Deus in omni genere perfectionum infinitus sit, atque scientia manifeste in eximiis perfectionibus numeretur: in ipso scientia talis, quae eum deceat, ab omni videlicet imperfectione prorsus immunis ac infinita, statuenda est; secus enim, si ipse omnia absolute certa et explorata scientia non pervaderet, et si ipsum aliquid latere posset, perfectissimus, quo nihil perfectius excogitari queat, non esset.

¹⁾ Ps. 138, 5—6.

²⁾ 1. Reg. 2, 3.

³⁾ Esth. 14, 14.

⁴⁾ Eccli. 42, 19.

⁵⁾ Hebr. 4, 13.

⁶⁾ 1. Joan. 3, 20.

Quemadmodum autem certum ac indubitatum, Deum omnia cognoscibilia modo perfectissimo nosse; ita quoque certum ac manifestum est, Deum spectato objecto ejus infinitae scientiae speciatim nosse perfectissime

A. semetipsum. Etenim si Deus omnia cognoscibilia perfectissime cognoscit: prae omnibus se ipsum cognoscat necesse est, et quidem:

a. Cognitione adaequata, comprehensiva ac infinita; quum infinite cognoscibilis sit. Quo sensu ait Apostolus: *Spiritus enim (Dei) omnia scrutatur, etiam profunda Dei. Quis enim hominum scit, quae sunt hominis, nisi spiritus hominis, qui in ipso est? ita et, quae Dei sunt, nemo cognovit nisi Spiritus Dei*¹⁾. Et Minucius Felix: *Deus — soli sibi tantus, quantus est, notus. Nobis vero ad intellectum pectus angustum est*²⁾.

b. Cognitione intuitiva ac clarissima, quum secus haec non esset perfecta. Quapropter Evangelista ait: *Deum nemo vidit unquam; unigenitus Filius, qui est in sinu Patris, ipse enarravit*³⁾. Atque

c. cognitione aeterna ac necessaria, quia cognitio ad naturam ac essentiam spiritus infiniti necessario pertinet, qua ille tam parum, quam ipsa essentia sua carere potest.

Cum vero divina mens se ipsam intueatur: necessario etiam omnia, quorum causa est, seu quae fieri inde ab aeterno decrevit, prout et illa, quae in se haud impossibilia, pro sua omnipotentia efficere potest, et quidem non progressionem quadam, sed una et simplici visione ac intelligentia scit; neque confuse universeque duntaxat, sed distincte ac singillatim perspicit et contemplatur omnia, etiam minutissima quaeque. Et ideo

B. Deus novit perfectissime omnia, quae extra ipsum dantur, vel dari possunt. Novit itaque

a. omnia singula existentia, tam in se, quam κατ' ἐνέργειαν, in omnibus suis relationibus, atque ex omnibus partibus; et quidem

α. omnia praesentia, quamvis exigua et abjecta, bona et mala, etiam omnia cordis secreta. Quod SS. Litterae passim ac luculenta praedicatione commendant. Sic legitur in Psalmis: *Excelsus Dominus, et humilia respicit; et alta a longe*

¹⁾ 1. Cor. 2, 10. 11. Cf. Matth. 11, 27. Joan. 1, 18.

²⁾ Octav. c. 18. In Galland, *Bibl. PP.* T. 2. p. 391. c. 1. A.

³⁾ Joan. 1, 18.

cognoscit ¹⁾). In Proverbiis: *Infernus et perditio coram Domino: quanto magis corda filiorum hominum* ²⁾). Ita etiam in N. Testamento plura occurrunt loca, quae idem edisserunt. Praecipue autem huc spectant ea, quae Dei curam ac providentiam ad minuta quaeque pertinere significant, ut ubi passeret, et quae eis accidunt, Deus dicitur curare, lilia agri vestire, ac volatilia coeli pascere, et alia ejus generis ³⁾). — Nominatim vero innumerabilia in S. Scriptura occurrunt testimonia, quae homines, eorumque cogitationes, verba atque actiones singulas a Deo cognosci ac dijudicari tradunt. *Omnia corda*, ait David es ad filium, Salamonem, *scrutatur Dominus, et universas mentium cogitationes* ⁴⁾). In Psalmis legitur: *Domine probasti me, et cognovisti me: tu cognovisti sessionem meam, et resurrectionem meam. Intellexisti cogitationes meas de longe: semitam meam, et funiculum meum investigasti. Et omnes vias meas praevidisti: quia non est sermo in lingua mea. Ecce Domine, tu cognovisti omnia novissima et antiqua: tu formasti me, et posuisti super me manum tuam. Mirabilis facta est scientia tua ex me: confortata est, et non potero ad eam* ⁵⁾). — *De coelo respexit Dominus: vidit omnes filios hominum. De praeparato habitaculo suo respexit super omnes, qui habitant terram. Qui finxit singillatim corda eorum: qui intelligit omnia opera eorum* ⁶⁾). — *Oculi Domini super justos: et aures ejus in preces eorum. Vultus autem Domini super facientes mala: ut perdat de terra memoriam eorum* ⁷⁾). — *Deus tu scis insipientiam meam: et delicta mea a te non sunt abscondita* ⁸⁾). — *Qui plantavit aurem, non audiet? aut qui finxit oculum, non considerat? Qui corripit gentes, non arguet: qui docet hominem scientiam* ⁹⁾? In Proverbiis: *In omni loco oculi Domini*

¹⁾ Ps. 137, 6. Cf. Job. 28, 24. 34, 21.

²⁾ Prov. 15, 11. Cf. Job. 28, 6.

³⁾ Matth. 10, 29. Luc. 12, 6.

⁴⁾ 1. Paral. 28, 9. Cf. 29, 17.

⁵⁾ Ps. 138, 1—6. Cf. 7—12. 6.

⁶⁾ Ps. 32, 13—15.

⁷⁾ Ps. 33, 16—17. Cf. 37, 10.

⁸⁾ Ps. 68, 6.

⁹⁾ Ps. 93, 9. 10. Cf. 43, 22. 118, 168. 7, 10.

contemplantur bonos et malos ¹⁾). — Omnes viae hominis patent oculis ejus: spirituum ponderator est Dominus ²⁾). In Ecclesiastico: *Oculi Domini multo lucidiores sunt super solem, circumspicientes omnes vias hominum, et profundum abyssi, et hominum corda intuentes in absconditas partes* ³⁾). — *Opera omnis carnis coram illo, et non est quidquam absconditum ab oculis ejus. A saeculo usque in saeculum respicit, et nihil est mirabile in conspectu ejus* ⁴⁾). Et: *Non praeterit illum omnis cogitatus, et non abscondit se ab eo ullus sermo* ⁵⁾). Apud Jeremiam: *Tu autem Domine Sabaoth, qui judicas juste, et probas renes, et corda, videam ultionem tuam ex eis* ⁶⁾). — *Pravum est cor omnium, et inscrutabile: quis cognoscet illud? Ego Dominus scrutans cor, et probans renes: qui do unicuique iuxta viam suam, et iuxta fructum adinventionum suarum* ⁷⁾). Et: *Putasne Deus e vicino ego sum, dicit Dominus, et non Deus de longe? Si occultabitur vir in absconditis: et ego non videbo eum? dicit Dominus* ⁸⁾). — Christus Dominus autem ait: *Et Pater tuus, qui videt in abscondito, reddet tibi* ⁹⁾). Atque cum Pharisaeis disputans: *Vos estis, qui justificatis vos coram hominibus: Deus autem novit corda vestra* ¹⁰⁾). Et Apostolus: *Non est ulla creatura invisibilis in conspectu ejus: omnia autem nuda et aperta sunt sculis ejus, ad quem nobis sermo, i. e. cui nos olim sumus rationem reddituri* ¹¹⁾).

β. Porro novit Deus omnia praeterita et futura, et quidem non tantum necessaria, sed et contingentia et libera.

Praescientiam in Deo negavit Cicero ¹²⁾ ignorans, qua ratione illa conciliari possit cum hominum libero arbitrio, et hinc, ut ait

¹⁾ Prov. 15, 3.

²⁾ Prov. 16, 2.

³⁾ Eccli. 23, 28.

⁴⁾ Eccli. 39, 24—25.

⁵⁾ Eccli. 42, 20. Cf. 15, 20, 16, 20, 17, 13, 16, 17, 42, 18.

⁶⁾ Jer. 11, 20. Cf. 20, 12.

⁷⁾ Jer. 17, 9—10. Cf. Sap. 1, 6.

⁸⁾ Jer. 23, 23—24. Cf. 16, 17. Is. 29, 15—16. Hos. 7, 2. Job. 34, 21—22.

⁹⁾ Matth. 6, 4. 6. Cf. 32.

¹⁰⁾ Luc. 16, 15.

¹¹⁾ Hebr. 4, 13.

¹²⁾ Cf. *De div. l. 2. n. 7.*

Augustinus ¹⁾, *dum vult facere homines liberos, fecit sacrilegos*. Simili modo Marcion Deo praescientiam cum bonitate et omnipotentia detrahebat, eo quod primum bonum hominem in peccatum labi passus esset ²⁾. Nec non Sociniani eo dementiae devenerunt, ut dicerent, futura libera ac contingentia conjecturis duntaxat quibusdam et verisimilibus rationibus Deo nota esse, non certa et firma cognitione; quia futura haec non sunt in genere scibilium, cum non habeant, ut illis placet, determinatam objectivam veritatem ³⁾.

Statuuntur autem haec adversus auctoritatem S. Scripturae, quae potius, ut scientiam praeteritorum, ita et praescientiam futurorum in Deo dari, clarissimis verbis ubique docet. *A saeculo usque in saeculum*, ait Ecclesiasticus, *respicit, et nihil est mirabile in conspectu ejus* ⁴⁾. — *Omnis homo, qui transgreditur lectum suum, contemnens in animam suam, et dicens: Quis me videt? Tenebrae circumdant me, et parietes cooperiunt me, et nemo circumspicit me: quem vereor? Delictorum meorum non memorabitur Altissimus. Et non intelligit, quoniam omnia videt oculus illius, quoniam expellit a se timorem. De huiusmodi hominis (seu humanus) timor, et oculi hominum time- tes illum: et non cognovit, quoniam oculi Domini, multo, plus lucidiores sunt super solem, circumspicientes omnes vias hominum, et profundum abyssi, et hominum corda intuentes, in absconditas partes; Domino enim Deo antequam crearentur, omnia sunt agnita: sic et post perfectum respicit omnia* ⁵⁾. — Et: *Cognovit Dominus omnem scientiam, et inspexit in signum aevi, annuntians, quae praeterierunt, et quae super- ventura sunt, revelans vestigia occulorum* ⁶⁾. — *Quia tu possedisti renes meos: suscepisti me de utero matris meae. — Non est occultatum os meum a te, quod fecisti in oc- cullo: et substantia mea in inferioribus terrae. Imperfectum meum viderunt oculi tui, et in libro tuo omnes scri- bentur: dies formabuntur, et nemo in eis* ⁷⁾. — *Scit (Sapientia divina) praeterita, et de futuris aestimat: signa et monstra scit, antequam fiant, et eventus*

¹⁾ De civ. D. I. 5. c. 1. n. 2. Opp. T. 7. c. 122.

²⁾ Cf. Tertullian. Adv. Marcion. l. 2. c. 5. Opp. V. 2. p. 182 s.

³⁾ Cf. Socin. Praelect. c. 11. et Crell. De ver. relig. l. 1. c. 24.

⁴⁾ Eccli. 39, 25.

⁵⁾ Eccli. 23, 25—29. Cf. 17, 18—19.

⁶⁾ Eccli. 42, 19—20.

⁷⁾ Ps. 138, 13. 15—16. Cf. 3—5.

temporum et saeculorum ¹⁾. — *Priusquam te formarem in utero, novi te* ²⁾. — *Deus aeternae, qui absconditorum es cognitor, qui nosti omnia, antequam fiant* ³⁾. — *Notum a saeculo est Domino opus suum* ⁴⁾. — Imo non tantum SS. Litterae scientiam futurorum Deo tribuunt, sed et hanc notam divinitatis esse edisserunt, et eandem ad falsos deos convincendos ipsis objiciunt. *Accedant, ait Isaias, et nuntient nobis, quaecunque ventura sunt: priora, quae fuerunt, nuntiate: et ponemus cor nostrum, et sciemus novissima eorum, et quae ventura sunt, indicate nobis. Annuntiate, quae ventura sunt in futurum, et sciemus, quia dii estis vos* ⁵⁾. — *Quis similis mei? Voget, et annuntiet et ordinem exponat mihi, ex quo constitui populum antiquum: ventura, et quae futura sunt, annuntient eis* ⁶⁾. — Quod ad scientiam praeteritorum attinet: pertinent huc quoque omnia illa loca, ubi Deus aliquando omnibus hominibus secundum eorum opera retributurus traditur. — Id ipsum porro tanquam dogma certum atque inconcussum omnes Patres docuerunt. Origenes scribit: *Propria divinitatis nota est, res futuras ita praedicere, ut praedicendi ratio vires humanas superet, et ex eventu judicetur, divinum Spiritum esse praedictionis auctorem* ⁷⁾. — Tertullianus: *Quae (praescientia) tantos habet testes, quantos fecit Prophetas* ⁸⁾. — Augustinus: *Confleri esse Deum, et negare praescium futurorum, apertissima est insania. — Non est autem consequens, ut si Deo certus est omnium ordo causarum, ideo nihil sit in nostrae voluntatis arbitrio. Et ipsae quippe nostrae voluntates in causarum ordine sunt, qui certus est Deo, ejusque praescientia continetur; quoniam et humanae voluntates operum causae sunt. Atque ita omnes, qui rerum causas praescivit, profecto in eis causis*

¹⁾ Sap. 8, 8.

²⁾ Jer. 1, 5.

³⁾ Dan. 13, 42.

⁴⁾ Act. 18, 18. Cf. Is. 46, 10. 48, 8.

⁵⁾ Is. 41, 22—23. Cf. 45, 21.

⁶⁾ Is. 44, 7.

⁷⁾ Cont. Cels. l. 6. n. 10. Opp. T. 1. p. 637. c. 2. B. Cf. Cyrill. Alex.

⁸⁾ Is. l. 4. or. 2. Opp. T. 2. p. 584. D. — Ps. Justin. Quaest. ad orthod. q.

6. Opp. Justin. 543 s. — Boëthius, De consol. phil. l. 5. pros. 6. p. 120.

⁸⁾ Adv. Marcion. l. 2. c. 5. Opp. V. 2. p. 183. Cf. Apolog. c. 20. V.

p. 45.

etiam voluntates nostras ignorare non potuit, quas nostrorum operum causas esse praescivit ¹⁾. — Hieronymus: *Cui (Deo) omnia futura jam facta sunt, et antequam fiant, universa sunt nota* ²⁾.

Ecclesia autem universalis speciatim hancce veritatem fidelibus, Deum perfectam scientiam rerum omnium, et praecipue actionum humanarum habere, ubique inculcat, atque omni sua agendi ratione ac vita prae se fert.

Nec non ratio ipsa, cum Deus rerum omnium sit auctor atque gubernator, et omnia, quaecunque sunt et fiunt, ex ejus voluntate, sive ordinante sive permittente, sint et fiant, perspicit, notitiam rerum externarum omnium penes illum esse debere. Nam Deus libertate producit universa, quae extra se profundit. Nihil autem libere voluntas efficit, nisi intelligentia prius cognitum, a qua illa regitur, et ad agendum quasi impellitur. Quapropter cum nihil sit, esseve possit, nisi a Deo et ex ejus scientia effectum ac conditum: nihil est omnino, quod non ille cognoscat, sive praesens, sive praeteritum, sive aliquando futurum. Porro Dei scientia, utpote perfectissima, ad omnem rem cognoscibilem se extendere debet; et certe non tantum praesentia, sed et praeterita, atque etiam futura, et quidem non solum necessaria, verum libera quoque ac contingentia sunt in genere rerum, quae sciri et cognosci possunt; et ideo, prout illa, ita et haec divinae menti semper praesentia sint necesse est.

Ex quibus porro clare colligitur, Deum non sic illa, quae apud nos sunt differentiis temporis distracta, intueri, ut ea eodem modo, prout nos, atque iisdem differentiis, quibus sunt implicata, intelligat. Quin potius omnia, sive praeterita, sive futura tanquam praesentia cognitione simplici, aeterna atque rerum existentiam praeunte ac determinante, adeoque certissima ac clarissima, sine ulla confusione et obscuritate cognoscit et considerat. Quod SS. Patres pulchre ac subtiliter exponunt. *Mens divina*, ait Dionysius Areop., *comprehendit omnia cognitione quadam eminenti, qua secundum ipsammet omnium causam in se omnium cognitionem anticipat, prius quam Angeli ferebant cogno-*

¹⁾ *De civit. D. l. 5. c. 9. n. 1. 3.* Opp. T. 7. c. 121. 123. Cf. *Quaest. l. 2. q. 2. T. 6. c. 112 s.*

²⁾ *Comment. in Epist. ad Ephes. 1, 4.* Opp. T. 7. c. 548. C. Cf. *Cont. Ruffin. l. 1. n. 22. T. 2. c. 477. In Is. 40, 27—28. T. 4. c. 494.* — *Gregor. M. Moral. l. 1. c. 20. n. 36.* Opp. T. 1. c. 53, l. 20. c. 32. n. 63. c. 667, l. 25, c. 6. n. 11. c. 791 s.

cens Angelos, eosque creans, caeteraque omnia intus et ab ipso, ut ita dicam, exordio noscens, et in rerum naturam proferens. — Non enim ex rebus ipsis res discens, novit eas divina mens, sed ex seipsa et in seipsa, secundum causam omnium scientiam et notionem et essentiam praehabet, et ante comprehendit, non singulis secundum cuiusque speciem intendens, sed secundum unicam causae complexionem cuncta sciens et continens ¹⁾. — Tertullianus: *Nam et divinitati competit, quaecunque decreverit, ut perfecta reputare; quia non sit apud illam differentia temporis, apud quam uniformem statum temporum dirigit aeternitas ipsa, et divinationipropheticae magis familiare est id, quod prospiciat, dum prospicit, jam visum, atque ita jam expunctum, id est, omnimodo futurum demonstrare* ²⁾. — Hilarius: *Quid ergo est, praeparanti Deo coelum genitam ab eo adesse Sapientiam; cum neque creatio coeli ex praeparatione consistat, neque naturae Dei sit, in apparatu eum cogitandi operis commorari? Nihil enim non semper cum Deo fuit, quidquid in rebus est: quae etsi ad creationem sui coepta sunt, non sunt tamen ad Dei vel praescientiam vel potestatem inchoata. Et testis est nobis Propheta dicens: „Deus qui fecisti omnia, quae futura sunt.“ Quae enim futura sunt, licet in eo, quod creanda sunt, adhuc fient, Deo tamen, cui in rebus creandis nihil novum ac recens est, jam facta sunt: dum et temporum dispensatio est, ut creentur, et jam in divinae virtutis et praescientiae efficientia sint creata. Et ideo nunc Sapientia natam se ante saecula docens, anteriorem se non solum his, quae creata sunt, docet, sed aeternis coaeternam, praeparationi scilicet coeli et discretionis sedis Dei. — Perpetua enim et aeterna rerum creandarum est praeparatio: neque partibus cogitationum universitatis hujus corpus effectum est* ³⁾. — Ambrosius: *Deo enim, quae futura, praesentia sunt: et ei, cui praecognita sunt omnia, ventura pro factis sunt, sicut scriptum est: „Qui fecit, quae ventura sunt“* ⁴⁾. —

¹⁾ *De div. nom. c. 7. §. 2. Opp. T. 1. p. 749. Cf. Maxim. M. Schol. ad Dionys. c. 5. de div. nom. §. 6. Ib. p. 700.*

²⁾ *Adv. Marcion. l. 3. c. 5. Opp. V. 2. p. 213.*

³⁾ *De Trinit. l. 12. n. 39. 40. Opp. T. 2. c. 431 s.*

⁴⁾ *De Ad. l. 1. c. 15. n. 97. Opp. T. 2. c. 463. Cf. l. 2. c. 12. n. 132. c. 659. In Ps. 35. n. 11. T. 1. c. 770.*

Augustinus: *Quis ergo hominum potest istam sapientiam, qua novit Deus omnia, ita ut nec ea, quae dicuntur praeterita, ibi praetereant, nec ea, quae dicuntur futura, quasi desint, expectentur, ut veniant, sed et praeterita, et futura cum praesentibus sint cuncta praesentia; nec singula cogitentur, et ab aliis ad alia cogitando transeatur, sed in uno conspectu simul praesto sint universa: quis, inquam, hominum comprehendit istam sapientiam, eandemque prudentiam; quando quidem a nobis nec nostra comprehenditur ¹⁾?* — Alibi: *Qui non est praescius omnium futurorum, non est utique Deus ²⁾*. Et iterum: *In qua (Sapientia divina) sunt immensi quidam atque infiniti thesauri rerum intelligibilium, in quibus sunt omnes invisibiles atque incommutabiles rationes rerum, etiam visibilium et mutabilium, quae per ipsam factae sunt. Quoniam Deus non aliquid nesciens fecit, quod nec de quolibet homine artifice recte dici potest: porro si sciens fecit omnia, ea ulique fecit, quae noverat. Ex quo occurrit animo quiddam mirum, sed tamen verum, quod iste mundus nobis notus esse non posset, nisi esset; Deo aulem, nisi notus non esset, esse non posset ³⁾*. — Mar. Victorinus: *Et quidquid tempora volunt, praesens semper habet ⁴⁾*. — Atque Petrus Damianus: *Est plane sicut coaeternum omnia posse, sic et omnia nosse idemque semper existere. In illo itaque summo rerum cardine naturarum omnium jura dispensans, sic omnia tempora, praeterita videlicet, praesentia, et futura intra suae provisionis arcana complectitur, ut nec novum aliquid sibi penitus accedat, nec aliquid ab eo per cursus momenta recedat; sed nec diversis obtutibus diversa considerat, ut cum intendit praeteritis, vacet a praesentibus, vel futuris, vel rursus cum*

¹⁾ De Trinit. l. 15. c. 7. n. 13. Opp. T. 8. c. 975. Cf. c. 13—14. c. 983 s.

²⁾ De civ. D. l. 5. c. 9. n. 4. T. 7. c. 124. D.

³⁾ De civ. D. l. 11. c. 10. n. 3. T. 7. c. 281. Cf. De gen. ad lit. l. 8. c. 15. n. 33. T. 3. c. 192. Quaest. 83. q. 46. n. 2. T. 6. c. 17 s. De div. quaest. ad Simplic. l. 2. q. 2. n. 1 s. T. 6. c. 112 s. Conf. l. 13. c. 16. n. 19. T. 1. c. 231. De praedest. et grat. c. 5. T. 10. append. c. 52.

⁴⁾ Cosmop. l. 1. init. Cf. Petav. De D. Deique propr. l. 4. c. 4. n. 4. De dogm. theol. Antv. 1700. T. 1. p. 175. c. 2.

praesentia, sive futura considerat, oculos a praeteritis avertat; sed uno dumtaxat, ac simplici praesentissimae Majestatis intuitu, simul omnia comprehendit ¹⁾. — Et revera, quum divina substantia pro sua aeternitate tota simul sit, et esse debeat, neque per partes priores et posteriores diffundatur: etiam illud, quod in ea, et per eam cognoscitur, sine ulla successione capiatur necesse est. Etenim cognitio iidem se habet, ut natura ipsa vel substantia cognoscentis. Ea si actionem habet multiplicem, eamque certo spatio dimensam, et a se distinctam, cognitae res sub illa, qua continentur, differentia temporis intelligit. Sin divisionis ac compositionis est expers, atque in perfecta et individua monade consistit, totumque illud est, quod habet in se, cujusmodi Deum esse demonstravimus: nihil ab ea, nisi qua praesens est, atque omni caret differentia, percipitur.

b. Porro novit Deus omnia, quaecunque dari aut fieri possunt, licet nunquam sint futura, seu novit omnes creaturas possibles. Id

α. Apostolus diserte docet, ubi ait: *Qui (Deus) vivificat mortuos, et vocat ea, quae non sunt, tamquam ea, quae sunt*, i. e. ea, quae non sunt, et in statu merae possibilitatis versantur, pariter ac ea, quae adsunt, oriri jubere potest, et ideo cognoscat quoque necesse est ²⁾.

β. Idem autem quoque necessario ipsa ratio statuit. Nam cum Deus secundum sapientissimam suam cognitionem mundum fabricaverit; atque quum proin scientiam perfectam omnium partium ac elementorum istius universi sibi in creatione praelucentem, et ideo hac natura priorem haberet: hasce res non propterea, quoniam futurae, sed tantum, quoniam possibles in se erant, cognovit; et hinc etiam omnes alias res, quae sunt possibles, eadem

¹⁾ *Opusc. 36. De div. omnip. c. 7.* Ven. 1743, Opp. T. 3. p. 313. c. 1. C. Cf. Didochus, ap. J. Damasc. *Sacr. parall. L. α. tit. 47.* Opp. . 2. p. 751. — Gregor. Nysa. *Cont. Eunom. l. 1.* Opp. Par. 1638. T. 2. p. 363. A. — Theodoret. *In Gen. q. 37.* Opp. T. 1. p. 32. D. — Minuc. Fel. *Oct. c. 32.* In Galland. *Bibl. PP. T. 2.* p. 400. c. 1. — Lactant. *Div. instit. l. 6. c. 24.* Opp. T. 1. p. 504. — Fulgent. *De verit. praedest. et grat. l. 3. c. 5. n. 7.* Opp. p. 484. *De fid. ad Petr. c. 34. n. 75.* p. 529. — Gregor. M. *Mor. l. 20. c. 232. n. 63.* Opp. T. 1. c. 667. l. 9. c. 47. n. 72. c. 321.

²⁾ Rom. 4, 17.

stante ratione, nosse dicendus est. — Insuper id ipsum jam ex infinita Dei perfectione colligitur, utpote quae cum scientia, quocunque demum modo limitata, componi haud potest.

c. Praeter duas illas in Deo scientias, quarum altera res solas futuras, altera res nunquam futuras propositas habet, mediam quandam plerique Theologi constituunt, videlicet scientiam rerum contingentium, quae, ponenda certa conditione, sunt futurae, aut saltem, si illa conditio poneretur, essent aliquando futurae, tametsi neque conditio ipsa, neque, quod ex ea est consequens, ullo modo futurum sit. Propugnant autem Theologi hi scientiam conditionate futurorum praecipue ideo, quoniam putant, per eandem nonnisi phaenomena gratiae explicari, atque libertatem arbitrii cum decretis divinis conciliari posse; statuendo nempe, Deum praeter alia infinitae suae sapientiae consilia etiam secundum praeviam cooperationem, licet non propter eandem, gratias suas efficaces concedere, ita ut scientia media, decretorum divinorum non sit quidem causa impulsiva et determinativa, attamen directiva.

Scientiae mediae systema primus Ludov. Molina in libro *De concordia liberi arbitrii cum gratia* clare ac nitide evolvit. Notum est, quam maxime exarserit zelus et studium Thomistarum adversus librum Molinae, et quam acris disputatio inter Dominicanos et Jesuitas orta sit. Cujus quidem quaestionis causa habitae sunt celebres congregationes illae de auxiliis divinis sub P. Clemente VIII. et deinde Paulo V., qui tamen litigantes partes dimisit, ac intra religiosae modestiae fines se continere iussit, nullo a S. Sede lato in eam rem definitivo iudicio. — Veruntamen si rem sine partium studio consideramus: non potest quidem negari, denominationem illam scientiae mediae novam esse, a recentioribus demum Theologis excogitatam; ast res ipsa tum in SS. Litteris, tum a SS. Patribus clare docetur, ratione pariter omnino assentiente.

α) Ex SS. Litteris huc pertinet proditio Ceilitarum, Davidi certo a Domino annuntiata, qua illi profugum Davidem tradidissent, si, ipso Ceilae remanente, Saulus illuc descendisset¹⁾; porro Tyrionum et Sidoniorum poenitentia, futura a Christo Domino pronunciata, si apud eos eadem, quae in Galilaea portenta fecisset²⁾; deinde locus ille, in libro Sapientiae, ubi de ju-

¹⁾ 1. Reg. 23, 12.

²⁾ Math. 11, 21. Cf. Ezech. 3, 6.

sto, immatura morte sublato, dicitur: *Raptus est, ne malitia mutaret intellectum ejus, aut ne fictio deciperet animam illius* ¹⁾; nec non verba Jeremiae ad Sedeciam: *Haec dicit Dominus exercituum, Deus Israël: Si profectus exieris ad principes regis Babylonis, vivet anima tua, et civitas haec non succendetur igni: et salvus eris tu, et domus tua. Si autem non exieris ad principes regis Babylonis, tradetur civitas haec in manus Chaldaeorum, et succendent eam igni: et tu non effugies de manu eorum* ²⁾. Et ita alibi passim. Quae omnia certam minimeque dubiam, aut incerto veluti eventu suspensam exprimunt notitiam rerum laud futurarum, sed quae revera factae essent, si id, unde pendebant, reipsa evenisset. Quod si quis negare vellet, veracitatem Dei neget necesse est. In ultimo loco insuper sermo est de scientia divina rerum earum, quae, conditione videlicet sua reapse ponenda, revera consecuturae erant. Quam tamen cognitionem in Deo ne unus quidem Theologorum adversariorum negavit, solummodo illam, quae ad res nunquam reapse futuras refertur, omnibus impugnantibus.

β. Patres autem scientiam conditionate futurorum in Deo eo docent, quod tradunt: Deum secundum Siracidem progressum vitae infantis ad perfectionem prohibere, ne quod vi praescia malum animadversum est in eo, qui ita victurus fuisset, perficiatur, ut Gregorius Nys. ³⁾ et Cyrillus Alex. ⁴⁾; porro primum hominem a principio e paradiso expulsus esse, quia ex honore sibi praestito deterior effectus esset, si post spretum violatumque mandatum immotus ille, stabilisque durasset, ut Chrysostomus ⁵⁾; Tyrios et Sidonios ex testimonio ipsius Domini acturos fuisse magnae humilitatis poenitentiam, si in eis facta essent illa signa virtutum, ut Augustinus ⁶⁾; atque bonos malis aliquando vexari, quia mira potentia praevidet Deus, quod si quieti ac liberi in tranquillitate persisterent, tentationes ferre adversarii non valentes, mentis prostrati vulneribus jacerent, ut Grego-

¹⁾ Sap. 4, 11.

²⁾ Jer. 38, 17—18. Cf. 3. Reg. 11, 2. Exod. 34, 16.

³⁾ *Or. de infant. praem. mort. subl.* Opp. T. 2. p. 764. 766.

⁴⁾ *Cont. Julian. l. 3.* Opp. T. 6. P. 2. p. 95. B. Cf. Augustin. *Cont. Julian. op. imperf. l. 1. c. 119.* Opp. T. 10. c. 942.

⁵⁾ *Ad Stagir. n. 3.* Opp. T. 1. p. 160. B.

⁶⁾ *De don. persever. c. 9. n. 23.* Opp. T. 10. c. 832. E. Cf. *De praedest. Sanct. c. 9. n. 17—18.* T. 10. c. 802 s. c. 14. n. 35. c. 839.

rius M. ¹⁾. — Quando vero SS. Patres negant in Deo scientiam rerum, quae revera futurae non sunt: aut tantum loquuntur de scientia certo futuri, et dicunt, Deum ea qua revera futura haud videre; aut vero ajunt, Deum non praescire conditionate futura ad sensum et mentem Semipelagianorum, qui contendebant, Deum propter praevisa bona vel mala, quae facturi fuissent, videlicet tanquam bona vel mala merita ²⁾, infantes alios Baptismo lustratos, alios sine Baptismo e vita tollere.

7. Ratio vero hisce SS. Litterarum et SS. Patrum effatis eo facilius adstipulatur, quum ex una parte res conditionate futuras liberas, utpote quas etiam homines nonnunquam, licet non certo, tamen cum majori minorive probabilitate praesagiant, in se cognoscibiles esse perspiciat, ex altera autem parte simul omnem limitem a scientia divina removendum esse sciat.

Est itaque Deus omniscius, ejusque scientia absolute, seu, ut ajunt, intensive et extensive infinita est.

Observ. 1. Quamvis scientia Dei unica sit atque simplicissima, utpote quae ab ejus simplicissima natura non distinguitur: pro varietate tamen objectorum seu rerum, ad quas refertur, multiplex in schola solet assignari scientiae divinae divisio. Dividitur nempe

a. in scientiam necessariam, et liberam seu contingentem. Scientia necessaria est ea, quae habet pro objecto Deum ipsum, et res mere possibiles, quae itaque absolute non potest non esse in Deo inde ab aeterno. Scientia vero libera seu contingens dicitur illa, quae spectat res contingentes, sive existentes, sive aliquando futuras, atque voluntatis divinae decretum prius exigit, quod absolute loquendo posset etiam in Deo non dari.

b. Dispescitur in scientiam approbationis ³⁾ et reprobationis ⁴⁾. Priori Deus bona intelligit, quae approbat et imperat; posteriori vero peccata, quae prohibet et improbat.

¹⁾ Mor. l. 33. c. 19. n. 35. Opp. T. 1. c. 1098. Cf. Origen. *De princ.* l. 3. c. 1. n. 17. Opp. T. 1. p. 126 ss. — Nemes. *De nat. hom.* c. 44. In Galland. *Bibl. PP.* T. 7. p. 424. C. — Cons. Petav. *De D. Deiq. propr.* l. 4. c. 8. *De theol. dogm.* Antv. 1700. T. 1. p. 185 ss. — Tourniel. *Curs. theol.* Col. Agripp. 1752. T. 1. p. 144.

²⁾ Cf. Augustin. *De anim. et ej. orig.* c. 12. Opp. T. 10. c. 807. — Fulgent. *De verit. praedest. et grat.* l. 1. c. 7. n. 15 ss. Opp. p. 441 ss. — Prosper. *Ep. ad August.* Inter Epp. Augustin. 225. n. 5. Opp. huj. T. 2. c. 823.

³⁾ Ps. 1, 6.

⁴⁾ Hab. 1, 13. Matth. 25, 12.

c. Discernitur in scientiam simplicis intelligentiae, scientiam visionis, et scientiam mediam. Scientia simplicis intelligentiae est ea, quae versatur in rebus possibilibus, semota omni futura earum existentia, nec non in iis, quae data conditione necessario existere seu evenire debent; scientia visionis, quae versatur in rebus existentibus, praesentibus, praeteritis sive aliquando futuris; scientia vero media, quae, medium veluti locum inter utramque scientiam praecedentem occupans, spectat ad actiones hominum liberas conditionate futuras, i. e. quae futurae sunt, conditione posita, aut saltem futurae fuissent, si conditio posita esset. Scientiae simplicis intelligentiae est ordinare res ac disponere, et voluntatem divinam ac efficientiam quodammodo dirigere, eique quasi praelucere, unde et rerum causa efficiens habetur, saltem remota et exemplaris, atque a sapientia divina haud differt ¹⁾; scientiae visionis vero res easdem voluntate divina jam designatas et constitutas, in aliqua temporis parte producendas, quasi existentes ac praesentes intueri propter vim aeternitatis, quae omne discrimen praeteriti ac futuri excludit; atque scientiae mediae decreta divina de gratia efficaci saltem ex parte dirigere.

Observ. 2. Perdifficilis semper visa est quaestio de consensu divinae praescientiae cum libero voluntatis nostrae motu, ac multum humana perturbavit ingenia non solum imperitorum, sed et doctissimorum, ita ut vela Deo praescientiam, quod Tullio accidit, prout supra jam adnotavimus, vel ab homine libertatem auferrent. Etenim si Deus futura certo scit, antequam fiant: ea necessario fieri debere videntur; atque hinc libertati arbitrii non relinquitur locus. Si vero, quae Deus futura praevidet, non sunt necessaria, atque etiam non esse, fieri vel possunt: iterum scientia Dei falsa videtur esse posse; quod non minus impium est dictu, quam omnino nullum esse Deum. — Attamen si res adcuratius perpenditur, adparet, praescientiam Dei, praecise ut est rerum nuda cognitio, non magis tollere rei futurae libertatem, quam cognitio rei praesentis, vel memoria praeteritae. Nam res praevisae non propterea futurae sunt, quia praesciuntur, sed potius propterea praevidentur, quia futurae sunt; rerum enim, quae in libertate positae sunt, non causa est praescientia divina, sed istae potius hujus causa sunt. Atque ideo non fiunt necessario, quae libere nos agimus, etsi illa Deus necessario praevidit, quia praevidendo voluntates nostras praescivit, ipsas ea sponte esse futuras. Sicut et nos cum libere aliquid facimus, id necessario mente

¹⁾ Cf. Ps. 103, 24. 135, 5. Prov. 8, 22 ss. Sap. 7, 21. 14, 2 ss. Jer. 10, 12.

intelligentiaque cognoscimus, attamen ideo non necessario facimus. Quare cum dico: si Deus praescit aliquid, necesse est illud futurum idem est, ac si dicam: id certo erit, et si erit, non potest non futurum esse, quia nihil potest simul esse, et non esse, et hoc sensu necessario, i. e. necessitate externa, seu revera futurum est; nequaquam autem, illud necessario, i. e. necessitate interna, futurum esse. Est itaque necessitas illa, qua a Deo praevisa fieri debent, quam externam appellavimus, nonnisi necessitas sic dicta consequens et hypothetica, quae hominem haud cogit, sed a libero ejus decreto pendet, haudquaquam autem necessitas absoluta. Et hinc praescientia Dei minime libertati nostrae obest, neque libertas nostra praescientiam divinam tollit. Quod Deus praescit, me libero facturum esse, illud certo libere, non autem necessario facturum sum; et recte propterea, quoniam id certo facturum sum, illud Deus infallibiliter praescit. — Eodem prorsus modo SS. Patres quaestionem illam solvunt. Sic ait Origenes: *Deus, quod nulla res causam non habeat aliquam, dum sub ipsum orbis moliendi principium futura singillatim omnia mente percurrit, videt illico, si factum hoc erit, illud praeinde seculurum, quod ubi exstiterit, tertium ex eo quiddam aptum fore; hoc iterum si positum erit, et consequens illud futurum: itaque ad rerum finem omnium cognitione perducta, quicquid futurum est, intelligit: nec tamen cujuslibet omnino rei, cur hoc illove modo eveniat, causa dicendus est. — Atque, ut libere, quod res est, eloquamur, non Dei modo praenotionem rerum causam esse, (nec enim quem peccaturum Deus esse praevидit, eum, dum re ipsa peccat, ad facinus quasi manu deducit): sed etiam, quod a communi sensu remotius quidem, sed verum tamen est, id ipsum quod futurum sit, ejusmodi praenotionis causam esse. Neque enim idcirco fit, quod futurum esse cognoscatur, sed quod futurum sit, idcirco futurum esse cognoscitur. — Si, quod omnino futurum dicitur, id ita quis accipiat, perinde ac si, quod praevisum est, evenire necesse sit: hoc vero minime damus. Nec enim, quod praevisa Judae proditia fuerit, Judam propterea necessario proditorem fuisse concedimus ¹⁾. — Boëthius: *Duae sunt necessitates: simplex una, veluti quod necesse est, omnes homines esse mortales; altera conditionis, ut si aliquem ambulare scias, eum ambulare necesse**

¹⁾ Ap. Euseb. *Praep. Evang.* l. 6. c. ult. p. 287 s. Cf. Origen. *Comm. in Gen.* n. 3. 7. *Opp.* T. 2. p. 6. 11 s. D. E. *De orat.* n. 4. T. 1. p. 207 s. *In Ep. ad Rom.* n. 8, T. 4. p. 461. B. l. 7. n. 8. p. 605 s.

est. Quod enim quisque novit, id esse aliter, ac notum est, nequit. Sed haec conditio minime secum illam simplicem trahit. Hanc enim necessitatem non propria facit natura, sed conditionis adjectio. Nulla enim necessitas cogit incedere volutarie gradientem, quamvis eum tamen, cum graditur, incedere necessarium sit. — Eodem igitur modo, si quid providentia praesens videt, id esse necesse est, tametsi nullam habeat naturae necessitatem. Atqui Deus ea futura, quae ex arbitrii libertate proveniunt, praesentia contuetur. Haec igitur ad intuitum relata divinum, necessaria fiunt per conditionem divinae naturae: per se vero considerata, ab absoluta naturae suae libertate non desinunt¹⁾. — Nam sicut scientia praesentium nihil his, quae fiunt, ita praescientia futurorum nihil his, quae ventura sunt, necessitatis importat²⁾. Et iterum: Novit enim futura Deus, non ut ex necessitate evenientia, sed ut contingenter: ita ut etiam aliud posse fieri, non ignoret: quod tamen fiat, ex ipsorum hominum et actuum ratione perciscit³⁾. — Joannes Damascenus: Praescit itaque Deus ea, quae sponte ac libere acturi sumus: — verum ut, quae facturi sumus, praesciat, hoc a nobis proficiscitur. Nisi enim facturi essemus, ne ipse quidem, quod futurum non esset, praecognosceret. Porro Dei praescientia certa et inviolabilis est: sed ipsa non est causa, cur omnino fiat id, quod futurum est: quin potius, quia hoc vel id acturi sumus, idcirco praenoscit. Multa autem praenoscit, quae ipsi minime grata sunt, quorum propterea minime auctor est. Sicut nec medicus idcirco morbi causa est, quia futurum praenovit, ut quis in morbum incadat: sed aegrolatio quidem ab alia causa proficiscitur, quae morbum parit; medici vero praescientia ex ipsius arte oritur: ita pariter id quoque, quod a nobis futurum est, Deum causam non habet, sed liberam nostram voluntatem⁴⁾. — Augustinus: Non est consequens, ut, si Deo certus esset omnium ordo causarum, ideo nihil sit in voluntatis nostrae arbitrio. Et ipsae quidem nostrae voluntates in causarum

¹⁾ De consol. phil. l. 5. pros. 6. p. 122.

²⁾ Ib. pros. 4. p. 112 s.

³⁾ Comm. ad Aristot. de interpr. V. Petav. l. c. l. 4. c. 8. T. 1. p. 181. c. 2.

⁴⁾ Dial. cont. Manich. n. 79. Opp. T. 1. p. 202.

*ordine sunt, qui certus est Deo, ejusque praescientia continetur; quoniam et humanae voluntates humanorum operum causae sunt. Atque ita omnes, qui omnes rerum causas praescivit, profecto in eis causis etiam nostras voluntates ignorare non potuit, quas operum nostrorum causas esse praescivit*¹⁾. — Atque: *Non continuo tu peccare cogeres, quem peccatum esse praescires; neque ipsa praescientia tua peccare eum cogeret, quameis sine dubio peccaturus esset: non enim aliter id futurum esse praescires. Sicut itaque non sibi adversantur haec duo, ut praescientia tua noveris, quod alius sua voluntate facturus est: ita Deus neminem ad peccatum cogens, praevidet tamen eos, qui propria voluntate peccabunt.* — Et rursus: *Sicut tu memoria tua non cogis facta esse, quae praeterierunt: sic Deus praescientia sua non cogit facienda, quae futura sunt*²⁾. Praeter reliquos³⁾. — Caeterum licet etiam angusta et tenuis mens nostra, hujus argumenti pondere oppressa, succumberet, nec satis liquide ab eo se posset expedire: non idcirco tamen neganda foret aut Dei praescientia futuri certissima, aut hominis expedita libertas, quando quidem utramque clare ac disserte adstruat revelatio, nec non ipsa ratio.

Observ. 3. Se ipsum Deus sine ullo medio in se et per se ipsum absolute novit, neque per aliquid aliud cognoscere potest. Res possibiles cognoscit in infinita sua sapientia, qua scilicet perfectissime perspiciit, quid neque sibi ipsi, neque infinitae ipsius perfectioni, neque aliis rebus, ad quas refertur, repugnat. Res vero existentes, et quidem necessarias cognoscit Deus in suis sapientissimis decretis, utpote quae earundem ultima ac propria causa effectrix sunt; res liberas autem cernit remote quidem in indole naturarum intelligentium, ad res omnes, quibuscum illae conjunguntur, relata, proxime vero pari-

¹⁾ *De civ. D. l. 5. c. 9. n. 3. Opp. T. 7. c. 123.*

²⁾ *De lib. arb. l. 3. c. 4. n. 10. 11. T. 1. c. 614. Cf. De civ. D. l. 5. c. 10. n. 2. T. 7. c. 125. Tract. 53. in Joan. n. 4. T. 3. P. 2. c. 615.*

³⁾ Cf. Chrysost. *Hom. 59 (60). in Matth. n. 1. Opp. T. 7. p. 594. B. C. Hom. 77. n. 3. p. 745. A. Hom. 1. de proph. obscur. n. 4. T. 6. p. 175. C. — Theodoret. In Ep. ad Rom. 8, 30. Opp. T. 3. p. 69. B. — Hieronym. In Is. 17, 13. Opp. T. 4. c. 192. In Ezech. 2, 5. T. 5. c. 25. In Jer. 26, 1—3. T. 4. c. 1025. D. — Gaudent. Brix. Tr. 3. de pasch. observ. In Bibl. max. PP. Lugdun. T. 5. p. 918. c. 2. F. — Anselm. De concord. praesc. et libert. Opp. 123 ss.*

ter in suis decretis, quibus secundum suam infinitam sapientiam bonum per naturas seu entia libera, vel cum illis efficere, atque malum permittere vult ¹⁾. Quo sensu quoque res futurae Deo praesentes sunt, videlicet non quidem τῷ ἔργῳ, seu re, sed τῇ δυνάμει καὶ τῇ γρομῇ, seu potentia et consilio ²⁾.

Observ. 4. Quando in SS. Litteris Deus tentare Abrahamum dicitur, ut fidelitatem exploret ³⁾, vel descensurus, ut videat clamorem et scelera Sodomitarum ⁴⁾: modo humano haec dicta sunt, quum nos perfecte scire dicimur, quae experimento comprobata, ac oculis nostris veluti subjecta habemus; et nonnisi indicant, Deum Abrahamo occasionem merendi subministrare, illiusque obedientiae sublimitatem ac praestantiam publice manifestam reddere voluisse, atque ipsum in discernendis poenis nihil temere et praecipitanter moliri. — Hieronymus autem verbis illis: *Absurdum est ad hoc Dei deducere maiestatem, ut sciat per momenta singula, quot nascantur culices, quotve moriantur, quae cimicum et pulicum et muscarum sit in terra multitudo, quanti pisces in aqua natent, et qui de minoribus majorum praedae cedere debeant* ⁵⁾, solummodo, ut ex contextu antecedentium et subsequentium adparet, dicere vult, Deum erga res illas non habere illam specialem providentiam, quam erga creaturas ratione praeditas, vel anxietatem humanam in Deo haud obtinere ⁶⁾.

Observ. 5. Cum Deus omniscius sit: discamus inde

a. omne peccatum, etiam occultissimum, evitare, cum non possit in loco tam abscondito perpetrari, ut effugiat Deum omniscium; atque, ut tentationi resistamus, nunquam hujus veritatis esse immemo-

¹⁾ Cf. Maxim. Schol. ad c. 5. Dionys. de div. nom. §. 6. Opp. Dionys. T. 1. p. 709. — Augustin. De civ. D. l. 11. c. 7. Opp. T. 7. c. 277. De Trinit. l. 6. c. 10. T. 8. c. 850. De Gen. ad litt. l. 5. c. 15. n. 33. T. 3. c. 192. — Anselm. Monol. c. 9. 10. 34. Opp. p. 7 s. 17.

²⁾ Cf. Cyrill. Alex. Thes. Assert. 5. Opp. T. 5. P. 1. p. 41. A. — Hilari. De Trinit. l. 12. n. 40. Opp. T. 2. c. 431 s. — Augustin. Ad Oros. c. 8. n. 9. Opp. T. 8. c. 615 s. — Tr. in Joan. n. 4. T. 3. P. 2. c. 305. F. — De serm. Dom. in mont. sec. Matth. l. 2. c. 3. n. 12. c. 205. — Prosper. Sent. 145. Aeterna est et incommutabilis voluntas ejus, nec consilio alternante variatur: in qua simul est, quidquid in rebus creandis, vel ordinandis aut praecessit, aut sequitur. Opp. c. 563. — Anselm. Monol. c. 9.—11. Opp. p. 7. c. 1 ss.

³⁾ Gen. 22, 1 ss.

⁴⁾ Gen. 18, 21.

⁵⁾ Comm. in Hab. 1, 13—14. Opp. T. 6. c. 604.

⁶⁾ Cf. Comm. in Matth. 10, 29—30. T. 7. c. 63 s.

res, ut monet Ephraemus Syr., quum ait: *Quod si ab adversario in re aliqua subdole supplantari nolis: crede, nihil te agere, vel cogitare, quod lateat Deum* ¹⁾. — Nam continua Dei recordatione ut alibi scribit, *turpes animae passiones recedunt, instar malefactorum, praetore accedente* ²⁾.

b. Caveamus ab hypocrysi, quae malitiam cordis occultam externa honestatis specie obvelat; Deus enim omniscius occultissimos cordis recessus intuetur.

c. Porro quando calumniis impetimur, aut injuste opprimimur, aut etiam sollicitationibus ad malum perturbamur: consolemur nos, Deo notam esse rectitudinem cordis nostri, notamque luctam nostram ei, *qui non patietur nos tentari supra id, quod possumus, sed faciet etiam cum tentatione proventum, ut possimus sustinere* ³⁾, nostros gemitus ac nostras preces exaudiet, atque nostram integritatem, si non in hoc, certe in futuro saeculo, ostensurus est.

§. 17. 6. b. Sapientissimus.

Deum sapientissimum esse, tam parum addubitari potest, quam eum esse omniscium. Prout autem omniscientia in Deo intellectui, ita rationi in homine sapientia Dei infinita respondet. Rationis vero est, verum apprehendere, efficientiae nostrae fines honestos praefigere, bonaque ac apta media ad illos consequendos indicare, nec non, quid quoad formam externam rebus congruum ac conveniens sit, definire. Ratio itaque seu sapientia in cognoscendo eo, quod rebus quoad existentiam seu naturam, speciem seu formam, atque dignitatem moralem conveniat cernitur. Diciturque sapientia haec sapientia theoretica. A qua differt sapientia practica, quae ad voluntatem refertur, atque in electione bonorum finium, et bonorum ac aptorum mediorum ad illos consequendos, seu paucis, in congruenti cum sapientia theoretica agendi ratione consistit, et a prudentia eo distinguitur, quod haec apta media ad fines, sive bonos sive malos, adhibeat. In SS. Litteris de sapientia hac utroque sensu accepta quam saepissime sermo occurrit ⁴⁾. Nos hic loci, quum sapientia practica a virtute ac sanctitate haud differat, nonnisi sapien-

¹⁾ De vit. spir. n. 34. Opp. Rom. 1732. T. 1. p. 266. F.

²⁾ De virt. c. 10. T. 1. p. 228.

³⁾ 1. Cor. 10, 13.

⁴⁾ Cf. Exod. 28, 3. Ps. 36, 30, 48, 4. 50, 8, 89, 12, 106, 43, 146, 5. Eccl. 4, 10. Sap. 7, 7 ss. Rom. 1, 21, 22. 1. Cor. 1, 19 ss. 3, 10, 19. etc.

tiae theoreticae, quae ad intelligentiam videlicet spectat, rationem habemus, quam in summo gradu pro infinita Dei perfectione in eum transferimus.

Unde sapientia divina ea est perfectio, qua Deus perfectissime cognoscit, quod sibi naturisque seu entibus finitis, tam ratione carentibus, quam ea instructis, congruum atque conveniens sit. Pro sapientia sua itaque Deus novit perfectissime:

a. quoad se ipsum, suamque externam efficientiam:

α. quatenam dari fierive a se possint, seu quae entia sint possible;

β. porro quinam sint fines optimi, quaeque ad illos consequendos optima atque aptissima media, seu quatenam sit optima rerum dispositio; atque

b. quoad entia extra se ipsum:

α. quid entia non libera efficere debeant, quinam sint causarum effectus, ac vice versa; atque

β. quid entia rationalia praestare oporteat, seu quatenam illis constituenda sit lex moralis.

Sapientia Dei infinita

A. in SS. Litteris vario modo, populari quidem, at una sublimi adstruitur. Et quidem:

a. Deus diserte infinite ac necessario sapiens esse traditur. *Soli*, i. e. vere ac per se, *sapienti*, ait Paulus, *Deo per Jesum Christum, cui honor, et gloria in saecula saeculorum. Amen* ¹⁾. Psalmista: *Magnus Dominus noster, et magna virtus ejus: et sapientiae ejus non est numerus* ²⁾. Jobus: *Apud ipsum est sapientia, et fortitudo, ipse habet consilium, et intelligentiam* ³⁾. Et Daniel: *Sit nomen Domini benedictum a saeculo, et usque in saeculum: quia sapientia, et fortitudo ejus sunt. Et ipse mutat tempora, et aetates: transfert regna, atque constituit: dat sapientiam sapientibus, et scientiam intelligentibus disciplinam: ipse revelat profunda, et abscondita, et novit in tenebris constituta: et lux cum eo est* ⁴⁾.

¹⁾ Rom. 16, 27. Cf. 1. Tim. 1, 17. Jud. 25. in textu graeco; ast lectio non videtur esse genuina.

²⁾ Ps. 146, 5. Cf. Job. 15, 8. Is. 40, 28.

³⁾ Job. 12, 13. Cf. Apoc. 7, 12.

⁴⁾ Dan. 2, 20—22. Cf. Is. 40, 13 s.

b. Docetur, Deum omnia sapientissime constituisse, atque praeclara hujus sapientiae documenta in operibus divinis conspicua adferuntur. Sic Psalmista, cum varia opera divina atque ordinem in iis adspectabilem descripsisset, exclamat: *Quam magnificata sunt opera tua, Domine. Omnia in sapientia fecisti* ¹⁾. Et Sapiens: *Attingit (sapientia divina) a fine usque ad finem fortiter, et disponit omnia suaviter* (ωφέλιμος) ²⁾. Unde et Moyses, exposita historia creationis, Deum, opera quasi lustrantem, sic loquentem inducit: *Viditque Deus cuncta, quae fecerat, et erant valde bona*, i. e. finibus suis convenientissime disposita ³⁾. Praecipue autem in Proverbiis laus divinae sapientiae praedicatur, ubi inter alia legitur: *Dominus sapientia fundavit terram, stabilivit coelos prudentia. Sapientia illius eruperunt abyssi, et nubes rore concrescunt* ⁴⁾. Sensus est: universa sapienter constituta sunt. Eandem sententiam pluribus inferius prosequitur et exornat sacer Scriptor, ubi sapientiam fingit ceu personam, quae comes et adiutrix fuerit Deo in condendo mundo, scribens: *Dominus possedit me in initio viarum suarum, antequam quidquam faceret a principio. Ab aeterno ordinata sum, et ex antiquis antequam terra fieret. Nondum erant abyssi, et ego jam concepta eram: necdum fontes aquarum eruperant: necdum montes gravi mole constiterant: ante colles ego parturiebar: adhuc terram non fecerat, et flumina, et cardines orbis terrae. Quando praeparabat coelos, aderam: quando certa lege, et gyro vallabat abyssos: quando aethera firmabat sursum et librabat fontes aquarum: quando circumdabat mari terminum suum, et legem ponebat aquis, ne transirent fines suos: quando appendebat fundamenta terrae, cum eo eram cuncta componens: et delectabar per singulos dies, ludens coram eo omni tempore* ⁵⁾. — In N. T. inprimis Dei sapientia, quatenus in revelatione Christiana, tanquam religione vera, nec non in ejus propagandi modo se manifestam reddit, celebratur. Nos autem, inquit Paulus, praedicamus Christum crucifixum: Judaeis quidem scandalum, Gentibus autem stultitiam, ipsis autem vocatis Judaeis, atque

¹⁾ Ps. 103, 24. Cf. Jer. 10, 12.

²⁾ Sap. 8, 1.

³⁾ Gen. 1, 31.

⁴⁾ Prov. 3, 19, 20.

⁵⁾ Prov. 8, 22—30. Cf. Job. 28, 23 ss. Eccli. 1, 1 ss. 24, 5 ss.

*Gracis Christum Dei virtutem et Dei sapientiam: quia quod stultum est Dei, sapientius est hominibus: et quod infirmum est Dei, fortius est hominibus. — Ex ipso autem vos estis in Christo Jesu, qui factus est nobis sapientia a Deo et justitia, et sanctificatio et redemptio. — Sapientiam autem loquimur inter perfectos: sapientiam vero non hujus saeculi, neque principum hujus saeculi, qui destruuntur: sed loquimur Dei sapientiam in mysterio, quae abscondita est, quam praedestinavit Deus ante saecula in gloriam nostram, quam nemo principum hujus saeculi cognovit: si enim cognovissent, nunquam Dominum gloriae interfecissent. Sed sicut scriptum est: Quod oculus non vidit, nec auris audivit, nec in cor hominis ascendit, quae praeparavit Deus iis, qui diligunt illum: nobis autem revelavit Deus per spiritum suum: Spiritus enim omnia scrutatur, etiam profunda Dei ¹⁾. — Alio loco: Mihi omnium sanctorum data est gratia haec, in Gentibus evangelizare investigabiles divitias Christi, et illuminare omnes, quae sit dispensatio sacramenti absconditi a saeculis in Deo, qui omnia creavit: ut innotescat principatibus, et potestatibus in coelestibus per Ecclesiam, multiformis sapientia Dei ²⁾. Et in Epist. ad Romanos: O altitudo divitiarum sapientiae, et scientiae Dei: quam incomprehensibilia sunt judicia ejus, et investigabiles viae ejus. Quis enim cognovit sensum Domini? Aut quis consiliarius ejus fuit? ³⁾. Verum non tantum in N. T., sed etiam in libris A. F. similia leguntur. *Lex Domini*, ait Psalmista, *immaculata, convertens animas: testimonium Domini fidele, sapientiam praestans parvulis. Justitiae Domini rectae, laetificantes corda: praeceptum Domini lucidum, illuminans oculos* ⁴⁾. Sensus est: Lex divina, utpote absolute vera et sancta cognitionem veri, perfectionem ac tranquillitatem in nobis promovet, unde et nobis maximi momenti et tenerrimae curae sit oportet. —*

Atque

c. Deus fons et auctor omnis sapientiae in naturis finitis declaratur. *Omnis sapientia*, inquit Siracides, *a Do-*

¹⁾ 1. Cor. 1, 23—25. 30. — 2, 6—10.

²⁾ Ephes. 3, 8—10. Cf. 1, 8. 17. Col. 1, 9. 28. 2, 3, 3, 16.

³⁾ Rom. 11, 33—34.

⁴⁾ Ps. 18, 8—9. Cf. Ps. 42, 3. Eccli. 34, 8.

mino Deo est ¹⁾). Et Jacobus: *Si quis autem vestrum indiget sapientia, postulet a Deo, qui dat omnibus affluenter, et non impropert: et dabitur ei* ²⁾).

B. Id ipsum porro semper tenuit atque docuit Ecclesia, ut ex scriptis SS. Patrum et publica Ecclesiae institutione atque omni ejus vita clare cognoscitur. Quod quum neutrum a nemine in dubium vocetur: sufficiat hic loci solum Maximum laudasse, qui ita habet: *Rationabilitatem autem dicit in Deo* (Dionysius), *non quod velit significare, Deum esse rationalem, tanquam participem rationis; hoc (illa dictio) enim insinuat: sed quod est ipsamet rationabilitas, qui est totus ipsa per se subsistens ratio* ³⁾).

C. Neque desunt argumenta ex ratione petita. Et quidem:

a. infinitam sapientiam Dei postulat summa ejus atque absoluta perfectio. Nam cum Deus sit ens perfectissimum; atque quum porro sapientia fatentibus omnibus, inter perfectiones naturae intelligentis sit summa ac maxima; praeter sanctitatem enim. nihi homines magis dividit ab animantibus, quam illa: Deo quoque sapientia, eaque infinita, tamquam enti infinito, deesse non potest.

b. Id ipsum porro admirabilis ordo mundi physici, in quo, sive res singulas, sive earum conjunctionem spectamus, tam innumerabilia sapientiae et consilii summi monumenta deprehendimus, arguit; nec non existentia atque ordo mundi moralis evincit, quum auctor rationis atque ejus mundi dispositionis, pro qua ad summum bonum tendit, nonnisi ens infinitum rationale seu sapientissimum esse queat.

Cum ergo sapientia definiat, quid fieri queat, quid fieri debeat, atque quid fieri deceat: ipsa a veritate objectiva haud differt, secundum quam Deus omnia disponit ac dirigit, quemadmodum Augustinus ait: *Num aliam putas esse sapientiam, nisi veritatem, in qua cernitur et tenetur summum bonum?* ⁴⁾. Hinc etiam SS. Litterae Dei agendi rationem secundum suam sapientissimam cognitionem, seu opera divina ⁵⁾, porro doctrinam ac

¹⁾ Ecccl. 1, 1.

²⁾ Jac. 1, 6. Cf. Ps. 118, 98—106. 3. Reg. 3, 12.

³⁾ Schol. ad Dionys. De coelest. hierarch. c. 2, §. 3. Opp. Dionys. T. 1. p. 27.

⁴⁾ De lib. arb. l. 2. c. 9. n. 26. Opp. T. 1. c. 596.

⁵⁾ Ps. 35, 6, 25, 10, 88, 15, 140, 7. Dan. 4, 34.

legem divinam ¹⁾, nec non gratiam mentem nostram illustrantem ²⁾ veritatem adpellant. Atque ideo quoque de ideis in Deo sermo fieri potest. *Sunt namque, ait Augustinus, idae e principales quaedam, vel rationes rerum stabiles atque incommutabiles, quae ipsae formatae non sunt, ac per hoc aeternae ac semper eodem modo sese habentes, quae in divina intelligentia continentur. Et cum ipsae neque oriantur, neque intereant: secundum eas tamen formari dicitur omne, quod oriri et interire potest, e omne quod oritur et interit. — Quis audeat dicere, Deum irrationabiliter omnia condidisse? Quod si recte dici vel credi non potest, restat omnia ratione sint condita. — Has autem rationes, ubi arbitrandum est esse, nisi in ipsa mente Creatoris? Non enim extra se quidquam positum intuebatur, ut secundum id constitueret, quod constituerebat: nam hoc opinari sacrilegum est. Quodsi hae rerum omnium creandarum creaturarumve rationes in divina mente continentur, neque in divina mente quidquam, nisi aeternum atque incommutabile potest esse; atque has rerum rationes principales appellat ideus Plato: non solum sunt idae, sed ipsae verae sunt, quia aeternae sunt, et ejusmodi atque incommutabiles manent; quarum participatione fit, ut sit, quidquid est, quomodo est ³⁾. — Porro sapientiam in Deo non successivam esse vel discursivam, i. e. deliberatione quadam egentem, sed directam et intuitivam, i. e. uno simplici actu omnia simul comprehendentem, ex cognitionis absolute perfectae indole jam consequitur.*

Observ. Sapientia Dei infinita excitamur:

a. Ut in ea spem ac fiduciam certissimam, etiam in rebus adversis, collocamus, persuasissimum habentes, Deum omnia sapientissime disponere, et hinc sortem nostram, quaecunque fuerit, tranquille, cum plena animi acquiescentia feramus. Quae sola est vera vitae sapientia.

b. Ut documenta ejus tum in rerum natura, tum in historia, atque praecipue in opere redemptionis nostrae, tum in vita nostra quodque sollicitae aequae ac modeste investigemus, quo magis in dies Deum

¹⁾ Mal. 2, 6. Ps. 25, 3. 85, 11. 118, 30. 86, 142. 160. Tob. 13, 10. Joan. 3, 21. 17, 17. 16, 13. 2, Joan. 4, 3. Joan. 4, Rom. 1, 18. 2, 8. Gal. 3, 1. Ephes. 5, 9.

²⁾ Ps. 42, 3. Cf. Joan. 1, 4. 5, 9. 13, 6. 16, 17.

³⁾ De divers. quaest. 83. q. 46. n. 2. Opp. T. 6. c. 17 s.

veneremur et diligamus, atque cum imitando ipsi sapere discamus.
Quod et nobis feliciter succedat,

c. ut sapientiam a Deo, ejus fonte, precibus ardentibus efflagitemus.

§. 18. Voluntas divina.

Postquam de intellectu divino disseruimus: restat, ut modo de altera spiritus infiniti veluti parte, de divina voluntate, dicamus.

Venit autem nomine voluntatis generatim facultas spiritus appetendi bonum et aversandi malum, ab intellectu agnitum. Quod tamen de voluntate in Deo loquimur: facile patet, neque hic sermonem esse posse de facultate, seu nuda potentia, incrementum et decrementum admittente, et cum nisu, imbecillitatem arguente, conjuncta, neque de actu multiplici, sibi succedente atque temporis limitibus obnoxio; sed esse potius voluntatem divinam vim infinitam, seu actum simplicissimum, quo Deus ratione perfectissima bonum appetat, malum vero aversetur; vel esse substantiam divinam, prout secundum sapientissimam cognitionem actuosa cogitatur. Voluntas divina itaque idem est ac substantia divina, atque idem ac intellectus divinus, a quo non nisi virtualiter, ut ajunt, discernitur ¹⁾; et ideo quoque est, ut substantia divina, simplicissima, immutabilis, aeterna, immensa, atque, ut intelligentia divina, sapientissima ac verissima; ita ut omne bonum atque omne malum, ejusdem indoli convenienter, i. e. exacte pro bonitatis aut malitiae, quam possidet, gradu diligit, atque aversetur constantissime.

Dari in Deo voluntatem, eamque perfectissimam, constat:

A. ex manifestis S. Scripturae testimoniis. Docent enim SS. Litterae omnia, quaecunque extra Deum existunt, ex voluntate Dei facta esse et fieri, atque Dei voluntatem esse, ut nos bonum sectemur, malumque vitemus. Sic legitur in Psalmis: *Deus autem noster in coelo: omnia, quaecunque voluit, fecit* ²⁾. Apud Isaiam: *Consilium meum stabit, et omnis voluntas mea fiet* ³⁾. In Proverbiis: *Multae cogitationes in*

¹⁾ Cf. Junil. Afric. *De part. div. leg.* 1. c. 19. In Galland. *Bibl. PP.* T. 12. p. 83. c. 1.

²⁾ Ps. 113, 3 (11). Cf. 134, 6.

³⁾ Is. 46, 10. Cf. 48, 14. Dan. 4, 31 s. 5, 21. Job. 23, 13.

*corde viri: voluntas autem Domini permanebit*¹⁾. — Christus Dominus autem, voluntatem in Deo perfectissimam dari, docet, ubi nos orare jubet: *Fiat voluntas tua, sicut in coelo et in terra*²⁾; porro ubi ait: *Meus cibus est, ut faciam voluntatem ejus, qui misit me*³⁾; et alias saepissime⁴⁾. Atque Apostolus, quum scribit: *Operatur omnia secundum consilium voluntatis suae*⁵⁾. Verum non est opus in re tam manifesta, et ab omnibus, qui Deum agnoscunt, concessa, testimonia conglomerare, imprimis cum omnia sequentia attributa necessario voluntatem in Deo arguant.

Velle autem Deum omnia, quaecunque sunt aut dari possunt, bona, et quidem pro eorum indole ac bonitatis gradu, et ita etiam omnia mala pro eorum malitiae gradu aversari, pariter indubitata est doctrina S. Scripturae. Illud adparet ex verbis Christi Domini, quum a nimia rerum terrenarum cura nos avocans; ait: *Nonne anima plus est, quam esca: et corpus plus, quam vestimentum? Respicite volatilia coeli, etc. Nonne vos magis pluris estis illis? Atque: Si autem foenum agri, quod hodie est, et cras in clibanum mittitur, Deus sic vestit: quanto magis vos modicae fidei*⁶⁾? Quibus manifeste significatur, Deum singulas res creatas ex earum indole aestimare, et pro illa etiam amore complecti. Mala omnia autem Deum odio prosequi, legimus apud Psalmistam, qui Deum his alloquitur verbis: *Odisti omnes, qui operantur iniquitatem: perdes omnes, qui loquuntur mendacium*⁷⁾. Porro, Deum omne honestum pro ejus interna bonitate, et omne inhonestum pro ejus malitia diligere ac odisse, ex eo jam consequitur, quia ipse ex testimonio SS. Litterarum cuilibet secundum ejus opera retributurus est⁸⁾. Atque ideo quoque Deus *justus et rectus*⁹⁾, *opera ejus perfecta et omnes viae ejus judicia* (rectae)¹⁰⁾, atque doctrina et mandata divina ve-

¹⁾ Prov. 19, 21,

²⁾ Matth. 6, 10.

³⁾ Joan. 4, 34.

⁴⁾ Cf. Matth. 7, 10, 12, 50, 26, 29. Marc. 14, 36. Luc. 22, 42. Joan. 5, 30, 6, 38—40, 7, 17.

⁵⁾ Ephes. 1, 11. Cf. Rom. 9, 18, 12, 2. Gal. 1, 4. Ephes. 1, 5, 5, 17, 1. 1 Thess. 4, 3, 1. Tim. 2, 4. Hebr. 10, 36, 13, 21.

⁶⁾ Matth. 6, 25—30. Luc. 12, 22—28.

⁷⁾ Ps. 5, 7.

⁸⁾ Matth. 16, 27. Act. 17, 31. Rom. 2, 6.

⁹⁾ Deut. 32, 4. Ps. 91, 16.

¹⁰⁾ Deut. 32, 4. Ps. 24, 10, 88, 15, 110, 7. Dan. 4, 34.

ritas, via, lex veritatis adpellantur ¹⁾. — Ita quoque tandem disertis verbis sacrae paginae tradunt, velle Deum voluntate constantissima atque a mutatione prorsus aliena. *Neque enim homo est, ut agat poenitentiam* ²⁾.

B. Testimonia ex Traditionis quoque documentis hic proferre supervacaneum censemus, idque eo magis, quum

C. jam ipsa ratio nos ad voluntatem perfectissimam in Deo assumendam cogat. Etenim

a. cum voluntas manifeste ad perfectiones pertineat: ipsa, e quidem perfectissima quoque in Deo, ente perfectissimo, deesse non potest; qua destitutus necessario etiam libertate, sanctitate, justitia, benignitate etc. carere deberet, seu Deus non esset.

b. Dein sicut existentia mundi atque ordinis, tam physici quam moralis, in eo conspicui, necessario postulat ens necessarium ac independens: ita eadem prorsus necessitate exigit voluntatem in hoc ente; quum mundus atque uterque ille ejus ordo, ut pote contingens, ac ideo temporalis, nonnisi libero voluntatis actu ortus esse, ac conservari possit.

Observ. 1. Cum Deus pro summa perfectione voluntatis suae omnem rem, quam vult, pro ejus indole velit; etsi, ut unico ac simplicissimo actu omnia intelligit, ita unico ac simplicissimo voluntatis actu, a sua natura indistincto, vult, quaecunque vult: tamen, non quidem ex parte Dei, sed ex parte rerum, ad quas voluntas ejus refertur, varia voluntas divina distingui potest.

Et quidem

a. discernitur voluntas necessaria et libera. Voluntas necessaria dicitur voluntas divina eatenus, quatenus ad Deum ipsum, summum bonum atque omne bonum aliud possibile, in se spectatum, refertur, quaeque in Deo prorsus non potest abesse, quum Deus semetipsum tanquam summum bonum, et ita etiam quodcunque aliud bonum dari potest, sine contradictione, i. e. quin Deus esse desinat, non possit non velle aut non diligere. — Libera autem appellatur voluntas divina, quatenus ad entia creata attinet, quae Deus etiam salva sua infinita perfectione non velle posset.

b. Voluntas libera, consilium, propositum

¹⁾ Ps. 25, 3, 85, 11, 118, 30, 86, 142, 160. Mal. 2, 6. Tob. 14, 10. Joan. 3, 21, 16, 13, 17, 17, 2. Joan. 4, 3. Joan. 4. Rom. 1, 18, 2, 8. Gal. 3, Ephes. 5, 9.

²⁾ 1. Reg. 15, 29.

³⁾ 2. Tim. 1, 9. Rom. 8, 28.

praedestinatio ¹⁾, decretum ²⁾, quum referri queat vel ad res sic dictas necessario existentes, vel ad ea, quae actiones liberas entium rationalium sequuntur, iisque tanquam conditioni adstricta sunt, vel vero ad ipsas hasce actiones a naturis intelligentibus ponendas, porro dividitur in voluntatem absolutam, conditionatam et voluntatem signi. Voluntas absoluta (decretum absolutum) est ea, qua Deus vult simpliciter, nulla ratione habita ad qualemcunque conditionem ex parte rei, ad quam refertur, et quae propterea semper impletur ³⁾. — Voluntas conditionata seu hypothetica (decretum conditionatum, hypotheticum) est, qua Deus decernit aliquid fieri habito respectu ad certam conditionem ex parte rei, quam respicit, et quae itaque tantum effectum sortitur, quando conditio illa adfuerit ⁴⁾. — Voluntas denique signi est, qua Deus ea vult, quae entibus rationalibus libere praestanda sunt, quaque non ipse agit, sed quae nos agere oportet, sive per rationem sive per revelationem, significat ⁵⁾. Alii tamen sub voluntate signi nonnisi merum et externum signum voluntatis divinae, seu legem divinam patefactam, prout in se consideratur, intelligunt, non ipsam internam voluntatem, quam in illius oppositione voluntatem beneplaciti adpellant. Caeterum quinque assignari solent voluntatis divinae signa, hoc versu expressa:

Praecipit, et prohibet, permittit, consulit, implet.

Cum tamen nobis ceu entibus contingentibus ratio efficaciae sufficiens haud insit, et praeterea ad salutariter operandum speciali auxilio divino indigeamus: ut revera agamus, voluntas signi seu lex divina non sufficit; sed Deus insuper voluntate sua efficaci seu voluntate beneplaciti in agendo nobiscum concurrit. Quo respectu

c. voluntas divina distinguitur in ordinantem, qua Deus bonum directe vult, et permittentem, qua malum permittit, et eatenus illud vult, quatenus libertatem nobis non adimit, qua nonnisi sublata illud praepediri posset, idque propterea, quia secus ipsam nostram naturam destruere, sibi que contradicere deberet.

¹⁾ Rom. 8, 29—30.

²⁾ Is. 14, 27. Act. 4, 28.

³⁾ Cf. Job. 23, 13. Ps. 113, 3 (11). Is. 46, 10. Esth. 13, 9. Apoc. 4, 11.

⁴⁾ Cf. Exod. 32, 10—14. Ps. 102, 17 s. 3. Reg. 9, 4 ss. 4. Reg. 13, 19. Is. 55, 2. Ezech. 33, 12 ss. Prov. 1, 24. Jon. 3, 4. coll. ss. Matth. 7, 7 21, 21 s. Marc. 11, 24. Luc. 11, 9. Joan. 14, 13. Jac. 1, 5.

⁵⁾ Ps. 5, 5. 49, 17. Ezech. 33, 11. Matth. 6, 10. 12, 15. Act. 7, 51. 1. Thess. 4, 3. 1. Tim. 2, 4. 1. Petr. 2, 15. 1. Joan. 2, 17. 5, 14.

Porro naturis rationalibus, quae est ipsarum indoles, aliud pro earum fine, aliud vero pro earum merito convenire potest; ideoque voluntas divina hoc respectu

d. in voluntatem antecedentem et consequentem dispescitur. Antecedens ea dicitur voluntas, qua Deus rem ipsam considerando, praecisis particularibus ejus circumstantiis, aliquid velle cogitatur. Tali voluntate e. g. vult Deus omnes homines salvos fieri. — Consequens vero illa dicitur, qua Deus respectu habito ad universam rei conditionem vult, quae ei congruunt. Hac voluntate vult Deus hominem peccatorem in peccatis morientem damnare. — Voluntas antecedens itaque praecedit praevisionem dignitatis vel indignitatis nostrae, meritorum vel demeritorum, ut Theologi loquuntur, consequens autem praescientiam consensus liberi arbitrii et meritorum vel demeritorum sequitur ¹⁾. Voluntas consequens porro cum effectu conjuncta est, cum sit absoluta, antecedens autem, quum sit, quamvis quoad affectum pariter absoluta, adeoque serium desiderium, tamen quoad effectum tantum conditionata, non item. Quapropter

e. tandem voluntas divina adhuc dividitur in efficacem et inefficacem, quarum illa semper impletur et effectum sortitur ²⁾, haec autem effectum, quem Deus ultimo intendit, ex defectu conditionis statutae, ob contumaciam hominum non nanciscitur. Dicitur itaque voluntas haec, quae effectum non sortitur, tantum ratione effectus ultimi, quem quidem Deus intendit, sed non absolute vult, inefficax, in se autem et ratione effectus proximi semper efficax; qualis e. g. est voluntas salvandi peccatorem, quia suppeditat media ad finem obtinendum sufficientia, licet homo forsitan iis non utatur. Qua observatione posita adparet, Deo minime injuriosum esse, ejus voluntatem dicere inefficacem, cum inefficacia haec non arguat defectum potentiae in Deo, sed defectum seu abusum libertatis tantum in homine, cui, ut illa adimatur, sapientiae divinae repugnare, supra jam adnotavimus.

¹⁾ Haec voluntatis divisio jam apud Chrysostomum occurrit. *Hom.* 1. in *Ep. ad Ephes.* n. 2. Opp. T. 11. p. 5. *θήλημα πρῶτον καὶ δεύτερον, προηγούμενον καὶ ἐπόμενον.* Cf. J. Damasc. *De orth. fid.* l. 2. c. 29. Opp. T. 1. p. 198. B. C. *Dial. cont. Manich.* n. 79. p. 462. C. — Thom. 1. q. 19. art. 6. ad 1. Opp. T. 20. p. 126. c. 2. L. 1. *Sent. dist.* 46. q. 1. art. 1. T. 9. p. 582.

²⁾ Gen. 50, 19. Ps. 113, 3 (11). Is. 46, 10.

³⁾ Is. 5, 4. Ezech. 24, 13. Matth. 23, 37. Act. 7, 51. 2. Petr. 3, 9.

Observ. 2. Rerum creatarum sapientia divina est, ut supra jam servavimus, causa exemplaris et dirigens, voluntas divina autem usa efficiens ¹⁾).

Observ. 3. Adfectus, seu vehementiores commotiones mentis anseuntes in bono appetendo aut malo aversando, per sensualem peditatem excitatae, in Deo haudquaquam dari, ex infinita ejus rfectione sponte sua intelligitur; quum sensualitas, quae nonnisi mini, ex anima et corpore constanti, est propria, in eo nulla sit, etiam desiderium felicitatis augendae in ipso, utpote ente beatissimo, locum habere nequeat. Veritatem hanc non tantum Judaei et cristiani, continuo professi sunt, sed et gentiles philosophi ²⁾ noverunt. SS. Patres non minus egregie affectuum tumultus a Deo movent ³⁾. Nominatim eleganter Augustinus ait: *Amas, nec stuas; zelas, et securus es; poenitet te, et non doles; irasceris, tranquillus es; opera multas, nec multas consilium* ⁴⁾. Lactantius tamen, ut Deo voluntatem peccata puniendi vindicat, ipsi iram buendam esse, ostendere conatur ⁵⁾. Atque etiam Tertullianus tumat, Deum sine ira esse inertem et inermem Epicuri Deum ⁶⁾. centiori aevo Sociniani adfectus Deo contra auctoritatem revelationis et dictamina sanae rationis adscribunt ⁷⁾. Quodsi ergo in S. riptura, quae se humano cogitandi modo adcommodat, adfectus o tribuuntur: non sunt adfectus, quales nostri; sed tantum aliquid fectibus humanis simile, Deo dignum et conveniens, nempe adpiones et aversationes, nullam commotionem ac immutationem contactam habentes, significant. Sic amor Dei erga homines designat nisi seriam ejus voluntatem perfectionem ac felicitatem nostram movendi; odium ac tristitia seriam mali aversationem; mor voluntatem malum a nobis avertendi; ira voluntatem peccata puniendi; zelotypia voluntatem nemini gloriam ac honorem inum dandi, et eundem invadentes severe puniendi; poenitentia voluntatem rem consiliis divinis adversantem immutandi aut struendi; laetitia acquiescentiam in perfectionibus infinitis; etc.

¹⁾ Apoc. 4, 11.

²⁾ Cf. Huet. *Quaes. Ainet.* l. 2. c. 2. n. 10. Ven. 1761. p. 63.

³⁾ Cf. Tournèl. *Curs. theol. De D. et attr. div. q. 18.* Col. Agripp. 52. T. 1. p. 218 ss.

⁴⁾ *Conf. l. 1. c. 4.* Opp. T. 1. c. 71.

⁵⁾ *De ira D.* Opp. T. 2. p. 127 ss.

⁶⁾ *Adv. Marcion.* n. 16. Opp. V. 2. p. 194 s.

⁷⁾ Cf. Baumgarten, *Untersuch. theol. Streitigkeiten.* 1. B. p. 203.

§. 19. 7. Quoad voluntatem Deus est: a. Omnipotens

Sub omnipotentia ea intelligitur perfectio, qua voluntas, seu essentia divina omnia, quae in se non sunt impossibilia, et quidem solo nutu efficere et extra se producere potest.

Ex qua definitione facile intelligitur, quomodo omnipotentia a potentia entium finitorum discernatur. Differt autem primo extensione, cum entia finita suis limitibus coarctentur, omnipotentia vero infinita ac inexhausta sit, quae nec numero, nec magnitudine operum terminari potest; deinde operandi modo, nam entia finita materiae existenti adstringuntur, atque instrumentis egent, seu nonnisi adhibitis viribus naturae, atque secundum leges, quibus hae subsunt, agere possunt, Deus autem sola voluntate ea, quae non sunt, ad existentiam vocat, aut illa, quae sunt, in alia mutat; sola repugnantia seu impossibilia in se omnipotentia produci nequeunt.

Omnipotentiam Dei oppugnarunt Herminiani seu Seleuciani, qui Platoni adhaerentes, materiam eapropter coaeternam Deo excogitarunt, quia negabant, Deum posse facere aliquid ex nihilo ¹⁾. Huc quoque porro pertinent, qui sibi plura principia contraria invicem ac coaeterna finxerunt, et eo ipso potentiam summi Numinis limitarunt, ut Marcion, Manichaei et alii ²⁾. Deinde etiam illi, qui asserunt, Deum non posse plura et majora, quam fecit, facere, ut Abaelardus ³⁾, qui tamen errorem suum revocavit, porro Wicleffus, Hobbesius, Spinoza et Pantheistae omnes ⁴⁾.

Deum omnipotentem esse ita, ut omnia potestate comprehendat, nihilque non facere possit, sive quod futurum est aliquando, sive quod nunquam fiet, fieri tamen posset, intelligimus.

A. ex ipso Verbo Dei scripto; in quo

a. passim Deus omnipotens, vel solus potens, i. e. vere, utpote per se ac infinite potens, nominatur, aut tanquam ille, cui nihil impossibile, vel etiam difficile sit, exhibe-

¹⁾ Cf. Augustin. *De haer. Haer.* 59. Opp. T. 8. c. 20.

²⁾ Cf. Epiphani. *Adv. haer. Haer.* 42. n. 2. Opp. T. 1. p. 303 s. *Haer.* 66. n. 8. p. 625. — Tertull. *Adv. Marcion.* l. 1. c. 2. Opp. V. 2. p. 148.

³⁾ *Introd. in Theol.* l. 3. Opp. Par. 1616. p. 1112 ss. *Apolog. Epist.* 20. p. 331.

⁴⁾ Cf. Wiest, *Instit. theol.* Eustad. et Ingolst. 1782 ss. T. 4. p. 104.

tur. Sic enim ipse Deus, Abrahamo adparens, ait: *Ego Deus omnipotens*, אֱלֹהִים אֶנִּי¹⁾. Jobus: *Spiritus Dei*, inquit, *fecit me, et spiraculum omnipotentis*, רוּחַ, *vivificavit me*²⁾.

Siracides: *Unus est altissimus Creator omnipotens, et Rex potens, et metuendus nimis, sedens super thronum illius, et dominans Deus*³⁾. — Deinde Moyses: *Quia Dominus Deus vester*, ait, *ipse est Deus deorum, et Dominus dominantium, Deus magnus, et potens, et terribilis*⁴⁾. Et Apostolus: *Quem (Jesum Christum) ostendet beatus, et solus potens, Rex Regum, et Dominans dominantium*⁵⁾. — Tum item ad Abrahamum inquit Dominus: *Numquid Deo quidquam est difficile?* (Textus Hebr. habet: *An mirificum erit quidquam a Domino?* in eodem sensu)⁶⁾. Et rursus: *Numquid manus Domini invalida est?* vel *abbreviata?* ut in Hebraeo legitur⁷⁾. Jobus: *Scio, quia omnia potes, et nulla te latet cogitatio*⁸⁾. Sapiens: *Multum enim valere, tibi soli supererat semper: et virtuti brachii tui quis resistet? Quoniam tanquam momentum staleræ, sic est ante te orbis terrarum, et tanquam gutta roris antelucani, quæ descendit in terram. Sed misereris omnium, quia omnia potes*⁹⁾. Jeremias: *Heu, heu, heu Domine Deus: ecce tu fecisti coelum, et terram in fortitudine tua magna, et in brachio tuo extento: non erit tibi difficile omne verbum*¹⁰⁾. Atque Christus Dominus: *Apud Deum omnia possible sunt*¹¹⁾. Et alibi: *Abba pater, omnia tibi possible sunt, transfer calicem hunc a me*¹²⁾. Angelus coelestis: *Quia non erit impossibile apud Deum omne verbum*¹³⁾. Et Apostolus: *Qui*

¹⁾ Gen. 17, 1. Cf. 28, 3. 43, 14. 48, 3. 49, 25. Exod. 6, 3.

²⁾ Job. 33, 4.

³⁾ Eccli. 1, 8. Cf. 2. Cor. 6, 18. Apoc. 16, 7. Esth. 13, 9. 1. Par. 29, 11—12.

⁴⁾ Deut. 10, 17.

⁵⁾ 1. Tim. 6, 15. Cf. Eccli. 43, 31. Nah. 1, 3. Ps. 134, 1 ss.

⁶⁾ Gen. 18, 14.

⁷⁾ Num. 11, 23.

⁸⁾ Job. 42, 2.

⁹⁾ Sap. 11, 22—24.

¹⁰⁾ Jer. 32, 17.

¹¹⁾ Matth. 19, 26. Cf. Mare. 10, 27. Luc. 18, 27.

¹²⁾ Marc. 14, 36.

¹³⁾ Luc. 1, 37.

vivificat mortuos, et vocat ea, quae non sunt, tanquam ea, quae sunt, i. e. ea, quae nondum existunt in rerum natura, perinde existere facit, atque ea, quae jam pridem in rerum natura existunt ¹⁾). Atque alibi: *Ei, qui potens est omnia facere superabundanter, quam petimus, aut intelligimus, secundum virtutem* (pro potentia), *quae operatur in nobis, ipsi gloria, etc.* ²⁾).

b. Porro docetur, Deum solo voluntatis nutu omnia creasse, atque sola sua voluntate omnia conservare ac gubernare, ita ut omnia ab ipso prorsus pendeant, ipsiusque nutu in nihilum redigi queant. *Verbo Domini*, ait Psalter, *coeli firmati sunt: et spiritu oris ejus omnis virtus eorum*. — *Quoniam ipse dixit, et facta sunt: ipse mandavit, et creata sunt* ³⁾). Simplicissima sane et magnificentissima summae Dei potentiae descriptio; cui consonant et verba Moysis: *Dixitque Deus: Fiat lux. Et facta est lux* ⁴⁾). Apostolus: *Quoniam ex ipso, et per ipsum sunt omnia: ipsi gloria in saecula* ⁵⁾). — *Fide intelligimus, aptata esse saecula verbo Dei, ut ex invisibilibus visibilia fierent* ⁶⁾). — Auctor libri Job: *Columnae coeli contremiscunt, et pavent ad nutum ejus* ⁷⁾). Et iterum Psalmista: *Qui respicit terram, et facit eam tremere: qui tangit montes, et fumigabunt* ⁸⁾).

c. Denique omnipotentiam Dei quoque omni tempore ab ipso, testantibus SS. Litteris, patrata miracula demonstrant, ut impote quae duntaxat solo voluntatis omnipotentis nutu fieri possunt, ut alibi a nobis ostensum est ⁹⁾); nec non fata populi Israelitici, quae secundum sapientissimum consilium, quidquid tentaverint adversarii, executioni mandata sunt, quemadmodum et celerrima propagatio religionis Christianae inter tot ac tant-

¹⁾ Rom. 4, 17.

²⁾ Ephes. 3, 20. Cf. Sap. 11, 23. 12, 18.

³⁾ Ps. 32, 6. 9. Cf. 113, 3 (11). 103, 2 ss. 135, 5 ss. Is. 40, 12 ss. 44, 2^a. Jer. 27, 5. 32, 17. Job. 26, 5—14. 38, 4 ss. Apoc. 4, 11.

⁴⁾ Gen. 1, 3.

⁵⁾ Rom. 11, 36. Cf. Hebr. 1, 2. Act. 17, 24. Ps. 61, 7 ss. Amos. 9, 5 ss. Is. 44, 28.

⁶⁾ Hebr. 11, 3.

⁷⁾ Job. 26, 11. Cf. 9, 4—10.

⁸⁾ Ps. 103, 32.

⁹⁾ Cf. Ps. 77, 12 ss. 85, 10. Sap. 11, 4. Is. 25, 1. Joan. 3, 2. Luc. 11, 20^{ss} ²⁾

obstacula, interna et externa, ejusque per tot saecula conservatio postea.

Pari modo infinitam Dei potentiam docet

B. Traditio. Omnipotentem enim Deum esse tradunt

a. unanimi consensu SS. Patres. Nos, ait Origenes, sicut incorporeum esse Deum, et omnipotentem et invisibilem profitemur, ita eum curare mortalia, et nihil absque ejus providentia geri, neque in coelo, neque in terris, certo et immobili dogmate constemur ¹⁾. — Clem. Alex.: Quanta est autem Dei potentia, cujus sola voluntas est mundi creatio? Solus enim Deus mundum creavit, ut qui solus sit Deus: is autem opera sua volendo conficit, ejusque velle sequitur fieri, ψιλῶ τῷ βούλεσθαι δημιουργεῖ, καὶ τῷ μόνον ἐθέλῃσθαι αὐτὸν, ἔπεται τὸ γεγενῆσθαι ²⁾. — Theodoretus: Neque enim rebus creatis mensuratur potestas Dei, sed sola voluntate. Omnia enim, inquit, quaecunque voluit, Deus fecit, non quaecunque potuit, sed quaecunque voluit. Poterat enim multo plura facere: fecit autem, quae convenire judicavit ³⁾. — Gregorius Nyss.: Impotentia (τὸ ἀδύνατον) est valde remota ab ea, quae de Deo habetur existimatione ⁴⁾. Et alibi ait: In natura divina cum voluntate ita concurrere potestatem, ut Dei potestatis mensura sit ipsa voluntas ⁵⁾. — Eusebius Emes.: Merito itaque omnipotens creditur, qui cum solem de luce, splendorem de splendore protulerit, sic ea omnia ex nihilo in praecepti celeritate perfecit. Cuncta enim, quae ante non erant, tanquam subito aliunde producta, ante nutum ejus velociter astiterunt, nulla apparente materia. Origo fuit rerum efficax Creatoris imperium ⁶⁾. — Tertullianus: Non alia lege (Deus) credendus est, quam ut omnia posse credatur ⁷⁾. — Augustinus: Non dico: da mihi Christianum, da mihi Judaeum: sed, da mihi paganum, idolorum cultorem, daemonum servum, qui non dicat, Deum esse omnipotentem. Negare Christum

¹⁾ In. Gen. Hom. 3. n. 2. Opp. T. 2. p. 66.

²⁾ Cohort. ad Gen. n. 4. Opp. T. 1. p. 55.

³⁾ Interpr. in Is. 40, 24. Opp. T. 2. p. 100 s. Cf. Haer. fab. l. 5. c. 1. T. 4. p. 250.

⁴⁾ Catech. c. 1. Opp. ed. Par. 1615. T. 2. p. 478. D.

⁵⁾ Hezaem. T. 1. p. 6. B.

⁶⁾ Hom. 1. de Symb. In Bibl. max. PP. Lugd. T. 6. p. 628 s.

⁷⁾ De resurr. carn. n. 11. Opp. V. 2. p. 83. Cf. De carn. Chr. n. 3. p. 44.

potest, negare omnipotentem Deum non potest ¹⁾). Et alibi: *Creatoris namque potentia, et omnipotentis, atque omnitenentis virtus causa subsistendi est omni creaturae: quae virtus ab eis, quae creata sunt, regendis, si aliquando cessaret, simul et illorum cessaret species, omnisque natura concideret* ²⁾). — Cassiodorus: *Solus omnipotens Deus est, cui hoc est esse, quod sapere: hoc est posse, quod vivere: hoc est velle, quod facere* ³⁾). — Petr. Chrysologus: *Quid tam rationale, nisi ut Deus quidquid voluerit, possit? Qui quod vult, non potest, Deus non est* ⁴⁾). — Et ita reliqui ⁵⁾. Sed nec necessarium fuit, haec congerere Patrum effata; quum

b. Ecclesia publice fidem suam enuntiet in Symbolo Apostolico, Nicaeno-Constantinopolitano, et Athanasiano, atque solenniter profiteatur, se credere *in Deum, Patrem omnipotentem, creatorem coeli et terrae*.

C. Denique etiam ipsa ratio perspicit, omnipotentiam Deo necessario tribuendam esse. Eandem enim

a. infinitas Dei postulat, pro qua nulla perfectione, et quidem in summo gradu cogitata, destitui potest; nec non

b. existentia mundi atque ejusdem ordinis, tam physici quam moralis; quum illum aequae, ac huncce nonnisi vis infinita ex ni-

¹⁾ *Serm. 240. de dieb. Paschal. c. 2. n. 2. Opp. T. 5. c. 1001. Cf. Serm. 214. n. 4. c. 945. Serm. 213. c. 1. n. 1. c. 938. Serm. 242. n. 7. 1010. De Symb. c. 3. n. 6. T. 6. c. 558. Enchir. c. 96. n. 24. c. 231 s. Cont. advers. Leg. et Proph. l. 1. c. 8. n. 8. T. 8. c. 555. De civ. D. l. 21. c. 5. n. 3. T. 7. c. 326.*

²⁾ *De Gen. ad litt. l. 4. c. 12. n. 22. Opp. T. 3. P. 1. c. 167.*

³⁾ *De anim. c. 2. Opp. T. 2. p. 597. c. 1.*

⁴⁾ *Serm. 41. Serm. ed Seb. Paul. Aug. Vind. 1758. p. 202. c. 1.*

⁵⁾ Cf. Justin. *De resurr. ap. J. Damasc. in Eclog. s. Sacr. Parall. litt. α. tit. 73. Opp. T. 2. p. 758.* — Tatian. *Conf. Graec. n. 5. Opp. Justin. p. 261 s.* — Athenag. *De resurr. mort. n. 11. Ib. p. 344. B.* — Theophil. *Ant. Ad Autol. l. 1. n. 4. Ib. p. 362.* — Iren. *Adv. haer. et. l. 2. c. 2. n. 5. p. 118.* — Athanas. *Or. cont. Gent. n. 29. Opp. T. 1. p. 28. A.* — Epiphani. *Haer. 70. n. 7. Opp. T. 1. p. 818. C. s.* — Chrysost. *Hom. 38. in Act. Apost. n. 2. T. 9. p. 289. D. Hom. 15. n. 1. p. 120. E. n. 2. p. 121. C. Hom. 2. de Incompreh. adv. Anom. n. 4. T. 1. p. 457. E. Adhort. I. ad Theodor. laps. n. 1. T. 1. p. 2. B.* — Dionys. Areop. *De div. nom. c. 8. Opp. T. 1. p. 775.* — Fulgent. *Rusp. De ad. ad. Petr. c. 3. n. 25. Opp. 511. De verit. praed. et grat. l. 3. c. 9. p. 14. p. 488.* — Petr. Damian. *Opusc. 36. c. 10. Opp. T. 3. p. 315.*

hilo ad. existentiam vocare et in ea conservare possit. Atque illam tandem

c. tam infinita rerum aptissime inter se connexarum multitudo atque ineffabilis varietas palam praedicat.

§. 20. Continuatio.

Posse Deum facere et alia, quam quae sunt, atque ideo falsam esse sententiam illam, Deum nihil posse praeter ea, quae facit, seu Deum omnia possibilia efficere, necessario ex infinitate divinae potentiae consequitur; quum potentia infinita tam parum, quam infinita rerum possibilitas, exhauriri aut terminari queat.

In SS. Litteris id ipsum diserte eo traditur, quod docetur, ut inferius ostendemus, liberam inesse Deo agendi, vel non agendi potestatem, qua quoad res creatas utatur; et quod expresse Deus dicitur posse alia facere, vel alia facturum fuisse, quam revera fecit. *Stulle egisti*, ait Samuel ad Saul, *nec custodisti mandata Domini Dei tui, quae praecepit tibi. Quod si non fecisses, jam nunc praeparasset Dominus regnum tuum super Israël in sempiternum* ¹⁾. Joannes Bapt.: *Dico enim vobis: quoniam potens est Deus de lapidibus istis suscitare filios Abrahæ* ²⁾. Et Christus Dominus ad Petrum: *An putas, quia non possum rogare patrem meum, et exhibebit mihi modo plus quam duodecim legiones Angelorum* ³⁾.

SS. Patres autem consulto sententiam nostram adstruunt, contrariamque impugnant. Sic Theophilus Alex. contra Origenem disputans: *Quomodo non impium est, inquit, humanae arti finem non imponere, nec operibus suis artificum scientiam consequare; et Deum tanta fecisse dicere rationalium creaturarum, quanta facere poterat? Audiat ergo et discat impius: Non tanta est virtus Dei, quantas fecisse dicitur rationabiles creaturas: sed imponens mensuram operibus, ultra quam esse non poterant, et rerum numerum dispositionis suae arte concludens, ipse mensura et numero non tenetur. — Non tantas fecit creaturas,*

¹⁾ 1. Reg. 13, 13.

²⁾ Matth. 3, 9.

³⁾ Matth. 26, 53. Cf. Sap. 11, 18.

quantas poterat: sed tantae ab eo factae sunt, quantae debebant fieri. — Necesse est, numero mensuraque factorum Dei fortitudinem coaequari, si non potuit majora facere, quam fecit ¹⁾ — Theodoretus: *Voluit autem non quaecunque poterat, sed quae satis esse censuit. Facile enim illi fuerat, decies ac vicies mille mundos producere: quando quidem velle omnium operum est facillimum. Nam et nobis ipsis omnium facillimum est velle: sed voluntatem nostram non illico sequitur facultas. Deus autem universorum, quae vult, omnia potest. Divinae siquidem voluntati facultas adjuncta est. Neque tamen rerum creationem sua potestate commensus est, sed quae voluit, ea fecit ²⁾*. — Dionysius exponens, Deum *ὁράων* dici, cuius causam hanc praecipue reddit, quod videlicet sit infinite potens, non solum omnem potentiam producendo, sed etiam supra omnem potentiam, et supra ipsam per se potentiam existendo; et quod desuper possit innumerabiliter infinitas alias potentias producere; et quod infinitae infinito numero productae potentiae numquam queant supraquam infinitam potentiae ejus potentificae effectiorem habere ³⁾. — Tertullianus: *Plane nihil Deo difficile. Sed si tam abrupte in praesumptionibus nostris hac sententia utamur, quidvis de Deo confingere poterimus, quasi fecerit, quia facere potuerit. Non autem quia omnia potest facere, ideoque credendum est, illum fecisse etiam, quod non fecerit. Sed an fecerit, requirendum ⁴⁾*. Et Augustinus: *Tunc in clarissima sapientiae luce videbitur, quod nunc piorum fides habet, antequam manifesta cognitione videatur, quam certa, immutabilis, efficacissima sit voluntas Dei; quam nulla possit, et non velit, nihil autem velit, quod non possit ⁵⁾*

¹⁾ Epist. pasch. n. 17—18. In Galland. Bibl. PP. T. 7. 629.

²⁾ Serm. 4. Cont. Gent. Opp. T. 4. p. 537.

³⁾ De div. nom. c. 8. Opp. T. 1. p. 775.

⁴⁾ Adv. Prax. n. 10. Opp. V. 2. p. 413.

⁵⁾ Enchir. c. 95. n. 24. Opp. T. 6. c. 231. Cf. De nat. et grat. c. 7. n. 8. T. 10. c. 130. Cont. Faust. l. 26. c. 7. T. 8. c. 438. De spir. et litt. c. 1. n. 1. T. 10. c. 85. c. 35. n. 62. c. 121. — Athanas. Or. cont. Gent. n. 39. Opp. T. 1. P. 1. p. 38. Or. 2. cont. Arian. n. 68. p. 536. — Epiph. in Haer. 70. n. 7. Opp. T. 1. p. 818. C. D. — Chrysostom. Hom. 24. in Gen. n. 7. Opp. T. 4. p. 227. A. B. — Cyrill. Alex. In Joan. l. 9. Opp. T. 4. p. 803. B. — Ps. Justin. Quaest. Christ. ad Graec. Conf. resp. 66

Neque obmoveri potest, si potentia divina revera esset infinita, assignari debere quoque effectum infinitum, qualis autem nequaquam datur. Nam recte propterea, quia potentia Dei infinita est: nullo modo exauriri potest, satisque est, quod modus agendi divinae potentiae infinitus sit.

Observ. 1. Illud, quod repugnantia a Deo effici nequeant, ipsius omnipotentiae obesse, nemo sanus dixerit. Causa enim hujus non in defectu potentiae aliquo, sed potius in defectu possibilitatis ex parte rerum harum sita est. Res sibi contradicens *oūx ōv*, non-ens, seu nihil est; nil autem efficere non posse recte omnipotentiae est. Unde de ejusmodi rebus bene adnotat S. Thomas: *Convenientius dicitur, quod ea non possint fieri, quam quod Deus non possit facere* ¹⁾. Atque Hugo a S. Viet.: *Summe potens est, qui potest omne, quod possibile est: nec ideo minus potest, quia impossibilia non potest, quia impossibilia posse non est posse, sed non posse* ²⁾. Et rursus: *Itaque omnipotest Deus, quae posse potentia est. Et ideo vere omnipotens est, quia impotens esse non potest* ³⁾.

Eo minus autem potest statui, esse defectum omnipotentiae, ut Plinius somniavit, quod in Deo fieri nequeant, quae ejus perfectioni infinitae repugnant, ut e. g. quod non possit sibi Deus vitam adimere, etc.; quum haec omnia pariter impotentis, non autem potentis sint. *Dicitur enim omnipotens*, ait Augustinus, *faciendo, quod vult, non patiendo, quod non vult* ⁴⁾. Et alibi: *(Deus) non potest mori, non potest peccare, non potest mentiri, non potest falli. Tanta non potest: quae si posset, non esset omnipotens* ⁵⁾. Et Ambrosius: *Impossibile est mentiri Deum. Impossibile quoque istud numquidnam infirmitatis est? Non utique. — Quid ei impossibile? non quod virtuti arduum, sed quod na-*

¹⁾ 2. n. 7. Opp. Justin. p. 557. B. — Lactant. *De opific. D. c. 3.* Opp.

²⁾ 2. p. 77. — Hieronym. *Epist. 98.* (Theophil. Alex. Paschal. 2.)

³⁾ 17. Opp. T. 1. c. 600. A. B.

⁴⁾ 1. q. 25. art. 3. Opp. T. 20. p. 160. c. 2.

⁵⁾ *Erud. theol. De Sacram. l. 1. p. 2. c. 22.* Opp. Rothom. 1648. T. 3.

⁶⁾ 502. c. 2. Cf. Anselm. *Proslog. c. 7.* Opp. p. 31. *De cas. diab. c. 12.*

⁷⁾ 67. c. 2. C. D.

⁸⁾ *Annot. elucidat. Allegor. in Luc. super Magnific. T. 1. p. 324. c. 1. B.*

⁹⁾ *De civ. D. l. 5. c. 10.* Opp. T. 7, c. 125.

¹⁰⁾ *Serm. 213. In tradit. Symb. c. 1. n. 1. T. 5. c. 939. Serm. 214. n. 4. c. 945.*

Cont. Faust. l. 26. c. 5. T. 8. c. 436. s. De Symb. n. 2. T. 6. c. 547.

turae ejus contrarium, Impossibile, inquit, est ei mentiri. Impossibile istud non infirmitatis est, sed virtutis e majestatis ¹⁾).

Observ. 2. Nos omnipotentiam tanquam vim infinitam voluntat divinae inhaerentem cogitamus; alii vero illam ad ipsam substantiam divinam immediate, ut ita dicamus, referunt, et sic quasi tres infinitas vires, videlicet intellectum, voluntatem atque vim effectricem in Deo assumunt. Putamus tamen, hoc sine ratione sufficienti statui, quum natura spiritus intellectu ac voluntate absolvatur. Nostrae sententiae SS. Litterae quoque, quae tradunt ²⁾, voluntatem divinam esse, cui nemo resistere possit, nec non SS. Patres suffragantur ³⁾).

Observ. 3. Doctrina de omnipotentia divina excitatur:

a. Ut nunquam obliviscamur, omnia quaecunque existunt, non nisi ex Deo et per Deum esse, ita ut, quemadmodum averso fontivuli exarescunt, ac sole oblitescente obscurantur caetera, pariter si Dei abesset vitalis omnipotentia, omnia tabescerent et interirent

b. Ut fastum, arrogantiam ac pervicaciam deprimamus, utpot qui a nobis quasi ex nobis nihil sumus, nihilque valemus, sed toti Deo pendemus.

c. Ut nobis nunquam fidamus, neque in rebus terrestribus, sed omnem nostram spem in Deo collocemus ⁴⁾; nam in ipso omnia possumus, qui nos confortat ⁵⁾, *Deus enim noster refugium, et virtus adiutor in tribulationibus* ⁶⁾. Sed et

¹⁾ Epist. 50. n. 1. Opp. T. 2. c. 993. Cf. n. 2. Ib. — Cyrilj. Alex. Comm. in Joan. l. 2. c. 6. Opp. T. 4. p. 214 ss. — Chrysost. Hom. 38. in Joan. n. 4. Opp. T. 8. p. 221 s. — Dionys. Areop. De div. nom. c. 8. §. 6. Opp. T. 1. p. 777. — Boëth. De cons. phil. pros. 12. p. 72 s. — Isidor. Pelus. L. 3. Epist. 335. p. 259 s. — Petr. Damian. Opusc. 36. De div. omnip. c. 1. Opp. T. 3. p. 308 s. — Isidor. Hisp. Orig. l. 7. c. 1. Opp. p. 53. c. 2. — Anselm. Prosl. c. 7. Opp. p. 31.

²⁾ Cf. Gen. 50, 19. Esth. 13, 9. Rom. 9, 19.

³⁾ Cf. Clem. Alex. Cohort. ad Gent. n. 4. Opp. T. 1. p. 55. — Athanas. Cont. Arian. Or. 3. n. 62. Opp. T. 1. p. 611. — Chrysost. Hom. 2. de Incompreh. n. 4. Opp. T. 1. p. 457. E. — Cyrilj. Alex. Thes. assert. 2. Opp. T. 5. p. 1. p. 54. E. De Trin. Dial. 4. p. 540. Dial. 6. p. 618. D. — Theodoret. Graec. affect. cur. Serm. 4. Opp. T. 4. p. 536. B. — Ambros. Comm. in Luc. l. 5. n. 3. Opp. T. 1. c. 1355. Hexaëm. l. 1. n. 22. c. 12. A. — Augustin. De Trin. l. 3. c. 2—4. n. 7—10. Opp. T. 3. c. 795. — Iren. ap. J. Damasc. De duab. Chr. volunt. n. 28. Opp. T. 1. p. 543.

⁴⁾ Cf. Ps. 19, 8.

⁵⁾ Phil. 4, 13.

⁶⁾ Ps. 45, 1 ss. Cf. 90, 1 ss. Ephes. 6, 10.

d. ut Deum timeamus, qui potest et animam et corpus perdere in gehennam ¹⁾).

§. 21. S. b. Summe bonus.

Omnium Dei proprietatum et ad professionem notissima et ad contemplandum jucundissima sine dubio est, quae modo disputationi nostrae succedit, divina bonitas.

Est autem bonitas Dei alia naturalis, quae ad naturam divinam universim consideratam, alia moralis, quae ad internam quasi voluntatis divinae indolem, et alia relativa, quae ad voluntatem divinam relata ad alia entia spectat.

Bonitas naturalis nil aliud est, quam ipsa essentiae seu naturae divinae infinita perfectio. Hoc sensu Deus infinite bonus est, quia omne genus verarum perfectionum, et quidem per se possidet; atque hanc bonitatem intelligimus, quando Deum bonum originarium (das unerſchaffene Gut) adpellamus. Bonitas moralis in Deo est ipsius absoluta sanctitas. De bonitate Dei naturali supra egimus, et de bonitate morali inferius agemus; unde hic nonnisi de bonitate relativa, seu de benignitate Dei dicimus.

Potest vero bonitas haec relativa seu benignitas definiri seu ea perfectio voluntatis seu substantiae divinae, qua Deus creaturis tantum perfectionis ac felicitatis, quantum natura ac nexus earundem, nec non sapientissima consilia divina patiuntur, largiri vere ac constanter vult, seu qua entibus felicitatis capacibus absolute benevult ac benefacit; quapropter et benevolentia ac beneficentia divina discernitur.

Haec divina bonitas varia accipit nomina pro variis naturarum creaturarum, ad quas attinet, conditionibus. Relata ad entia libertate morali praedita dicitur charitas (ἀγάπη) ²⁾, et ad homines speciatim humanitas (φιλανθρωπία) ³⁾, quatenus non merentibus dona dividit, gratia (χάρις) ⁴⁾; quando miseris et indigentibus succurrit, atque speciatim peccatori spatium poenitentiae, et poenitenti vere etiam veniam concedit, misericor-

¹⁾ Matth. 10, 28.

²⁾ Deut. 33, 3. Joan. 3, 16. 1. Joan. 4, 8. 16.

³⁾ Tit. 3, 4.

⁴⁾ Rom. 8, 24. Ephes. 1, 6. 7.

dia (ἄλσος οἰκτιρμός, σπλάγχνα τοῦ ἐλέους) ¹⁾ vel etiam clementia ²⁾; quatenus malos tolerat, patientia ³⁾; et quatenus poenas eorum differt, aut mitigat, longanimitas (μακροθυμία) ⁴⁾, vel lenitas (χρηστότης) ⁵⁾.

Bonitatem divinam sustulerunt Manichaei, qui Deum auctorem mali statuerunt, quibus recentiori aevo Petrus Bayle non erubuit adstipulari.

Veruntamen nil potest esse manifestius, nihilque certius divina bonitate, quam in Deo revera dari, manifestissime docet revelatio, atque in eo necessariam esse, invicte ostendit ipsa ratio. Nihil enim

A. SS. Litterae frequentius atque vehementius quam divinam benignitatem commendant. Et quidem

a. Deum benignum erga omnes creaturas docent. *Diligis enim omnia*, ait Sapiens, *quae sunt, et nihil odisti eorum, quae fecisti: nec enim odians aliquid constituiisti, aut fecisti* ⁶⁾. Psalmista: *Suavis Dominus: et miserationes ejus super omnia opera ejus. Oculi omnium in te sperant, Domine: et tu das escam illorum in tempore opportuno. Aperis tu manum tuam: et imples omne animal (animans) benedictione. Prope est Dominus omnibus invocantibus eum: omnibus invocantibus eum in veritate. Voluntatem timentium se faciet, et deprecationem eorum exaudiet: et salvos faciet eos. Custodit Dominus omnes diligentes se: et omnes peccatores disperdet* ⁷⁾. Alibi: *Misericordia (חַסְדִּים) Domini plena est terra* ⁸⁾. Et iterum: *Confortemini Domino, quoniam bonus: quoniam in saeculum (immutabilis) misericordia (חַסְדִּים) ejus* ⁹⁾. — Atque Christus Dominus: *Respicite volatilia coeli, quoniam non serunt*

¹⁾ Ps. 50, 3. Matth. 5, 7. Luc. 1, 72. 78. 2. Cor. 1, 3.

²⁾ Exod. 34, 6. 2. Esdr. 9, 17. 31. Jon. 4, 2.

³⁾ Rom. 2, 4. 9, 22. 1. Petr. 3, 20.

⁴⁾ Rom. 11, 22.

⁵⁾ Rom. 2, 4.

⁶⁾ Sap. 11, 25.

⁷⁾ Ps. 144, 9. 15—16. 18—20. Cf. 103, 10 ss. 146, 8—9. Job. 38, 41. 1—30. 40, 10—28. 41, 1—25.

⁸⁾ Ps. 32, 5. Cf. 118, 64. Eccli. 18, 4. 12.

⁹⁾ Ps. 105, 1. Cf. Ps. 35, 8—9. Jer. 33, 11.

neque metunt, neque congregant in horrea: et Pater vester coelestis pascit illa. Nonne vos magis pluris vultis illis ¹⁾? Et rursus: Nonne quinque passeret veniunt dydenio, et unus ex illis non est in oblivione coram Deo ²⁾?

b. Speciatim autem Deum amore summo complecti homines, et inter hos iterum justos. *Quid est homo, canit Psalmista: quod memor es ejus? aut filius hominis, quoniam visitas eum? Minuisti eum paulo minus ab Angelis, gloria et honore coronasti eum: et constituisti eum super opera manuum tuarum. Omnia subjecisti sub pedibus ejus, oves et boves universas: insuper et pecora campi. Volucres coeli, et pisces maris, qui perambulant semitas maris ³⁾.* Christus Dominus autem ait: *Diligite inimicos vestros, benefacite his, qui oderunt vos: et orate pro persecutentibus, et calumnantibus vos: ut sitis filii Patris vestri, qui in coelis est: qui solem suum oriri facit super bonos, et malos: et pluit super justos et injustos ⁴⁾.* Et Apostolus: *Non sine testimonio semetipsum reliquit benefaciens de soelo, dans pluvias, et tempora fructifera, implens cibo et laetitia corda nostra ⁵⁾.* — *Qui praestat nobis omnia abunde ad fruendum ⁶⁾.* Atque rursus: *Quid habes, quod non accepisti? Si autem accepisti, quid gloriaris, quasi non acceperis ⁷⁾?* — Imprimis vero justos a Deo diligi, docet Moyses his verbis: *Scitis, quia Dominus Deus tuus, ipse est Deus fortis, et fidelis, et custodiens pactum, et misericordiam diligentibus se, et his, qui custodiunt praecepta ejus, in mille generationes ⁸⁾.* Psalmista: *Quam magna multitudo dulcedinis tuae, Domine, quam abscondisti timentibus te, i. e. quam multae, et quam magnae deliciae, quas repositas habes timentibus te ⁹⁾.* Atque Christus Dominus: *Qui dili-*

¹⁾ Matth. 6, 26. Cf. Luc. 12, 24.

²⁾ Luc. 12, 6.

³⁾ Ps. 8, 5—10. Cf. Gen. 1, 26—31. Job. 7, 17.

⁴⁾ Matth. 5, 44—45. Cf. 6, 25—32. Luc. 12, 22—30.

⁵⁾ Act. 14, 6.

⁶⁾ 1. Tim. 6, 17.

⁷⁾ 1. Cor. 4, 7. Cf. Jac. 1, 17.

⁸⁾ Dent. 7, 9. Cf. Exod. 20, 6.

⁹⁾ Ps. 30, 20. Cf. 32, 18. 102, 11, 13. 17—18, 113, 13, Sap. 4, 15. Luc. 1, 50.

git me, diligetur a Patre meo; et ego diligam eum, et manifestabo ei meipsum ¹⁾. Quapropter et SS. Scripturae Deum patrem hominum ²⁾, patrem misericordiarum, et Deum totius consolationis ³⁾ compellant, atque eum nos amore longe teneriori ipso parentum amore diligentem exhibent, cujus opem nemo frustra imploret, qui det omnibus superabundanter, quam petimus et intelligimus, quique charitas ipsa sit. *Numquid*, ait Dominus apud Isaiam, *oblivisci potest mulier infantem suum, ut non misereatur filio uteri sui? Et si illa oblita fuerit, ego tamen non obliviscar tui. Ecce in manibus meis descripsi te: muri tui coram oculis meis semper* ⁴⁾. Christus Dominus: *Petite, et dabitur vobis: quaerite, et invenietis: pulsate, et aperietur vobis. Omnis enim, qui petit, accipit: et qui quaerit, invenit: et pulsanti aperietur. Aut quis est ex vobis homo, quem si petierit filius suus panem, numquid lapidem porriget ei? Aut si piscem petierit, numquid serpentem porriget ei? Si ergo vos, cum sitis mali, nostis bona data dare filiis vestris: quanto magis pater vester, qui in coelis est, dabit bona petentibus se* ⁵⁾? Et Joannes Apostolus: *Et nos cognovimus, et credimus* (fide complexi sumus) *charitati* (charitatem), *quam habet Deus in nobis* (erga nos). *Deus charitas est: et qui manet in charitate, in Deo manet, et Deus in eo* ⁶⁾. Atque ideo

c. Deum omnibus nostris necessitatibus atque miseriis benigne succurrere, non obstantibus peccatis nostris. *Dominator Dominus Deus*, ait Moyses, *misericors, et clemens, patiens, et multae miserationis, ac verax* (fidelis) ⁷⁾. Davides: *Miserator, et misericors Dominus: patiens et multum misericors. Suavis Dominus universis: et miserationes super omnia opera ejus* ⁸⁾. Speciatim autem nobis Deus dat, quibus

¹⁾ Joan. 14, 21. Cf. 16, 27. Act. 10, 35. 1. Joan. 4, 12. 13. 15.

²⁾ Deut. 32, 6. Sap. 2, 13. 16. 18. 18, 4. Is. 63, 6. Mal. 1, 6. Matth. 5 45. 6, 9. 15. 23, 9. Rom. 8, 15. 1. Cor. 8, 6. Ephes. 4, 6. 1. Joan. 3, 1.

³⁾ 2. Cor. 1, 3.

⁴⁾ Is. 49, 15—16.

⁵⁾ Matth. 7, 7—11. Cf. 21, 22. Luc. 11, 11—13. Ephes. 3, 20.

⁶⁾ 1. Joan. 4, 16. Cf. 2. Cor. 13, 11. 1. Petr. 5, 10.

⁷⁾ Exod. 34, 6. Cf. Num. 14, 18.

⁸⁾ Ps. 144, 8—9. Cf. 85, 5. 15. 111, 4. Porro Psalmi: 102, 106, 113, 117, et 135, qui integri misericordiam divinam canunt. Jac. 5, 11.

a) corpore indigemus. *Qui dat escam omni carni: quoniam in aeternum misericordia ejus* ¹⁾). Quare Christus, postquam ostenderat, Deum ipsarum plantarum ac animalium curam gerere, nos admonet: *Nolite ergo solliciti esse, dicentes: Quid manducabimus, aut quid bibemus, aut quo operiemur? Haec enim omnia gentes inquirunt. Scit enim pater vester, quia his omnibus indigetis* ²⁾). Et Apostolus post Magistrum: *Omnem sollicitudinem vestram projicientes in eum, quoniam ipsi cura est de vobis* ³⁾). — Atque

β. maxime quae nobis quoad animam sunt necessaria. Hinc nobis, teste S. Scriptura, ut dona naturalia intelligentiae et liberi arbitrii silentio praetereamus, revelationem dedit, *multifariam, multisque modis olim loquens patribus, novissime locutus est nobis in Filio* ⁴⁾), *erudiens nos, ut abnegantes impietatem, et saecularia desideria, sobrie, et juste, et pie vivamus in hoc saeculo* ⁵⁾). — Porro per Filium suum nos redemit. *Sic enim Deus, ait ipse divinus Salvator, dilexit mundum, ut Filium suum unigenitum daret: ut omnis, qui credit in eum, non pereat, sed habeat vitam aeternam* ⁶⁾). Et Apostolus Paulus: *Commendat autem charitatem suam Deus in nobis: quoniam cum adhuc peccatores essemus, secundum tempus Christus pro nobis mortuus est* ⁷⁾). Atque Joannes: *In hoc apparuit charitas Dei in nobis (in nos), quoniam Filium suum unigenitum misit Deus in mundum, ut vivamus per eum. In hoc est charitas (scil. manifestata): non quasi nos dilexerimus Deum, sed quoniam ipse prior dilexit nos, et misit Filium suum propitiationem pro peccatis nostris* ⁸⁾). — Atque nobis per Spiritum S. gratiam justificantem confert, qua nobis peccata remittuntur, nosque renovati ac regenerati iterum in amici-

¹⁾ Ps. 135, 25. Cf. Ps. 103, 14—15. Eccli. 34, 20, 50, 25. Jer. 33, 11. Act. 14, 16.

²⁾ Matth. 6, 31. 32.

³⁾ Petr. 5, 7,

⁴⁾ Hebr. 1, 1—2.

⁵⁾ Tit. 2, 12. Cf. 1. Cor. 1, 30. Joan. 1, 17. Eccli. 17, 9—10.

⁶⁾ Joan. 3, 16.

⁷⁾ Rom. 5, 8—9. Cf. 3, 23—26. 8, 15. 32. Gal. 4, 4—6. Ephes. 1, 6. 2. Tim. 1, 9. 1. Cor. 1, 10.

⁸⁾ 1. Joan. 4, 9—10. Cf. 3, 1. 16. 4, 14. 1. Tim. 2, 6. Tit. 2, 11. 3, 4.

tiam divinam recipimur, nec non illa gratiae auxilia exhibet, quibus ad justificationem rite disponimur, et in justitia perseveramus; nil enim Deus ardentius desiderat, quam resipiscentiam atque salutem nostram; unde peccatores patienter fert, in poenitentia indugiendis longanimis ac clemens est, atque ad condonandum vere poenitentibus semper paratus. *Quotquot enim, inquit Joannes, receperunt eum, dedit eis potestatem, filios Dei fieri, his, qui credunt in nomine ejus*¹⁾. Et Paulus: *Non enim accepistis spiritum servitutis iterum in timore, sed accepistis spiritum adoptionis filiorum, in quo clamamus: Abba (Pater)*²⁾. Atque: *Deus est, qui operatur in vobis, et velle, et perficere pro bona voluntate*³⁾. Huc pertinent porro sequentia adhuc loca: *Numquid voluntatis meae est mors impij, dicit Dominus Deus, et non ut convertatur a viis suis, et vivat? — Quia nolo mortem morientis, dicit Dominus Deus, revertimini, et vivite*⁴⁾. — *Quiescite agere perverse. Discite bene facere. — Et venite et arguite me dicit Dominus: si fuerint peccata vestra, ut coccinum, quasi nix dealbabuntur: et si fuerint rubra, quasi vermiculus, velut lana dealbabuntur*⁵⁾. — *Convertimini ad me in toto corde vestro, in jejunio, et in fletu, et in planctu. Et scindite corda vestra, et non vestimenta vestra, et convertimini ad Dominum Deum vestrum: quia benignus, et misericors est, patiens, et multae misericordiae, et praestabilis super malitia*⁶⁾. — *Patienter agit propter vos, nolens aliquos perire, sed omnes ad poenitentiam reverti*⁷⁾. — *An divitias bonitatis ejus, et patientiae, et longanimitatis contempnitis? Ignoras, quoniam benignitas Dei ad poenitentiam te adducit*⁸⁾. — *Miseratur, et misericors Dominus: longanimis, et multum misericors. Non enim in perpetuum irascetur: neque in aeternum comminabitur. Non se-*

¹⁾ Joan. 1, 12.

²⁾ Rom. 8, 15. Cf. Gal. 4, 6. 1. Cor. 3, 16. Eccli. 17, 1-2.

³⁾ Philipp. 2, 13. Cf. 1, 6. Rom. 8, 26. 1. Cor. 10, 13. 1. Thess. 5, 2-3.
²⁾ Thess. 3, 3. 1. Petr. 5, 10. Ps. 24, 8-10. Eccli. 17, 6-8.

⁴⁾ Ezech. 18, 23. 32. Cf. 33, 11.

⁵⁾ Is. 1, 16-18. Cf. Sap. 11, 21. Eccli. 2, 13. Mich. 7, 18, 19.

⁶⁾ Joël. 2, 12-13.

⁷⁾ 2. Petr. 3, 9.

⁸⁾ Rom. 2, 4.

cundum peccata nostra fecit nobis: neque secundum iniquitates nostras retribuit nobis. Quoniam secundum altitudinem coeli a terra, corroboravit misericordiam suam super timentes se. Quantum distat Ortus ab Occidente: longe fecit a nobis iniquitates nostras. Quomodo miseretur pater filiorum, misertus est Dominus timentibus se ¹⁾. Et: Pareis autem omnibus: quoniam tua sunt, Domine, qui amas animas. O quam bonus, et suavis est, Domine, spiritus tuus in omnibus. Ideoque eos, qui exerrant, partibus (i. e. per partes, sensim, paulatim) corripis: et de quibus peccant, admones, et alloqueris: ut relicta malitia, credant in te, Domine ²⁾. — Quin imo, quando Deus mala nobis immittit, nonnisi bonum nostrum intendit. Quem enim diligit Dominus, inquit Apostolus, castigat, flagellat autem omnem filium, quem recipit. In disciplina perseverate. Tamquam filiis offert se Deus: quis enim filius, quem non corripit pater? — Omnis autem disciplina in praesenti quidem videtur non esse gaudii, sed moeroris: postea autem fructum pacatissimum exercitatis per eam reddet justitias ³⁾. Et alibi: Gloriamur in tribulationibus: scientes, quod tribulatio patientiam operatur, patientia autem probationem, probatio autem spem, spes autem non confundit ⁴⁾. — Tandem.

d. docetur, bonitatem ac misericordiam Dei esse universalem, quum ipse non Iudaeorum Deus sit, imo *et Gentium* ⁵⁾, *qui omnes homines vult salvos fieri, et ad agnitionem veritatis venire* ⁶⁾; perro sine omni prorsus hominum respectu, *quia non est personarum acceptator Deus* ⁷⁾; *et aequaliter cura est illi de omnibus* ⁸⁾; atque immutabilem, nam *misericordia Domini ab aeterno, et usque in aeternum super timen-*

¹⁾ Ps. 102, 8—13.

²⁾ Sap. 11, 27. 12, 2. Cf. ss.

³⁾ Hebr. 12, 6. 7. 11. Cf. Prov. 3, 11—12. Tob. 2, 12. 13, 13. Jud. 8, 27.

⁴⁾ Rom. 5, 3—5.

⁵⁾ Rom. 3, 29. Cf. 11, 32.

⁶⁾ 1. Tim. 2, 4. Cf. 2. Petr. 3, 9. Deut. 10, 18. Ps. 141, 9. Act. 10, 35.

⁷⁾ Act. 10, 34.

⁸⁾ Sap. 6, 8. Cf. Eccli. 35, 16—21. Prov. 22, 2. 29, 13. Job. 34, 19. **T**uth. 5, 45. Luc. 6, 35.

tes eum ¹⁾), montes commoventur, et colles contremiscunt: misericordia autem ejus non recedit a populo ²⁾); atque sine poenitentia sunt dona, et vocatio Dei ³⁾).

B. Summam Deo bonitatem atque misericordiam convenire, unanimi consensu docent quoque SS. Patres, e quorum numero tamen in doctrina adeo plana, atque per praecones Ecclesiae continuo ac ubique tradita, paucos laudasse sufficiat. Sic ait Athenagoras: *Deus cum perfecte bonus sit, perpetuo beneficus est* ⁴⁾). — Origenes: *Hic* (Deus bonus, justus et omnipotens) *cum in principio crearet ea, quae creare voluit, id est rationabiles naturas, nullam habuit creandi causam, nisi propter se ipsum, id est, bonitatem suam* ⁵⁾). — Chrysostomus: *Cum nullo eorum, quae apud nos sunt, egeret Deus, nos condidit. Quod autem nullo egeret, ostendit, cum nos postremo condidit; si enim eguisset, longe ante fecisset. Quod si ille sine nobis erat, nos autem postremis temporibus facti sumus, non quod nostri egeret nos condidit. Coelum, terram, mare et omnia propter nos condidit. Annon, quaeso, haec ex bonitate facta sunt?* ⁶⁾). — Leo: *Deus omnipotens, et clemens, cujus natura bonitas, cujus voluntas potentia, etc.* ⁷⁾). — Fulgentius: *Nisi summe bonus esset, non se gubernandis rebus quoque infimis praestitisset. Igitur tam in magnis, quam in parvis quibusque rebus conditis magna est bonitas, atque omnipotentia conditoris* ⁸⁾). Atque Zacharias Mityl.: *Deus benefactor, et opifex, et Deus eorum, quae beneficio affecturus est, et procreaturus, non necessario beneficia conferens, aut procreans, neque ut Deus sit, in rerum naturam res ipsas producens: habet enim ex se ipso id, quod est, sed ut bonus, et Deus* ⁹⁾). — Possidet simul ingentem et coaeternam beatam (suae) naturae voluntatem erga ea, quae et producenda sunt, et beneficiis cumulanda. Caeterum produxit, cum

¹⁾ Ps. 102, 17. Cf. 99, 5. 105, 1. 107, 1—4. 137, 8.

²⁾ Is. 54, 10.

³⁾ Rom. 11, 19.

⁴⁾ Leg. pro. Christ. n. 26. Opp. Justin. p. 324. C.

⁵⁾ De princ. l. 2. n. 6. Opp. T. 1. p. 99. c. 1. D.

⁶⁾ Hom. 3. in Epist. ad Philem. n. 3. Opp. T. 11. p. 789. C.

⁷⁾ Serm. 2. de nativ. c. 1. Opp. p. 71. c. 1.

⁸⁾ De fid. ad Petr. c. 3. n. 25 s. Opp. p. 511.

⁹⁾ De mund. opif. In Galland. Bibl. PP. T. 11. p. 280. D.

profuturum iis, quae producta sunt, vidit, atque ratio et ordo postulabat. Sic circa res Dei voluntas et beneficentia aeterna est, non ut earum natura in tempore ¹⁾. — Hilarius, qui scribit, Deum universa sic molitum esse, nullo ut eorum indigeret, et praesertim hominem instituisse, non quod officio ejus in aliquo egerit, sed quia bonus est, participem beatitudinis suae condidit, et rationale animal in usum largiendae suae aeternitatis vita sensuque perfecit. Et pergit: Nullum a nobis, nisi innocentiae, et religionis, et fidei obsequium Deus postulat. Amari se a nobis exigit: non utique amoris in se nostri fructum aliquem sui causa ipse percipiens, sed amore ipso nobis potius, qui eum amabimus, profuturo. Nam amari se, sibi que nos obsequi idcirco, ut nobis bene sit, expetit, ut digni beatitudinis suae ac bonitatis suae munere per meritum amoris sui, et obsequii judicemur. Bonitatis autem usus, ut splendor solis, ut lumen ignis, ut odor succi, non praebentis proficit, sed utenti. Quod ergo sumus, profectus noster est potius, quam ejus, qui nos in id, quod sumus, instituit: quia Deus bonorum eorum, quae in se sunt aeterna, non invidens, in sensum nos, atque usum suae bonitatis assumit. Sed qui perfectus ac bonus est, bonitate in nos ac beatitudine sua non sine ratione, ac modo usus est ²⁾.

Augustinus: *Omnia bona, sed facta bona; et a Deo bona, non a se. Qui fecit haec, super omnia est bonus: quia nullus eum fecit bonum, sed a se ipso bonus est: nec tamen sibi soli, sed et nobis bonus est. Conflimini, ergo Domino, quoniam bonus est ³⁾. — Atque Dionysius ait: Sic essentia sua bonus est Deus, ut tanquam substantiale bonum bonitatem in omnia porrigat. Quemadmodum enim sol ille noster non cogitatione aut voluntate, sed eo ipso, quod est, illuminat universa, quae quoquo modo lucis ejus sunt capacia: sic etiam ipsum bonum (quod non secus praestat soli, quam primaeva species imagini obscurae) ipsamet substantia sua rebus omnibus, pro cujusque captu, totius bonitatis suae radios affundit.*

C. Summam Dei bonitatem denique quoque probat ratio.

¹⁾ Ib. p. 279. E.

²⁾ In Ps. n. 15—16. Opp. T. 1. c. 38 s. Cf. Augustin. De doctr. Christ. l. 1. c. 31. Opp. T. 3. P. 1. c. 15 s.

³⁾ Serm. 29. c. 1. n. 1. Opp. T. 5. c. 149. Cf. Serm. 45. c. 5. n. 5. c. 89. Serm. 23. c. 8. n. 9. c. 120.

a. Benignitas enim, seu benevolentia ac beneficentia procul dubio vera perfectio est; et hinc Deo pro ejus infinitate quoque, eaque infinita necessario tribuenda est.

b. Id ipsum porro ex consideratione rerum creaturarum clare colligitur. Nam bonitatem Dei infinitam annuntiant tam innumerae res, vita fruenter, quibus Deus facultatem felicitate fruendi indidit, occasionemque hujus uberem subministrat; manifestamque, ostendunt praecipue naturae intelligentes perfectionis moralis capaces, atque speciatim homines, quos Deus, sibi sufficientissimus, ad imaginem suam condidit, ad cognitionem ac amorem sui, tanquam summi Boni, et felicitatem inenarrabilem vocavit, eosque ideo non tantum naturalibus dotibus, sed et supernaturalibus exornavit, porro postquam lapsi erant, haud deseruit, sed iisdem revelationem contulit, illos per Filium suum unigenitum redemit, atque per Spiritus S. gratiam sanctificat, inque salutis negotio adjuvat, et ne unquam luce coelestis doctrinae sint destituti, aut de ejus superno auxilio incerti, Ecclesiam visibilem, cum qua esse promisit omnibus diebus usque ad consummationem saeculi, fundavit.

Observ. 1. Loca illa S. Scripturae, in quibus de ira, furore, vindicta ¹⁾ in Deo sermo est, doctrinae de summa Dei bonitate haud obstat, ex supra jam adnotatis constat; quum hisce dicendi formulis, humano cogitandi modo adcommoatis, nonnisi Dei mali improbatio ac punitio, atque legis divinae sanctitas graviter nobis ob oculos sistatur.

Observ. 2. Quae mala adsunt: ea partim ad limites rerum finitarum necessarios referenda, partim tanquam poenae nobis immissae, quibus pro peccatis nostris puniamur, et ad meliorem frugem revocemur, partim vero tanquam res, quibus in virtute ac sanetitate provehamur, consideranda sunt.

Observ. 3. Bonitaa, Deum patrem in nos propensissimum exhibens, omnes gratitudinis, amoris spei ac pietatis sensus in mente nostra excitat. Nam quidquid nos sumus, divinae bonitati in acceptis referimus. Deus suo bono bonus, in se continens omnia; nos autem ex ejus plenitudine accepimus, ejus voluntate vivimus, ejus donis ditescimus. Hinc nihil est, quod nos magis ad gratum animum Deo exhibendum, eumque redamandum permoveat, nilquod in necessitatibus nostris, atque in angustiis, periculis ac calamitatibus quibuscunque nos magis impellat ad fiduciam in Deo collo-

¹⁾ Deut. 32, 21—22. 41—42. Ps. 6, 2. Mich. 5, 14. Zach. 8, 2.

eandem, simulque autem ad acquiescendum in ejus omnibus dispositionibus, quum sciamus, omne datum optimum, et omne donum perfectum deaurum esse, descendens a Patre luminum ¹⁾).

b. Non minus porro ad Deum imitandum nos stimulat, ut scilicet simus misericordes, sicut Pater noster misericors est; quum sentiamus, nulla re propius ad Deum nos accedere, quam benefaciendo, et tunc demum filios Dei effici, quando misericordiae et bonitatis divinae imaginem quandam in vita nostra expresserimus ²⁾. *Quia charitas ex Deo est. Est omnis, qui diligit, ex Deo natus est* ³⁾).

§. 22. 9. c. Liberrimus.

In illa autem benevolentissima ac beneficentissima voluntatis efficacia Deus, uti ab omni impedimento, ita et ab omni coactione, seu violentia ac necessitate prorsus immunitus est, seu est liberrimus.

Antequam tamen, in Deo esse voluntatem liberrimam, ostendamus: primum, quid sub libertate intelligendum sit, paucis exponendum est, ne ambiguitate vocis oratio nostra conflictetur.

Liberum communi et insita quasi humanae menti notione dicitur, quod sui juris est. Hinc definit Cicero ita libertatem, *ut sit potestas vivendi, ut velle* ⁴⁾. Liberum itaque omnem coactum, sive negativum, sive positivum, non tantum externum, sed et internum respuit. Quo sensu liberum a spontaneo differt. Spontaneum, *ἐκ φύσεως*, enim potest cum necessitate, seu impulsu interno esse conjunctum, quamvis violentia seu coactu externo careat. Sic parvuli nondum ratione utentes, vel etiam pecudes multa sponte faciunt, ad quae tamen impetu interno quodam feruntur, quem in potestate non habent. Liberum vero, *ἀντὶ τῆς ἐξουσίας* seu *ἐκ φύσεως*, necessitatem non minus, quam violentiam excludit, et sibi contraria et opposita eligendi facultatem expeditam desiderat. Spontaneum ergo contrarium est violentum, non necessarium, libero utrumque. Unde libertas ea est proprietatis, quae voluntas sine ullo impedimento, atque sine ullo coactu, externo et interno, seu sine ulla violentia ac necessitate se ad efficaciam determinare

¹⁾ Jac. 1, 17.

²⁾ Cf. Matth. 5, 44 s. Col. 3, 12–13.

³⁾ 1. Joan. 4, 7.

⁴⁾ *Parad. n.* 5.

potest. Sic quidem sumitur libertas sensu latiori. Sensu enim strictiori libertas est potestas secundum rationis dictamina ad agendum se per semetipsum determinandi. Sensu strictissimo autem est vis praeponderans constanter recte agendi. Quo sensu libertas a sanctitate et virtute non differt, atque etiam libertas Christiana adpellatur. De illa loquitur Christus Dominus, ubi ait: *Si ergo vos Filius liberaverit, vere liberi eritis* ¹⁾. E contrario, qui sceleribus indulget, libertate hoc sensu destitutus, seu *servus peccati* declaratur ²⁾. Propterea etiam religio Christiana a Jacobo *lex perfecta libertatis* vocatur ³⁾. In Deum itaque translata libertas illa est perfectio, qua ipse in sua efficacia ab omni impedimento atque omni violentia ac necessitate prorsus immunis, secundum suam sapientissimam cognitionem per semetipsum actuosus est, i. e. vult et agit, quia actuosus esse, seu velle et agere vult.

Libertas haec, quae solummodo ad efficaciam voluntatis divinae refertur, nequaquam autem ad actus illos internos, uti sunt ipsa existentia Dei, porro generatio Filii, nec non processio seu *ἐκπεμπis* Spiritus S., moralis adpellatur, atque a libertate metaphysica distinguitur, sub qua nihil aliud, quam independentia absoluta seu aseitas intelligitur, qua Deus nemini quidquam debet, et omnis suae vitae efficaciaeque fontem in se ipso habet.

Libertatem moralem in Deo negavit teste Tertulliano Hermogenes, cui assentiunt Pantheistae antiquiores et recentiores omnes.

Deum absolute liberum, nullisque prorsus stimulis quibus in sua efficacia alliciatur aut terreatur, obnoxium esse,

A. SS. Litterarum oracula praedicant. Cujusmodi sunt:

a. *Omnia quaecunque voluit, Dominus fecit in coelo, et in terra, in mari, et in omnibus abyssis* ⁴⁾. — *Haec omnia operatur unus, atque idem Spiritus, dividens singulis, prout vult* ⁵⁾. — *Operatur omnia secundum consilium voluntatis suae* ⁶⁾. Quod enim ex consilio voluntatis operamur, non ex

¹⁾ Joan. 8, 36. Cf. 1. Petr. 2, 16.

²⁾ Joan. 8, 34.

³⁾ Jac. 1, 25.

⁴⁾ Ps. 137, 6. Cf. Apoc. 4, 11.

⁵⁾ 1. Cor. 12, 11.

⁶⁾ Ephes. 1, 11.

necessitate volumus. Cum igitur Deus omnia, quae operatur, ex consilio voluntatis suae operetur: non ex necessitate, sed libertate vult, ita ut possit etiam ea non velle. Atque: *Voluntaria genuit vos verbo veritatis* ¹⁾. — Huc quoque pertinent:

b. illa loca, quibus Deus se paratum dicit, ut pro eo, ac homines agere voluerint, vicissim et ipse sit acturus, et consilium suum pro illorum voluntate moderaturus. Potest itaque Deus, uti sine ulla sui mutatione, ita cum absoluta libertate, sine ullo impedimento aut ullo coactu ad extra agere ac efficax esse. Praeclara est Ezechielis alternantis illius sententiae iudiciiue significatio, qua se Deus obliturum pollicetur omnium scelerum, quae peccator commisit, si ipse resipuerit, et vicissim iusti merita pro nihilo ducturum, si ab instituta probitate desciverit ²⁾.

c. Porro loca, ubi beneficia divina tanquam dona gratuita ac voluntaria describuntur, et ideo gratiae vocabulo censentur. Si enim Deus necessitate compulsus ageret: bona nobis ab eo collata, dona dici haud possent, nedum gratiae, seu dona gratuita ac voluntaria ³⁾. Dein

d. loca ea, quibus liberalitas, misericordia, et aliae virtutes divinae summis encomiis celebrantur, hominesque excitantur tum ad laudem ac gratiarum actionem Deo exhibendam, tum ad fiduciam in Deo collocandam, atque beneficia ab eo postulanda ⁴⁾. Quae omnia, libertatem in Deo adesse, ostendunt. Nam si beneficia illa, quae a Deo in nos derivantur, ex necessitate nobis obtingerent: nulla debita laus liberalitatis ac misericordiae, nulla gratitudo Deo rependenda, nihilque ab eo sperandum, nihilque petendum foret. Ad quid enim et nostrae ad Deum preces, et Dei ad nos exhortationes ac commonitiones, si fatali quadam necessitate bona vel mala immitteret?

B. Absolutam Dei libertatem quoque docet Traditio, alter religionis Christianae fons. Eam enim tradunt

¹⁾ Jac. 1, 18. Cf. 2. Reg. 24, 13. Job. 23, 13. Ps. 88, 18. 115, 3. Eccli. 41, 6. Prov. 21, 1. Dan. 4, 29. 32. Jer. 27, 5. 1. Cor. 1, 21. 27. Gal. 1, 4. Ephes. 1, 4—5. 9. 11. Rom. 8, 28. 9, 1—11, 36.

²⁾ Ezech. 33, 11—19. Cf. Is. 38, 1 ss. Jer. 7, 1 ss. 18, 8 ss. Is. 1, 19. Jon. 3, 4 ss. 3. Reg. 21, 21 ss. etc.

³⁾ Cf. Rom. 9, 10—23. 1. Cor. 12, 3 ss. Jac. 1, 17. Matth. 7, 11.

⁴⁾ Cf. Ps. 102, 1 ss. 105, 1 ss. 144, 21. Sap. 12, 1 ss. Jer. 33, 11. — Ps. 144, 18—19. Matth. 7, 7—11. Luc. 11, 10—13. — Matth. 21, 22. Marc. 11, 24. 1. Joan. 3, 22, Ephes. 3, 20.

3. unanimi ore SS. Patres omnes. Sic scribit Theophilus Antioch.: *Dei potentia in eo spectatur, ut primum quidem res ex nihilo creat: deinde ad arbitrium creet* ¹⁾. — Basilii veteres endarguit philosophos, qui mundum ex aeterno et necessario, non voluntate a Deo, sicut a corpore umbram, vel a luce splenderem, manasse crediderunt, ac Deum quidem causam illius esse confitebantur, sed causam sine voluntatis electione. Quem errorem Moysen refutare voluisse ac scripsisse: *In principio Deus fecit coelum et terram*; ut hoc faciendi verbo demonstraret, Deum tanquam artificem, summa et vi et sapientia opus illud elaborasse et perpolivisse. Quae vox artis et artificis Dei libertatem in agendo maxime declarat. Nam nulla sine voluntaria electione ars, nullus artis usus esse potest ²⁾. — Epiphanius: *Est enim praepotens (Deus), inquit, et quodcumque libitum est, molitur, ita tamen, ut, quae divinitatem ipsius deceant, perpetuo faciat* ³⁾. — Macarius: *Tu (homo) propterea es ad imaginem et similitudinem Dei factus, quia, quemadmodum Deus sui juris est, et quod vult, facit: — de quoque tu tui juris es* ⁴⁾. — Maximus Deum adpellat ἀνταρξάτορον πνύου, i. e. natura liberum, seu liberae potestatis ⁵⁾. — Hieronymus: *Si Deus voluntarie, et non ex necessitate bonus est, debuit, hominem faciens, ad suam imaginem, et similitudinem facere, hoc est, ut et ipse voluntarie, et non ex necessitate bonus esset. Qui autem asserunt, ita eum debuisse fieri, ut malum recipere non posset, hoc dicunt: talis debuit fieri, qui necessitate bonus esset, et non voluntate. Quodsi talis fuisset effectus, qui bonum non voluntate, sed necessitate perficeret, non esset Deus similis: qui ideo bonus est, quia vult, non quia cogitur* ⁶⁾. — Auctor libri *De fide contra Manichaeos*: *Nullam necessitatem patitur Deus, neque necessitate facit, quod facit, sed summa et ineffabili voluntate ac potestate* ⁷⁾. — Et S. Augustinus: *Nulla necessitate, — sed sola bonitate fecit (Deus), quod factum est, id est, quia bonum est* ⁸⁾.

¹⁾ Ad Autol. l. 2. c. 13. Opp. Justin. p. 382. C.

²⁾ Hom. 1. in Hexaëm. n. 7. Opp. T. 1. p. 7.

³⁾ Haer. 70. n. 7. Opp. T. 1. p. 818. D.

⁴⁾ Hom. 15. n. 23. In Galland. Bibl. PP. T. 7. p. 58 s.

⁵⁾ Disp. c. Pyrrh. In Bibl. max. PP. Lagd. T. 12. p. 497. C. D. et p. 498. A.

⁶⁾ Comm. in Ep. ad Philem. 14. Opp. T. 7. c. 767.

⁷⁾ De fide cont. Manich. c. 28. Opp. Augustin. T. 8. app. c. 31.

⁸⁾ De civ. D. l. 11. c. 24. Opp. T. 7. c. 231. Cf. Hippol. Cont. haer.

b. Porro Ecclesia in absolutam Dei libertatem semper tradidisse atque tenuisse, patet jam ex eo, quoniam nunquam non dogmata de mundi per liberam Dei voluntatem creatione, conservatione ac gubernatione professa, et sanctitatem divinam, quae sine libertate nulla esset, venerata est.

C. Denique illud idem per rationem

a. ex ipsa divinitatis natura probare licet. Libertas enim in se spectata est perfectio absolute simplex, omnis defectus aut vitii expers, atque ideo Deo detrahi non potest, qui est perfectissimus, et a quo, quidquid boni in nobis est, defluit. Porro neque extra, neque intra Deum quidquam datur, quo Deus in sua efficacia aut alliciatur, aut vero deterreatur. Non extra Deum, quoniam ipse est independens, et omnia, quaecunque existunt, vel existere possunt, ab ipso pendent. Non intra Deum, quia sensualitas, entibus finitis non nisi propria, ex qua illa incitamenta et terricula oriri possent, in ipso locum haud obtinet. Nec non

b. ex operibus divinis, videlicet ex creatione, conservatione ac gubernatione mundi colligitur. Nam opera haec, utpote contingentia ac temporalia, non nisi libere a Deo producta esse possunt; quod enim necessario est aut fit, aeternum quoque sit necesse est ¹⁾).

Observe. 1. Libertati Dei absolutae minime obest ejus necessitas; quoniam haec ad Dei existentiam, illa vero ad divinae voluntatis efficaciam refertur. Nam quemadmodum homo, licet ex voluntate Creatoris existere debeat, nihilominus tamen liber est: ita etiam Deus, quamvis necessario existat, tamen, et quidem necessario absoluta libertate vult atque agit ²⁾. — Neque etiam illud contra libertatem divinam obmoveri potest, quod Deus ἀναγκάστως est, atque malum velle non potest; quum causa hujus non tam in defectu libertatis, quam potius in infinitate perfectionis sita sit; quaecunque enim Deus operatur, operatur, ut Ambrosius observat, *pro liberae voluntatis arbitrio, non pro necessitatis obsecratio* ³⁾. Unde et Augustinus *beatam* hanc vocat *necessitatem*, *qua Deus injustus esse non potest* ⁴⁾.

¹⁾ Et. n. 8. In Galland. Bibl. PP. T. 2. p. 459. — Ambros. Hexaem.

²⁾ c. 5. n. 18 s. Opp. T. 1. c. 9 s.

³⁾ Cf. Ambros. Hexaem. l. 2. c. 2. n. 4. Opp. T. 1. c. 24.

⁴⁾ Cf. Thom. Cont. Gent. l. 1. c. 28. n. 1. Opp. T. 18. p. 28. 2. Sent. l. 25. q. 1. art. 1. ad 2. T. 10. p. 368 ss.

⁵⁾ De Ad. l. 2. c. 6. n. 48. Opp. T. 2. c. 479.

⁶⁾ Oper. imperf. cont. Julian. l. 1. c. 100. T. 20. c. 933.

Observ. 2. Praeter infinitam Dei sapientiam in ejus absoluta libertate et cum hac conjuncta sanctitate summa conspicitur ejusdem dignitas. Quapropter hac divina perfectione excitamur :

a. ut Deum summa veneratione prosequamur ; atque

b. ut, quum ipsius imaginem praeferimus, quotidie magis ad filiorum Dei libertatem per ardens ac constans virtutis studium et nominatim per sui abnegationem enitamur, spe autem vanae et perversae libertatis, quam homines mundani anhelant, quum sit propria carnis servitus, animum nunquam lactemus.

§. 23. 10. d. Sanctissimus.

Idem ipse tamen Deus, qui in sua efficacia absolute liber necessario cognoscitur, minime ideo ceu is, qui coeco quasi arbitrio agat, cogitandus, sed potius una tanquam infinite sanctus venerandus est.

Intelligitur autem sub sanctitate in homine nihil aliud, quam constans amor recti, et ex hoc amore procedens studium omnes actiones ad normam legis moralis, seu voluntatis divinae componendi. Unde sanctitas in Deo, qui normam legis extra se nullam habet, sed ipse sibi est lex, est ex summo ac immutabili recti ac honesti amore absolute perfecta liberrimae voluntatis ejus cum sapientissima cognitione consensio, seu illa absoluta perfectio, qua Deus semetipsum tanquam summum bonum, et speciatim tanquam infinitam sapientiam infinite diligit, et omne id, quod cum illa convenit, propterea nunquam non quam maxime probat et vult, atque omnia, quae eidem repugnant, constanter ac absolute improbat ac aversatur.

Conspicitur itaque sanctitas divina primo in infinito amore, quo voluntas divina pro absoluta Dei perfectione necessario, non quidem necessitate coactionis ac violentiae, sed naturalis inclinationis, in omne bonum ac honestum ab ejus infinita sapientia cognitum fertur; et deinde in ejusdem liberrima ac immutabili *βούλησι*, dem absolut freien, unveränderlichen Willen, omnis illius, quod pro sua perfectissima intelligentia tanquam bonum et honestum cognoscit, et quidem propterea, quia illud bonum ac honestum scit. Hinc sanctitas in Deo aequae necessaria ac liberrima est, ita tamen, ut summa illa in bonum naturalis propensio, seu amor honesti in Deo non prior liberrima voluntatis efficacia cogi-

tetur; sed quemadmodum Deus bonum ab aeterno diligit, ita illud ab aeterno liberrime vult, atque quemadmodum bonum liberrime ab aeterno vult, ita et ab aeterno illud diligit.

Ex quibus una colligitur, sanctitatem divinam a virtute humana, ut omnia attributa divina, essentia, τὴν ὄντι, differre. Sanctitas enim divina minime, ut virtus humana, in pugna adversus sensuum illecebras, et in studio perfectionis reponitur, sed est perfectio absoluta; in Deo enim nulla prorsus contentio, prout nullum absolute peccatum dari potest. Porro haudquaquam, ut virtus, augeri vel etiam imminui potest, sed sibi est penitus constans ac immutabilis. Atque tandem, uti ab omni vi, ita et ab omnibus sensuum illecebris omnino est immunis, et liberrima ac purissima. Neque in Deo de debito aut officio quaeri potest, quum hoc tantum ad naturas intelligentes, a se invicem pendentes, aut alicui subjectas referatur, quae illud etiam negligere possint, Deus autem prorsus independens, supremus rerum omnium Dominus, atque essentialis ac infinita perfectio sit.

Deo summam competere sanctitatem, probamus:

A. Ex SS. Litteris, quarum una vox est, Deum esse sanctissimum. Et quidem

a. Deum expresse sanctum, rectum et justum per excellentiam, atque solum bonum seu perfectum adpellant. Huc pertinent sequentia effata A. T.: *Deus fidelis, et absque iniquitate, justus et rectus* ¹⁾. *Sancti estote, quia ego sanctus sum* ²⁾. — *Non est sanctus, ut est Dominus: neque enim alius est extra te* ³⁾. — *Sanctum, et terribile nomen ejus* ⁴⁾. — *Et clamabant (Seraphim) alter ad alterum, et dicebant: Sanctus, sanctus, sanctus* (i. e. summe bonus seu perfectus, et ideo summe venerandus), *Dominus exercituum, plena est omnis terra gloria ejus* ⁵⁾. — Et ex N. T.: *Estote perfecti, sicut et Pater vester coelestis perfectus est* ⁶⁾. — *Unus est bonus*, i. e. unus vere ac absolute perfectus et sanctus ⁷⁾. — *Sed secundum eum, qui vocavit vos, Sanctum:*

¹⁾ Deut. 32, 4.

²⁾ Lev. 11, 44. Cf. 19, 2. 20, 7. 26, 21, 8. Exod. 15, 11.

³⁾ 1. Reg. 2, 2. Cf. 4. Reg. 19, 22.

⁴⁾ Ps. 110, 9. Cf. 98, 3. 102, 1. 104, 3. 144, 21. Ezech. 20, 39. 39, 7.

⁵⁾ Is. 6, 3. Cf. 1, 4. 5, 16. 10, 20. 12, 6. 29, 19. 23, 31. 1, 40, 25.

⁶⁾ Matth. 5, 48.

⁷⁾ Matth. 19, 17. Cf. Joan. 17, 11. 17. Apoc. 15, 4.

et ipsi in omni conversatione sancti stitis: quoniam scriptum est: Sancti eritis, quoniam ego Sanctus sum ¹⁾).

b. Ostendunt, nihil vitii esse in Deo, imo ne posse quidem esse, atque omnia opera ejus perfecta, legemque veram ac sanctam. *Dei perfecta sunt opera, et omnes viae ejus judicia*, i. e. justae ²⁾. — *Quoniam Deus lux est, et tenebrae in eo non sunt ullae*, i. e. Deus est absoluta moralis integritas, et moralis vitiositas in eo datur nulla ³⁾. — *Nemo cum tentatur, dicat, quoniam a Deo tentatur: Deus enim intentator malorum est: ipse autem neminem tentat*, i. e. Deus, uti in se tentationi ad malum obnoxius non est, ita etiam ipse neminem tentat ⁴⁾. Qui potius est *pater luminum* (auctor omnium bonorum, sive naturae sive gratiae), *a quo descendit omne datum optimum, et omne donum perfectum* ⁵⁾. — *Justus Dominus in omnibus viis suis: et sanctus in omnibus operibus suis* ⁶⁾. — *Lex sancta, et mandatum sanctum, et justum, et bonum*. — *Lex Domini immaculata, convertens animas: testimonium Domini fidele, sapientiam praestans parvulis* ⁷⁾. — *Justitiae Domini rectae, laetificantes corda: praeceptum Domini lucidum, illuminans oculos* ⁸⁾. — *Sanctifica eos in veritate. Sermo tuus veritas est* ⁹⁾.

c. Id unice urgent, et voluntatem Dei esse declarant, ut homines vitae sanctimonia infucata eum sequantur; qui et propterea legem moralem non tantum cordibus illorum inscripserit, sed et modo extraordinario revelaverit eosque gratia sua sanctificet. *Quoniam non Deus volens iniquitatem tu es. Neque habitabit juxta te malignus neque permanebunt injusti ante oculos tuos. Odisti omnes, qui operantur iniquitatem: perde*

¹⁾ 1. Petr. 1, 15—16.

²⁾ Deut. 32, 4. Cf. Rom. 9, 14.

³⁾ 1. Joan. 1, 5. Cf. Joan. 8, 12.

⁴⁾ Jac. 1, 13.

⁵⁾ Jac. 1, 17. Cf. Ps. 75, 5.

⁶⁾ Ps. 144, 17. Cf. 76, 14. 97, 1. 2.

⁷⁾ Rom. 7, 12.

⁸⁾ Ps. 18, 8—9. Cf. Ps. 42, 3. Eccli. 34, 8.

⁹⁾ Joan. 17, 17.

nes, qui loquuntur mendacium ¹⁾. — Abominatio Domini via impii; qui sequitur justitiam, tollitur ab eo ²⁾. — Mundi sunt oculi tui, ne videas nimis: et respicere ad iniquitatem non poteris ³⁾. — Non conformari huic saeculo, sed reformamini in novitate sensus tui: ut probetis, quae sit voluntas Dei, bona, et benedicens, et perfecta (quid bonum, Deo probatum et peritum) ⁴⁾. — Haec est voluntas Dei, sanctificatio vestra ⁵⁾. — Cum enim Gentes, quae legem non habent, naturaliter ea, quae legis sunt, faciunt, ejusmodi legem non habent, ipsi sibi sunt lex: qui ostendunt opus legis scriptum cordibus suis ⁶⁾. — Multifariam, multisque modis olim Deus loquens patribus in Prophetis: novissime diebus istis locutus est nobis in Filio ⁷⁾. — 10 Dominus, qui sanctifico vos ⁸⁾. — Quotquot autem ceperunt eum, dedit eis potestatem, filios Dei fieri, et, qui credunt in nomine ejus ⁹⁾. — Justitia autem Dei per fidem Jesu Christi in omnes, et super omnes, qui credunt in eum ¹⁰⁾. Huc pertinent quoque omnia loca, in quibus hic amor Dei atque praemia sub una conditione sanctitatis prostantur. — Verum ne opus quidem fuisset, haec omnia afferre testimonia, quum jam ipsa nobis divinitus facta revelatio, et eadem conservatio per Ecclesiam, in qua et per quam Christus Dominus salutem hominibus ipsius passione ac morte parum perficit, id ipsum quam clarissime ob oculos ponat.

B. Sanctitatem Dei porro infinitis fere elogiis celebrant SS. patres, e quorum numero paucos laudasse sufficiat. Sic scri-

¹⁾ Ps. 5, 5—7. Cf. 14, 1 ss. 33, 12 ss. 44, 8. 17, 26 ss. 49, 16 ss.

²⁾ Prov. 15, 9. Cf. 11, 20. Exod. 23, 7. Jos. 24, 19. Judith. 5, 21. Sap. 9. Eccli. 12, 1 ss. 15, 20—22. Is. 1, 16 ss. 59, 2. Jer. 3, 12 ss. 7, 5 ss. 31, 2, 12 ss. Zach. 1, 3 ss. Job. 31, 1 ss.

³⁾ Hab. 1, 13.

⁴⁾ Rom. 12, 2.

⁵⁾ 1. Thess. 4, 3. Cf. Exod. 19, 6. Luc. 12, 4—5. 1. Cor. 3, 16—17. 1. Pet. 1, 4. 2, 10. 1. Tim. 2, 4. 1. Petr. 2, 9. 1, 14—16. 3, 8 ss.

⁶⁾ Rom. 2, 14—15.

⁷⁾ Hebr. 1, 1—2.

⁸⁾ Lev. 20, 8. Cf. 21, 8. 22, 9. 32. Ezech. 20, 12. 2. Mach. 1, 23 s.

⁹⁾ Joan. 1, 12. Cf. 17, 17.

¹⁰⁾ Rom. 3, 22. Cf. 1. Cor. 6, 11. Ephes. 5, 25—27. 1. Thess. 5, 23. 1. Pet. 3, 3—7. Hebr. 2, 11, 10, 14.

bit Origenes: *Scimus enim illud „omnia“*, (esse Deo possibilita), *non complecti ea, quae fieri posse repugnat et cogitari. Dicimus etiam Deum turpia non posse; alioqui Deus posset non esse Deus. Nam si quid turpe Deus facit, Deus non est*¹⁾. Quod alibi similitudine explicat. *Dicimus autem, inquit, nos, quemadmodum id, cujus nativa dulcedine res aliae dulcescunt, illas non potest amaras facere, quod contra suam naturam esset; neque id potest obscurare, quod natum est ad illustrandum; ita nec Deum injuste facere posse. Haec enim potestas ejus divinitati contraria est, et illi omnipotentiae, quam ut Deus habet*²⁾. — Basilius: *At neque malum a Deo generatum esse dicere fas est, propterea quod nullum contrarium a contrario gignatur. Neque enim vita mortem generat, neque tenebrae lucis principium sunt, neque morbus opifex est sanitatis*³⁾. — Gregorius Nyss.: *Cum omnia autem possit Verbi electio, eam ad nihil mali habere propensionem: ad vitium enim propensio est aliena a divina natura, sed quidquid est bonum, hoc etiam velle. Potentem autem omnino etiam posse. Volentem autem non esse ejusmodi, ut non operetur, sed omne boni propositum deducit ad operationem*⁴⁾. — Dionysius Areop.: *Haec itaque omnia (sanctitas i. e. ab omni scelere libera, et omnino perfecta et omni ex parte immaculata puritas, dominatio, et deitas) de causa illa transcendentali absolute praedicanda sunt, addendumque, ipsam esse supra eminentem sanctitatem, atque dominationem, et regnum omnium supremum, simplicissimamque deitatem*⁵⁾. — Tertullianus: *Bonus natura Deus solus. Qui enim quod est, sine initio habet, non institutione habet illud, sed natura*⁶⁾. — Ambrosius: *Proprium ergo Dei est, ut bonus sit*⁷⁾. — Augustinus: *Aliud dicit (Catholica disciplina) bonum, quod summe ac per se bonum est, et non participatione*

¹⁾ Cont. Cels. l. 5. n. 23. Opp. T. 1. p. 595. A.

²⁾ Cont. Cels. l. 3. n. 70. Ib. p. 494. A. Cf. l. 5. n. 24. p. 595. n. Select. in Exod. ad 15, 25. T. 2. p. 124. E.

³⁾ Hom. 2. in Hexaëm. n. 4. Opp. T. 1. p. 16. C.

⁴⁾ Or. cat. c. 1. Opp. T. 3. p. 46.

⁵⁾ De div. nom. c. 12. §. 3. coll. §. 2. Opp. T. 1. p. 866. Cf. c. 2. §. 1. p. 496. n.

⁶⁾ Adv. Marcion. l. 2. c. 6. Opp. V. 2. p. 184.

⁷⁾ Serm. 9. in Ps. 118, n. 15. Opp. T. 1. c. 1083.

alicujus boni, sed propria natura, et essentia; aliud quod participando bonum et habendo; habet autem de illo summo bono, ut bonum sit, in se tamen manente illo, nihilque amittente ¹⁾). Et alibi: *Deus omnino peccare non potest, sicut negare seipsum non potest: homo autem potest peccare, et Deum negare; sed si nolit, non facit* ²⁾). — Atque Boëthius: *Deum rerum omnium principem, bonum esse, communis humanorum conceptio probat animorum. Nam cum Deo nil melius excogitari queat, id quo melius nihil est, bonum esse quis dubitet* ³⁾). Demum id ipsum

C. necessario postulat jam naturalis nostra ratio. Nam

a. cum Deus pro sua natura perfectissimus sit: non potest ipsi non competere quoque infinita sanctitas, quae omnem prorsus excludit nequitiam, ut infinitus calor nullam frigoris admittit particulam. Quemadmodum enim τὸ εἶναι repugnat τῷ μὴ εἶναι, et summe esse penitus a se rejicit non esse, sic Deus, cujus essentia est summum bonum esse, ne levissima quidem afflatur aura improbitatis aut peccati, quod non est nisi defectus, et non cadit, nisi in entia ex nihilo facta, ac mutationis capacia, minime autem in ens, quod prorsus mutari, et ideo etiam a natura sua, seu a se deficere nequit.

b. Porro qui hunc finem naturis ratione praeditis praefixit, ut virtutem tanquam summum bonum sectentur, et propterea animis earum legem moralem insculpsit, nec non libera voluntate eas instruxit: non potest non summe delectari unice eo, quod sanctum et moraliter perfectum est.

Dei sanctissimam voluntatem autem absolute constantem ac immutabilem esse, ejusque affectiones minime variari posse, ex

¹⁾ *De mor. Manich. l. 2. c. 4.* Opp. T. 1. c. 717 s. Cf. *De perfect. justit. c. 14. n. 32.* T. 10. c. 182. *Serm. 29. c. 1. n. 1.* T. 5. c. 148 ss. *De nat. et litt. c. 31. n. 54.* T. 10. c. 116. B. *Enarr. ad Ps. 134. n. 3—4.* T. 4. c. 1493 s. n. 6. c. 1496. *De Trinit. l. 8. c. 3. n. 4.* T. 8. c. 867 s. *Ps. 70. n. 6.* T. 4. c. 738. *In Ps. 117. n. 2. c. 1272 s.*

²⁾ *Cont. Faust. l. 32. c. 22.* T. 8. c. 375. Cf. *De spir. et litt. c. 31. n. 4.* T. 10. c. 116. *De civ. D. l. 22. c. 25.* T. 7. c. 693. *l. 5. c. 9. n. 4. c. 24.* *Epist. 153. c. 2. n. 4. c. 5. n. 12.* T. 2. c. 525. 528.

³⁾ *De consol. phil. l. 3. pros. 10. p. 62.* Cf. Clem. Alex. *Paedag. l. 1. c. 8.* Opp. T. 1. p. 265 s. — Cyrill. Alex. *Comm. in Joan. l. 5. c. 5.* Opp. T. 4. p. 530 s. Cf. *l. 1. c. 4. p. 32.* E. *De Trin. Dial. 1. T. 5. P. 1. c. 393 ss.* — Tit. Bostr. *Cont. Manich. l. 2. n. 5—6.* In Galland. *Bibl. PP. T. 5. p. 298. D. ss.* — Didym. *De Spir. S. n. 6. lb. T. 6. p. 35 s.*

divina immutabilitate, nec non ex ipsa notione infinitae sanctitatis necessario consequitur, et in SS. Litteris variis testimoniis confirmatur. *Non est Deus, ait Moyses, quasi homo, ut mentitur: nec ut filius hominis, ut mutetur* ¹⁾. Psalmista: *Consilium Domini in aeternum manet: cogitationes cordis ejus in generatione et generationem* ²⁾. Et Apostolus: *Sine poenitentia sunt dona et vocatio Dei* ³⁾. Nonnunquam, quidem in SS. Litteris de poenitentia in Deo sermo est; ast hisce locutionibus nonnisi immutatam externam Dei erga homines mutatos agendi rationem exprimi, jam observatum est. Pro infinita sanctitate itaque Deus

a. amat semetipsum tanquam summum et infinitum Bonum, sibi, clare, ac comprehensive cognitum, amore infinito.

b. Amat omnes naturas creatas, utpote in se, bonas, et perfectas perfectione essentiali, ac praecipue naturas rationales, ipsius imaginem referentes, et quidem quamlibet pro ratione boni, quod continet. ⁴⁾.

c. Mala naturae autem tantum eatenus positive vult, quatenus sunt, propter bonum universi necessaria; atque quatenus iisdem nos propter peccata partim punimur, partim ad ordinem justitiae reducimur, aut vero in virtutis studio confirmamur ac proficimus. ⁵⁾.

d. Mala culpaе tandem, seu peccata nullo prorsus modo positive, neque directe, neque indirecte vult, sed nonnisi permittit, ut creaturae rationali suam concedat libertatem. ⁶⁾. Summa enim bonitas velle et amare non potest, quod nullam habet speciem boni, qualia sunt mala culpaе, sive peccata. Utitur tamen Deus his malis, quae non facit, ad bonum, quod facit.

Quidquid autem Deus amat extra se, amat propter semetipsum ⁷⁾, in quantum, scilicet, ut ait Thomas, *concedet divinam bonitatem etiam alia ipsam participare* ⁸⁾.

¹⁾ Num. 23, 19. Cf. 1. Reg. 15, 29. Mal. 3, 6.

²⁾ Ps. 32, 11.

³⁾ Rom. 11, 29.

⁴⁾ Sap. 11, 25.

⁵⁾ Cf. Amos. 3, 6. Is. 45, 7. Eceli. 11, 14. 39, 35. Augustin. De Trinit. I. 3. c. 4. n. 9. Opp. T. 8. c. 797.

⁶⁾ Cf. Ps. 5, 5. Sap. 14, 9. Hab. 1, 13.

⁷⁾ Cf. Prov. 16, 4. Ephes. 2, 7. 1. Joan. 3, 2. Augustin. De doctr. Christ. I. 1. c. 31—32. n. 34—35. T. 3. c. 15. s.

⁸⁾ 1. q. 19. art. 1. Opp. T. 20. p. 122. Cf. art. 2. p. 122 s.

Observ. 1. Loca, quae in SS. Litteris edissere videntur, cum, peccatum velle aut praecipere ¹⁾, vel vero in quibus cor minimum indurare dicitur ²⁾, nonnisi designant, Deum malum perittere, aut etiam gratiam suam ob hominis malitiam renitentem negare ³⁾, vel de concursu Dei, quem generalem dicunt, ad alium poenae loquuntur ⁴⁾, vel vero tantum, quae futura sint, nuntiant ⁵⁾.

Observ. 2. Sanctitas divina, uti principium atque finis omnis religionis verae, ita et ejusdem summum est incitamentum. Etenim sanctitas Dei summa est ejus pulchritudo, et decor ineffabilis ejus aeternissimae naturae, lux divinitatis intemerata, puritas et castioria integerrimae voluntatis. Et hinc

a. nullum est post sapientiam infinitam Dei attributum, quod is magis moveat ad reverentiam atque dilectionem Deo ex toto corde, et ex tota anima, et ex omnibus viribus exhibendam; nullumque

b. quod nos magis ad studium virtutis provocet. Nam Deo placere non possumus, nisi et ipsi pro viribus sanctitatem sectemur, diligentes justitiam, et odio habentes iniquitatem; *Deus enim charissimus est: et qui manet in charitate, in Deo manet, et Deus in* ⁶⁾; sed etiam effugere omnipotentis vindictam nequimus, *cui damnatio est via impiorum* ⁷⁾, *et qui odit omnes, qui operantur iniquitatem, et perdet omnes, qui loquuntur mendacium* ⁸⁾.

§. 24. 11. c. Veracissimus ac fidelissimus.

Ex sanctitate divina sequuntur, vel potius ad sanctitatem vinam pertinent summa Dei veracitas ac fides, seu fide-

¹⁾ Exod. 3, 22. 3. Reg. 22, 19—23. 2. Reg. 24, 1. 12, 11 s.

²⁾ Exod 4, 21. 9, 12. Jud. 9, 23. Is. 6, 9. 10. 29, 10. 63, 17. Matth. 6, 13. Rom. 1, 24. 26. 28. 9, 18. 2. Thess. 2, 10—13.

³⁾ Ita Exod. 4, 21. 9, 12. 2. Reg. 12, 11 s. 24, 1. Is. 29, 10. 63, 17. Matth. 6, 13. Rom. 11, 24. 26. 28. 9, 18. 2. Thess. 2, 10—13. Coll. Exod. 13. 22. 23. 8, 32. Dent. 10, 16. 1. Par. 24, 1. Jer. 5, 3. 9, 26. Ephes. 4, 1—19. Augustin. *Cont. Julian. l. 5. c. 3. n. 8. T. 10. c. 631. Coecitas cordis, quam solus removel Deus, et peccatum est, quo in Deum non credimus; et poena peccati, qua cor superbum digna animadversione punitur; causa peccati, cum mali aliquid coeci cordis errore committitur. Cf. vult. 194. (105) ad Sixt. c. 3. n. 14. T. 2. c. 719.*

⁴⁾ Sic 3. Reg. 22, 19—23. Jud. 9, 23.

⁵⁾ Ita Exod. 3, 22. Is. 6, 9—10.

⁶⁾ 1. Joan. 4, 16.

⁷⁾ Prov. 15, 9.

⁸⁾ Ps. 5, 7.

litas; quarum illa nostrae fidei, haec vero spei fundamentum est, et ideo specialem mentionem merentur.

Sub veracitate, quae sinceritatem quoque includit, in Deo intelligimus perfectissimam consensionem eorum, quae Deus manifestat, cum ejus perfectissima intelligentia ac voluntate, seu illam absolutam perfectionem, qua, quaecunque Deus patefacit, cum ejus omniscia ac sapientissima cognitione, et cum ipsius sanctissimis consiliis omnimode conveniunt. Pro hoc itaque attributo Deus nil patefacit, nisi quod ipse verum cognoscit ac vult, adeoque quod sibi rebusque extra se est convenientissimum, seu quod in se est verissimum. Per veracitatem a Deo omne mendacium ac falsum, omnisque illusio ac deceptio prorsus excluditur, atque omnia, tum quae docet ac praecipit, tum quae promittit ac minatur, absolute vera sunt.

Fidelitas autem in Deo est constans ac immutabilis ejus voluntas servandi promissa, seu est illud absolutum attributum, quo Deus, quidquid promissit, aut minatus est, constanter ac exacte exequitur.

A. In SS. Litteris veracitatem Deo sequentia tribuunt loca: *Non est Deus quasi homo, ut mentiatur: nec ut filius hominis, ut mutetur. Dixit ergo, et non faciet? locutus est, et non implebit¹⁾?* — *Quia rectum est verbum Domini, et omnia opera ejus in fide, i. e. quod Dominus dicit, verum est, et ipse in omnibus stat suis promissis²⁾.* In quo loco, quemadmodum in praecedenti, de fidelitate quoque Dei sermo est. — *Eloquia Domini, eloquia casta: argentum igne examinatum, probatum terrae, purgatum septuplum³⁾.* — *Omnes viae (leges) suae veritas⁴⁾.* — *Qui misit me, ait Christus, verax est⁵⁾.* Apostolus: *Est autem Deus verax: omnis autem homo mendax⁶⁾.* — *Quae (agnitio veritatis) secundum pietatem est in spem vitae aeternae* (i. e. quae ad verum Dei cultum perducit, ex quo nobis speranda offertur vita aeterna), *quam promissit, qui*

¹⁾ Num. 23, 19.

²⁾ Ps. 32, 4.

³⁾ Ps. 11, 7.

⁴⁾ Ps. 118, 151.

⁵⁾ Joan. 8, 26. Cf. 17. 3, 33. 14, 6.

⁶⁾ Rom. 3, 4.

non mentitur Deus (ὁ ἀψευδὴς Θεὸς ¹⁾). Et: *Impossibile est mentiri Deo* ²⁾. — Huc pertinent quoque loca omnia, quae adimpletionem vaticiniorum divinatorum memoriae produunt.

Fidelitas autem Dei traditur praeter loca mox supra allata hisce divinis oraculis: *Exsiccatum est foenum, et cecidit flos: verbum autem Domini nostri manet in aeternum* ³⁾. — *Ego Dominus, et non mutor* ⁴⁾. — *Fidelis est, qui vocavit vos, qui etiam fuciet* (praestabit promissa) ⁵⁾. — *Si non credimus, ille fidelis est, negare se ipsum non potest* ⁶⁾. — *Teneamus spei nostrae confessionem indeclinabilem, fidelis enim est, qui repromisit* ⁷⁾. Id ipsum jurisjurandi formula: *Vivo ego*, qua Deus saepe sua dicta confirmat, jam significat. Utitur enim ea Deus, partim ut infirmitati nostrae se adcommode, partim ut nos de proposito sui immutabilitate certiores efficiat, et spem, fiduciamque nostram augeat ⁸⁾; atque sensus ejusdem est: Quam certo existo ego, qui per me, ac necessario existo, promissis meis stabo.

B. Idem, in acceptis revelationi divinae referens, semper tenuit ac docuit Ecclesia. Quod adeo certum est, ut singula SS. Patrum aut aliorum Traditionis divinae documentorum testimonia afferre, superfluum fore censeamus ⁹⁾. Idque eo magis, quum

C. summa Dei veracitas ac summa ejus fides jam ex ejus infinita scientia ac sapientia, omnipotentia atque absoluta sanctitate necessario conficiatur. Nam si Deus tanquam omniscius ac sapientissimus verum quam adcuratissime cognoscit, et tanquam sanctissimus quam maxime verum dicere amat: certo quoque nunquam non nisi verum dicit ac manifestat. Insuper ipse fons ac principium omnis cognitionis veri in naturis creatis est, uti sol origo omnis luminis; et hinc ipsa absoluta veritas sit necesse est.

¹⁾ Tit. 1, 2.

²⁾ Hebr. 6, 18. Cf. Exod. 34, 6. Ps. 118, 89. 90. 160. Rom. 15, 8. Apoc. 15, 3. 21, 5. 22, 6.

³⁾ Is. 40, 8.

⁴⁾ Mal. 3, 6.

⁵⁾ 1. Thess. 5, 24.

⁶⁾ 2. Tim. 2, 13.

⁷⁾ Hebr. 10, 23. Cf. 3. Reg. 8, 56. Ps. 35, 6. 99, 5. 118, 89. Is. 10, 20. Rom. 3, 3. 1. Cor. 1, 9.

⁸⁾ Hebr. 6, 18.

⁹⁾ Cf. Herm. *Past.* l. 2. *mand.* 3. Cotelier. PP. apost. Amstelod. 1724. V. 1. p. 86. — Origen. *Comm. in Gen.* n. 7. Opp. T. 2. p. 11. D. — Augustin. *De civ. D.* l. 22. c. 25. Opp. T. 7. c. 693. Etc.

Porro si Deus ut omnipotens omnia, quaecunque promisit, aut comminatus est, effectu complere potest, atque ut infinite sanctus etiam complere vult: necessario ea adimplet, ac exequitur, seu fidelis in suis promissis ac comminationibus est.

Observ. 1. Mendacium Jacobi, quo, matre suadente, benedictionem loco fratris sibi conciliavit ¹⁾, et quae sunt similia, veracitati divinae haud obesse, per se intelligitur; quum Deus illa neque imperasse, neque tanquam recte facta approbasse dicatur; atque nonnisi ostendunt, Deum naevos hominum, quibus sua sapientissima consilia haud evertuntur, minime impedire, atque iisdem ad fines suos consequendos uti. Neque illud, quod Deus Abrahamum jusserit filium suum immolare, immolationem antem deinde haud concesserit, ejus veracitati adversatur. Postulaverat enim solummodo Deus ab Abrahamo, ut animum paratum filium suum unicum sibi sacrificandi palam ostenderet; unde antequam id praestitisset, Deus pro suo absoluto in vitam nostram dominio immolationem petit; postquam autem animum suum promptum declaraverat, eandem renuit.

Observ. 2. Ergo verax ac fidelis est Deus, ergo vera sunt ejus eloquia, firma ac inconcussa ejus promissa. Coelum et terra transibunt, verba autem ejus non praeteribunt.

Quapropter

a. firmiter veritati revelatae adhaereamus, atque omnem spem, quae *non confundit* ²⁾, in Deo collocemus; sed et minas ipsius timeamus, scientes, *quoniam Deus non irridetur* ³⁾. Simul autem

b. Deum imitantes loquamur *veritatem unusquisque cum proximo suo* ⁴⁾, atque ab omni mendacio, simulatione, amphibolia atque perfidia abstineamus. *Vae enim duplici corde, et scelestis labiis, — et peccatori terram ingredienti duabus viis* ⁵⁾.

§. 25. 12. f. Justissimus.

Cum sanctitate arctissime porro conjungitur, et ex illa necessario procedit infinita Dei justitia.

Accipitur autem hic loci vocabulum justitiae nequaquam sensu latiori, pro justitia videlicet universali seu absoluta, qua

¹⁾ Gen. 27, 1 ss.

²⁾ Rom. 5, 5.

³⁾ Gal. 6, 7. Cf. Rom. 2, 3.

⁴⁾ Ephes. 4, 25.

⁵⁾ Eccli. 2, 14. Cf. Ps. 14, 2—3. Is. 33, 15—16. Zach. 8, 16. 19. Prov. 12, 19. Matth. 5, 37.

Deus in se justus est, et quae nihil aliud est, nisi complexio omnium virtutum, atque a sanctitate haud distinguitur; sed sumitur sensu strictiori pro parte justitiae universalis, seu pro justitia relativa, qua Deus in ordine ad alios justus est, quaque naturis ratione praeditis sortem condignam attribuit.

Hinc justitia divina illa est perfectio absoluta, qua Deus bonis sortem bonam, et malis sortem malam, et quidem utramque aequissima ratione distribuit, seu, quoniam amoena sors, quae cum probe factis jungitur, praemium, damnum vero, quod malefactis nequitur, poena dicitur, qua cuique praemium aut debitam poenam pro ejus merito rependit.

Justitia divina ergo, ab omni partium studio alienissima, non ad speciem externam judicat, sed totum entis rationalis pretium ad normam *isotoplas* seu aequilibratae perfectissimae adcommodate ponderat, et sortem illi congruentem, sive praemium sive poenam, assignat,

Quando justitia pro bene factis praemia decernit, remuneratoria, quando vero poenas pro sceleribus commissis confert, punitiva seu vindex aut ultrix adpellatur.

Justitiam in Deo, saltem vindicativam, inficiati sunt inter antiquos haereticos Marcionitae, tanquam Deo iniquam, quae cum ejus infinita bonitate conciliari nequeat ¹⁾. Inter recentiores vero pariter eandem impugnant Sociniani ²⁾ atque Ariminiani ³⁾, quibuscum Naturalistae seu Deistae omnes faciunt, qui, ut dogma de satisfactione Christi convellant, docent, nullum esse in Deo attributum, quo ipse satisfactionem necessario pro peccatis exigit; si peccatum punit, hoc, ajunt, esse liberrimum ejus effectum, a quo possit quoque abstinere.

Verum utramque in Deo dari justitiam, tam remuneratoriam quam vindicem,

A. docent clarissime SS. Litterae innumeris locis. Sic jam Abrahamus Deum his verbis alloquitur: *Absit a te, ut rem hanc facias, et occidas justum cum impio, fiatque justus sicut impius, non est hoc tuum: qui judicas omnem terram,* (i. e. qui judex es sanctissimus omnis orbis) ⁴⁾. In libro Job le-

¹⁾ Cf. Tertullian. *Adv. Marcion.* l. 2. c. 11—12. Opp. V. 2. p. 190 a.

²⁾ Cf. Socin. *Praelect.* c. 16.

³⁾ Cf. Limborch. *Instit. Christ.* l. 2. c. 12.

⁴⁾ Gen. 18, 25.

gitor: *Absit a Deo impietas, et ab omnipotente iniquitas. Opus enim hominis reddet ei, et juxta vias singulorum restituet eis* ¹⁾. In Psalmis: *Paravit in judicio thronum suum: et ipse judicabit orbem terrae in acquitate, judicabit populos in justitia* ²⁾. — *Justus es Domine: et rectum est judicium tuum* ³⁾. In Proverbiis: *Qui inspector est cordis, ipse intelligit, et servatorem animae tuae nihil fallit, reddetque homini (tibi) juxta opera tua* ⁴⁾. Apud Jeremiam: *Tu autem Domine Sabaoth, qui judicas juste, et probas renes, et corda, videam ultionem ex eis* ⁵⁾. — Id ipsum tradit Scriptura N. T.. Nam pari modo hic non tantum Deus *justus*, vel *judeus justus* simpliciter in sensu absolute justi adpellatur ⁶⁾, sed et definite docetur, Deum, et quidem per Jesum Christum, Filium suum, mundum judicaturum, et cuique secundum ejus opera retributurum esse, ita ut quivis mercedem reportet eorum, quae corpore indutus, sive recte sive male, egerit. *Filius hominis*, ait Christus, *venturus est in gloria Patris sui cum Angelis suis: et tunc reddet unicuique secundum opera ejus* ⁷⁾. Paulus vero: *Secundum duritiam tuam, et impenitentem cor, thesaurizas tibi iram in die irae, et revelationis justi judicii Dei* (colligis tibi poenam, eo tempore tibi referendam, quo justum Dei judicium manifestum reddetur). *Qui reddet unicuique secundum opera ejus* ⁸⁾. — *Tribulatio, et angustia in omnem animam hominis operantis malum, Judaei primum, et Graeci: gloria autem, et honor, et pax omni operanti bonum, Judaeo primum, et Graeco: non enim est acceptio personarum apud Deum* ⁹⁾. — *Omnes enim nos manifestari oportet ante tribunal Christi, ut referat unusquisque propria corporis, prout gessit*, (i. e. quae corpore indutus egit), *sive bonum, sive ma-*

¹⁾ Job. 34, 10—11.

²⁾ Ps. 9, 8.

³⁾ Ps. 118, 137. Cf. 17, 25. 37, 1 ss. 47, 11. 73, 7 ss. 35, 7. 128, 4. Tob. 3, 2.

⁴⁾ Prov. 24, 12. Cf. Eccles. 12, 14. Sap. 12, 15.

⁵⁾ Jer. 11, 20. Cf. Dan. 9, 14.

⁶⁾ Joan. 17, 25. Apoc. 16, 5—8.

⁷⁾ Matth. 16, 27. Cf. 5, 12. 6, 29 ss. 11, 22—21. 25, 31—46. Luc. 12, 47—48. 19, 16—26. Joan. 5, 22. 27. 30.

⁸⁾ Rom. 2, 5—6. Cf. 1, 18. 3, 5—6.

⁹⁾ Rom. 2, 9—11.

lum ¹⁾, *Quae seminaverit homo, haec et metet. Quoniam qui seminat in carne sua* (seu carni suae, i.e. opera sua facit in obsequium carnalis concupiscentiae suae), *de carne sua metet corruptionem* (miseriam et interitum): *qui autem seminat in spiritu* (spiritualia operatur), *de spiritu metet vitam aeternam* ²⁾. Atque: *Qui parce seminat, parce et metet: et qui seminat in benedictionibus, de benedictionibus et metet* ³⁾. — Accedunt facta illa, quibus Deus justitiam suam, tam vindicem quam remuneratorem, modo extraordinario manifestare voluit. Sufficiat hic meminisse primorum parentum ⁴⁾, diluvii universalis ⁵⁾, excidii Sodomorum et Gomorrhae ⁶⁾, historiae populi Israëliti ⁷⁾, et inprimis acerbissimae passionis ac mortis Christi, Dei — hominis. Unde enim tanta Dei in unigenitum Filium severitas, tantus rigor nisi ex necessitate justitiae, quae plenam ab eo satisfactionem exigebat pro peccatis, non quidem suis, sed nostris, pro quibus vadem ac sponsorem se exhibuit.

Porro diserte quoque in S. Scriptura traditur, Deum, quum justitiam exerceat, personam haud respicere, *non enim est*, ut ait Apostolus, *personarum acceptio apud Deum* ⁸⁾; *qui sine acceptione personarum judicat secundum uniuscujusque opus* ⁹⁾; ne minima quidem opera, sive bona sive mala, sine mercede vel poena sinere, ita ut *quicumque dederit uni ex minimis istis* (discipulis Domini) *calicem aquae frigidae, non perdat mercedem suam* ¹⁰⁾, verum etiam de omni verbo otioso *reddant rationem in die judicii* ¹¹⁾; et hanc utramque secundum internum operum nostrorum pretium, quod a fine et intentione imprimis pendeat,

¹⁾ 2. Cor. 5, 10.

²⁾ Gal. 6, 8.

³⁾ 2. Cor. 9, 6. Cf. Act. 17, 31. Ephes. 6, 8. 1. Thess. 4, 6. 2. Thess. 1, 4 ss. 2. Tim. 4, 8. Hebr. 6, 10. 10, 30 s. 12, 23. 1. Joan. 4, 17.

⁴⁾ Gen. 2, 17. 3, 14—19.

⁵⁾ Gen. 6, 6—7, 24.

⁶⁾ Gen. 18, 20—19, 28.

⁷⁾ Cf. Deut. 28, 1 ss.

⁸⁾ Col. 3, 25. Cf. Gal. 2, 6.

⁹⁾ 1. Petr. 1, 17. Cf. Deut. 10, 17—18. Eccli. 35, 16. Sap. 6, 8. 2. Par. 19, 17.

¹⁰⁾ Matth. 10, 42.

¹¹⁾ Matth. 12, 36.

assignare; quapropter nos admonet Apostolus: *Itaque nolite ante tempus iudicare, quoadusque veniat Dominus, qui et illuminabit abcondita tenebrarum, et manifestabit consilia cordium: et tunc laus erit unicuique a Deo*¹⁾.

B. Idem Ecclesia semper docuit ac tenuit, ut jam ex dogmate iudicii, tam particularis quam universalis, colligitur; quod posterius in omnibus Symbolis expressum conspicitur. *Inde venturus est iudicare vivos et mortuos*, habet Symbolum Apostolicum et Symbolum Nicaeno-Constantinopolitanum. Athanasianum autem: *Ad cuius adventum omnes homines habent resurgere cum corporibus suis, et reddituri sunt de factis propriis rationem, et qui bona egerunt, ibunt in vitam aeternam, qui vero mala, in ignem aeternum*. SS. Patres vero non tantam doctrinam Ecclesiae de iustitia divina in scriptis suis proponunt, sed et contra Marcionitas statuantes, ultricem Dei iustitiam cum ejus bonitate ac misericordia componi ac conciliari non posse, utramque inter se mire consentire, atque in ipsa etiam punitione Dei bonitatem commendari, ostendunt²⁾.

C. Nec non id ipsum per rationem naturalem tam ex sanctitate Dei atque ejus sapientia, quam ex morali nostra conscientia colligere licet. Nam

a. Deus tanquam infinite sanctus omne bonum etiam in creaturis summe diligere, atque omnem iniquitatem summo odio habere debet; et ideo ipse probitati et vitiositati eandem sortem impertiri, aut felicitatem et miseriam sine ullo respectu ad moralem singulorum entium rationalium dignitatem distribuere nullo modo potest; sed ordinem moralem statuere ipsum oportet, ita ut iustitiae aliquando, finita scilicet nostra probatione, felicitas, eaque illius gradui respondens obtingat, peccatum autem poena, et quidem pariter ejus vitiositati conveniens maneat. Porro Deus qua sapientissimus legem moralem, quam nobis, naturis ad virtutem ac felicitatem destinatis, tulit, ut illa auctoritate necessaria polleat, promissione praemii et comminatione poenae neces-

¹⁾ 1. Cor. 4, 5.

²⁾ Cf. Tertullian. *Adv. Marcion.* l. 2. c. 13. Opp. V. 2. p. 192 s. — Origen. *De princ.* l. 2. c. 5. Opp. T. 1. p. 86 ss. — Chrysostom. *Hom. 3. in Epist. ad Philem.* n. 3. Opp. T. 11. p. 786 s. *Hom. 26. in Ep. ad Rom.* n. 6. T. 9. p. 710. A. E. s. — Augustin. *De lib. arbitr.* l. 3. 15. n. 43—44. T. 1. c. 627 s.

sario sancire, qua fidelissimus autem iis, quae promisit ac minatus est, exitum dare debet. Tum

b. conscientia nostra absolute enuntiat, studium honesti praemio dignum esse, atque peccatum poenam mereri. Hinc ille timor, quo quisque inter peccandum ultricem cujusdam Numinis manum pertimescit, atque coeca illa verbera, quibus peccator torquetur post admissum scelus, etiam latens et incognitum, ita ut nemo improbus in hac vita vera beatitate fruatur; siquidem malefactorum conscientia, cum moerore ac poenitentia saepissime conjuncta, ubique eum persequitur et illius bona splendidissima haud raro contaminat et perdit. Unde autem hoc, nisi ex intima ac firma persuasione ultricis Dei justitiae? Quin imo jam eo, quoniam bonos bene, et malos male afficit conscientia, a Deo nobis indita, ut ejus vices gerat, ipsum legis moralis arbitrum ac vindicem arguit.

Observ. 1. Praeter justitiam hanc distributivam adhuc de justitia legislativa in Deo loquuntur, qua ipse creaturis rationalibus leges convenientes, atque omnibus easdem fert. Attamen justitia haec aperte nihil aliud est, quam sanctissima Dei voluntas ad entia rationalia relata; quapropter specialem ejus mentionem injicere, haud necessarium esse duximus.

Observ. 2. Justitiam commutativam inter Deum et hominem non dari, manifestum est. Cum enim justitia commutativa, qua unum pro alio redditur, in aequalitate rei datae et acceptae sita sit, homoque nihil proprium habeat, quod Deo dare possit; si quidem quaecunque bona sunt nostra opera, ut docet Augustinus, abs Deo nobis sunt, et ideo ejus magis, quam nostra sunt: consequens est, inter Deum et hominem dari non posse justitiam illam. Quin imo, si stricte loqui velimus, etiam justitia distributiva, quatenus ad praemia elargienda refertur, in Deo assumi haud potest, eo nimirum sensu, ac si homo, in se consideratus, jus absolutum in praemium habeat, et Deus ex rigore justitiae ipsi illud reddere teneatur. Nam licet nos absolute obstringamur ad poenas peccatorum nostrorum luendas; quoniam tamen omne creaturae meritum ab aliquo gratuito Dei dono initium sumit, et Deus naturalis creatis nullam rem debet; atque cum universam ejusmodi jus ad praemium ex solo opere derivari haud queat: praemia a Deo proprie nonnisi eatenus exspectare possumus, quatenus pro sua

¹⁾ In Ps. 137, v. 17. Opp. T. 4. c. 1533. Cf. Rom. 11, 35. Conc. Trident. Sess. 6. c. 16. S. Thom. 1. q. 21. art. 1. Opp. T. 20, p. 137.

infinita benignitate nos ad felicitatem condere, et hanc nobis per revelationem promittere voluit; ita ut causa proxima praemiorum sperandorum sit quidem justitia propter factum promissum, remota autem ac propria infinita Dei benignitas.

Observ. 3. Discrepantia inter moralem dignitatem atque sortem externam, quae non raro his in terris invenitur, justitiae divinae minime adversari, non difficulter intelligitur. Etenim status vitae praesentis status probationis est, in quo minime nostro consummato bono fruamur, sed ad illud tendamus et praeparemur; et ideo Deus in hacce vita, salva sua justitia, tam bonis ad exercitationem virtutis et abstergendas humanae virtutis maculas molestias immittere, quam malos patienter ferre, et peccata quasi dissimulare propter poenitentiam, aut vero, ut bona, quae in eis reperit, non sine praemio relinquat, iis bona terrena quaedam et caduca impertiri potest, quos in altera vita justitiae severitatem praevidet experturos.

Observ. 4. Eo, quod Deus infinite justus est, quam maxime excitamur ad peccata vitanda, ne iram Dei adversus nos provocemus, *horrendum enim est, incidere in manus Dei viventis* ¹⁾, atque ad virtutem sectandam, et inprimis ad afflictiones et oppressiones injustas patienter perferendas, *ut digni habeamur in regno Dei, pro quo et patiamur; si tamen justum est apud Deum, retribuere tribulationem iis, qui tribulant, et nobis, qui tribulamur, requiem* ²⁾. Quoniam tamen justitia divina manifestabitur in die judicii, et mala quibus his in terris premimur, licet quoad genus humanum, et etiam nonnunquam quoad singulos poenae divinae sint ³⁾, non tamen semper ⁴⁾; ex sorte sinistra neminem iniquitatis insimulemus, sed potius ab omni petulanti judicio abstineamus ⁵⁾; *Domini enim est ultio, et ipse retribuet in tempore* ⁶⁾.

§. 26. 13. Quoad statum internum Deus est: a. Sibi sufficientissimus.

Ex attributis, quae Deo inesse hucusque ostendimus, sponte sua alia adhuc necessario consequuntur, ejusque quasi statum

¹⁾ Hebr. 10, 31. Cf. 12, 29. Deut. 4, 24. 32, 35. Ps. 93, 1. 7, 13 s. 2—13. 109, 5—6.

²⁾ 2. Thess. 1, 6—7.

³⁾ Cf. Luc. 15, 15 s. 19, 41 ss. Joan. 5, 14.

⁴⁾ Cf. Luc. 13, 1 ss. Joan. 9, 1 ss. 1. Cor. 4, 9 ss. Hebr. 12, 6.

⁵⁾ Deut. 32, 45. Jer. 50, 15.

⁶⁾ Cf. Matth. 7, 1. Luc. 6, 36. Rom. 2, 1 ss. 1. Cor. 4, 5.

internum conficiunt. Etenim quum Deus omnes perfectiones sine limite ac fine in se contineat, atque omnes res creatae, quidquid perfectionis habent, ejus participatione seu communicatione habeant; et ideo ipse sit bonitas ipsa et fons bonorum omnium, seu Bonum summum, Bonum ipsum: Deus sibi sufficientissimus, summa majestate conspicuus ac supremus rerum omnium Dominus, et beatissimus sit necesse est.

Deum sibi esse sufficientissimum ac nulla prorsus re extra se indigere, docent

A. disertis verbis SS. Litterae, quae tradunt, statui divino neque per probe neque per male facta quidquam posse addi vel derogari. *Si peccaveris*, ait auctor libri Job, *quid ei nocebis? et si multiplicatae fuerint iniquitates tuae, quid facies contra eum? Porro, si juste egeris, quid donabis ei, aut quid de manu tua accipiet* ¹⁾? Et Apostolus definite scribit: *Nec indigens aliquo, cum ipse det omnibus vitam, et inspirationem, et omnia* ²⁾.

B. Eadem est quoque SS. Patrum seu Ecclesiae doctrina. Nam ubique, ut vidimus supra, tradunt, Deum perfectissimum, et quidem per se ac necessario, quo nihil melius excogitari possit, seu, ut ait Boëthius, *summi perfectique boni esse plenissimum*, atque, minime necessitate adactum, sed sola bonitate ductum mundum hunc condidisse ac conservare, non ut rebus fruatur, sed tantum utatur, id est, non ut inde aliquid emolumentum aut aliquid felicitatis percipiat, sed potius, ut cum illis suam perfectionem ac beatitudinem participet. *Quomodo ergo*, ait Augustinus, *diligit? Ut nobis utatur, an ut fruatur? Sed si fruatur, eget bono nostro, quod nemo sanus dixerit. Omne enim bonum nostrum vel ipse, vel ab ipso est. Cui autem obscurum vel dubium est, non egere lucem rerum harum nitore, quas ipsa illustraverit? — Non ergo fruatur nobis, sed utitur* ³⁾. Similia habent reliqui ⁴⁾; quorum omnium loco solus

¹⁾ Job. 35, 6.

²⁾ Act. 17, 25.

³⁾ De consol. philos. l. 3. pros. 10. p. 62.

⁴⁾ De doct. Christ. l. 1. c. 31. n. 34. Opp. T. 3. P. 1. c. 15 s.

⁵⁾ Cf. Tertullian. Adv. Marcion. l. 2. c. 16. Opp. V. 2. p. 195. — Tatian. Cont. Graec. n. 4. Opp. Justin. p. 260. — Athenag. Legat. pro Christian. n. 16. lb. p. 310. C. Et al. s. cc.

adhuc audiatur Joannes Damascenus, qui scribit: *Increatum, et sine principio, et immortale, infinitum, aeternum, materia vacans, bonum, opifex, justum, illuminans, immutabile, impatibile, incircumscriptum, incomprehensum, indefinitum, incorporeum, non limilatum, invisibile, cogitatu majus, nullius e gens, merum jus sui et liberum arbitrium, omnium dominans; vivificans, omnipotens, infinitae potentiae, sanctificare* (τὸ ἀγιαστικὸν), *ac communicatu esse* (μεταδοτικὸν, zum Mittheilen geneigt), *omnia continere ac conservare, omnibusque providere. Haec omnia similia suapte natura habet, non aliunde sumta; sed ipsa rebus a se conditis pro cujusque capacitate bonum omne impertit* ¹⁾.

C. Ast nec opus est hisce testimoniis, quum idem ex infinita Dei perfectione per ipsam rationem necessario colligatur. Nam cum Deus tanquam ens infinite perfectum ac summum bonum omnia quaecunque dari possunt, bona, eaque in infinito gradu possideat, et omnia alia bona finita nonnisi per ipsum sint: ipse nulla prorsus re indiget, neque ulla indigere potest.

§. 27. 14. b. Summa majestate conspicuus, atque rerum omnium Dominus.

Simili modo docent A. SS. Litterae, summam Deo ob infinitam ejus perfectionem competere dignitatem, seu summam ei esse majestatem ac gloriam. Ad hanc enim mente agnoscendam, atque verbo ac opere profitendam ubique nos admonent et excitant. *Afferte gloriam Domino*, clamat Psalmista, *et honorem, afferte gloriam nomini ejus*. — *Vox Domini super aquas, Deus majestatis innotuit* ²⁾. Atque Apostolus scribit: *Sive ergo manducatis, sive bibitis, sive aliud quid facitis, omnia in gloriam Dei facite* ³⁾. Quin imo tota oeconomia tum A. tum N. T. huc tendit, ut majestas Dei ab hominibus agnoscatur, atque gloria ejus externa in terris promoveatur.

Nec non porro SS. Litterae Deo supremum ac illimitatum dominium in res creatas, seu perfectissimam facultatem de iisdem disponendi, ac earum actiones ad certos fines dirigendi attribuunt.

¹⁾ De fid. orthod. l. 1. c. ult. Opp. T. 1. p. 152. Cf. l. 1. c. 8 p. 131 s.

²⁾ Ps. 28. 2—3. Cf. Ps. 148, 149, 150, Is. 6, 1 ss, Ezech. 1, 3 ss, Dan. 3, 24 ss. 7, 9 s. Habac. 3, 1 ss.

³⁾ 1. Cor. 10, 31. Cf. Col. 3, 17.

appellatur enim ipse in S. Scriptura *Deus deorum, et Dominus dominantium* ¹⁾, *Dominus saeculi* ²⁾, *Dominus* *αἰώνων* ³⁾, *Rex magnus* ⁴⁾, *Rex regum* ⁵⁾, *Rex saeculorum* ⁶⁾; coelum autem et terra, eorumque plenitudo sunt ex doctrina ejusdem opus Dei ejusque peculium ⁷⁾. Atque Paulus diserte cribit: *Deus, qui fecit mundum, et omnia, quae in eo sunt, hic coeli et terrae cum sit Dominus, non in manufactis templis habitat, nec manibus humanis colitur, indigens aliquo, cum ipse et omnibus vitam, et inspirationem, et omnia* ⁸⁾. Et rursus: *O homo, tu quis es, qui respondeas Deo? Numquid dicit figmentum ei, qui se finxit: Quid me fecisti ic? An non habet potestatem figulus lutii ex eadem massa facere aliud quidem vas in honorem, aliud ero in contumeliam* ⁹⁾? Sensus est, Deo perfectissimum s ac dominium in homines, et ideo etiam in res caeteras omnes impetere; quum omnia ab ipso ex nihilo facta sint, ita ut nullum cistat ens, cui rationem reddere teneatur, cur has potius res oduxerit, quam alias, atque liberrima ejus voluntate constitutum esse hunc rerum ordinem, ita ut nemini integrum sit, alium stius, quam hunc requirere.

B. Et sane quis denegare aut non agnoscere posset summam Dei majestatem? quum ipse sit perfectissimus, immutabilis, aeternus, immensus, omniscius, sapientissimus, omnipotens, enignissimus ac sanctissimus; et quum cum hac infinita perfectione us infinita quoque dignitas seu majestas necessario conjuncta sit, a ut ab illa avelli aut separari prorsus nequeat. Quis porro posset supremum Dei in res dominium haud admittere? quum Deus, que solus ac unicus sit necessarius, omnes autem res aliae, aecunque extra Deum existunt, contingentes sint, quae non si ejus voluntate existunt, nonnisi ejus vitae participatione viunt, atque ab illo prorsus pendent, ita ut ipse plenam ac absolutam potestatem de iis disponendi necessario possideat ac habeat.

1) Deut. 10, 17.

2) Sap. 13, 9.

3) Tob. 13, 10. Mal. 1, 6.

4) Ps. 94, 3. Matth. 5, 35.

5) 2. Machab. 13, 4. 1. Tim. 6, 15. Apoc. 19, 16.

6) Tob. 13, 6. 1. Tim. 1, 17. Cf. Ps. 65, 7.

7) Act. 17, 24—25.

8) Rom. 9, 20—21.

9) Rom. 9, 20—21.

Observ. 1. Summa Dei dignitas seu majestas, quatenus in operibus divinis comparet, et praecipue quatenus a naturis intelligentibus agnoscitur ac colitur, dicitur gloria divina, eaque externa, in cujus oppositione deinde divina majestas etiam gloria Dei interna adpellatur. Quo sensu ait Propheta: *Plena est omnis terra gloria ejus* ¹⁾. Et Psalmista: *Et benedictum nomen majestatis ejus in aeternum: et replebitur maiestate (gloria) ejus omnis terra: fiat, fiat* ²⁾.

Observ. 2. Quod si autem Deus summa maiestate est conspicuus, supremusque rerum omnium Dominus:

a. summam ei exhibeamus reverentiam, pudeatque nos, quum alia non aestimentur ac amentur, nisi quia bona sunt, non revereri ac amare ipsum summum Bonum, unde bona sunt; atque

b. nos ipsi humillime subjiciamus, eidemque semper ad obediendum intenti simus, et in nullius hominis gratiam faciamus, quod Deus vetat, aut omittamus, quod Deus praecipit, monente Apostolo: *Obedire oportet Deo magis, quam hominibus* ³⁾.

§. 28. 15. c. Beatissimus.

Tandem quoniam infinite perfectus, etiam infinite beatus Deus est.

Intelligitur autem sub beatitudine in Deo ea absoluta ejus conditio, qua ipse se tanquam summum Bonum seu perfectissimum per se absolute ac perfectissime cognoscit, sibi que summe ac necessario complacet et acquiescit.

Deum beatissimum esse, nemo haereticorum unquam negavit aut in dubium vocavit, sed omnes omnino, quicumque Christiano censebantur nomine, prouti et Judaei antea, per revelationem divinam edocti professi sunt. Etenim infinitam Dei beatitudinem

A. docent clarissime SS. Litterae. Sic Apostolus Deum vocat beatum ⁴⁾ κατ' ἐξοχήν, τὸν μακάριον, i. e. solum vere ac necessario beatum, qui sit ipsa beatitudo, omnisque beatitudinis largitor. Atque iterum scribit: *Beatus, ó μακάριος, et solus potens, Rex regum, et Dominus dominantium, qui solus habet immortalitatem, et lucem inhabitat inaccessibilem* ⁵⁾.

¹⁾ Is. 6. 3. Cf. Exod. 24, 16—17.

²⁾ Ps. 71, 19.

³⁾ Act. 5, 29.

⁴⁾ 1. Tim. 1, 11.

⁵⁾ 1. Tim. 6, 15—16.

B. Haec est quoque unanimis doctrina SS. Patrum, quorum testimonia tamen hic in medium proferre superfluum foret. Unicus sufficiat ex graecis Gregorius Nyss., et ex latinis Augustinus. Hic ait: *Neque beatæ vitæ vocabulum ita contrahimus ad quasdam significationis angustias, ut solum Deum dicamus beatum: qui tamen ita vere beatus est, ut major beatitudo esse non possit: in cuius comparatione, quod Angeli beati sunt, sua quadam summa beatitudine, quanta in Angelis esse potest, quid aut quantum est ¹⁾*? Prior autem scribit: *Quod vere beatum habendum sit, ipsum divinum Numen est. Nam quicquid id tandem esse ponamus: beatitudo est illa immortalis et incorrupta vita, ineffabile pariter et inaninadvorsibile atque inexcogitabile bonum, inenarrabilis inexplicabilisque pulchritudo, a se ipsa profecta, a se ipsa data, et gratia, et sapientia, et potentia: vera lux: fons omnis bonitatis: rebus universis praesidens ac superimposita potestas: sola amabilis, semper eodem modo sese habens, perpetua exultatio: sempiterna laetitia: de qua si quis dicat omnia, quae possit, nihil dicit eorum, quae rei dignitas postulat ac requirit ²⁾*.

C. Sed et ratio id ipsum necessario statuit. Etenim Deus tanquam ens perfectissimum ac necessarium vi intellectus infiniti, omnia perfectissime cognoscit, atque vi voluntatis infinitae omnia perfectissime vult, et sine ullo prorsus impedimento perficit, idque omne per se et a se, ita ut nulla omnino ab ipso perfectio absit, sed omnia prorsus bona in illo tanquam fonte suo reperiantur, nullusque metus aliquid eorum amittendi, nullaue efficientiae impeditio adsit, et ideo ipse vera et absoluta vita sit. Hujusce autem status ornatissimi non potest non Deus esse sibi perfectissime simul conscius, atque hinc etiam in se quam maxime acquiescere sibi placere.

Observ. 1. Quomodo loca illa S. Scripturae, in quibus Deo poenitentia, ira, et aliae ejusmodi affectiones attribuuntur, quae solummodo relationem ipsius ad ejus opera, et nominatim ad entia intelligentia, vel potius horum ad ipsum exprimunt, interpretanda sint, jam dictum est.

Non turbari autem Deum eo, quod multi hominum voluntatem divinam haud adimpleant, per se intelligitur. Nam in iis, quae ad salutem nostram pertinent, Deus nil vult, quod homo non vult, ita

¹⁾ De civ. D. I. 11. c. 11. Opp. T. 7. c. 281 a.

²⁾ De beatit. Or. 1. Opp. ed. Par. 1638. T. 1. p. 764.

ut, quemadmodum pariter observatum est, voluntate sua vera et propria nunquam frustretur.

O b s e r v. 2. Deus vere beatus, quia vere perfectus est. Quapropter felicitatem nostram in fluxis bonis terrestribus non, sed in cognitione vera atque vita sancta, et per hancce cum Deo unione quaeramus; fugiamusque quae nos a Deo, qui sine fine beatus etiam nostra beatitudo est, abducunt nostramque cum Domino gloriae conjunctionem impediunt. Quo magis terrenis voluptatibus renuntiamus, corque nostrum evacuamus, eo magis voluptatibus vere coelestibus jam hisce in terris affluit. *Quid enim, mihi est in coelo? et a te (separatus) quid volui super terram? Defecit caro mea, et cor meum : Deus cordis mei, et pars mea, Deus, in aeternum* ¹⁾.

¹⁾ Ps. 72, 25—26.



SECTIO TERTIA.

De vita Dei absoluta, seu de Deo triuno.

§. 29. Transitio.

Quemadmodum Deus quoad existentiam suam absolute necessarius, et ideo infinite est perfectus: ita quoque quoad τὸ πνευματικόν seu vitam suam, h. e. quoad cognitionem et voluntatem, βούλησιν, pariter absoluta necessitate ac infinita perfectione praeditus sit necesse est. Prout ergo Deus perfectissimam, per se subsistentem, suique consciam existentiam, sic etiam intelligentiam, nec non dilectionem infinite perfectam, per se subsistentem, cum sui conscientia conjunctam possidet, seu tum quoad existentiam, tum quoad intelligentiam, tum quoad voluntatem ἀνταξιοῦστος atque sui necessario conscius est.

Licet itaque, ut vidimus, unus nonnisi detur Deus, unica nonnisi sit divina natura ac substantia: haec tamen una eademque natura et substantia in tribus suppositis seu personis subsistit, indivisis quidem, attamen a se realiter distinctis. Adpellatur doctrina haec, quae Deum triunum esse statuit, seu tres dari divinas personas unius ejusdemque non specie, sed numero substantiae divinae, mysterium SS. Trinitatis; quum illam soli revelationi in acceptis referamus, ratioque naturalis per se ipsam nunquam ad ejus cognitionem pervenisset, licet in eam, postquam per revelationem divinam nobis innotuit, adcuratius inquirere et ejus profunda quasi scrutari queat, quod et nunquam non tentavit. Unde et nos, quemadmodum disciplinam nostram alioquin decet, ut ubique, ita etiam hic, mysterium nostrum prae omnibus e fontibus revelationis propriis probabimus, et deinde principaliora tentamina illud explicandi et per se ipsum, h. e. ex idea Dei demonstrandi adjiciemus.

§. 30. Momentum doctrinae.

Doctrina, quam modo tractaturi sumus, gravissimi est ponderis, quin imo primum ac summum religionis Christianae caput ¹⁾. Etenim

1. attinet ipsa, ut praecedens, ad Deum ipsum, summum Bonum, atque ejus inscrutabilem naturam nobis adcuratius ob oculos ponit,

et quis Deus triunus sit, cui nomen in Baptismo dedimus obsequiumque spopondimus, exponit.

2. Doctrinae huic doctrina de nostra redemptione, justificatione ac aeterna salute superstruitur, ita ut hoc uno fundamento stet structura catholicae religionis, et a Judaeorum et Gentilium religione utrimque disjungatur, sitque uti fidei, ita et virtutis ac solatii principium. Quapropter et S. Augustinus, de mysterio SS. Trinitatis scribens: *Nec periculosius, ait, alicubi erratur, nec laboriosius aliquid quaeritur, nec fructuosius aliquid invenitur. Hinc autem*

3. doctrina illa quoque infensissimos quovis tempore nacta est adversarios, ita ut nullum aliud unquam dogma tam forti tamque repetito impetu impugnatum, atque ex omni parte exploratum tentatumque fuerit. Sciebant enim omnes, quibus religio Christiana exosa erat, negato illo mysterio, religionis Christianae fundamentum subverti. Unde quo majori conatu ac industria dogma nostrum ab adversariis oppugnatur, eo impensius nobis defendendum est.

§. 31. Conspectus.

Cum mysterium SS. Trinitatis in eo consistat, quod nihil plane perfectionis naturalis in uno trium, Patre, Filio aut Spiritu S. adsit, quod non et in duobus aliis reperiatur, sed Pater, Filius et Spiritus S. eadem aeterna ac immensa natura sint, et ideo consubstantiales ac prorsus aequales, idcirco tamen Pater non sit Filius, nec Pater aut Filius sit Spiritus S., sed Pater et Filius et Spiritus S. sint personae a se invicem realiter distinctae; idque eatenus, quatenus una ab altera accipiat originem, seu una ab altera procedat, videlicet Pater aeternus ab ipsa aeternitate generet Filium, Deum eundem aeternum, Pater item et Filius, tamquam unum principium, ab omni aeternitate emittant (*ἐκπέποντον*), seu spirent Spiritum S., ita ut generatio Filii et processio Spiritus S. prorsus eadem ratione sint divinitatis propriae ac ipsa divinitas: tractatus praesens commode in tres dispesci potest titulos; quorum

1. ostendit, Patrem et Filium et Spiritum S. esse unum eundemque Deum, seu sibi consubstantiales.

1) Cf. Athanas. Or. 1. cont. Arian. n. 18. Opp. T. 1. P. 1. p. 422. E.

2) De Trinit. l. 1. c. 8. n. 5. Opp. T. 8. c. 762.

2. Patrem Filium et Spiritum S. esse personas saliter distinctas, demonstrat; atque

3. processiones divinas exponit.

T i t u l u s I.

Pater et Filius et Spiritus S. sunt unus idemque
eius verus.

A r t i c u l u s I.

D e P a t r e v e r o D e o.

§. 32. Pater Deus.

Nullus est inter Dei veri ac vivi cultores, qui Patris divinitem, saltem directe, impugnaverit, quamvis omnes, qui Filio natum divinam detraxerunt, eo ipso quoque Deum Patrem sensu proprio esse negarunt. Hinc paucis absolvere possumus primum hunc lei nostrae de SS. Trinitate articulum.

A. In SS. Litteris Deus triplici respectu Pater adpellatur, et quidem primo in relatione ad universum genus humanum singulos homines, tamquam eorum Creator, Conservator ac Tutor; deinde in relatione ad justos, utpote gratia divina regatos et filios Dei adoptivos, et hinc etiam ad populum Judaeum et Christianum, utpote speciali ac extraordinario modo Justitiam ac sanctitatem vocatum; atque tum in relatione Jesum Christum, Filium suum unicum, naturalem ac proprium. Sed quocunque demum respectu de Patre, sive generis humani, sive electorum, sive Jesu Christi, in SS. Litteris sermo est ubique Pater divinae naturae plene particeps, ~~sem~~ verus eius describitur. Deus enim est,

1. qui Pater hominum universim cognominatur. Sic recto sub Patre nostro nemo alius, quam Deus verus ac vivus intelligendus est, quando Christus nobis, ut oremus, mandat: *pater noster, qui es in coelis: etc.* ¹⁾. Item ubi ait:

¹⁾ Matth. 6, 4 ss.

Diligite inimicos vestros. — ut sitis filii Patris vestri, qui in coelis est ¹⁾; et iterum: *Pater, qui videt in abscondito* (eleemosynam tuam), *reddet tibi* ²⁾. Nec non quando Apostolus: *Unus, inquit, Deus, et Pater omnium, qui est super omnes* (ἐπὶ πάντων), *per omnia, et in omnibus nobis* ³⁾. Et sic multis aliis in locis ⁴⁾. Deus est

2. porro, qui Pater justorum, populi Israël atque Christiani appellatur. Deum esse Patrem justorum generatim, docet Apostolus, scribens: *Non enim accepistis spiritum servitutis iterum in timore, sed accepistis spiritum adoptionis filiorum, in quo clamamus Abba (Pater)* ⁵⁾. Patrem Christianorum, ipse Salvator, quum ait ad discipulos: *Sic luceat lux vestra coram hominibus, ut videant opera vestra, et glorificent patrem vestrum, qui in coelis est* ⁶⁾. Atque populi Israëliti, Moyses, illum his verbis affatus: *Numquid non ipse est pater tuus, qui possedit te, et fecit te, et creavit te* ⁷⁾? Tandem Deus pariter est,

3. qui Christi Domini sensu longe sublimiori, proprio ac vero, Pater dicitur. Ex ingenti numero S. Scripturae locorum praecipue laudari merentur verba Christi ad matrem suam et Josephum: *Nesciebatis, quia in his, quae Patris mei sunt, oportet me esse* ⁸⁾? De templo aperte hic Jesus loquitur, quod domus Dei vivi erat, et ideo Patrem suum, in oppositione matris atque nutritii, expresse Deum verum adpellat. Porro illud: *Ascendo ad Patrem meum, et Patrem vestrum, Deum meum et Deum vestrum* ⁹⁾. Nec non verba ista, quibus dignitatem suam divinam adversus Phariseos tuetur: *Est Pater meus, qui glorificat me, quem vos dicitis, quia Deus vester est* ¹⁰⁾. Ob quae verba Pharisei Jesum lapidare voluerunt. Hinc et Christus

¹⁾ Matth. 5, 44 s.

²⁾ Matth. 6, 4.

³⁾ Ephes. 4, 6.

⁴⁾ Cf. Matth. 7, 11. Act. 1, 4, 17, 29. 1. Cor. 1, 3. 8, 6. Col. 1, 3. etc.

⁵⁾ Rom. 8, 15. Cf. Gal. 4, 6. Joan. 1, 12.

⁶⁾ Matth. 5, 16. Cf. 48.

⁷⁾ Deut. 32, 6. Cf. Exod. 4, 32 s. Is. 63, 16. Jer. 3, 19. 31, 9. 20. Malach. 1, 6.

⁸⁾ Luc. 2, 49.

⁹⁾ Joan. 20, 17.

¹⁰⁾ Joan. 8, 54.

d Patrem preces dirigit ¹⁾, porro eum in coelis esse ²⁾, omnia isponere ³⁾, habere vitam in se ipso, et dedisse quoque Filio, abere vitam in semetipso ⁴⁾, ei omnia esse possibile ⁵⁾, ab eo ubi omnia tradita esse ⁶⁾, omnemque trahi debere, qui vult venire ad Christum ⁷⁾, atque illum ab hominibus in spiritu ac veritate adorandum esse ⁸⁾, docet ⁹⁾. — Simili modo Apostolis vocabula deus et Pater Domini nostri Jesu Christi synonyma sunt. *Uno re honorificetis*, ait Paulus, *Deum et Patrem Domini nostri Jesu Christi* ¹⁰⁾. Petrus: *Benedictus Deus, et ater Domini nostri Jesu Christi, qui secundum misericordiam suam magnam nos regeneravit in spem vivam* ¹¹⁾. Atque Ioannes: *Hic est Antichristus, qui negat Patrem, et Filium. mnis, qui negat Filium, nec Patrem habet, qui confletur Filium, et Patrem habet* ¹²⁾. Quibus veritas nostra religionis hristianae propria et essentialis declaratur.

B. Patrem Deum verum esse, porro fides universalis ecclesiae profitetur, et eum *διασφόρως*, cum excellentia quam, Deum adpellat. *Credo*, habet Symbolum Nicaeno-Constantinopolitanum, *in Deum, Patrem omnipotentem, factorem coeli terrae. Et in Jesum Christum, Filium Dei unigenitum, et ex aatre natum ante omnia saecula, Deum de Deo, — consubstantialem Patri*. Accedunt precum publicarum invocationes et claudae vetustissimae: *Omnipotens, sempiternus Deus, Pater omni nostri Jesu Christi, — qui tecum vivit et regnat in unitate Spiritus S. Deus per omnia saecula saeculorum*.

1) Joan. 8, 59. Cf. 10, 15. 30. Matth. 11, 27. Luc. 10, 22.

2) Matth. 11, 25 ss. 26, 39. Marc. 14, 36. Luc. 10, 21 s. 22, 42. 23, 34. 1. Joan. 17, 1 ss.

3) Matth. 7, 21. 12, 50. 10, 32. 16, 17. 18, 10.

4) Joan. 5, 26.

5) Matth. 20, 23—24.

6) Matth. 28, 18. Luc. 10, 22.

7) Joan. 6, 44 s.

8) Joan. 4, 23 s.

9) Cf. Matth. 16, 16. 26, 63. Marc. 14, 61. Joan. 1, 14. 5, 17. 36. 37. 3, 18. 35. 5, 17. 18. 36. 37. 6, 32. 37. 39. 8, 16. 28. 10, 25. 29. 12, 26. 27. 1, 2. 11. 13. 16. 20—21. 24. 15, 8. 9. 15. 23. 16, 15. 28. 17, 5. 11. 21. 24.

10) Rom. 15, 6. Cf. 8, 3. 22. 2. Cor. 1, 3. 11, 31. Ephes. 1, 3. 17. 3, 14. al. 4, 4. Hebr. 1, 2. 7, 28.

11) 1. Petr. 1, 3.

12) 1. Joan. 2, 22. 23. Cf. 1, 3. 4, 15. Joan. 1, 1.

A r t i c u l u s II.

De Filio vero Deo, Patri consubstantiali.

§. 33. Ingressio.

Primi, qui divinitatem Filii negarunt, erant Gnostici, Nazaræi et Ebionitæ. Quorum priores plerique, Jesum Christum æonem esse, docuerunt; Nazaræi ipsum Dei Filium quidem altioris originis, attamen nequaquam verum Deum; Ebionitæ vero non nisi Prophetam et Legatum divinum, cæterum naturali modo a Josepho et Maria progenitum, habebant ¹⁾.

Antitrinitarii, uti Praxeas, Noëtus, Theodotus, Artemon atque Paulus Samosatenus, non tam divinitatem Filii, τοῦ Λόγου, quam ejus personalem subsistentiam impugnaverunt, illud merum attributum divinum habentes; et ideo, Christum vel Deum Patrem hominem factum, vel vero parum dumtaxat hominem fuisse, stantes; quapropter eorum error, uti Ebionitarum, non tam præsentis, quam potius doctrinæ de tribus in divina substantia personis opponitur.

Veri ac proprii doctrinæ nostræ hostes, qui directe divinitatem Filii, ejusque cum Patre consubstantialitatem aggressi sunt, erant Ariani, sæculo IV. orti. Qui tamen, ut omnes hæretici, sibi minime constiterunt. Alii enim contendebant, Λόγον creaturam esse, et in tempore factum, (κτῆμα καὶ ποτὴν), simulque per omnia Deo Patri dissimilem, ἀνόμοιον, unde Anomæi seu Ariani rigidi, vel etiam a suis ducibus, Aetio et Eunomio, Aetiani et Eunomiani dicti. Alii autem Λόγον quidem divinitatem tribuerunt, sed inferioris dignitatis, et diversam ab ea, quam habet Pater, atque propterea Filium Patri ὁμοούσιον, similem in externis quibusdam naturæ divinæ lineamentis asserentes, Semitaſtiani ideo, quod asperitatem dogmatis Ariani aliquo modo effollerent ac temperarent, adpellati. Alii tandem ab Acacio, Caesariensi Episcopo, capite suo, Acaciani nuncupati, Filium neque ὁμοούσιον, neque ἀνόμοιον dixerunt, sed ὁμοιον, similem, non quidem essentia, sed voluntate; seu ad eam modum, quo effigies suæ προτότυπον similis est. At illi quatenunque dentum partem propensæ erant singulis Ariatorum sectæ: in hoc tamen omnes conveniebant, ut Filium ~~se~~ Λόγον ὁμοούσιον, consubstantialem, Patri negarent.

¹⁾ Cf. Klein, *Hist. eccl. Graec.* 1828. T. 1. p. 166 ss.

Sociniani et recentiores Rationalistae biblici, qui post Catharos, multos Anabaptistas et alios singulos, ut Joannem Valdez et Bernardinum Occhinum, Matthaeum Gribaldum, Michaëlem Servetum et Valentinum Gentilem, errores antiquorum Antitrinitariorum resuscitarunt, directe pariter dumtaxat divinitatem Christi, verum eo ipso simul saltem indirecte divinitatem Filii impugnarunt, contententes, Christum verum, non tamen vulgarem, sed divinum esse hominem, qui ad salutem hominum procurandam destinatus, gloria miraculorum exornatus, officium sibi demandatum adcurate impleverit, et idcirco post mortem, quam martyr pro sua doctrina obierit, suscitatus, et ad summam dignitatem evectus, a nobis pro Deo colendus sit; Patrem, Filium et Spiritum S. vero non personas, sed tantum diversa esse attributa divina, statuantes ¹⁾. Unde et hi solummodo eatenus huc pertinent, quatenus nobis loca S. Scripturae, quibus divinitas Filii, realiter a Patre distincti, probatur, e manibus extorquere conantur.

Contra hosce ergo errores probamus dogma Ecclesiae Catholicae solemner definitum, *Λόγος*, qui inde ab aeterno apud Patrem existens, in tempore homo factus, Jesus Christus est, adeoque et hunc Jesum Filium Dei esse, non quidem sensu morali, quo fideles ac justii quoque filii Dei adpellantur ²⁾, neque sensu politico, quo vices Dei in terris gerentes ejus filii cognominantur ³⁾, sed sensu quam maxime proprio ac naturali, seu physico, qui unius ejusdemque prorsus ac individuae cum Patre sit naturae et substantiae, sive Patri consubstantialem, unumque cum Patre Deum verum.

In evincendo dogmate nostro ita versabimur, ut prius effata Christi, deinde testimonia Apostolorum, tum Traditionis documenta, loca SS. Patrum ac decreta Conciliorum in medium proferamus, atque ipsum testimonium nominis Christiani hostium adjiciamus, ubique ad objectiones, ab adversariis motas, attendentes.

§. 34. A. Testimonia S. Scripturae.

a. Effata Jesu.

Christus Dominus in SS. Litteris non tantum excellentior Moyse ⁴⁾, major summo Sacerdote antiqui Testamenti ⁵⁾, nec

¹⁾ Cf. *Biblioth. Fratr. Polon.* T. 1. P. 1. p. 781. T. 2. p. 489 s.

²⁾ Cf. Gen. 6, 2. Deut. 14, 1. Jer. 31, 20. Matth. 5, 9. 45. Joan. 1, 12. Rom. 8, 14 s. 1. Joan. 3, 1.

³⁾ Cf. Ps. 81, 6.

⁴⁾ Hebr. 3, 1 ss.

⁵⁾ Hebr. 4, 14—16. 5, 1—10. 7, 11—28.

non melior ipsis¹⁾ Angelis¹⁾ declaratur; sed etiam tum ipse, tum Apostoli clarissime docent, illum ejusdem prorsus esse cum Patre naturae ac substantiae. Et quidem Christus, disputans cum Judaeis in porticu Salamonis ait: *Oves meae vocem meam audiunt: et ego cognosco eas, et sequuntur me: et ego vitam aeternam do eis: et non peribunt in aeternum, et non rapiet eas quisquam de manu mea. Pater meus, quod dedit mihi, majus omnibus est* (vel potius juxta textum graecum: *qui dedit mihi illas, major est omnibus, ὃς δέδωκέ μοι, μείζων πάντων ἐστίν*): *et nemo potest rapere de manu Patris mei. Ego, et Pater unum sumus, ἐγὼ καὶ ὁ πατήρ ἓν ἐσμεν*²⁾). Quo loco aperte ita argumentatur Christus: Discipuli mei, quibus felicitatem aeternam largiturus sum, (quod nonnisi Dei est,) mihi tam parum, quam Patri eripi possunt; quum, quemadmodum Pater est omnipotens, ita et ego omnipotens sim; ego enim et Pater unum sumus. Ad unitatem itaque suam cum Patre, quam affirmat, tamquam causam ejusdem cum Patre potentiae provocat; hujus autem causa manifeste nonnisi unitas substantiae, minime vero sola voluntatis consensio, seu unitas moralis esse potest. Quare et Judaei verba Jesu de unitate substantiali intelligunt, et eum propterea blasphemiae accusant, atque lapidibus obruere volunt; quia, ut ajunt, homo cum sit, faciat se ipsum Deum³⁾. Si vero Christus ulterius sermonem proseguens: *Nonne, inquit, scriptum est in lege vestra: quia Ego dixi, dii estis? Si illos dixit deos, ad quos sermo Dei factus est, et non potest solvi scriptura: quem Pater sanctificavit, et misit in mundum, vos dicitis: Quia blasphemias: quia dixi, Filius Dei sum*⁴⁾? sententiam suam minime retractat, aut mitigat, sed potius, a minori ad majus, ut ajunt = argumentans, magis confirmat. Sensus enim verborum alius non est, quam: Si in Scriptura, quae tamen mentiri non potest, homines nihil divini habentes, ad quos sermo Dei pertinet, verba Psalmi scilicet, seu adversus quos dirigitur Dei comminatio iudices videlicet, tantum propter auctoritatem a Deo acceptam utpote Dei vices gerentes, dii adpellantur: multo magis ego qui a Patre, quem Deum vestrum colitis, Salvator generis humani, utpote Deus homo, designatus, et propterea in mundum

¹⁾ Hebr. 1, 4.

²⁾ Joan. 10, 27—30.

³⁾ v. 33.

⁴⁾ vv. 34—36.

missus sum, sine ulla blasphemia Filius Dei vocari possum. Quapropter et ulterius disserens ad miracula, a se patrata, tamquam certissimam effati sui confirmationem provocat, his verbis: *Si non facio opera Patris mei, nolite credere mihi. Si autem facio: etsi mihi non vultis credere, operibus credite, ut cognoscatis, et credatis, quia Pater in me est, et ego in Patre*, i. e. ut intelligatis, verum esse, quod asserui, me et Patrem unum esse ¹⁾. Quod haud necessarium fuisset, si se tantum tamquam Propheta et Legatus divinus simili sensu, ac iudices dii et filii excelsi dicti sunt, Filium Dei adpellasset. Id Judaei bene senserunt, Jesum denuo comprehendere studentes, ita ut ipse per iugum eorum insidiis se subducere cogeretur ²⁾.

b. Alia occasione, postquam scilicet ad piscinam aegrotum, qui triginta octo annos languerat, sabbato sanaverat, Judaeos, sibi ideo insidiantes, his affatus est verbis: *Pater meus usque nudo operatur, et ego operor. Propterea ergo magis quaerebant eum Judaei interficere: quia non solum solvebat sabbatum, sed et patrem suum dicebat Deum, aequalem se faciens Deo. Respondit* (allocutus est illos) *itaque Jesus, et dixit eis: Amen, amen dico vobis: non potest Filius a se facere quidquam* (quod scilicet sanctitati adversum esset), *nisi quod viderit Patrem facientem*, (i. e. nisi quod facit Pater, utpote qua Deus cum Patre unum, et qua homo ei perfecte subditus): *quaecunque enim ille fecerit, haec et Filius similiter facit. Pater enim diligit Filium, et omnia demonstrat* (communicat) *ei, quae ipse facit: et majora his demonstrabit* (substantiam divinam videlicet cum eo communicando) *ei opera, ut vos miremini. Sicut enim Pater suscitavit mortuos, et vivificat: sic et Filius, quos vult, vivificat. Neque enim* (vero) *Pater judicat unquam: sed omne iudicium dedit Filio, ut omnes honorificent Filium, sicut honorificant Patrem: et qui non honorificat Filium, non honorificat Patrem, qui misit illum. — Amen, amen dico vobis, quia venit hora, et nunc est, quando mortui audient vocem Filii Dei: et qui*

¹⁾ vv. 37—38.

²⁾ Sic exponunt locum hunc: Athanasius *Or. 3. cont. Arian. n. 5—6. pp. T. 1. P. 1. p. 554 s. Or. 4. n. 2. p. 619. et al. s. — Basil. Adv. hom. l. 1. n. 25. Opp. T. 1. p. 236. A. B. l. 4. n. 2. p. 282. D. E. — Gregor. Naz. Or. 49. T. 1. c. 659—660. — Gregor. Nys. Cont. hom. l. 1. Opp. Par. 1615. T. 2. p. 7. D. E. — Chrysostom. Hom. in Joan. n. 2. Opp. T. 8. p. 363. Hom. 39. in Joan. n. 4. p. 232. B. — Hilar. De Trinil. l. 7. n. 15 ss. T. 2. c. 186 ss.*

audierint, vivent. Sicut enim Pater habet vitam in semetipso: sic dedit et Filio habere vitam in semetipso: et potestatem dedit ei iudicium facere, quia Filius hominis (i. e. Messias, Deus — homo) est ¹⁾. Quibus verbis Jesus se non tantum Filium Patris adpellat ²⁾, sed et α) sibi eandem cum Patre tribuit dignitatem, asseverans, se, uti Patrem, pleno dominio, legi sabbati hanc adstricto, mundum conservare ac regere; β) se esse impeccabilem, uti Patrem, ita ut quod contrarium sit sanctitati, perficere prorsus non possit; γ) porro, se, sicut Patrem, esse omnipotentem, qui pro sua voluntate miracula patrare, atque mortuos resuscitare queat ³⁾; δ) sibi iudicium universorum hominum ac Angelorum esse demandatum, quod eum scrutatorem renum ac cordium seu omniscium arguit; ε) sibi eundem cultum cum Patre tribuendum ⁴⁾; atque tandem ζ) se per semetipsum existere, seu esse ens a se, ens necessarium ⁵⁾. Quae omnia manifeste nonnisi Deo competent, et hic enuntiata eo majoris sunt ponderis, quoniam Christus Dominus ea in medium protulit, ad sententiam suam, qua se Filium Dei longe alio sensu esse asseruerat, quam quo magistratus, aut etiam homines pii filii Dei dici possunt, magis confirmandam, et quasi demonstrandam, postquam Judaeos ideo offensos esse viderat; quos propterea porro ad testimonium Joannis ⁶⁾, deinde iterum ad miracula a se patrata ⁷⁾, tum ad manifestationem ad Jordanem factam ⁸⁾, denique ad vaticinia A. T., de se edita ⁹⁾, ablegat ¹⁰⁾.

c. Perfectam porro cum Patre aequalitatem, atque eapropter etiam, quum nonnisi unus sit Deus, identitatem edisserit Christus, ubi ad Philippum ait: *Qui videt me, videt et Patrem. Quomodo tu dicis: Ostende nobis Patrem? Non creditis, quia e*

¹⁾ Joan. 5, 17—27.

²⁾ Cf. Joan. 8, 27. Matth. 10, 32. 12, 50.

³⁾ Cf. Joan. 6, 39. 11, 25.

⁴⁾ Cf. Matth. 4, 10.

⁵⁾ Cf. Joan. 8, 24.

⁶⁾ vv. 32. 33.

⁷⁾ v. 36.

⁸⁾ v. 37.

⁹⁾ vv. 39. 45—47.

¹⁰⁾ Cf. Epiphani. *Haer.* 62. n. 4. Opp. T. 4. p. 516. — Cyrilli. *Alex. Thes. Assert.* 32. Opp. T. 5. P. 1. p. 321 s. *De Trinit. Dial.* 2. lb. p. 4. — Hilar. *De Trinit.* l. 7. n. 15—21. Opp. T. 2. c. 186—192. — Fulger. *Rusp. Cont. Arian.* Opp. p. 60. — Augustin. *Tract.* 17. n. 16. Opp. 3. P. 2. c. 429.

in Patre, et Pater in me est? ¹⁾). Et ad discipulos: *Omnia quaecunque habet Pater, mea sunt. Propterea dixi: quia de meo accipiet, et annuntiabit vobis* (Spiritus S.) ²⁾. Atque alia occasione: *Et nemo novit Filium, nisi Pater: neque Patrem quis novit, nisi Filius, et cui voluerit Filius revelare* ³⁾. Hinc se Filium Dei unigenitum adpellat ⁴⁾, qui Abrahamo praeexstiterit ⁵⁾, a Patre exiv-
rit ⁶⁾, atque *descenderit de coelo, Filius hominis, qui est in coelo* ⁷⁾; vitae suae dominum declarat: *Nemo tollit eam* (vitam) *a me: sed ego pono eam a me ipso, et potestatem habeo ponendi eam, et potestatem habeo iterum sumendi eam* ⁸⁾; miracula ex propria potestate non tantum se patrare, docet ⁹⁾, sed et aliis eadem patrandi potestatem dat ¹⁰⁾, suamque assistentiam atque Spiritum Sanctum Apostolis pollicetur ¹¹⁾; legem novam fert ¹²⁾, et se auctorem omnis verae Dei cognitionis atque vitae spiritualis esse testatur: *Ego sum via, et veritas, et vita; nemo venit ad Patrem, nisi per me* ¹³⁾; peccata remittit ¹⁴⁾, potestatemque hanc sibi competere patrato miraculo probat ¹⁵⁾; se esse scrutatorem renum et cordium ¹⁶⁾, mortuos resuscita-

¹⁾ Joan. 14, 9—10. Cf. Chrysost. Hom. 74. in Joan. n. 1. Opp. T. 8. p. 435. — Athanas. Cont. Arian. Or. 4. n. 17. Opp. T. 1. p. 629. etc. — Cyrill. Alex. Thes. Assert. 10, 12, 17. Opp. T. 5. P. 1. p. 79. E. p. 107 s. 112. A. 180. D. In Joan. l. 1. c. 3. T. 4. p. 27. A. — Augustin. Tr. in Joan. 48. n. 10. Opp. T. 3. P. 1. c. 618. Tr. 70. n. 3. c. 684 s.

²⁾ Joan. 16, 15. Cf. Matth. 28, 18, 11, 27. Joan. 17, 10. — Cyrill. Alex. Thes. Assert. 9. T. 5. P. 1. p. 70. E. In Joan. l. 1. c. 3. T. 4. p. 27. — Augustin. Sermon. 135. n. 3. Opp. T. 5. c. 656, E. Cont. Maximin. l. 3. c. 14. n. 7. T. 8. c. 706. c. 19. n. 3. c. 721.

³⁾ Matth. 11, 27. Cf. Joan. 6, 46.

⁴⁾ Joan. 3, 16, 18.

⁵⁾ Joan. 8, 58.

⁶⁾ Joan. 16, 27, 28.

⁷⁾ Joan. 3, 13.

⁸⁾ Joan. 10, 18. Cf. 2, 19.

⁹⁾ Joan. 5, 21. Cf. 11, 25, 2, 11, 1, 14. Matth. 8, 8 ss.

¹⁰⁾ Matth. 10, 1. Luc. 10, 17 ss. Act. 9, 34, 16, 18.

¹¹⁾ Matth. 28, 20. Joan. 15, 26, 16, 7.

¹²⁾ Matth. 11, 29, 28, 19 ss. Joan. 15, 12, 14, 15, 21.

¹³⁾ Joan. 14, 6. Cf. 8, 12, 1. Joan. 1, 9.

¹⁴⁾ Matth. 9, 2 ss. Marc. 2, 5. Luc. 7, 48.

¹⁵⁾ Matth. 9, 2 ss. Marc. 2, 5. Luc. 7, 48.

¹⁶⁾ Apoc. 2, 23. Cf. Ps. 7, 10. Jer. 17, 9—10.

turum ¹⁾, iudicem mundi futurum ²⁾, ut supra jam monstravimus, atque bonis vitam aeternam largiturum ³⁾, asseverat; preces ad se fusasse exauditurum esse ⁴⁾, promittit; hincque in se, uti in Deum Patrem, credendum ⁵⁾; in se, ut in Patre, fiduciam collocandam, atque se, ut Patrem, diligendum esse, postulat ⁶⁾. Quae omnia aperte Christus Dominus, nisi revera Deus sit, de se sine blasphemia edisserere atque sibi vindicare minime potuisset.

d. Denique sententiam hancce Christus iurejurando, quin imo ipsa vita sua data confirmat. Adjuratus enim a Principe Sacerdotum, numne sit Christus, *Filius Dei*, ait illi: *Tu dixisti*, seu, ut habet Marcus: *Ego sum*. Quibus auditis summus Sacerdos scidit vestimenta sua, atque ait: *Blasphemavit: quid adhuc egemus testibus? ecce nunc audistis blasphemiam: quid vobis videtur? At illi respondentes dixerunt: Reus est mortis* ⁷⁾. Hic Christum Dominum sensu quam maxime proprio Filium se dixisse, nullum potest subesse dubium; in illo sensu enim eum Princeps Sacerdotum interrogaverat; atque secus ipse neque morte dignus declarari potuisset, neque se illa dignum etiam declarari permisisset.

Aut ergo statuendum, Christum verum Dei Filium, et ideo cum Patre unum, seu ipsi esse consubstantialem, aut vero, eum veteratorem pessimum ac impudentissimum, qui in ipsam legem divinam peccavit vehementius, quam ullus ante ipsum, et Deum, qui adeo honorem, sibi debitum, sibimet vindicat, impune legem

¹⁾ Joan. 6, 40. Cf. Cyrill. Alex. In Joan. l. 4. Opp. T. 4. p. 341.

²⁾ Joan. 5, 22. 27. Matth. 28, 19 ss.

³⁾ Joan. 14, 2 s. 10, 28. 11, 25.

⁴⁾ Joan. 14, 13. 14.

⁵⁾ Joan. 3, 15. 18. 36. 6, 19. 40. 47. 9, 35. 38. 11, 25. Cf. Pascha. De Spir. S. Praef. Bibl. PP. max. Lugd. T. 8. p. 807. — Gregor. Naz. Or. 36. Opp. T. 1. p. 519. A. — Augustin. Tr. 29. in Joan. n. 6. Opp. T. 3. P. 2. c. 515. qui scribit: *Hoc est opus Dei, ut credatis in eum, quem ille misit. Ut credatis in eum; non ut credatis ei. Sed si creditis in eum, creditis ei: non autem continuo, qui credit ei, credit in eum. Nam et daemones credebant ei, et non credebant in eum. Rursus etiam de Apostolo ipsius possumus dicere: Credimus Paulo, sed non credimus in Paulum. Credimus Petro, sed non credimus in Petrum. — Quid est ergo credere eum? Credendo amare, credendo diligere, credendo in eum ire, et ejus membris incorporari.*

⁶⁾ Joan. 14, 21—24.

⁷⁾ Matth. 26, 63—66. Cf. Marc. 14, 61—64. Luc. 22, 70—71. Joan. 19,

am migrari permisisse, imo mendacium impudentissimum mirabilis quoque comprobasse.

§. 35. b. Testimonia SS. Apostolorum.

a. Petri et Thomae.

Inter testimonia Apostolorum pro divinitate Filii Dei primum cum occupat solennis professio Principis Apostolorum, Jesum Messum esse promissum, atque verum Dei vivi Filium, utpote ab ipso irriso Domino diserte comprobata, et pro speciali Dei revelatione clarata, ita ut quodammodo ejus ipsius effatum censi mereatur.

Postquam enim Apostoli ad quaestionem Jesu sibi propositam, quemnam homines eum haberent, significaverant, ab aliis sum Eliam, ab aliis Jeremiam aut unum ex Prophetis censi, que Christus Dominus iterum interrogat: *Vos autem quem me se dicitis?* profitetur Petrus: *Tu es Christus, Filius Dei vi.* Ad quae Christus: *Beatus es, inquit, Simon Bar-Jona: via caro, et sanguis non revelavit tibi, sed Pater meus, qui in celis est* ¹⁾. Petrus hic itaque Jesum in oppositione Prophetarum lium Dei adpellat; Christus autem disertis verbis significat, um, quae professus est, non per se esse assecutum, sed ei ex eciali Dei suggestione accidisse. Unde verbum illud: *Filius ei vivi*, minime sensu improprio, quo Prophetae, quis Christus opponitur, item filii Dei adpellantur, et quo sensu u filius Dei sine singulari Dei inspiratione aut revelatione a Petro, prouti a reliquis hominibus, facile poterat cognosci, sed sensu inentissimo accipiendum est ²⁾.

Eodem autem loco cum professione Petri habenda est professio A. Thomae, quae pariter a Christo Domino probari meretur. Quum scilicet Jesus a mortuis resurrexisset, et discipulis igno gaudio recreatis adparuisset: Thomas, qui abfuerat, illis, surrectionem Domini sibi nuntiantibus, credere noluit, nisi ipseavorum vestigia viderit, digitumque his immiserit, et manum is lateri admoverit. Salvator autem benignissimus post octo es denuo discipulis, una cum Thoma congregatis, clausis januis paret, et ad Thomam conversus: *Infer, ait, digitum tuum huc, vide manus meas, et affer manum tuam, et mitte in latus meum: noli esse incredulus, sed fidelis.* Quibus auditis confusus, re-

¹⁾ Matth. 16, 14—17.

²⁾ Cf. Joan. 6, 69—70.

spondit Thomas, et dixit ei, εἶπεν αὐτῷ: Dominus meus, et Deus meus, ὁ κύριός μου καὶ ὁ Θεός μου, scilicet σὺ εἶ ¹⁾). Verba itaque non sunt admirantis, per exclamationem prolata, sed enuntiantis. Quod adparet jam ex articulo adjecto, et praecipue inde cognoscitur, quoniam Evangelista definite, verba illa ad Christum facta esse, narrat. Si vero verba haec ad Christum referuntur: ipse iisdem aperte Dominus ac Deus verus significatur, quum alium, quam verum Thomas ignoraverit. Salvator autem tantum abest, ut Apostolum, ejus divinitatem palam profitentem, corrigat, sed potius, quod professus fuerat, approbat, et eum tardius, quam decebat, ita credidisse docet, beatosque fore, qui non itidem, ut ille, ipso viso demum crediderint, affirmat ²⁾).

§. 36. β. Joannis.

Quamvis vero Petri professio atque professio Thomae inter testimonia Apostolorum pro divinitate Filii primum sibi eatenus vindicet locum, quatenus utraque tamquam effatum Christi ipsius ἀμυσσον spectari debet: praecipuus tamen inter Apostolos divinitatis Jesu testis et assertor sine dubio est discipulus ille, quem diligebat Jesus, Joannes Evangelista, qui dogma nostrum consulto contra ejusdem adversarios, jam primis Ecclesiae saeculis ortos, et speciatim contra Cerinthum adstruit, atque in Evangelio suo exarando, nullum alium sibi praefixit finem, quam illud ipsum dogma ostendendi, ut credamus, *quia Jesus est Christus Filius Dei, et ut credentes, vitam habeamus in nomine ejus* ³⁾).

Ex innumeris autem testimoniis, vel potius loco totius Evangelii Joannis, quod hic exscribendum esset, solummodo initium illius adferimus, quod ita se habet: *In principio erat Verbum, et Verbum erat apud Deum, et Deus erat Verbum. Ἐν ἀρχῇ ἦν ὁ λόγος, καὶ ὁ λόγος ἦν πρὸς τὸν Θεόν, καὶ Θεὸς ἦν ὁ λόγος. — Omnia per ipsum facta sunt: et sine ipso factum est nihil, quod factum est. Πάντα δι' αὐτοῦ ἐγένετο, καὶ χωρὶς αὐτοῦ ἐγένετο οὐδὲ ἓν, ὃ γέγονεν. — Et Verbum caro factum est, et habitavit in nobis: et vidimus gloriam ejus, gloria quasi unigeniti a Patre plenum gratiae, et veritatis, δόξα ὡς μονογενοῦς, πλήρης χάριτος καὶ ἀληθείας*, hominibus scilicet affe-

¹⁾ Joan. 20, 19—29.

²⁾ v. 29. Cf. Athanas. *Cont. Ariann. Or.* 2. n. 23. Opp. T. 1. P. 1. 491. E. — Cyrill. Alex. *In Joan.* l. 12. c. 1. Opp. T. 4. p. 1109.

³⁾ Joan. 20, 31.

rendae ¹⁾. Sub Verbo seu Λόγῳ Apostolus neminem alium, quam Filium Dei intelligit, qui inde ab aeterno apud Patrem existens, ejusdem divinae naturae cum Patre socius, in tempore homo factus, Christus Jesus est, Deus—homo. Nam ad neminem alium, quam ad Christum referri possunt verba illa: *Et Verbum caro factum est, et habitavit in nobis: et vidimus gloriam ejus, gloriam quasi unigeniti a Patre, plenum gratiae, et veritatis*. Insuper ait Evangelista, Joannem B., qui de Christo testatus est, testimonium *de illo* (Verbo) perhibuisse ²⁾; atque tum mox inferius Verbum incarnatum expresse Jesum Christum adpellat ³⁾, quam appellationem exin per totum Evangelium retinet.

Quare Evangelista Filium Dei Λόγον adpellaverit, inter Theologos non constat. Alii enim nomen hoc depromptum esse ex V. T statuunt, videlicet ex loco illo: *Verbo Domini coeli firmati sunt: et spiritu oris ejus omnis virtus eorum* ⁴⁾. Alii illud ex phrasi Chaldaica, quum Paraphrastae Chaldaici pro *Jehova* semper *verbum Jehovae* ponant, repetunt. Alii mutuatum esse ex philosophia Platonica, vel potius ex scriptis Philonis, placitis illius philosophiae addicti, qui simili aliquo sensu vocabulo λόγος utatur, contendunt. Alii vocabulum istud ex Gnosticorum placitis deducunt, qui aeonum miram admisérunt multitudinem, inter quos praestantior fuerit Λόγος, sub quo deinde, Christiani effecti, Christum intellexerint, ita ut Joannes vocabulum retinuerit, demonstraverit autem, Λόγον Christum non esse Gnosticorum aeonem qualemcunque demum, sed verum Deum. Alii putant, λόγος, vocabulum abstractum, esse positum pro concreto λεγόμενος in sensu τοῦ ἐπαγγελλόμενος, seu ἐρχόμενος, *promissus*, quo sensu רַבִּי et λόγος apud LXX. haud raro occurrat. Alii iterum autumant, abstractum λόγος adhiñeri ab Apostolo pro concreto λέγων τὰ τοῦ θεοῦ, *doctrina* seu *veritas* pro doctore (veritatis ⁵⁾). Alii illud inde derivant, quod Λόγος ad Patrem, uti ratio seu cognitio ad mentem referatur ⁶⁾.

¹⁾ Joan. 1, 1. 3. 14.

²⁾ v. 15.

³⁾ v. 17.

⁴⁾ Ps. 32, 6.

⁵⁾ Cf. Clem. Alex. *Strom.* l. 2. c. 4. Opp. T. 1. p. 434 ss. — Origen. In Joan. t. 1. n. 42. Opp. T. 4. p. 43. 45 s.

⁶⁾ Cf. Clem. Alex. *Paedag.* l. 1. c. 12—13. T. 1. p. 156 ss. — Origen. In Joan. t. 1. n. 42. T. 4. p. 46 s. *Adv. Cel.* l. 5 n. 39. T. 1. p. 608. l. 6. n. 71. p. 686. E.

Alii tandem hanc denominationem derivandam esse censent ex ipsa revelatione; quum nimirum Joannes in Apocalypsi narret, sibi Christum Dominum in visione, quam habuerat, cum nomine hocce fronti inscripto adparuisse ¹⁾. Quidquid autem sit, et undecunque demum Joannes hanc adpellationem repetierit: id certum est, eum de *Λόγος* talia praedicare, quae in neminem alium, quam Deum verum cadunt. Etenim

1. cum dicit, *Λόγος ἐν ἀρχῇ* exstitisse, ejus aeternitatem adstruit. Nam *ἀρχὴ* hic loci nonnisi pro serie orationis contexta aut sonat initium aeternitatis, modo humano conceptum, quo sensu dicitur Deus *a principio* existere ²⁾, et Messiae egressus esse *ab initio, a diebus aeternitatis* ³⁾, et tunc *ἐν ἀρχῇ* idem est, ac *ab aeterno*; aut vero significat *ἀρχὴ* initium rerum creandarum, quo sensu sumitur in loco illo, quo Sapientia divina loquens ita inducitur: *Dominus possedit me in initio viarum suarum, antequam quidquam faceret, a principio. Ab aeterno ordinata sum, et ex antiquis, antequam terra fieret* ⁴⁾. In posteriori casu *ἐν ἀρχῇ* ergo valet idem, ac hebraicum *בְּרֵאשִׁית*, quo inchoatur liber Geneseos, nempe in principio, cum creanda essent coelum et terra, sive ante constitutionem mundi; qua phrasi autem in SS. Litteris constanter id ipsum, scilicet *ab aeterno* exprimitur; quando quidem ante mundum conditum, seu ante tempus inchoatum nil, nisi aeternitas exstitit. Quaecunque itaque harum ambarum explicandi rationum eligatur: sensus semper idem est, nimirum *Λόγος* inde ab aeterno exstitisse. — Sensus autem, quem verbo *ἐν ἀρχῇ* Sociniani subjiciunt, ac si videlicet Evangelista de initio praedicati Evangelii loquatur, frigidus est, atque cum orationis contextu pugnat. Evangelista enim a creatione mundi exorditur, deinde Verbum in mundo adparitionem commemorat, et tum demum ad enarrandum munus Messianum coeptum transit; ut taceamus Jesum, uti saltem ipsum sibi Sociniani cogitant, initio praedicati Evangelii apud homines fuisse, Apostolum vero scribere, *in initio* Verbum fuisse apud Deum.

2. Porro diserte *Λόγος* Deum adpellat Evangelista. Nam *Λόγος* in tertio commate versiculi primi subjectum orationis esse, du-

¹⁾ Apoc. 19, 12—13.

²⁾ Hab. 1, 12. Js. 43, 13.

³⁾ Mich. 5, 2.

⁴⁾ Prov. 8, 22—23.

bium esse non potest; quum in tota hac Evangelii περιχοπή de Λόγῳ sermo sit. Praeterea si non Λόγος, sed Θεός subjectum esset: sequeretur, Deum Patrem esse Λόγον, hunc enim sub voce ὁ Θεός in praecedentibus aperte Joannes intelligit; a quo tamen expresse Λόγον discernere vult, quum ipsum apud Deum, τὸν Θεόν, fuisse, et illum, non autem hunc hominem factum esse, doceat. Praeponit autem Apostolus in commate nostro praedicatum subiecto, quoniam de hoc singulare aliquid enuntiare vult, et insuper forsitan, ut, quemadmodum in praecedentibus et subsequentibus commatibus facit, eodem vocabulo sententiam sequentem inchoet, quo praecedentem finiverat. — Sociniani quidem vocabulum Θεός converterunt in Θεοῦ, verum contra auctoritatem omnium codicum, omnium versionum, atque omnium SS. Patrum, qui textum hunc citant. Alii mutarunt interpunctionem, ponentes punctum post ἦν, quasi dicere voluisset Apostolus: Λόγος erat apud Deum, et Deus exstitit. Ast immutatio haec tentatur pariter contra auctoritatem omnium versionum et SS. Patrum. Insuper illa admissa, sensus prodit frigidissimus ac vere intolerabilis. Quomodo enim potuisset Apostolus primum adfirmare, Deum exstitisse, postquam dixerat, Λόγον apud Deum fuisse? Neque obstat, quominus de vera divinitate τοῦ Λόγου cogitemus, vocabulum Θεός hic positum esse sine articulo. Nam cum Evangelista voce Θεός in prioribus commatibus semel iterumque utatur ad veram divinitatem denotandam, verosimile non est, illum eodem quasi habitu idem vocabulum et proprie et improprie sumsisse. Accedit, in illa ipsa nostra περιχοπή idem vocabulum sine articulo ter de Deo Patre adhiberi. *Fuit homo missus a Deo, παρὰ Θεοῦ* ¹⁾; *dedit eis potestatem filios Dei, τέκνα Θεοῦ, fieri* ²⁾; *qui — ex Deo, ἐκ Θεοῦ, nati sunt* ³⁾. **E** contrario Θεός cum articulo de falsis diis quoque occurrit ⁴⁾. **P**osuit autem Θεός de Verbo in nostro commate sine articulo, ne ipsum commisceatur cum Patre, qui ὁ Θεός in praecedentibus appellatur. Ergo Λόγος ex mente Apostoli est Deus, et quidem ille ipse Λόγος, qui erat ab aeterno apud Deum, seu Λόγος est Deus, et Deus apud Deum, atque utrumque aeternae.

Quanta sit totius hujus versus vis contra haeresin Arianam, nec non Sabellianam, accurate colligit Isidorus Pelusiota,

¹⁾ v. 6.

²⁾ v. 12.

³⁾ v. 13.

⁴⁾ Cf. Act. 7, 43. 2. Cor. 4, 4. Gal. 4, 8.

qui scribit: *Ex appellatione Filii eandem essentiam: ex Verbo generationem perpersionis expertem: ex eo porro, quod fuerit in principio eandem aeternitatem: denique ex eo, quod fuerit apud Deum, conjunctionem cum Patre: ex eo vero, quod Deus sit, dignitatem atque excellentiam ipsius discentes. Ex unoquoque autem nomine removentes inconveniens et indecorum, — verbi gratia, a Filii nomine id, quod est recentius sive posterius, a Verbi appellatione id, quod nullam habet subsistentiam, Deum aeternum, consubstantialitatem absque perpersione, et extra tempus ex Patre progressum agnoscamus et adoremus ¹⁾.*

3. Tum cum Apostolus ulterius de λόγῳ praedictet, omnia per ipsum facta esse et sine ipso factum esse nihil, quod factum sit, i. e. omnia, quaecunque extra Deum existent, per ipsum creata esse, ita ut prorsus nil existat, quod per ipsum conditum non sit: omnipotentiam et aseitatem ipsi adscribit. Nam si λόγος Creator est universi, omnipotens, et si non datur ens existens creatum, quod non per ipsum sit creatum, increatus, adeoque ens a se sit necesse est ²⁾. — Expositioni verborum nostrorum, a Socinianis tentatae, de creatione mystica, seu hominum morali per Evangelii doctrinam a Christo allatam emendatione, jam ipsa phrasis: πάντα δι' αὐτοῦ ἐγένετο, καὶ χωρὶς αὐτοῦ ἐγένετο οὐδὲ ἓν, nec non sequentia obstant, ubi Apostolus, idem repetens, ait: *Et mundus per ipsum factus est, καὶ ὁ κόσμος δι' αὐτοῦ ἐγένετο, et mundus eum non cognovit* ³⁾. Nam si verba priora de morali mundi reformatione acciperentur: etiam haec eodem sensu sumi deberent; quod tamen, quominus fiat, aperte prohibet posterior pars commatis: *Et mundus eum non cognovit*; nam his verbis tolleretur mox praecedentibus adstructum ⁴⁾. — Neque obmoveri potest, λόγον ca

¹⁾ L. 4. epist. 141. p. 329. c. 1.

²⁾ Cf. Augustin. *De Trinit.* l. 1. c. 6. n. 9. Opp. T. 8. c. 754. Tr. 1 in Joan. n. 11—12. T. 3. P. 2. c. 293 s. — Athanas. *Cont. Arian.* Or. 2. n. 5. Opp. T. 1. P. 1. p. 473. D. *Epist.* 3. ad Serap. n. 4. T. 1. P. 2 p. 693 s. — Gregor. Nys. *Cont. Eunom.* l. 1. Opp. Par. 1615. T. 2 p. 33. A. B. — Cyrill. Alex. *Thes. Assert.* 15. Opp. T. 5. P. 1. p. 162 D. — Gelas. *Comm. act. Cont. Nic.* l. 2. c. 13. In *Mansi Coll. Conc.* T. 2. c. 835 ss.

³⁾ v. 10.

⁴⁾ Cf. Chrysostom. *Hom.* 5. in Joan. n. 1. Opp. T. 8. p. 34 s. Hom. 8. n. 1. p. 48. — Athanas. *Cont. Arian. Or.* 2. n. 3. Opp. T. 1. P. p. 473. *Epist.* 3. ad Serap. n. 4. T. 1. p. 2. p. 693 s. — Cyrill. Ale

sam tantum instrumentalem mundi conditi a Joanne declarari, quum dicat, δι' αὐτοῦ, non ἀπ' vel ἐξ αὐτοῦ. Etenim falsum est, διὰ nunquam causam principalem designare, quum non raro de Deo Patre, ultimo rerum omnium fonte, occurat, et tamquam συνάντημον cum ἐκ et ἀπο adhibeatur ¹⁾).

4. Denique Joannes Λόγον Filium Dei unigenitum pronuntiat. Verba enim: *Et vidimus gloriam ejus, gloriam ὡς μονογενοῦς παρὰ πατρός*, necessario hoc sensu sumi debent: Vidimus gloriam ejus, quae erat ejus, tamquam unigeniti Patris, i. e. quae est unigeniti propria ²⁾), nequaquam vero sensu isto: quae erat similis gloriae unigeniti Dei filii; quoniam tum Joannes similitudinem ex re prorsus incognita duceret, quum tamen omnis similitudo pro sua natura notior re explicanda necessario esse debeat. Quodsi autem Λόγος unigenitus Dei filius a Joanne declaratur: necessario verus ac naturalis Dei Filius, et ideo unius ac ejusdem individuae cum Patre naturae et essentiae est.

Quapropter et Joannes porro de Λόγῳ ac Christo enuntiat, ipsum esse Deum, qui animam suam pro nobis posuerit ³⁾; porro Dei unigenitum Filium, *qui est in sinu Patris* ⁴⁾, et quem *misit Deus in mundum* ⁵⁾, verum Dei filium ⁶⁾; eapropter, qui neget Filium, nec habere Patrem, qui confiteatur Filium, et Patrem habere ⁷⁾, seu, qui in Filium non credat, vitam non habere ⁸⁾, qui vero

Theol. Asser. 32. Opp. T. 5. P. 1. p. 313. et al. s. — Hilar. *De Trinit.* l. 4. n. 16 ss. Opp. T. 2. c. 83 ss. Versiones antiquae omnes pari modo utrumque versiculum de physica mundi creatione interpretantur. Cf. Walton, SS. *Bibl. Polyglotta*. T. 5. p. 309.

¹⁾ Cf. 1 Cor. 1, 9. *Fidelis Deus, per quem, δι' οὗ vocati estis.* Rom. 11. 36. *Ὅτι ἐξ αὐτοῦ καὶ δι' αὐτοῦ — τὰ πάντα* Gal. 1, 1. Gen. 1, 1. Prov. 8, 15. Joan. 3, 6. coll. c. 1. Joan. 3, 9.

²⁾ Cf. Matth. 14, 5. *Ὡς προφήτην αὐτὸν εἶχον.*

³⁾ 1. Joan. 3, 16. Cf. Act. 20, 28.

⁴⁾ Joan. 1, 18. Cf. 3. 16. 18. — Cyrill. Alex. *In Joan. l. 1. c. 2.* Opp. T. 4. p. 16. c. 10. p. 105. l. 2. c. 8. p. 229. *De Trinit. Dial. 8. T. 5. P. 1 p. 573. Dial. 2. p. 436 s. 458. Dial. 3. p. 461 s.* — Athanas. *Cont. Arian. Or. 2. n. 62.* Opp. T. 1. P. 1. p. 536. *Or. 4. n. 26.* — Basil. *De fide Hom. 6. n. 2.* Opp. T. 2. p. 739. c. 2. D. — Augustin. *Cont. serm. 6. Arian. c. 36. n. 34.* Opp. T. 8. c. 616 s. *Cont. Maxim. l. 2. c. 6. lb. c. 694 s.* — Hilar. *De Trinit. l. 6. n. 8 ss.* Opp. T. 2. c. 136 ss.

⁵⁾ 1. Joan. 4, 9. Cf. 4, 15. 11, 27.

⁶⁾ 1. Joan. 5, 20. Cf. Joan. 20, 31. 1. Joan. 3, 8.

⁷⁾ 1. Joan. 2, 23. Cf. Joan. 3, 36. 1. Joan. 5, 5. 9—13. 4, 15. etc.

⁸⁾ 1. Joan. 1, 18.

in eum credat, habere vitam in nomine ejus ¹⁾; Filium nonnisi Deum nosse ²⁾; τοῦ Λόγου esse mundum proprium ³⁾, ipsumque Dominum dominorum, Regem regum ⁴⁾, qui nullius egeat ⁵⁾; eum esse auctorem vitae, in quo *vita erat*, i. e. qui fons vitae entium omnium finitorum est ⁶⁾, et ideo etiam auctorem vitae verae spiritualis ⁷⁾, seu pro peccatis nostris atque totius mundi propitiationem ⁸⁾, veritatis doctorem ac originem ⁹⁾, atque gratiae, qua fimus Dei filii, largitorem ¹⁰⁾; porro Sanctum et Verum ¹¹⁾, *qui est principium creaturae Dei* ¹²⁾, iudex hominum ¹³⁾, ac vindicat sanguinem interfectorum propter verbum Dei ¹⁴⁾, atque vitam aeternam, *quae erat apud Patrem, et adparuit nobis* ¹⁵⁾; visum sic loquentem inducit: *Ego sum primus, et novissimus, et vivus, et fui mortuus, et ecce sum vivens in saecula saeculorum* ¹⁶⁾; et iterum: *Ego sum scrutans renes, et corda, qui dabit unicuique secundum opera sua* ¹⁷⁾; eumque omnibus adorandum esse docet, utpote agnum existentem, *qui dignus est accipere virtutem, et divinitatem, et sapientiam etc.* ¹⁸⁾.

§. 37. γ. Pauli. δ. Philipp. 2, 5—11.

Sed ne quis nobis objiciat, Joannem, uti jam Julianus olim criminatus est, ex nimia, qua in Magistrum ducebatur, veneratione ei divinitatem attribuisse, ea quoque quae Paulus de

¹⁾ Joan. 20, 31. Cf. 3, 16.

²⁾ Joan. 1, 18.

³⁾ Joan. 1, 11.

⁴⁾ Apoc. 17, 11, 19, 16.

⁵⁾ Apoc. 3, 7.

⁶⁾ Joan. 1, 4.

⁷⁾ Joan. 1, 4. 5. Cf. 14, 6. 8, 12.

⁸⁾ 1. Joan. 5, 6. Cf. 1, 5. 3, 19.

⁹⁾ 1. Joan. 5, 6.

¹⁰⁾ Joan. 1, 12. 14. 16. 17.

¹¹⁾ Apoc. 3, 7. Cf. 19, 11. 1. Joan. 2, 1. 3, 3. 5.

¹²⁾ Apoc. 3, 14.

¹³⁾ Apoc. 1, 18. 14, 7. 14.

¹⁴⁾ Apoc. 6, 10.

¹⁵⁾ 1. Joan. 1, 2.

¹⁶⁾ Apoc. 1, 17. 18. Cf. 21, 6. 22, 13. 2, 8.

¹⁷⁾ Apoc. 2, 23.

¹⁸⁾ Apoc. 5, 8 ss.

Christo docet, in medium proferenda sunt. Primo citamus epistolam ad Philippenses, in qua inter alia Apostolus scribit: *Hoc sentite in vobis* (idem sensus vobis insit, ac), *quod et in Christo Jesu: qui cum in forma Dei esset, ὃς ἐν μορφῇ θεοῦ ὑπάρχων, non rapinam arbitratus est, esse se aequalem Deo, τὸ εἶναι ἴσα θεῷ: sed semetipsum exinanivit, formam servi accipiens, μορφῇ δούλου λαβὼν, (exinanivit semetipsum non deponendo divinitatem, sed assumendo humanitatem, sub cujus indumento veluti obscurata et exinanita externa specie est divinitas), in similitudinem nominum factus, et habitu inventus ut homo. Humiliavit semetipsum factus obediens usque ad mortem, mortem autem crucis. Propter quod et Deus exaltavit illum, et donavit illi nomen, quod est super omne nomen, ut in nomine Jesu omne genu flectatur, πᾶν γόνυ κέκμη, coelestium, terrestrium, et infernorum, et omnis lingua confiteatur, quia Dominus Jesus Christus in gloria est Dei Patris, i. e. habet gloriam eandem cum Patre. Admonet Apostolus in loco nostro fideles, ut modesti sint, atque aliorum potius commoda, quam sua procurent, quemadmodum Jesus Christus, qui quum verus sit Deus, non cupide sua maiestate utendum esse existimaverit, instar ferarum rapacium, rapinam quam firmissime retinentium, sed ab illa abstinuit, nostro scilicet rem concipiendi modo, quo pariter de sole oriente et occidente loquimur, ad statum naturae humanae se deprimens, et factus obediens Patri usque ad perpersionem mortis. Propterea et mortis exantlatis laboribus Patrem Christo tamquam homini summam contulisse dignitatem, ut ipsum omnes naturae intelligentes cultu divino prosequantur, eum tanquam verum Deum agnoscentes. Clarissime itaque Apostolus hic divinitatem in Jesu Christo, eumque consubstantiali Patri prae-dicat. Etenim 1) Paulus ait, Christum Jesum ἐν μορφῇ θεοῦ exstitisse; μορφή vero de essentia seu natura etiam apud auctores profanos occurrit, in eodem significato ac οὐσία vel φύσις¹⁾, nunquam autem vernaculum Gestalt in sensu speciei vel similitudinis significat; atque in nostro loco insuper opponitur sequenti: μορφῇ δούλου λαβὼν, quod sine dubio veram humanam naturam Christi indicat, et hinc etiam oppositum μορφή θεοῦ nil, quam naturam divinam significare potest²⁾. 2) Porro dicit, Christum rapi-*

¹⁾ Cf. Jos. Flav. *Cont Appion. l. 2. c. 22* Opp. T. 2. p. 485. — Epiphani. *Anch. n. 67* Opp. T. 2. p. 71. Conc. Constantinop. III. *Act. 2*. Mansi, *Co II. Conc. T. 11. c. 219*. E. Cf. Sulzer. *Theol. eccl. s. v. μορφή*.

²⁾ Cf. Tertull. *Adv. Marcion. l. 5. c. 20*. Opp. V. 2. p. 401. — Hi-

nam ¹⁾ non arbitratum esse, esse se aequalem Deo, τὸ εἶναι ἴσα θεῷ, sicque perfectam ejus cum Patre aequalitatem edisserit. Nam verba illa tantum de similitudine accipi item propter oppositum: ἐν ὁμοιώματι ἀνθρώπων γενόμενος, prorsus non possunt; quum his manifeste, Christum verum hominem factum esse, non homini similem, affirmetur. 3. Tandem tradit Apostolus, Christo, et quidem una quatenus homo est, cultum divinum esse exhibendum, ipsumque tanquam Patri omnino aequalem, ab omni natura agnoscendum. Phrasin γόνυ κύνειν nonnisi de adoratione stricti nominis accipiendam esse, docet ipse Paulus, in epistola ad Romanos scribens: *Tu autem quid judicas fratrem tuum? aut quare spernis fratrem tuum? Omnes enim stabimus ante tribunal Christi. Scriptum est enim: Vivo ego, dicit Dominus, quoniam mihi flectetur omne genu: et omnis lingua confitebitur Deo*, i. e. me verum Deum profitebitur ²⁾. Quodsi vero Christo cultus divinus praestandus est: ipse persona divina, et propterea unius ejusdemque cum Patre naturae socius sit necesse est ³⁾.

§. 38. 2. Rom. 9, 3—5. et Tit. 2, 11—13.

Alter locus, in quo Paulus item divinitatem Jesu Christi clare docet, invenitur in ejus epistola ad Romanos, ubi Apostolus summa tristitia affectus ob pervicaciam Judaeorum, qua nomen Christo dare renuebant, haec habet: *Optabam enim ego ipse anathema esse a Christo pro fratribus meis, qui sunt cognati mei secundum carnem, qui sunt Ieraëlitae, quorum adoptio est filiorum, et gloria (dignitas), et testamentum (foedus), et legislatio, et obsequium (cultus divinus), et promissa: quorum patres (Patriarchae), et ex quibus est Christus secundum carnem, qui est super omnia Deus benedictus in saecula, ὁ ὢν ἐπὶ πάντων θεὸς εὐλογητὸς εἰς τοὺς αἰῶνας. Amen* ⁴⁾. Inter praec-

lae, *Ad Constant.* n. 19. Opp. T. 2. c. 577. B. etc. — Victor. *Adv. Arian.* l. 1. n. 4. 21 ss. In Galland *Biblioth. PP.* T. 8. p. 155. 159. s. — Augustin. *Cont. Faust.* l. 3. c. 6. Opp. T. 8. c. 192. *Cont. Maxim.* l. 1. c. 5. Ib. c. 681 s.

¹⁾ ἀρπαγμός idem protervus ac ἀρπαγνός significare, ostendit el. Aug. Tholuck. in *Disputatione Christologica de l. Pauli ad Phil.* 2, 6—9; Hal. 1836.

²⁾ Rom. 14, 11. Cf. 11, 4. Is. 45, 24. Esth. 3, 2. Matth. 4, 9—10. Gregor. Nyss. *Cont. Eunom.* Or. 2. Opp. Par. 1645. T. 2. p. 9. D. Or. 5. p. 181 s.

³⁾ Cf. Theophylacti ad. h. l. Opp. T. 2. p. 437 ss. — Chrysostom. *Rom. 7.* in *Epist. ad Philipp.* n. 1—4. Opp. T. 11. p. 244—251.

⁴⁾ Rom. 9, 3—5 Θεὸς genuinum esse, testantur omnes codices, versio

rogativas ergo populi Israëliti, fratrum suorum, quas enumerat, principalem illam Paulus habet, Christum Dominum, qui sit super omnia Deus, aeternum venerandus, secundum carnem ex ipsis originem ducere, et sic Christum Deum, rerum creatarum Dominum ac cultu divino prosequendum esse, docet. Verba ultima: *ὁ ὢν* etc. revera ad Christum, non vero forsitan ad Deum Patrem pertinere, jam 1. inde colligitur, quoniam illud: *ex quibus est Christus secundum carnem*, necessario aliquod exigit additamentum, quod conditionem quandam carnali origini oppositam exprimat, quamque solummodo in verbis illis deprehendimus. 2. Porro si verba illa non ad Christum, sed ad Deum Patrem referrentur: necessario doxologiam continerent; quod tamen quominus assumatur, obstat affectus Apostoli, qui, se in tristitia, eaque summa versari testatur, in immediate praecedentibus scribens: *Quoniam tristitia mihi magna est, et continuus dolor cordi meo* ¹⁾. Tristitiae autem deprecatio, aut etiam quietis animi ac patientiae affirmatio, non autem laus convenit. 3. Dein doxologiae adversatur ipse quoque usus loquendi. Nam in omnibus doxologiis, quae frequenter in N. ac V. F. occurrunt, nunquam dicitur: *θεὸς εὐλογητός*, sed constanti ac fixo usu loquendi, quemadmodum et in vernaculo dicimus: *Gott Lob!* et nunquam: *Lob Gott!* ad imitationem Hebraici: *בְּרוּךְ אֱלֹהִים*, *εὐλογητός ὁ θεός* adhi-

betur ²⁾. Iusuper 4. si Apostolus verba illa ad Christum referre noluisse: certo adjecta particula *θε*, aut simili lectores attentos reddere non omisisset, quemadmodum et alias facere solet. Quod si autem verba illa: *ὁ ὢν ἐπὶ πάντων θεός εὐλογητός εἰς τοὺς αἰῶνας*, tanquam praedicatum ad Christum referenda sunt, unde ingratus Judaeorum animus, Salvatorem ad se pertinentem respicientium, praecipue pateat: non potuit Apostolus uti verbis significantioribus ad veram summamque Christi divinitatem designandam ³⁾.

Arabica, Syriaca, Aethiopica, Persica (Cons. Walton. *Polyglott.* T. 5. p. 308 s.) et St. Patres, ut Tertullianus, Cyprianus, Origenes, Athanasius, Gregorius Nyss., Mar. Victorinus, Hilarius, Cyrillus, Ambrosius, Augustinus, etc. Cf. Bullus, *Defens. fid. Nic.* p. 78.

¹⁾ V. 2.

²⁾ Cf. 2. Cor. 1, 3. Ephes. 1, 3. 1. Petr. 1, 3. Luc. 1, 28. 42. 68. Ps. 17, 47. 27, 6. 30, 22. 40, 14. 65, 20. 67, 20. 71, 18. 19. 88, 53. 105, 48. 123, 6. 134, 21. 143, 1. Zach. 11, 5.

³⁾ Cf. Iren. *Adv. haer.* l. 3. c. 16. n. 3. p. 205. c. 1. — Origen.

Adfinis loco huic est locus epistolae ad Titum, in quo pari modo Paulus Jesum Christum Deum adpellat, qui iudicaturus sit orbem. Sonat autem locus hicce ita: *Servos* (hortare) *dominis suis subditos esse, in omnibus placentes* (placere studentes), *non contradicentes, non fraudantes, sed in omnibus fidem bonam ostendentes, ut doctrinam Salvatoris nostri Dei ornent* (commendent) *in omnibus. Apparuit enim gratia Dei Salvatoris nostri omnibus hominibus, erudiens nos, ut abnegantes impietatem, et saecularia desideria: sobrie, et juste, et pie vivamus in hoc saeculo, exspectantes beatam spem, et adventum magni Dei et Salvatoris Jesu Christi*, ἐπιφάνειαν τῆς δόξης τοῦ μεγάλου θεοῦ καὶ σωτῆρος ἡμῶν I. X. ¹⁾. Licet enim de verbis prioribus dubitari possit, num illa ad Christum, an vero ad Deum Patrem referenda sint, quum Deus universim, ut ita dicamus, spectatus, in A. T. saepius Salvator adpelletur: nullum tamen dubium praesto esse potest, verba ultima: τοῦ μεγάλου θεοῦ καὶ σωτῆρος ἡμῶν, ad Christum pertinere; quum ἡ ἐπιφάνεια τῆς δόξης, quae hic de Deo praedicatur, ubique nonnisi adventum Christi Domini ad iudicium significet ²⁾, et insuper utrique vocabulo θεοῦ et σωτῆρος duntaxat unus articulus sit appositus ³⁾.

§. 39. J. Hebr. 1, 1—14. et Col. 1, 15—20. 2, 9.

Quantum argumentum ex epistolis Paulinis pro divinitate Filii seu Jesu Christi nobis exhibet caput primum epistolae ad Hebraeos, quod ita se habet: *Multifariam, multisque modis olim*

Comment. in Ep. ad Rom. l. 7. n. 13. Opp. T. 4. p. 612. — *Syn. Antiochen. l. Epist. ad Paul. Samosat.* Mansi, *Coll. Conc. T. 1. c. 1034.* — *Athanas. Or. 4. n. 1.* Opp. T. 1. P. 1. p. 617. et al. — *Gregor. Nyss. Cont. Eunom. l. 10.* Opp. Par. 1615. T. 2. p. 265. C. — *Cyrill. Alex. Thesaur. Assert. 17.* Opp. T. 5. P. 1. p. 181. C. — *Chrysostom. Hom. 16. in Epist. ad Rom. n. 1—3.* Opp. T. 9. p. 603 ss. — *Tertull. Adv. Prax. n. 13.* Opp. V. 2. p. 418. — *Novatian. De Trinit. c. 13. et 30.* Galland, *Bibl. PP. T. 3. p. 296. c. 1. C. et 313. c. 1. A.* — *Cyprian. Testim. adv. Jud. l. 2.* Opp. V. 2. p. 222 ss. — *Hilar. De Trinit. n. 37.* Opp. T. 2. c. 240. — *Ambros. De Spir. S. l. 1. c. 3. n. 46.* Opp. T. 2. c. 609. *De fid. L. 1. c. 11. n. 68.* Ib. c. 457. — *Hieron. Ep. ad Algas. q. 9.* Opp. T. 1. c. 878. — *Augustin. De Trinit. l. 2. c. 13. n. 23.* Opp. T. 8. c. 785. E. *Cont. Faust. l. 3. c. 6.* Ib. c. 192. et al.

¹⁾ Tit. 2, 9—13.

²⁾ Cf. 1. Tim. 6, 14. 1. Thess. 3, 13. 2. Thess. 2, 8.

³⁾ Cf. *Athanas. De comm. essent. P. et T. et Sp. S. n. 27.* Opp. T. 2. p. 16. — *Cyrill. Alex. Thesaur. Assert. 32.* T. 5. P. 1. p. 298. D.

Deus loquens patribus in Prophetis: novissime, diebus istis locutus est nobis in Filio, quem constituit haeredem universorum, per quem fecit et saecula, δι' οὗ καὶ τοὺς αἰῶνας ἐποίησεν: qui cum sit splendor gloriae, et figura substantiae ejus, ὃς ὢν ἀπάντασμα τῆς δόξης καὶ χαρακτὴρ τῆς ὑποστάσεως αὐτοῦ, portansque omnia verbo virtutis suae, φέρων τε τὰ πάντα τῷ ῥήματι τῆς δυνάμεως αὐτοῦ, (per se) purgationem peccatorum faciens, δι' ἑαυτοῦ καθαρισμὸν ποιησάμενος τῶν ἁμαρτιῶν ἡμῶν, sedet ad dexteram majestatis in excelsis: tanto melior Angelis effectus (tanto magis prae Angelis honoratus), quanto differentius nomen prae illis haereditavit. Cui enim dixit aliquando Angelorum: Filius meus es tu, ego hodie genui te, υἱός μου εἰ σὺ, ἐγὼ σήμερον γέγονα σε ¹⁾? Et rursum: Ego ero illi in patrem, et ipse erit mihi in filium ²⁾? Et cum iterum introducit primogenitum in orbem terrae, dicit: Et adorent eum omnes Angeli Dei, καὶ προσκυνήσωσαν αὐτῷ πάντες ἄγγελοι θεοῦ. Et ad Angelos (de Angelis) quidem dicit (Scriptura): Qui facit Angelos suos spiritus, et ministros suos flammam ignis ³⁾. Ad filium autem: Thronus tuus Deus in saeculum saeculi: virga aequitatis, virga regni tui. Dilexisti justitiam, et odisti iniquitatem: propterea unxit te Deus, Deus tuus oleo exultationis prae participibus tuis ⁴⁾. Et: Tu in principio Domine terram fundasti: et opera manuum tuarum sunt coeli. Ipsi peribunt, tu autem permanebis, et omnes ut vestimentum veterascent: et velut amictum mutabis eos, et mutabuntur: tu autem idem ipse es, et anni tui non deficient ⁵⁾. Ad quem autem Angelorum dixit aliquando: Sede a dextris meis, quoadusque ponam inimicos tuos scabellum pedum tuorum? Nonne omnes sunt administratorii spiritus, in ministerium missi propter eos, qui haereditatem capient salutis ⁶⁾?

Cui loco ob similitudinem sequentia duo loca epistolae ad Colossenses adjungi possunt: *Qui (Filius) est imago Dei invisibilis, ὃς ἐστὶν εἰκὼν τοῦ θεοῦ τοῦ ἀοράτου, primogenitus*

¹⁾ Cf. Ps. 2, 7.

²⁾ Cf. 2. Reg. 7, 14.

³⁾ Cf. Ps. 103, 4.

⁴⁾ Cf. Ps. 44, 7. 8.

⁵⁾ Cf. Ps. 101, 26—28.

⁶⁾ Hebr. 1, 1—14.

omnis creaturae (i. e. ante omnem creaturam genitus, seu supra omnes creaturas eminens): *quoniam in ipso condita sunt universa, ὅτι ἐν αὐτῷ ἐκτίσθη τὰ πάντα, in coelis, et in terra, visibilia, et invisibilia, sive throni, sive dominationes, sive principatus, sive potestates: omnia per ipsum, et in ipso creata sunt, τὰ πάντα δι' αὐτοῦ καὶ εἰς αὐτὸν ἐκτίσται: et ipse est ante omnes, καὶ αὐτός ἐστι πρὸ πάντων, et omnia in ipso constant, καὶ τὰ πάντα ἐν αὐτῷ συνέστηκε. Et ipse est caput corporis Ecclesiae, qui est principium, primogenitus ex mortuis: ut sit in omnibus ipse primatum tenens, quia in ipso complacuit, omnem plenitudinem inhabitare: et per eum reconciliare omnia in ipsum, pacificans per sanguinem crucis ejus, sive quae in terris, sive quae in coelis sunt ¹⁾. Et: Quia in ipso inhabitat omnis plenitudo divinitatis corporaliter, ὅτι ἐν αὐτῷ κατοικεῖ πᾶν τὸ πλήρωμα τῆς θεότητος σωματικῶς ²⁾.*

Quibus tradit Apostolus:

1. Christum esse verum Dei filium. Nam non tantum eum in oppositione Moysis, quem fidelem famulum Dei quidem, non autem filium dicit ³⁾, Prophetarum et Angelorum, qui ipsum adorare jubentur, adeoque sensu eminentiori Filium Dei adpellat, sed et diserte docet, ipsum a Patre genitum esse, quum verbum *γεννηθήναι*, quod per: *ἐγὼ γεγέννηκά σε*, exprimitur, alium

sensum, quam: *ego te genui*, aut *tanquam a me genitum ostendi*, non admittat.

2. Esse Christum ejusdem cum Patre essentiae ac naturae, Deum verum. Dicit enim magnus Apostolus, a. illum esse *ἀπαύγασμα τῆς δόξης*, scilicet τοῦ θεοῦ πατρὸς, *καρὰ τῆς ὑποστάσεως αὐτοῦ*, seu, ut habet in epistola ad Colossenses, *εἰκόνα τοῦ θεοῦ τοῦ ἀοράτου*. Jam *ἀπαύγασμα* candorem, lucem emissam significat, quae cum luce emittente aperte unius ejusdemque est naturae; unde, quum Filius dicatur splendor gloriae seu majestatis divinae, quae a natura una et individua, utpote simplicissima, non est diversa: ejusdem cum Patre essentiae seu naturae sit necesse est. Id ipsum autem pariter per verba: *καρὰ τῆς ὑποστάσεως* et *εἰκὼν τοῦ θεοῦ* indicatur. Nam *καρὰ τῆς* proprie significat notam incisam, porro signum, quo una res ab altera distinguitur, deinde vero, ut etiam *εἰκὼν* ima-

¹⁾ Col. 1, 15—20.

²⁾ Ib. 2, 9.

³⁾ Hebr. 3, 5—6.

ginem, in omnibus partibus perfecte exprimentem ac repraesentantem τὸ ἀρχέτυπον, illique congruentem, et hinc utraque vox etiam τῇ σικῇ opponitur. Unde ipse auctor epistolae ad Hebraeos scribit: *Umbram, σικῶν, habens Lex futurorum bonorum, non ipsam imaginem, τὴν σικῶνα, rerum* ¹⁾. In hocce vero sensu vocabulum *χαρακτῆρ* accipiendum esse, alterum *συνώνυμον* enuntiationis membrum, porro argumentum totius pericopae, nec non adjectum: *τῆς ὑπαστάσεως*, postulat; secus enim, si Apostolus verbis illis imaginem Dei substantialem, ipsam essentiam divinam referentem, indicare haud voluisset: non intelligeretur, quid addita voce hac significare voluerit. Ita quoque non potest esse dubium, vocem *σικῶν* in loco epistolae ad Colossenses citato, eodem, et non alio sensu sumendam esse, quum hujus, Christum scilicet imaginem Dei invisibilis esse, statim causa haec addatur, in ipso condita esse universa in coelis et in terra, visibilia et invisibilia, quod nonnisi ipsius divinitatis esse potest; quemadmodum et alibi gloriam, *τὴν δόξην*, Christo adscribit, quia est *imago Dei, σικῶν τοῦ Θεοῦ* ²⁾. — b. Deinde ait Doctor gentium, *in Christo inhabitare omnem plenitudinem divinitatis, πᾶν τὸ πλήρωμα τῆς Θεότητος*, i. e. non portionem aliquam, sed totam divinitatem, et quidem *corporaliter, σωματικῶς*, leibhaftig, i. e. non *σχετικῶς*, ἀλλ' οὐσιωδῶς, ut scribit Oecumenius, seu *τῷ ὄντι, Wirklich, ganz eigentlich*. Haec est enim loquendi ratio Pauli, qui statim inferius veritatem religionis Christianae in oppositione umbrarum antiqui Testamenti *corpus, τὸ σῶμα*, adpellat ³⁾. Quapropter et in mox praecedentibus dixe-

¹⁾ Hebr. 10, 1. Cf. Gregor. Naz. Or. 36. Opp. T. 1. c. 523 s. — Athanas. Cont. Arian. Or. 1. n. 20—21. Opp. T. 1. P. 1. p. 424 s. — Cyrill. Alex. Thesaur. Ass. 32. Opp. T. 5. P. 1. p. 301. In Joan. 1. 2. T. 4. p. 230. — Ambros. De fid. l. 1. c. 7. n. 48—50. Opp. T. 2. c. 453. — Hilar. De Trinit. l. 11. n. 5. Opp. T. 2. c. 377. De Syn. s. de Ad. Orient. n. 12—13. lb. c. 467.

²⁾ 2. Cor. 4, 4. Cf. Gregor. Naz. Or. 36. Opp. T. 1. c. 523 s. Qui scribit: *Imago (Dei mihi dici videtur), ut ejusdem cum Patre substantiae, et quia ex illo est, ut exemplar suum imitando referat. Quanquam hic imago exemplar suum expressius refert. Illic enim rei vivae ac motu praeditae mortuae et motus expers imago est: hic autem vivi exemplaris viva quoque est effigies, multoque minus a Patre differens, quam Seth ab Adamo, filiusque omnis a parente suo. Hujusmodi namque simplicium rerum natura est, ut non partim inter se similes sint, partim dissimiles, sed totae totas repraesentent, eademque potius sint quam similes.* — Augustin. L. 83. quaest. q. 74. Opp. T. 6. c. 66. Retract. l. 1. c. 26. T. 1. c. 39. Qui (*Unigenitus*) tantummodo imago est, non ad imaginem.

³⁾ Col. 2, 17.

rat, in Christo Jesu esse omnes thesauros sapientiae et scientiae absconditos, seu reconditos ¹⁾. — c. Tum vocat Paulus Christum definite Deum ac Dominum sensu eminentissimo, atque, aeternum ac immutabilem esse, aperte praedicat. Ad Christum enim verba Psalmi refert: *Thronus tuus Deus in saeculum saeculi, etc.* Et rursus: *Tu in principio Domine terram fundasti, etc.* ²⁾. *Ipsi peribunt, tu autem permanebis, et omnes ut vestimentum veterascent: et velut amictum mutabis eos, et mutabuntur: tu autem idem ipse es, et anni tui non deficient.* Et hinc

3. Christo etiam tanquam homini competere summam dignitatem, supremumque in res creatas dominium. Quapropter ipse haeres universorum constitutus, porro sedere ad dexteram majestatis in excelsis, in oppositione Angelorum ministrantium, atque primogenitus omnis creaturae, principium ac primogenitus ex mortuis, in omnibus primatum tenens dicitur, et ei summum cultum exhibendum esse docetur. Idque ideo, quoniam

4. Christus causa, τὸ ἀρχέτυπον et finis rerum omnium finitarum est, per quem et propter quem omnia condita sunt et conservantur, quique nos Deo reconciliat. Creationem tribuit Christo Paulus verbis: *Per quem (Filium) fecit et saecula, τοὺς αἰῶνας ἐποίησεν*, i. e. res in saeculo seu tempore existentes ³⁾. Porro scribens: *Tu in principio terram fundasti: et opera manuum tuarum sunt coeli.* Nec non, quum ait: *Quoniam in ipso condita sunt universa, ἐκ τούτου πάντα*, — omnia per ipsum, et in ipso, δι' αὐτοῦ, καὶ αὐτόν, i. e. propter eum, *creata sunt, ἔκτισται*. Quominus de morali mundi reformatione per Christum facta cogitemus, vocabulum πάντα, quod diserte omnibus omnino rebus creatis, si coelestibus sive terrestribus, explicatur, nec non verbum καὶ nude sine ullo additamento, quo ad illam significationem restringeretur, positum nos prohibet ⁴⁾. Conservationem verbis: *Potens omnia verbo virtutis suae, φέρων τὰ πάντα τῷ ῥήματι*

¹⁾ Col. 2, 3. Cf. Hug, Einleitung in die BB. des N. B. 2. Th. p. 294.

²⁾ Cf. Luc. 1, 76. Hebr. 8, 2. Matth. 5, 33. 21, 42. Marc. 5, 19. Act. 1, 24.

³⁾ Cf. Hebr. 11, 3. Fide intelligimus, aptata esse saecula verbo Dei: ut invisibilibus visibilia fierent.

⁴⁾ Cf. Apoc. 4, 11.

τῆς δυνάμεως αὐτοῦ. Atque: *Omnia in ipso constant, τὰ πάντα ἐν αὐτῷ συνέστηκε*. Utraque autem, tam creatio quam conservatio, ad actiones divinas pertinet ¹⁾, quemadmodum et gratiae divinae reconciliatio, quam Christo Apostolus attribuit verbis: *Purgationemque peccatorum faciens, δι' ἑαυτοῦ καθαρισμὸν ποιησάμενος τῶν ἁμαρτιῶν ἡμῶν* ²⁾.

Hisce quam maxime congruunt, quae alibi in epistolis Paulinis de Jesu Christo occurrunt. Quando nimirum Apostolus relate ad Christum Deum Patrem sensu eminenti adpellat, et Christum Jesum eodem sensu Filium Dei, Filium Dei proprium, aut Filium Dei perfectum in aeternum vocat ³⁾, ipsum esse, ait, *heri et hodie*: ipsum *et in saecula* ⁴⁾; eum Dominum gloriae perhibet ⁵⁾, *propter quem omnia, per quem omnia, et nos in illum* ⁶⁾; qui sit *Dominus vivorum et mortuorum* ⁷⁾; qui Evangelium praedicantibus assistat, omnibusque necessariam gratiam largiatur ⁸⁾, noster autem et iudex existat, *ante cuius tribunal nos omnes manifestari oportet* ⁹⁾; in quem itaque credendum ¹⁰⁾, sperandum ¹¹⁾, et qui ab omnibus, et quidem super omnia sit diligendus, ita ut nos a charitate Christi neque tribulatio, neque angustia, neque fames, neque nuditas, neque periculum, neque persecutio, neque gladius, neque mors, neque vita, neque angeli, neque principatus, neque virtutes, neque instantia, neque futura, neque fortitudo, neque altitudo, neque profundum, neque creatura alia separet ¹²⁾; qui sit *sanctus, segregatus a peccatoribus* ¹³⁾, nostraeque salutis ac sanctitatis auctor ¹⁴⁾; cuius

¹⁾ Cf. Sap. 11, 26.

²⁾ Cf. Cyrill. Alex. *Thes. Assert.* 13. Opp. T. 5. P. 1. p. 139.

³⁾ 2. Cor. 11, 31. Gal. 4, 4. Rom. 1, 3. 4, 4, 8, 8, 32. 1. Cor. 1, 9, 15, 28. Gal. 2, 20. Col. 1, 13. Hebr. 4, 14, 5, 8, 7, 28, 10, 29.

⁴⁾ Hebr. 13, 8.

⁵⁾ 1. Cor. 2, 8.

⁶⁾ Hebr. 2, 10. 1. Cor. 8, 6.

⁷⁾ Rom. 14, 9. 1. Cor. 15, 17.

⁸⁾ 2. Tim. 4, 7. Ephes. 2, 21. 22. 3, 17. 2. Thess. 2, 15 s. 1. Thess. 3, 11, 12,

⁹⁾ 2. Cor. 5, 10. Rom. 14, 10. Act. 17, 31.

¹⁰⁾ Act. 20, 21.

¹¹⁾ 1. Tim. 1, 1. Col. 1, 27. Rom. 15, 12.

¹²⁾ 1. Cor. 15, 22. Rom. 8, 35 ss.

¹³⁾ 2. Cor. 5, 21. Hebr. 4, 15, 7, 26.

¹⁴⁾ 1. Cor. 1, 2. Cf. Rom. 10, 12. 13. Gen. 4, 26. Jer. 10, 25.

nomen propterea a fidelibus invocetur ¹⁾; a quo, uti a Deo Patre, nobis *gratia et pax* contingat ²⁾, cuique tribuenda sit *gloria in saecula saeculorum* ³⁾.

Quae omnia totidem sunt tam aperta ac luculenta divinitatis Filii seu Jesu Christi documenta, ut nonnisi ab iis, qui in meridiana luce caecutire malunt, rejici queant.

§. 40. δ. Apostolorum universim.

Nec non Apostoli cuncti in illa oratione, qua ante electionem Matthiae Christi Domini opem implorant, ipsius divinitatem palam fatentur, quum ajunt: *Tu Domine, qui corda nostri omnium, ostende, quem elegeris ex his duobus unum, etc.* ⁴⁾; nam illum non tantum Dominum cum excellentia adpellant, quo nomine Judaei nonnisi Jehovahm insignire consueverant ⁵⁾, sed et scrutatorem cordium esse dicunt, qui secundum SS. Litteras solummodo omniscius Deus est ⁶⁾. — Deinde, ut Joannes et Paulus, ita et reliqui discipuli Domini ubique, Jesum Filium Dei sensu eminenti esse tradunt, adeo, ut fides haec, *Filium Dei esse Jesum Christum*, primum, ut ita dicamus, Ecclesiae Symbolum sit ⁷⁾; qui in terram *desursum, de coelo* venerit, et *super omnes* sit, ut Joannes B. loquitur ⁸⁾, *omniumque Dominus*, ut ait Petrus ⁹⁾; atque qui omnia sciat, hominumque cogitationes videat ¹⁰⁾. Porro eum sanctum ac justum κατ' ἐξολήν vocant ¹¹⁾, atque *auctorem vitae* perhibent, in quo oporteat nos salvos fieri ¹²⁾; qui sit — in *dextera Dei deglutiens mortem, ut vitae aeternae haeredes efficeremur* ¹³⁾, atque *constitutus a Deo*

¹⁾ Hebr. 2, 10, 11.

²⁾ Rom. 1, 7, 16, 20, 16, 24. 1. Cor. 1, 3, 16, 23. 2. Cor. 1, 2, 13, 13. Gal. 1, 3, 6, 18. Ephes. 1, 2, 6, 23. Phil. 1, 2, 4, 23. Col. 1, 3, 1. Thess. 1, 1, 5, 28. 2. Thess. 1, 2, 1. Tim. 1, 2, 4, 22. 2. Tim. 4, 18. Hebr. 13, 21

³⁾ 2. Tim. 4, 18. Hebr. 13, 21.

⁴⁾ Act. 1, 24 s.

⁵⁾ Cf. Luc. 1, 76.

⁶⁾ Cf. Act. 15, 8.

⁷⁾ Cf. Act. 8, 35—38. 16, 31. 1. Petr. 1, 8—9.

⁸⁾ Joan. 3, 31.

⁹⁾ Act. 10, 36.

¹⁰⁾ Joan. 16, 30. Matth. 9, 4. Cf. 12, 25. Marc. 2, 8. Luc. 6, 8, 9, 41. Joan. 2, 24 s. 13, 11, 1, 47—50. 4, 17—18.

¹¹⁾ Act. 3, 14, 7, 52. 1. Petr. 2, 22, 1, 19.

¹²⁾ Act. 4, 12.

¹³⁾ 1. Petr. 3, 22.

judex vivorum et mortuorum ¹⁾. In Christi nomine denique miracula patrant ²⁾, ipsi morientes se commendant ³⁾, eumque esse docent, cui debeatur *gloria, et imperium in saecula saeculorum* ⁴⁾.

Observ. 1. Verum licet Filius Dei seu Jesus Christus unius sit naturae ac substantiae cum Patre, atque aeque ac Pater Deus vivus et verus: potest tamen Deus Pater, quoniam Filius et Spiritus S. ab ipso procedunt, atque cum illo unum sunt, solus una loco Filii et Spiritus S. poni, praecipue ubi non relatio Patris ad Filium aut Spiritum S., sed Dei ad res creatas respicitur, vel vero hic falsis diis opponitur. Quo sensu Christus Patrem solum Deum verum dicit, quum ait: *Haec est vita aeterna: Ut cognoscant te, solum Deum verum, et quem misisti Jesum Christum*, i. e. id ad veram salutem homines ducit, ut credant, non multos deos, sed te Patrem, mecum et Spiritu S. unum, solum esse verum Deum, et simul agnoscant, quem misisti, me Filium tuum, hominem factum, Messiam promissum, Redemptorem mundi ⁵⁾. Itaque verbis illis multitudinem substantiarum divinarum, nequaquam autem trinitatem divinarum personarum, aut suam et Spiritus S. divinitatem negat. — Simili sensu Paulus unum esse Deum Patrem ait, dum scribit: *Nobis tamen unus est Deus Pater, ex quo omnia, et nos in illum: et unus Dominus Jesus Christus, per quem omnia, et nos per ipsum* ⁶⁾. Nam etiam hic dictio: *εἰς θεός*, ad Deum, quatenus Gentilium opponitur diis, nequaquam autem quatenus opponitur Filio et Spiritui S., refertur, hoc sensu: Nobis tantum unus est Deus, qui est Pater, cum Filio et Spiritu S. unum Numen, a quo omnia originem suam repetunt. Loquitur enim Paulus diserte in mox praecedentibus de iis, qui apud Gentiles dii et domini habebantur. *Nam etsi, inquit, sunt, qui dicantur dii, sive*

¹⁾ Act. 10, 42.

²⁾ Act. 3, 6. 7. 12 ss. 4, 10.

³⁾ Act. 7, 58 s.

⁴⁾ 1. Petr. 4, 11.

⁵⁾ Cf. Athanas. *Or. 3. cont. Arian. n. 3.* Opp. T. 1. P. 1. p. 558. — Epiphani. *Haer. 69. n. 32.* Opp. T. 1. p. 755. *Anacor. n. 2. T. 2. p. 7.* — Gregor. Naz. *Or. 36.* Opp. T. 1. c. 519. — Basil. *Cont. Eunom. l. 4. in Joan. 17, 3.* Opp. T. 1. p. 294. — Cyrill. Alex. *Thes. Assert. 27.* Opp. T. 4. P. 1. p. 247. — Ambros. *De fid. l. 5. c. 1. n. 18—20.* Opp. T. 2. c. 554. — Hilar. *De Trinit. l. 9. n. 28 ss.* Opp. T. 2. c. 279 ss. — Augustin. *Cont. serm. Arian. c. 4.* Opp. T. 8. c. 625. *Cont. Maximin. l. 2. c. 15. n. 4. lb. c. 711 s.*

⁶⁾ 1 Cor. 8, 6.

ubi preces ad Patrem fudisse, videlicet tamquam homo, seu, ut ait Paulus, *in diebus carnis suae*, commemoratur ¹⁾).

Huc quoque pertinent verba Christi ad juvenem, ipsum Magistrum bonum salutantem, dicta: *Quid me dicis*, quem scilicet merum hominem habes, *bonum? Nemo bonus nisi unus Deus*. Aut ergo me bonum ne adpelles, aut vero Deum confitere ²⁾. Nec non locus epistolae prioris ad Corinthios: *Omnia subjecta sunt ei* (Christo), *sine dubio praeter eum, qui subjecit ei omnia. Cum autem subjecta fuerint illi omnia: tunc et ipse Filius subjectus erit ei, qui subjecit sibi omnia, ut sit Deus omnia in omnibus* ³⁾. Quibus Apostolus significat, Ecclesiam hisce in terris, licet Christus pro ea mortuus sit, et post resurrectionem suam velut primitias mortuorum semet Patri obtulerit, nondum esse consummatam ac perfectam, atque a morte ac insidiis diaboli tutam; et ideo adhuc porro directione Christi Domini, qui caput ejus est ac Rex, indigere, huncque etiam post-hac munus suum Messianum sustinere; in futura autem generali resurrectione Christum Ecclesiam sanctam, omnino et penitus gloriosam, morte prorsus destructa, Deo exhibiturum, ita ut Deus integrum Ecclesiae triumphantis corpus possideat, et ab eo possideatur. Loquitur itaque Paulus solummodo de fine muneris Messiani, quatenus constat in munere Christi apud Patrem intercedendi, et Ecclesiam in terris gubernandi, quod in fine saeculorum, genere humano finem suum consecuto, etiam finietur.

3. Tandem de Christo etiam ad nostrum cogitandum dum dici possunt, et revera dicuntur, quae de eo, in se considerato, minime proferri possent, simili ratione, quemadmodum e. Deus in Genesi Abrahamum alloquens hisce verbis inducitur: *Nunc cognovi, quoniam times Deum* ⁴⁾; et prout nos externa phaenomena, non pro eorum veritate, sed ad speciem, qua nobis representantur, passim describere solemus. Ita interpretanda sunt omnia loca, in quibus legitur, Christum qua Dei Filium semetipsum examinavisse, semetipsum humiliasse ⁵⁾, a Patre missum esse ⁶⁾, man-

Dionys. Alex. *Epist. cont. Paul. Samos. Resp. ad. q. 7.* Mansi, C. Coll. Conc. T. 1. c. 1070 ss.

¹⁾ Matth. 24, 26. 39. 42. 44. Luc. 22, 41 s. 23, 46. Joan. 17, 1 ss. 11, 42. Hebr. 5, 7.

²⁾ Marc. 10, 18. Matth. 19, 17. Luc. 18, 19. Cf. Augustin. *Cont. Maximin. l. 2. c. 22. n. 5.* Opp. T. 8. c. 731. — Ambros. *De fid. l. 2. c. 1. n. 16—19.* Opp. T. 2. c. 474.

³⁾ Cor. 15, 27—28.

⁴⁾ Gen. 22, 2.

⁵⁾ Philipp. 2, 7.

⁶⁾ Joan. 3, 17.

datum a Patre accepisse ¹⁾, Patrem omnia in manu ejus dedisse ²⁾, et omnia ei demonstrare ³⁾, illum scilicet generando, et per generationem ipsi naturam divinam, et cum hac omnem scientiam et potentiam communicando, et ejusmodi; etsi haec etiam ad Jesum, quatenus tanquam homo Legatus divinus est, referri possunt ⁴⁾.

4. Prorsus nullam difficultatem autem pariunt verba, quibus Mariam Magdalenam affatus est Dominus: *Ascendo ad Patrem meum, et Patrem vestrum, Deum meum, et Deum vestrum* ⁵⁾. Nam Christus non eadem ratione Patrem coelestem Patrem et Deum suum ac discipulorum adpellat, alioquin dicere debuisset: *Patrem et Deum nostrum*; sed sensus hujus effati nullus alius est, quam: Ascendo ad eum, qui summa benevolentia et infinito amore me, et etiam vos complectitur.

§. 41. B. Testimonia ex Traditione petita.

Quae fuerit Christi et Apostolorum doctrina, quis S. Scripturae sensus, quod ad sacra dogmata attinet, tuto colligimus prae omnibus ex primis Ecclesiae Christianae Magistris, qui Christi et Apostolorum aetati propiores, vel auditores fuerunt discipulorum Christi Domini, vel instituti ab his, qui doctrinam coelestem ex ore Apostolorum hauserant. Atqui

a. si veteres illos divinae doctrinae testes audimus: de vera Christi divinitate dubitare non sinimur; tam multa, tamque perspicua ipsi reliquere illius veritatis documenta. In medium autem duntaxat proferimus testimonia SS. Patrum, qui vixerunt ante Concilium Nicaenum I.; nam fidem in Dei Filium Patri consubstantialem inde ab hacce Synodo in Ecclesia semper viguisse, ne ipsi adversarii quidem inficiantur. Inter hos jam auctor epistolae, cui nomen Barnabae est inscriptum, Christum Dei Filium, verum Deum, Patri coaeternum praedicat, *qui in carne apparuit, ut nos servaret a peccatis* ⁶⁾. — Hermas per similitudinem de duabus in Christo naturis, divina nempe et humana, disserit, atque de ipso ait: *Nomen Filii Dei magnum*

¹⁾ Joan. 10, 18.

²⁾ Joan. 3, 35.

³⁾ Joan. 5, 20.

⁴⁾ Cf. Joan. 11, 42. 17, 3. etc.

⁵⁾ Joan. 20, 17.

⁶⁾ n. 5—7, Coteler. PP. apost. Amstel. 1724. V. 1. p. 15 ss.

est et immensum, et totus ab eo sustentatur orbis ¹⁾. — Clemens Romanus, Pauli socius in Apostolatu, tertius a B. Petro Romae Pontifex († a. 101) scribit, oportere nos sentire de Christo *tanquam de Deo*, ac *de iudice vivorum et mortuorum* ²⁾, ipsumque *Sceptrum majestatis Dei* esse dicit ³⁾. — Ignatius, Joannis A. discipulus et Episcopus Antiochenus, († a. 107), scribit in epistola ad Ephesios: *Medicus autem unus est, et carnalis et spiritualis, genitus et ingenitus, seu factus et non factus, in homine existens Deus, in morte vita vera, et ex Maria et ex Deo, primum passibilis et tunc impassibilis, Jesus Christus Dominus noster* ⁴⁾. — *Deus enim noster Jesus Christus in utero gestatus est a Maria, juxta dispensationem Dei, ex semine Davidis, Spiritu autem S.* ⁵⁾. — In epistola ad Magnesianos: *Unus Deus est, qui se ipsum manifestavit per Jesum Christum Filium suum, qui est Verbum ipsius aeternum, non a silentio (ex nihilo) progrediens* ⁶⁾. — In epistola ad Romanos: *Deus noster Jesus Christus in Patre existens* ⁷⁾. — In epistola ad Smyrnaeos: *Glorifico Jesum Christum Deum, qui tanta vos sapientia donavit* ⁸⁾. — Et in epistola ad Polycarpum: *Opto vos valere semper in Deo nostro Jesu Christo* ⁹⁾. — Polycarpus, Ignatii discipulus et Episcopus Smyrnensis († 167) in oratione dicta, antequam rogo imponeretur, ait: *Domine Deus omnipotens, Pater dilecti ac benedicti Filii tui Jesu Christi, — de omnibus laudo te, glorifico te, cum sempiterno et coelesti Jesu Christo, dilecto tuo Filio; cum quo tibi Spiritui S. gloria, et nunc et in futura saecula. Amen* ¹⁰⁾. — Ecclesia Smyrnensis: *Ignari (Judaei) quod nec Christum unquam derelinquere poterimus, qui pro salute omnium, qui in toto mundo salvi fient, passus est; inculpatus, pro peccatoribus;*

¹⁾ L. 3. Simil. 9. n. 2. 12. 14. Ib. p. 115. 118. 119.

²⁾ 2. Cor. n. 1. Ib. V. 1, p. 185.

³⁾ 1. Cor. n. 16. Ib. p. 156.

⁴⁾ n. 7. Ib. V. 2. p. 13.

⁵⁾ n. 18. p. 15 s.

⁶⁾ n. 8. p. 19. Cf. n. 6. 7. 13. p. 19. 21.

⁷⁾ n. 3. p. 27. Cf. n. 6. p. 28 s.

⁸⁾ n. 1. p. 33.

⁹⁾ n. 8. p. 42.

¹⁰⁾ Epist. Eccles. Smyrn. de martyr. S. Polycarp. n. 14. Ib. p. 200 s. Cf. n. 9. p. 198. n. 20 s. p. 203.

nec alium quemquam colere. Illum siquidem, utpote Filium Dei, adoramus: martyres vero tanquam Domini discipulos et imitatores, merito diligimus, propter illorum erga suum regem ac magistrum benevolentiam eximiam ¹⁾. Et epistolam finientes: *Valere vos optamus, fratres, ac incedere in evangelico sermone Jesu Christi; cum quo gloria Deo et Patri, et Spiritui S., ob sanctorum electorum salutem; quemadmodum martyrium pertulit beatus Polycarpus; ad cujus vestigia contingat, ut in regno Jesu Christi inveniamur* ²⁾. — Justinus M. a. c. 103. natus, et 167. mortuus, e philosopho Christianus factus, qui sacram doctrinam non temere, sed post longas veritatis disquisitiones, annum agens circiter trigesimum, imbibit, atque et ore et scripto adversus Judaeos et Ethnicos defendit: *Qui (Filius) cum Verbum sit primogenitum Dei, Deus etiam est. Ac prius quidem Mosis ac caeteris Prophetis in specie ignis et imagine incorporea visus est: nunc autem vestri imperii temporibus (ad Antoninum Pium loquitur) ex virgine homo factus secundum Patris voluntatem, pro eorum salute, qui illi credunt, et pro nihilo haberi et pati sustinuit, ut mortuus ac resurgens mortem vinceret* ³⁾. — Et: *Quis igitur sanae mentis homo non fateatur, atheos nequaquam nos esse, qui opificem hujusce universitatis colimus. — Nostrum autem — doctorem, natum ad hoc munus Jesum Christum ac sub Pontio Pilato — crucifixum, veri Dei Filium esse edocti, ipsumque secundo loco, Spiritum autem propheticum tertio habentes ordine, non sine ratione a nobis colit demonstrabimus* ⁴⁾. — Alibi: *Ejus (Dei) autem Filius, qui solus proprie Filius dicitur, Verbum antequam mundus crearetur, quod et una cum eo aderat, et genitum est, cum per illud initio omnia condidit et ornavit* ⁵⁾. — Atque in dialogo cum Tryphone Jud.: *Trypho: Quod ais praestitisse Deum ante saecula hunc Christum, ac deinde etiam nasci hominem factum sustinuisse, nec hominem ex hominibus esse; id non solum ab opinione abhorrens mihi videtur, sed etiam stultum. Ad haec ego: Scio, inquam, hanc doctrinam ab opinione abhorrentem videri, praesertim vestri generis hominibus, qui quae Dei sunt, nec intelligere nec facere unquam voluistis, sed quae ma-*

¹⁾ n. 17. Ib. p. 202.

²⁾ n. 22. p. 204.

³⁾ *Apol. I.* n. 63. *Opp.* p. 84. C.

⁴⁾ *Ib.* n. 13. p. 51.

⁵⁾ *Apol. II.* n. 6. p. 96. Cf. n. 13. p. 101. C.

gistrorum vestrorum, quemadmodum ipse Deus clamat. Sed tamen, Trypho, nequaquam irritum et infectum erit, quod demonstravi, hunc esse Christum Dei, si demonstrare non possim (vobis Judaeis ex testimoniis A. F.), illum etiam praeexistisse Filium Creatoris universorum, Deum existentem, et hominem ex Virgine genitum esse. Sed cum omnino demonstratum sit, hunc esse Christum Dei, qualiscunque sit (ex dictis hucusque); si minus demonstravero, praeexistisse, et hominem per passionibus nostris obnoxium, et carnem habentem nasci, secundum Patris voluntatem sustinuisse; in hoc tantum aequum fuerit, me errasse dicere, nequaquam autem negare, eum Christum esse, etiamsi homo ex hominibus videatur, nec quidquam amplius demonstratur, nisi eum electione consecutum esse, ut Christus esset. Sunt enim quidam, amici (ὅ φίλοι), ex genere nostro (haeretici videlicet, quos nostros appellat, eos Judaeis et Paganis opponens), qui eum Christum esse confitentur, quamvis hominem ex hominibus genitum pronuntient; quibus ego non assentior, nec assentirer, si maxima pars, quae mecum consentit, idem diceret: neque enim humanis doctrinis jussi sumus ab ipso Christo credere, sed iis, quae a beatis Prophetis praedicata et ab ipso tradita ¹⁾. — Et postquam id multis ostenderat ²⁾, concludit: Ac Christum quidem Dominum et Deum, Dei Filium esse, et virtute prius apparuisse ut virum et angelum, et in gloria ignis, velut in rubo et in iudicio de Sodomis facto, jam pluribus demonstratum est ³⁾. Et interjectis aliquot iterum argumentis, ex A. F. depromtis: Et cum haec dixissem, addidi: Intelligitis, auditores, siquidem animum advertitis, Scripturam declarare, progeniem ex Patre ante omnes omnino res creatas genitam esse. Porro genitum a gignente alium numero esse, quilibet fatebitur ⁴⁾. — Athenagoras, e philosopho ethnico Christianus († c. a. 180.), in Apologia, seu Legatione pro Christianis, intra a. 177 et 180. scripta, quam Marco Aurelio obtulit et Lucio Aurelio Commodo, jam in regni partem assumpto: Satis igitur demonstratum a me est, atheos nos non esse, qui unum ingenitum et aeternum tenemus Deum, invisibilem et impassibilem, qui nec capi aut compre-

¹⁾ n. 48. p. 150—152.

²⁾ n. 49—127. p. 152—233.

³⁾ n. 128. p. 233.

⁴⁾ n. 129. p. 235. Cf. *Epist. ad Diognet.* n. 7—8. Ib. p. 249—251.

hendi potest, qui sola mente et ratione cognoscitur, ac luce et pulchritudine, et spirilu et potentia non enarrabili circumdatus est, a quo denique omnia per ipsius Verbum et creata et ornata sunt, et conservantur. Agnoscimus enim et Dei Filium. Nec quisquam ridiculum existimet, suum Deo esse Filium. Neque enim ut poëtae fabulantur, qui nihilo meliores hominibus inducunt deos, ita de Deo et Patre aut de Filio sentimus. Sed est Filius Dei Verbum (Λόγος) Patris in idea et operatione; ab eo enim et per eum facta omnia, cum Pater et Filius unum sint. Cum autem Pater sit in Filio, et Filius in Patre, unitate et virtute spiritus, mens et Verbum Patris et Filius Dei. Quodsi vobis pro summa vestra intelligentia inquirere subeat, quid sibi velit Filius: dicam breviter, primam esse Patris progeniem, non quod factus sit, ab aeterno enim Deus habebat in se ipso Verbum (Λόγον), utpote ab aeterno rationalis (λογικός), sed quod prodierit, ut omnium materialium rerum — idea et actus, ἰδέα, τὸ ἐνέργεια, (i. e. ἀρχήν τε et conditor) foret. — Atque ipsum illud Spiritum, qui in Prophetis operatur, effluentiam Dei esse dicimus, emanantem et redeuntem, veluti radium solis. Quis igitur non miretur, cum atheos vocari audiat eos, qui Deum Patrem, et Filium Deum et Spiritum S. asserunt, ac eorum et in unione potentiam (ὁνύαμ i. e. substantiam) et in ordine distinctionem demonstrant ¹⁾. — Tatianus, Justini auditor et sectator, qui postea tamen ab Ecclesia discessit, († a. 175.) in Oratione ad Graecos, ante lapsum confecta: *Deus erat in principio: principium autem Verbi potentiam esse accepimus. Universorum enim Dominus, quatenus quidem mundus nondum erat creatus, solus erat; quatenus autem ipse potentia omnis, et eorum, quae videntur et non videntur, hypostasis sive sustentatio erat; omnia cum eo per rationalem potentiam sustentabat ipsum etiam illud Verbum (Λόγος), quod erat in eo. Voluntate autem simplicitatis ejus prosilit Verbum: Verbum autem non in vacuum progressum, fit opus primogenitum Patris. Hoc scimus esse mundi principium. Natum est autem per communicationem, non per abscissionem: nam quod abscissum est, a primo separatur. Quod autem per communicationem progreditur, voluntariam administrationem suscipiens, id eum non imminuit, ex quo desumptum*

¹⁾ n. 10. lb. p. 304 s. Cf. n. 4, 12. 18. 24. p. 300. D. 397. 312 s. 322.

*est. Quemadmodum enim ex una face multi ignes accenduntur, nec tamen primae facis, ob plures accensas faces, lux imminuitur: sic Verbum ex Patris potentia prodiens, genitorem Verbi expertem non fecit ¹⁾. Et: Non disipimus, o Graeci, nec nugas praedicamus, Deum sub hominis forma natum nuntiantes ²⁾. — Theophilus Antioch., e Pagano Christianus, in pontificalem Antiochiae Sedem a. 168. evectus, († c. a. 186): *Habens Deus suum ipsius Verbum in propriis visceribus insitum, genuit illud cum sua Sapientia, proferens ante omnia. Hoc Verbo usus est administro operum suorum, et per illud omnia condidit. Vocatur principium, eo quod principatum habeat et dominatum eorum omnium, quae per ipsum creata sunt. Hic igitur cum sit Spiritus Dei et principium et sapientia et virtus Allissimi, descendebat in Prophetas, ac per eos de mundi creatione et caeteris rebus loquebatur; nondum enim erant Prophetae, cum mundus crearetur, sed tantum Sapientia Dei, quae est in eo, ac Sanctum Verbum ejus, quod ei semper adest ³⁾. — Atque: Sol imago Dei est, luna hominis. Et quemadmodum sol longe praestat luna, potestate et gloria, sic Deus longe praestantior humanitate. Et quemadmodum sol plenus semper manet, nec unquam minuitur, sic Deus semper perfectus manet ac plenus omni virtute, intelligentia, sapientia, immortalitate et omnibus bonis. Luna vero singulis mensibus minuitur et quodammodo interit, hominis similitudinem exhibens: deinde renascitur et crescit in exemplum futurae resurrectionis. Similiter tres illi dies, qui ante luminaria fuerunt, imago sunt Trinitatis, Dei, ejus Verbi, ejusque Sapientiae, quartus vero imago hominis, luce indigentis, ut sint Deus, Verbum, Sapientia, homo ⁴⁾. — Irenaeus, ex Asia minori oriundus, Polycarpi discipulus, Presbyter et postea Praesul Ecclesiae Lugdunensis, († a. 203): *Ecclesia, tametsi per universum orbem usque ad extremos fines terrae dispersa, fidem eam ab Apostolis eorumque discipulis acceptam, quae est in unum Deum, Patrem omnipotentem, — et in unum Jesum Christum Filium Dei, nostrae salutis causa incarnatum, et in Spiritum S., qui per Prophetas Dei dispensationes et adventus praedicavit, et ortum ex Virgine,***

¹⁾ n. 5. Ib. p. 261 s.

²⁾ n. 21. p. 278. Cf. n. 7. p. 263.

³⁾ Ad Autol. l. 2. n. 10. Ib. p. 378 s.

⁴⁾ l. 2. n. 15. p. 384 s.

passionem, et resurrectionem a mortuis, et cum carne in coelos ascensum dilecti Domini nostri Jesu Christi, et e coelo in gloria Patris adventum ipsius ad instauranda omnia, et a morte ad vitam revocandam omnem mortalium omnium carnem, ut Christo Jesu Domino nostro, et Deo, et Salvatori, et Regi, de benigna Patris invisibilis voluntate, omne genu flectatur, coelestium, terrestrium et inferorum, et omnia lingua ei confiteatur, atque ipse justam de omnibus sententiam ferat, spiritualia videlicet nequitiarum, et Angelos transgressores, quique perfide defecerant, impiosque item homines, et injustos, et flagitiosos, et blasphemos in ignem aeternum mittens; justis contra, et pietate praeditis, quique ipsius praecepta servaverunt, atque in ipsius charitate, partim jam inde ab initio, partim ex poenitentia persisterunt, vitam donet, atque incorruptibilitatem largiatur, gloriamque sempiternam afferat ¹⁾. Qui locus memoratu dignissimus est, quoniam Symbolum fidei Ecclesiae universalis saeculi secundi continet. Simili autem ratione S. Praesul etiam alibi per totum suum adversus haereses exaratum opus divinitatem Filii adserit, atque contra adversarios demonstrat, eumque modo *Dominum* ac *Deum*, uti Pater Dominus ac Deus est ²⁾, modo *existentem in principio ac semper apud Patrem* ³⁾, vel *Patri coexistentem* ⁴⁾, modo *Filium Dei, qui Deus est* ⁵⁾, porro *immensum Patrem in Filio mensuratum, mensuram enim Patris Filium, quoniam capit eum* ⁶⁾, aut qui *proprie Deus, ac Dominus, ac Rex aeternus, et Unigenitus, et Verbum incarnatum praedicatur et a Prophetis omnibus, et Apostolis, et ab ipso Spiritu S.* ⁷⁾, *per quem facta sunt omnia* ⁸⁾, quique *vere homo et vere Deus* existat ⁹⁾, et sic porro, dicit ac ostendit. — Hip-

¹⁾ *Cont. haer. l. 1. c. 10. n. 1. p. 48 s.*

²⁾ *l. 3. c. 6. p. 180 s.*

³⁾ *l. 3. c. 18. n. 1. p. 209. Cf. l. 4. c. 14. n. 1. p. 243. l. 4. c. 20. n. 1. p. 253. n. 7. p. 255.*

⁴⁾ *l. 2. c. 30. n. 9. p. 163. Cf. c. 25. n. 3. p. 153.*

⁵⁾ *l. 3. c. 20. n. 4. p. 214.*

⁶⁾ *l. 4. c. 4. n. 2. p. 231.*

⁷⁾ *l. 3. c. 19. n. 2. p. 212.*

⁸⁾ *l. 3. c. 18. n. 1. p. 209. Cf. c. 11. n. 1. p. 188. c. 8. n. 3. p. 183. l. 4. c. 20. n. 1. p. 253. l. 2. c. 2. n. 5. p. 118.*

⁹⁾ *l. 3. c. 9. n. 2—3. p. 184 s. c. 4. n. 2. p. 178. c. 16. n. 2. p. 204. l. 4. c. 9. n. 2. p. 238. l. 4. c. 33. n. 7. p. 271. l. 5. c. 1. n. 1. p. 292.*

polytus, Irenaei discipulus, Episcopus, ut fertur, et ob praeclaram fidei confessionem Martyr († c. a. 235.): *Qualem igitur Filium suum Deus per carnem misit, nisi Verbum, quod a principio scilicet Filium vocavit, quia futurum erat, ut ortum caperet. — Nec enim Verbum per se et sine carne, perfectus Filius erat, cum tamen esset perfectum Verbum, Unigenitus. Neque caro per se sine Verbo subsistere poterat, quia in Verbo habebat ὁνταςιν (das Bestehen), id est, in Verbo subsistebat ¹⁾. Et: Deus Verbum e coelis descendit in Mariam sanctam Virginem, ut ex ea incarnatus summa anima humana, rationis inquam particeps, factus omnia, quaecunque homo est, ex cepit peccato. — Sicut ergo praedicatum est, sic praesens se ipsum manifestum fecit, ex Virgine et Spiritu S. novus homo factus: habens coeleste, quod paternum erat, tanquam Verbum; terrenum vero, tanquam ex velere Adam per Virginem incarnatus. — Non enim per fictionem aut mutationem, sed vere factus est homo ²⁾. Atque alibi ait, Deum immensum simul et circumscriptum hominem existentem et intellectum utriusque perfecte perfectionem habentem ³⁾. — Clemens Alexandrinus, ex ethnico philosopho Christianus, Pantaeni discipulus ac in schola Alexandrina successor, Presbyter pro re Christiana assidue laborans: *Noster autem paedagogus sanctus Deus Jesus, qui est lux omnis humani generis, Verbum ⁴⁾. — Nihil odio habet Deus: sed neque Verbum: utrumque (uterque) enim unum est (ἐν γὰρ ἅμῳ), nempe Deus ⁵⁾. — Quis est universorum Deus, unus solus est, bonus, iustus, opifex, Filius in Patre, cui gloria in saecula saeculorum. Amen ⁶⁾. — Alibi dicit: Perfectissima autem et sanctissima, et maxime principalis, et quae maxime imperat, et est maxime regia, et longe beneficentissima, est natura Filii, quae est soli omnipotenti propinquissima (utpote quae est in**

¹⁾ *Cont. Noët. n. 15.* In Galland. *Bibl. PP.* T. 2. p. 463. Cf. 7. S. 11. 12. 14. p. 458 ss. *Serm. in Elcan. et Ann.* Ib. p. 496.

²⁾ *Ib. c. 17.* p. 463 s. Cf. *Demonstr. de Christ. et Antichr.* p. 417—422.

³⁾ *Cont. Beron. et Helicon.* p. 466. Ap. Anastas. *Collect.* Ib. T. 13. p. 79.

⁴⁾ *Paedag. l. 1. c. 7.* Opp. T. 1. p. 131. Cf. c. 11. p. 155 s.

⁵⁾ *Ib. c. 8.* p. 135. Cf. c. 9. p. 142 ss. c. 2—6. p. 99 ss. l. 3. c. 12. p. 302 ss.

⁶⁾ *Ib. c. 8.* p. 142.

ipso Patre). *Haec est maxima excellentia, quae omnia ordinat ex voluntate Patris, et optime gubernat universum, indefessa et inexhausta potestate cuncta operans, propterea quod agit arcanas respiciens notiones. Nunquam enim a sua excedit specula Dei Filius, ut qui non dividatur, non dissecetur, non transeat a loco ad locum, sit autem semper ubique, et contineatur nusquam: totus mens, totus lux paterna, totus oculus, qui omnia videt, omnia audit, scit omnia, potestate scrutatur potestates* ¹⁾ *Atque rursus: Quod (Verbum), quatenus olim ante jacta mundi fundamenta existebat, divinum rerum omnium principium fuit, etiamque nunc est: quatenus vero novissimis temporibus venerando illo et olim sancto Christi nomine appellari voluit, novum a me Canticum (utpote quod bonum attulit nuntium remissionis peccatorum, et regni Dei appropinquantis) vocatur. Hoc igitur Verbum Christus non solum, ut olim essemus, causa fuit (nam ille tum erat in Deo), sed idem etiam bene esse nobis dedit, et jam nuper hominibus apparuit, qui solus uterque, Deus et homo, est, ut omnimodam nobis felicitatem daret. — Novum ergo canticum est Verbi, quod in principio et ante principium fuit, exortus, qui modo nobis effulsit. Modo enim apparuit, qui olim erat, Servator: apparuit, qui ens est in ente (ὁ ἐν τῷ ὄντι ὄν); Verbum nempe, quod apud Deum erat, et a quo facta sunt omnia, Praeceptoris habitu apparuit* ²⁾. — *Crede, homo, homini et Deo. Crede, homo, Deo viventi, qui passus est, et adoratur. Credite, servi, mortuo. Credite ei, universi homines, qui solus est Deus ex universis hominibus* ³⁾. — *Nec enim tam exiguo temporis spatio tantum opus absque divina providentia perfecit Dominus, qui specie tenus despectus, re ipsa adoratus est; expiator, servator, mansuetus, divinum Verbum; verus sine controversia Deus, cum Domino totius universitatis adaequatus, quoniam ejus Filius erat, et Verbum erat in Deo* ⁴⁾. — Origenes, ob laboris instantiam et invictam animi fortitudinem Adamantius cognominatus, filius Leonidae Martyris, omnium aetatis suae doctorum

¹⁾ Strom. 7. c. 2. T. 2. p. 831.

²⁾ Cohort. ad Gent. c. 1. p. 6 s.

³⁾ Ib. c. 10. p. 84.

⁴⁾ Ib. p. 86. Cf. etiam Strom. l. 2. c. 15. p. 466, l. 4. c. 17. 25. p. 411. 635. l. 5. c. 1. T. 2. p. 643, etc.

virorum facile princeps, († a. 253.): *Species vero eorum, quae per praedicationem Apostolicam manifeste traduntur, istae sunt: Primo quod unus Deus est, qui omnia creavit atque composuit, quique, cum nihil esset, esse fecit universa, Deus a prima creatura et conditione mundi, omnium justorum Deus —: et quod hic Deus in novissimis diebus, sicut per Prophetas suos ante promiserat, misit Dominum nostrum Jesum Christum, primo quidem vocaturum Israël, secundo vero etiam gentes post perfidiam populi Israël. Hic Deus justus et bonus Pater Domini nostri Jesu Christi legem et prophetas et evangelia ipse dedit, qui et Apostolorum Deus est, et veteris et novi Testamenti. Tum deinde, quia Jesus Christus, ipse qui venit, ante omnem creaturam natus ex Patre est. Qui cum in omnium conditione Patri ministrasset (non tanquam servus, sed tanquam proprius Patris Filius), per ipsum enim omnia facta sunt, novissimis temporibus, se ipsum exinaniens homo factus incarnatus est, cum Deus esset, et homo factus mansit, quod erat Deus. Corpus assumpsit nostro corpori simile, eo solo differens, quod natum ex Virgine et Spiritu S. est. Et quoniam hic Jesus Christus natus et passus est in veritate, et non per phantasiam communem hanc mortem sustinuit, vere mortuus: vere enim a mortuis resurrexit, et post resurrectionem conversatus cum discipulis suis, assumptus est. Tum deinde honore ac dignitate Patri ac Filio sociatum tradiderunt Spiritum Sanctum ¹⁾. Et: Primo illud nos oportet scire, quod aliud est in Christo deitatis ejus natura, quod est unigenitus Filius Patris: et alia humana natura, quam in novissimis temporibus pro dispensatione suscepit. — Si semel recte receptum est, unigenitum Filium Dei sapientiam ejus esse substantialiter subsistentem, nescio, si jam ultra evagari sensus noster debeat ad suspicandum, ne forte ipsa *ὁντοκρατία*, id est substantia ejus, corporeum aliquid habeat, cum omne, quod corporeum est, vel habitu, vel colore, vel magnitudine designetur. — Extra omne, quod vel dici, vel intelligi potest, initium generatam esse credendum est Sapientiam. — Verbum Dei eam (sapientiam) esse, intelligendum est per hoc, quod ipsa caeteris omnibus, id est universae creaturae mysteriorum et arcanorum rationem, quae utique intra Dei sapientiam continentur, aperiat: et per hoc Verbum dicitur, quia sit tanquam arca-*

¹⁾ De princ. praef. n. 4. Opp. T. 1, p. 47 s.

norum mentis interpres. Unde et recte mihi dictus videtur sermo ille, qui in actibus Pauli scriptus est, quia „hic est verbum animal vivens.“ Joannes vero excelsius et praeclarius in initio Evangelii sui dicit, propria definitione Deum esse definiens Verbum, dicens: „Et Deus erat Verbum.“ — Qui autem initium dat Verbo Dei, vel sapientiae Dei, intueri, ne magis in ipsum ingenitum Patrem impietatem suam jaceret, cum eum neget, semper Patrem fuisse, et genuisse Verbum, et habuisse sapientiam in omnibus anterioribus, vel temporibus, vel saeculis, vel si quid illud est, quod nominari potest. — Infandum autem est et illicitum, Deum Patrem in generatione unigeniti Filii sui atque in substantia ejus exaequare alicui vel hominum vel aliorum animantium generanti; sed necesse est, aliquid exceptum esse Deoque dignum, cum nulla prorsus comparatio, non in rebus solum, sed ne in cogitatione quidem, vel sensu inveniri potest, ut humana cogitatio possit apprehendere, quomodo ingenitus Deus pater efficitur unigeniti Filii. Est namque ita aeterna ac sempiterna generatio, sicut splendor generatur ex luce. Non enim per adoptionem spiritus Filius fit extrinsecus, sed natura filius est. — Ut autem unam et eandem omnipotentiam Patris ac Filii esse cognoscas, sicut unus atque idem est cum Patre, Deus et Dominus, audi hoc modo Joannem in Apocalypsi dicentem: „Haec dicit Dominus Deus, qui est, et qui erat, et qui venturus est omnipotens.“ Qui enim venturus est, quis est alius nisi Christus? Et sicut nemo debet offendi, cum Deus sit Pater, quod etiam Salvator est Deus: ita et cum omnipotens dicitur Pater etiam nullus debet offendi, quod etiam Filius omnipotens dicitur¹⁾. — Gregorius Thaumaturgus,

¹⁾ *De princ. l. 1. c. 2. n. 1—4. 10. Opp. T. 1. p. 53—55. 58. Cf. l. 4. n. 28. p. 189 s. n. 29. p. 190. c. 2. Cont. Cels. l. 5. n. 24. T. 1. p. 596. J. 2. n. 9. p. 393. l. 6. n. 17. T. 1. p. 643. n. 47. p. 669. n. 64. p. 684. n. 73. p. 687. l. 8. n. 9. p. 749. n. 13. p. 751 s. n. 14. p. 752. n. 67. p. 792. In Gen. l. 1. T. 2. p. 1. In Exod. Hom. 9. n. 3. T. 2. p. 163. c. 2. E. In Num. Hom. 11. n. 8. T. 2. p. 310. c. 1. Hom. 1. n. 11. 13. p. 488. In Ps. 1. n. 2. T. 2. p. 526. In Jer. Hom. 9. n. 4. T. 3. p. 181 s. Hom. 8. n. 2. p. 171. Hom. 17. n. 4. p. 238. In Matth. t. 14. n. 7. T. 3. p. 622 s. t. 12. n. 6. p. 519. In Mult. Serm. n. 86. p. 889. E. In Joan. l. 1. n. 32. T. 4. p. 33. t. 6. n. 22. p. 137. t. 1. n. 11. p. 11 s. t. 2. n. 3. 18. 21. p. 51 ss. 76. 78 s. t. 32. n. 18. p. 449. t. 10. n. 30. p. 212. etc. Ex hisce locis, ubi tam clare ac perspicue Origenes divinam Filii adstruit naturam, quae alibi, inter θεός et ὁ θεός discernens, de illo minus recte*

Origenis discipulus († c. a. 265.): *Unus Deus Pater Verbi viventis, Sapientiae subsistentis et potentiae ac characteris sempiterni: perfectus perfecti genitor, Pater Filii unigeniti. Unus Dominus solus ex solo; Deus de Deo. Character et imago deitatis. Verbum efficax. Sapientia constitutionis rerum comprehensiva: et virtus atque potentia universae creaturae effectiva. Filius verus veri Patris, invisibilis ejus, qui est invisibilis, et incorruptibilis corruptioni non obnoxii, ac immortalis mortis prorsus nescii, et sempiternus sempiterni* ¹⁾. — Dionysius, Alexandriae Episcopus, de vera fide propaganda vehementissime sollicitus: *Qui ex Deo est ante saecula genitus, ipse extremis temporibus ex matre natus est. Idcirco Deicidae sunt Judaei, quia Dominum gloriae crucifixerunt. Nisi enim fuisset Christus idem, qui erat Deus Verbum, non poterat esse alienus a potestate peccandi. Nemo enim est, qui peccare non possit, nisi unus Christus, sicut et Pater Christi, et S. Spiritus* ²⁾. Et iterum: *Scripti, et scribo, et confiteor ac credo, et praedico coaeternum Patri Christum unigenitum et Verbum Patris* ³⁾. — Methodius, primum Olympi Lyciae, deinde Tyri in Phoenicia Episcopus, qui Martyr pro Christo occubuit c. a. 311.: *Decebat enim primogenitum Dei, ac unigenitum germen (id est Sapientiam) primum formato primoque ac primogenito hominum generis homini admixtum hominem fieri. Id enim Christum esse, hominem pura perfectaue deitate plenum, et Deum, qui in homine capiatur (seu hominis forma indutum). — Consentaneum quippe fuit, non ab alio vinci diabolum, quam ab illo ipso, quem a se seductum, suae se tyrannidi subjecisse gloriabatur. Nam neque aliter solvi peccatum, et damnationem aboleri possibile erat, nisi rursus ille ipse homo, ob quem dictum erat: „Terra es, et in terram reverteris,“ reformatus, (s. denuo formatus), quae ejus reatu in omnes pervaserat, sententiam antiquasset: ut sicut prius in Adam omnes moriebantur, sic et in Christo ru-*

disputare videtur, explicanda vel corrigenda erunt. Cf. Athanas. *De decret. Nic. Syn. n. 27*. Opp. T. 1. P. 1. p. 232 s.

¹⁾ *Expos. fld.* In Mansi. *Coll. Conc.* T. 1. c. 1029. — Gregor. Nyss. *Vit. Greg. Thaum.* Opp. Par. 1615. T. 2. p. 978.

²⁾ *Epist. cont. Paul. Samos.* In Mansi. *Coll. Conc.* T. 1. c. 1046. De

³⁾ *Ib. Resp. ad q. 10.* c. 1082 s.

sus, qui Adamum assumsisset, omnes vivificarentur ¹⁾. In Filii Dei Incarnatione ergo et morte Dei- hominis conditionem videt restaurationis generis humani, quae hodie fit in Ecclesia. *Adamus olim in somno, quem Deus ipsi immisit, carne sua et osse exutus est, et inde mulierem sociamque recepit; Christus, alter Adam, ipse in cruce se anima exuit, et ex substantia ejus (i. e. Paracleto, qui ex eo procedit) nascitur Ecclesia, quae inde recte dicatur esse carnem de carne sua et os de ossibus suis* ²⁾. — Prae aliis autem de Christi divinitate et humanitate diserte loquitur Athanasius in singulari quodam libro, quem inscripsit: *Oratio de humana natura a Verbo assumpta, et de ejus per corpus ad nos adventu* ³⁾. Magnificentissima tota haec commentatio est. Accedunt porro alia ejusdem generis opuscula: *Contra Arianos, Contra Appollinarium, De Trinitate et Spiritu S.*, etc. Insuper omnibus notum est, quanta pars Athanasius, licet adhuc Diaconus, Synodi Nicaenae, in qua solenniter definitum est, Filium Patri consubstantialem, ut statim dicitur, fuerit. — Tertullianus, rhetorices primum magister et causidicus, tum, rebus saecularibus abjectis, Christum amplexus et sacerdotio initiatus, postea vero jam senex in Montanistarum haeresin lapsus: *Nos sermoni atque rationi, itemque virtuti, per quae omnia molitum Deum ediximus, propriam substantiam spiritum inscribimus, cui et sermo inuit prae-nuntiant, et ratio adsit disponenti, et virtus praesit perficienti. Hunc ex Deo prolatum didicimus, et prolatione generatum, et idcirco Filium Dei, et Deum dictum ex unitate substantiae; nam et Deus spiritus: et cum radius ex sole porrigitur, portio ex summa; sed sol erit in radio, quia solis est radius, nec separatur substantia, sed extenditur: ita de spiritu spiritus, et de Deo Deus, ut lumen de lumine accensum: manet integra et indefecta materiae matrix, etsi plures inde traduces qualitatum mutuoris: ita et, quod de Deo profectum est, Deus est, et Dei Filius, et unus ambo: ita et de spiritu spiritus, et de Deo Deus: modulo alterum, non numero; gradu, non statu fecit: et a matrice non recessit, sed excessit. Iste igitur Dei radius, ut retro semper praedicaba-*

¹⁾ *Conviv. dec. Virg. Or. 3. n. 4—6.* In Galland. *Bibl. PP. T. 3. p. 686. 687.* Cf. *In ram. Palm. n. 5.* Ib. p. 823.

²⁾ *Ib. n. 8. p. 688 s.*

³⁾ *Opp. T. 1. P. 1. p. 47 ss.*

lur, delapsus in virginem quandam, et in utero ejus caro figuratus, nascitur homo Deo mixtus; caro spiritu instructa nutritur, adolescit, affatur, docet, operatur et Christus est ¹⁾. — Et: Nos vero (opposite ad haereticos, Patripassianos dictos) ei semper — unicum quidem Deum credimus: sub hac tamen dispensatione, quam oeconomiam dicimus, ut unici Dei sit et filius, sermo ipsius, qui ex ipso processerit, per quem omnia facta sunt, et sine quo factum est nihil: hunc missum a Patre in virginem, et ex ea natum hominem et Deum, filium hominis et filium Dei, et cognominatum Jesum Christum: hunc passum, hunc mortuum et sepultum secundum Scripturas, et resuscitatum a Patre, et in coelos resumtum, sedere ad dexteram Patris, venturum judicare vivos et mortuos: qui exinde miserit, secundum promissionem suam, a Patre Spiritum S. Paracletum, sanctificatorem fidei eorum, qui credunt in Patrem et Filium et Spiritum S. Hanc regulam ab initio Evangelii decurrisse, etiam ante priores quosque haereticos, nedum ante Praeaeam hesternum, probabit tam ipsa posteritas omnium haereticorum, quam ipsa novellitas Praeaeae hesterni. — Quasi non sic quoque sit omnia, dum ex uno omnia, per substantiae scilicet unitatem; et nihilominus custodiatur oeconomiae sacramentum, quae unitatem in trinitate disponit, tres dirigens, Patrem, et Filium, et Spiritum S. Tres autem non statu, sed gradu; nec substantia, sed forma; nec potestate, sed specie, unius autem substantiae, et unius status, et unius potestatis; quia unus Deus, ex quo et gradus isti, et formae, et species, in nomine Patris et Filii et Spiritus S. depulantur ²⁾. — Ante omnia Deus erat solus, ipse sibi et mundus et locus et omnia. Solus autem, quia nihil aliud extrinsecus praeter illum. Caeterum, ne tunc quidem solus: habebat enim secum, quam habebat in semetipso, rationem suam scilicet. Rationalis etiam Deus, et ratio in ipso prius; et ita ab ipso omnia. Quae ratio, sensus ipsius est. Hanc Graeci λόγον dicunt, quo vocabulo etiam sermonem adpellamus. Ideoque jam in usu est nostrorum, per simplicitatem interpretationis, Sermonem dicere in primordio apud Deum fuisse; cum magis rationem competat antiquiorem haberi; quia non sermonalis a principio, sed rationalis Deus etiam

¹⁾ Apolog. n. 21. Opp. V. 1. p. 46 s.

²⁾ Adv. Prae. n. 2. Opp. V. 2. p. 404.

*ante principium; et quia ipse quoque sermo ratione consistens, priorem eam ut substantiam suam ostendat. Tamen et sic nihil interest. Nam etsi Deus nondum sermonem suum miserat, proinde eum cum ipsa et in ipsa ratione intra semetipsum habebat, tacite cogitando et disponendo secum, quae mox per sermonem erat dicturus. Cum ratione enim sua cogitans atque disponens, sermonem eam efficiebat, quam sermone tractabat. Idque quo facilius intelligas ex leipso ante recognosce, ut ex imagine et similitudine Dei, quum habeas et tu in temetipso rationem, qui es animal rationale, a rationali scilicet artifice non tantum factus, sed etiam ex substantia ipsius animatus. Vide, cum tacitus tecum congrederis, ratione hoc ipsum agi intra te, occurrente ea tibi cum sermone ad omnem cogitatus tui motum, et ad omnem sensus tui vulsum. Quodcumque cogitaveris, sermo est; quodcumque senseris, ratio est. Loquaris illud in animo necesse est; et dum loqueris, collocutorem pateris sermonem, in quo inest haec ipsa ratio, qua cum eo cogitans loquaris, per quem loquens cogitas. Ita secundus quodammodo in te est sermo, per quem loqueris cogitando, et per quem cogitas loquendo: ipse sermo alius est. Quanto ergo plenius agitur hoc in Deo, cujus tu quoque imago et similitudo censeris, quod habeat in se etiam tacendo rationem, et in ratione sermonem? Possum itaque non temere praestruxisse, et tunc Deum ante universitatis constitutionem solum non fuisse, habentem in semetipso proinde rationem, et in ratione sermonem, quem secundum a se faceret, agitando intra se ¹⁾. Quae licet sint mera Tertulliani opinio, tamen negari non potest, ex iis doctrinam fidei perlucere, Filium Dei inde ab aeterno exstitisse, alium quidem a Patre, non tamen ab eo sejunctum, seu ut inferius ait, *unius et indivisae substantiae* cum Patre ²⁾. Quod saepius repetit ³⁾. Caeterum Tertullianus duplicem discernit nativitatem seu generationem, aliam scilicet internam ac aeternam, qua Deus semper inde ab aeterno in se habet *Λόγος*, et aliam quasi externam ac temporalem, ex*

¹⁾ *Ib.* n. 5. p. 407 s.

²⁾ *Ib.* o. 13. p. 418.

³⁾ *Ib.* n. 3. p. 405 s. n. 8. p. 410 s. n. 9. p. 410. n. 19. p. 425. *Individuum et inseparatum Filium a Patre pronuntiamus.* n. 21. p. 426 ss. Nam si haec (ab Apostolo dicta) non aliter accipi licet, quam quomodo scripta sunt, indubitanter alius ostenditur, qui fuerit, alius, apud quem fuit: alium Sermonem esse, alium Deum; licet et Deus sermo. n. 22 s. p. 428 ss. n. 25. p. 433 s. n. 27. p. 436 s. etc.

nostro videlicet rem concipiendi modo, qua Pater, quodammodo sermonem proferendo, per Filium mundum creavit ¹⁾, simili sensu, quo etiam Spiritus S. duplex missio, interna ad divinam naturam necessario pertinens, et externa ad peculiarem effectum ejusdem in mundo visibili designandum discernitur ²⁾. — Cyprianus, Carthaginensis Praesul, vir singularis candoris ac mansuetudinis, praecipuum Episcoporum ac Martyrum lumen, pro Christi fide capite plexus a. 258, juxta alios 261.: *Hujus igitur gratiae disciplinaeque* (omnibus gentibus promissae) *arbiter et magister Sermo et Filius Dei mittitur, qui per Prophetas omnes retro illuminator ac doctor humani generis praedicabatur. Hic est virtus Dei, hic ratio, hic sapientia ejus et gloria; hic in Virginem illabitur, carnem Spiritus sanctus (Dei Filius) induitur, Deus cum homine miscetur: hic Deus noster, hic Christus est, qui mediator duorum hominem induit, quem perducatur ad Patrem* ³⁾. Et alibi: Si (ab haereticis baptizatus) *sanctificatus est, si templum Dei factus est, quaero cujus Dei? Si Creatoris, non potuit, quia in eum non credit: si Christi, nec hujus fieri potuit templum, qui negat Deum Christum: si Spiritus S., cum tres unum sint, quomodo Spiritus S. placatus esse ei potest, qui aut Filii aut Patris inimicus est* ⁴⁾. — Arnobius, ex christianismi impugnatore defensor ejusdem egregius factus († 326): *Natum hominem colitis* (dicitis). *Etiam si esset id verum, locis ut in superioribus dictum est, tamen pro multis, et tam liberalibus donis, quae ab eo perfecta in nobis sunt, Deus dici appellarique deberet. Cum vero Deus sit re certa et sine ullius rei dubitationis ambiguo, inficiaturos arbitramini nos esse, quam maxime illum a nobis coli, et praesidem nostri corporis nuncupari? Ergone, inquiet aliquis furens, iratus, et percitus, Deus ille est Christus? Deus respondebimus, et interiorum potentiarum Deus: et quod magis infidos acerbissimis doloribus torqueat, rei maximae causa a summo Rege ad nos missus* ⁵⁾.

¹⁾ Cf. *Ib.* n. 7. p. 408 s.

²⁾ Conferri adhuc potest: *De praescript.* n. 13. Opp. V. 1. p. 306. *De virg. veland.* n. 1. V. 2. p. 25. *De carn. Chr.* n. 3—5. p. 44 ss. *De resurrect. carn.* n. 6. p. 78 s.

³⁾ *De idol. vanit.* n. 7. Opp. V. 2. p. 110.

⁴⁾ *Epist.* 73. *ad. Jubaj.* n. 8. V. 1. p. 219. Cf. *Epist.* 63. *ad Caecil.* n. 1. ss. p. 169 ss. *Epist.* 56. *de exhort. mart.* n. 5. 8. p. 149. 151.

⁵⁾ *Adr. Gent. l. 1. n. 42*, p. 26. Cf. *l. 1. n. 43* ss. p. 26 ss.

— Novatianus († a. 270), qui in eo, quem adhuc in communione Ecclesiae scripserat, libro *de Trinitate* Christi divinitatem et humanam naturam docet, atque illam inprimis dilucide ex S. Scriptura um V. tum N. T. defendit ¹⁾. — Lactantius, singularis eloquentiae vir, in ethnica superstitione impugnanda felicissimus († a. 30.): *Cum dicimus Deum Patrem, et Deum Filium, non diversum dicimus, nec utrumque secernimus; quia nec Pater sine Filio esse potest, nec Filius a Patre secerni, siquidem nec Pater sine Filio nuncupari, nec Filius potest sine Patre generari. Cum itur et Pater Filium faciat, et Filius Patrem: una utrique mens, unus spiritus, una substantia est: sed ille quasi exuberans fons est, hic tanquam defluens ex eo rivus; ille inquam sol, hic quasi radius a sole perrectus, qui quoniam immo Patri et fidelis, et charus est, non separatur: sicut nec ious a fonte, nec radius a sole ²⁾.*

Post haec tam clara ac manifesta Patrum Ante-Nicaenorum de divinitate Filii, atque ejus eadem ac individua cum Patre substantia, quis audeat illorum consensum in hacce sententia inficiari, aut in dubium vocare? Id ipsum effatur jam Athanasius, tribuens: *En igitur nos quidem hanc sententiam* (de nostro dogmate loquitur) *a Patribus ad Patres transiisse demonstramus: vos vero, o novi Judaei et Caiphae discipuli, quos Patres, qui vestris oculis faverint, exhibere potestis? Nullum certe prudentem et sapientem unquam proferetis, omnes enim a vobis abhorret, praeter unum diabolum ³⁾.* Et post Athanasium Augustinus, qui haec habet: *Omnes, quos legere potui, qui ante me scripserunt de Trinitate, quae Deus est, divinorum librorum veterum et novorum catholici tractatores, hoc intenderunt secundum Scripturas docere, quod Pater et Filius et Spiritus S. unius eademque substantiae inseparabili aequalitate divinam insinuent unitatem; ideoque non sint tres dii, sed unus Deus: quamvis alter Filium genuerit, et ideo Filius non sit, qui Pater est; Filiusque Patre sit genitus, et ideo Pater non sit, qui Filius est; Spiritusque S. nec Pater sit nec Filius, sed tantum Patris et Filii Spiritus, Patri et Filio etiam ipse coequalis, et ad Trinitatis perveniens unitatem ⁴⁾.*

¹⁾ c. 9—28. In Galland. *Bibl. PP.* T. 3. p. 293 ss.

²⁾ *Div. Instit.* l. 4. c. 29. *Opp.* T. 1. p. 351. Cf. c. 6—28. p. 284 ss.

³⁾ *De decret. Syn. Nic. n.* 27. *Opp.* T. 1. P. 1. p. 233. C. D.

⁴⁾ *De Trinit.* l. 1. c. 4. n. 7. *Opp.* T. 8. c. 753.

Observ. Quod jam ad ea attinet, quae in scriptis SS. Patrum hinc inde occurrunt, ac cum divinitate Filii pugnare videntur: observamus, fieri potuisse, prout jam Hieronymus monuit ¹⁾, ut vel simpliciter erraverint, praecipue, ubi argumentis internis veritatem revelatam ex sua sententia, non auctoritate divinae revelationis firmare satagunt, aut consecraria inde deducunt; vel alio sensu vocabula adhibuerint; vel antequam Arius nasceretur, innocenter quaedam et minus caute locuti sint; nisi forsitan de loco aliquo per liberos imperitos vel etiam haereticos corrupto agatur. Unde eorum verba ita attemperanda sunt, ut ab iis, quae alibi ac indubitate pronuntiant, haud dissideant, et ex diverso, a nostro recedente, quem Patres secuti sunt, loquendi usu, aut ad illorum mentem benignius interpretanda, aut vero ipsi, ubi aperte errarunt, relinquendi sunt; nam singuli SS. Patrum nequaquam infallibiles sunt, ut alibi ostendimus, praecipue in iis, quae non tam ex fidei deposito, in Ecclesia asservato, quam potius ex sua mente depromunt. Quod tamen eorum fidem in dogmate nostro adtestando haud imminuit. Id enim certum ac evictum est, ut ex lectione operum SS. Patrum ac Scriptorum, qui ante Synodum Nicaenam vixerunt, imo jam ex locis supra laudatis quilibet sibi persuadere potest, illos apertissimis verbis tradidisse, Christum esse Deum verum, qui inde ab aeterno existit, hypostasi a Patre quidem distinctum, natura tamen ac substantia cum Patre eunum, pari ac summo cultu cum Patre adorandum. Sic

1. nonnulli SS. Patrum Antenicaenorum Deum Patrem vocant *αἰτία*, *causam Filii*. — Attamen ipsi sub *αἰτία*, *causa*, non intelligunt, quod nos sub vernaculo *Ursache* intelligimus, rationem scilicet externam rei alicujus finitae, sed id ipsum, quod apud nos per vocabula: *principium*, *ratio existentiae*, *der Daseins- oder Entstehungs-Grund*, exprimi consuevit ²⁾.

Eodem sensu intelligendi illi viri sunt, quando Patrem *auctorem Filii*, aut vero contra, *Filium a Patre causatum*, *effectum*, *opus Patris*, vel *secundo loco* habendum, aut Patrem *ἀρχότιον* ³⁾ dicunt, quibus omnibus nonnisi, Filium a Patre gigni, Patrem autem sine principio esse, significare volunt; quemadmodum et, si Filium voluntate Patris natum ajunt, solummodo necessitatem brutam atque coecam, a divinitate abhorrentem, excludunt; quum nimirum nihil

¹⁾ Adv. Ruffin. Apol. 2. n. 19. Opp. T. 2. c. 508 s.

²⁾ Cf. Basil. Cont. Eunom. l. 1. n. 25. Opp. T. 1. p. 236. C. — Gregor. Naz. Or. 29. Opp. T. 1. c. 432. D. — Joan. Damascen. De fide orth. l. 3. c. 5. Opp. T. 1. p. 210.

³⁾ Cf. Origen. Comm. in Joan. t. 2. n. 2. Opp. T. 4. p. 50.

sit exploratius, quam negasse illos, Filium esse a Patre factum aut creatum, ut ex locis supra citatis clare elucet.

2. Porro aliqui Patrum illorum Filium Dei *instrumentum Patris*, vel *administrum*, *Patri obedientem*, *eidemque subjectum* nuncupant ¹⁾. — Verumtamen hisce nihil aliud ex ipsorum mente assecitur, nisi, Filium, a Patre originem ac subsistentiam habentem, in omnibus operibus suis Patris voluntati, quam cum eo communem habet, perfectissime esse consonum.

3. Nonnulli iterum, ut Athenagoras ²⁾, Tatianus ³⁾, Theophilus Antioch. ⁴⁾ ac Tertullianus ⁵⁾, de generatione Filii ante mundi conditionem, in tempore ergo facta loquuntur. — Attamen hoc minime aeterna Filii generatio negatur, et *pse* in classem rerum creaturarum detruditur, quum iidem Patres illum *expresse* aeternum ac increatum praedicent ⁶⁾; sed id solummodo adstruitur, ante creationem mundi *Λόγον*, qui ab aeterno in Deo existerat, etiam ad extra prolatum esse, ut per ipsum illa fieret, *Λόγον ἐνδιάθετον* et *πρόσφορον* distinguendo. Quae generatio externa potest quidem juxta effectum, seu κατ' ἐπιφάνειαν, non autem re ipsa, seu κατ' ἀλήθειαν mente concipi. In hoc ergo Patres laudati tantum, quod dictam nativitatem externam veram ac propriam habeant, ast sine dubio errant, quemadmodum et Tertullianus, quum scribit: *Haec est natiuitas perfecta Sermonis, dum ex Deo procedit: conditus ab eo primum ad cogitatum in nomine Sophiae, Dominus condidit me initium viarum suarum. Dehinc generatus ad effectum: cum pararet coelum, aderam illi simul* ⁷⁾.

3. Ita quoque certo erravit idem Tertullianus, quum ait: *Pater tota substantia est: Filius vero derivatio totius et portio, sicut ipse profletur: „quia Pater major me est“* ⁸⁾. Et pariter quando negat, Filium immensum esse ac invisibilem, hasque proprietates soli Patri tribuit, cum ait: *Jam ergo alius erit, qui videbatur, quia non potest idem invisibilis definiri, qui videbatur, et consequens erit, ut invisibilem Patrem intelligamas, pro pleni-*

¹⁾ Cf. Justin. M. *Dial. c. Tryph. n. 61. p. 165. n. 226. p. 132. n. 127. p. 233.* — Iren. *Cont. haer. l. 4. c. 7. n. 4. p. 236.*

²⁾ l. s. c.

³⁾ l. s. c.

⁴⁾ l. s. c.

⁵⁾ *Adv. Prax. n. 5. Opp. V. 2. p. 407 s. etc.*

⁶⁾ Cf. ll. ipsa cc.

⁷⁾ *Adv. Prax. n. 7. Opp. V. 2. p. 409.*

⁸⁾ *Ib. n. 9. p. 411. Cf. n. 14. p. 418.*

tudine majestatis; visibilem vero Filium cognoscamus, pro modulo derivationis: sicut nec solem nobis contemplari licet, quantum ad ipsam substantiae summam, quae est in coelis, radium autem ejus toleramus oculis pro temperatura portionis, quae in terram inde porrigitur ¹⁾. Et inferius: Caelerum quale est, ut Deus omnipotens ille invisibilis, quem nemo vidit hominum, nec videre potest; ille, qui inaccessibilem lucem habitat: ille, qui non habitat in manu factis: a cujus conspectu terra contremiscit, montes liquescunt, ut cera: qui totum orbem manu apprehendit, velut nidum, cui coelum thronus, et terra scabellum: in quo omnis locus, non ipse in loco, qui universitatis extrema linea est; ille Altissimus in paradiso ad vesperam deambulaverit, quaerens Adam; etc. — Ignorantes enim, a primordio omnem ordinem divinae dispositionis per Filium decurrisse, ipsum credunt Patrem et visum, et congressum, et operatum, et solum et esuriam passum; et ita unum Deum semper egisse, id est Patrem, quae per Filium gesta sunt ²⁾. Similia habent Justinus M. ³⁾. Novatianus ⁴⁾ et Theophilus Antioch. ⁵⁾. Interim tamen videntur Patres hi in parum cautas id genus locutiones incidisse, similitudine solis, ad quam ubique recurrunt decepti, ac nimio studio contradicendi adversariis abrepti, qui perfracte negabant, distingui in divinis a Patre Filium. Quapropter ipsi tantum id potissimum significare voluisse dicendi sunt, apparitiones illas, quas praeparationes quaspiam *τῆς ἐνσωματώσεως* Verbi habent, ad *οἰκονομίαν* referri, quae nullo modo Patri, sed soli Filio conveniat. Non autem hisce Patres illos divinitatem Filii negare voluisse, ex locis supra laudatis patet, ubi, illum verum Deum esse, non tantum clarissimis verbis docent, sed et hanc veritatem inter articulos fidei in Symbolis suis referunt ⁶⁾. Quod inprimis de Tertulliano, qui incautior omnibus reliquis scripsit, valet, qui praeter supra commemorata, identidem, Filium verum Deum, Patrique consubstantiali esse, tradit, quum e.g. ait: *Non minori se tradidit Filio Creator, quae per eum condidit, per Sermonem suum scilicet* ⁷⁾, *Sermo Deus* — non rapinam exē-

¹⁾ Ib. n. 14. p. 418.

²⁾ Ib. n. 16. p. 422 s.

³⁾ Dial. c. Tryph. n. 127. Opp. p. 232 s.

⁴⁾ De Trinit. c. 18. In Galland. Bibl. PP. T. 3. p. 300. c. 2 s.

⁵⁾ Ad Autol. l. 2. n. 22. Opp. Justin. p. 389.

⁶⁾ Cf. Iren. l. s. c. — Tertull. De praescr. n. 13. et De virg. vol. 1. s. cc.

⁷⁾ Adv. Marcion. l. 4. n. 25, V. 2. p. 302,

*stimavit paritari Deo*¹⁾, exinde eum (Sermonem) *parem sibi faciens*, de quo procedendo *filius factus est, primogenitus, ut ante omnia genitus, et unigenitus, ut solus ex Deo genitus*²⁾, *sed et nomina Patris, Deus omnipotens, Altissimus, Dominus virtutum, Rex Israël, Qui est, — haec dicimus, et in Filium competiisse, et unum sumus, dicens, ego et Pater, ostendit duos esse, quos aequat et jungit*³⁾.

Similiter minus caute loqui videntur quidam Patrum, quando Filium *inferiorem Patre* esse dicunt, ut Origenes⁴⁾, quum Filius Patris non sit Dominus atque Patris omnes omnino res creatae participes sint, Filii tantum rationales, atque Spiritus S. soli sancti. Quamvis etiam hisce divinitas Filii haud inficias itur; quum iis Filius Patre inferior declaratur tantum ordine et participatione, non autem potestate aut essentia.

4. Tandem Patres accusant, eos doctrinam de Λόγῳ non tam ex fidei Christianae deposito, quam potius ex philosophia Platonica hausisse. — Attamen de hac criminatione Patres ipsi se purgant. Sic enim Justinus scribit: *Nihil Platonem moror, inquit ille (senex), nec Pythagoram, nec quemquam omnino, qui talia opinetur. — Exstiteri longe ab hoc tempore viri quidam istis omnibus, qui philosophi existimantur, antiquiores, beati et iusti et Deo cari, qui Spiritu S. afflante locuti sunt, et futura vaticinati sunt, quae quidem nunc sunt: Prophetiae vocantur. Hi verum soli et viderunt, et hominibus nuntiaverunt, neminem metuentes, neminem reveriti, nec gloriae cupiditate victi, sed ea tantum praedicantes, quae audierant et viderant Spiritu S. repleti. — Haec ille. — Mihi vero statim in animo ignis accensus est, meque amor invasit Prophetarum et hominum illorum, qui Christi sunt amici. Cumque illius sermones apud animum proponerem, hanc solam reperiēbam philosophiam, quae quidem tuta et utilis foret. Ad hunc ego modum atque hac de causa philosophus*⁵⁾. An non hisce verbis Justinus aperte declarat, se suam doctrinam non ex schola Platonis, vel cujuscunque alius philosophi, sed a SS. Prophetis et Apostolis habere? — Alibi autem plane, postquam dixerat, Platonem quoque docuisse, Verbo Dei fa-

¹⁾ *De resur. carn.* n. 6. p. 78. s.

²⁾ *Adv. Prae.* n. 7. p. 400.

³⁾ *Ib.* n. 17. 22. p. 423. 430.

⁴⁾ *Cont. Cels.* l. 8. n. 15. Opp. T. 1. p. 753. C. *De princ.* l. 1. n. 5. p. 62. c. 1. E.

⁵⁾ *Dial. c. Tryph.* n. 6—8. Opp. p. 113—114.

etum esse mundum universum, imo Spiritum S. non fuisse ei penitus ignotum, declarat: *Non ergo eadem nos ac alii opinamur; sed nostra omnes imitati edisserunt. Haec sane apud nos audire est, et discere ex iis, qui ne figuras quidem litterarum norunt, imperitis hominibus et lingua barbaris, sed mente sapientibus et fidelibus, quorum etiam nonnulli debiles et oculis capti; ut facile pateat, non humana sapientia haec fieri, sed Dei virtute dici* ¹⁾. Eandem igitur sententiam non ut suam singularem, sed omnium vere Christianorum fidem ac doctrinam, non haustam in scholis aut ex libris philosophorum, coram Imperatore atque Gentilibus propugnat. — In altera vero Apologia insuper asserit, quaecunque de vero alii viderint, nonnisi subobscurè vidisse, ita ut ex iis doctrina Christianorum aperta ac dilucida minime sit repetenda. *Me profiteor*, inquit, *laudi ducere, ac dimicatione omni contendere, ut Christianus reperiar: non quod aliena sint a Christo instituta Platonis, sed quod non omnino similia, ut nec etiam aliorum, Stoicorum videlicet, poetarum et historicorum. Ut quisque enim disseminatae rationis divinae partem aliquam sibi cognatam videbat, praeclare locutus est. Qui autem secum ipsi in rebus longè gravissimis pugnarunt, ii nec scientiam sublimiorem, nec cognitionem, quae refelli non possit, assequuti videntur. Quaecunque igitur apud alios omnes praeclare dicta, e nostra sunt Christianorum. Natum enim ex ingenito et non enarrabili Deo Verbum secundum Deum adoramus et amamus; quando quidem propter nos homo factum est, ut per passionum nostrarum particeps factum, medicinam illis faceret. Omnes enim scriptores per insitum rationis semen potuerunt illi quidem verum videre, sed subobscurè. Aliud enim est semen alicujus et imitatio pro viribus concessa, aliud ipsum illud, cujus communicatio et imitatio secundum ipsius gratiam conceditur* ²⁾. — Haec de Justinino, quem omnes, quicumque platonismum illatum clamant, inter primos ponunt, qui id ausi fuerint. Facilis ergo est conjectura de reliquis, quos tam gravi accusatione vix onerant. — Quid Tertullianus de sententiis philosophorum, ubi de divinis rebus agit, senserit, satis produnt verba: *Quid ergo Athenis et Hierosolymis quid Academiae et Ecclesiae? quid haereticis et Christianis? Nostra institutio de porticu Salomonis est, qui et ipse tradiderat, Dominum in simplicitate cordis esse quaerendum. Viderint, qui Stoicum et Platicum et Dialecticum Christianismum protulerunt. No-*

¹⁾ *Apol.* n. 60. *Ib.* p. 81 s.

²⁾ *Apol.* 2. n. 13. p. 101. Cf. *Conhort. ad Graec.* p. 6 ss.

his curiositale opus non est post Christum Jesum, nec inquisitione post Evangelium ¹⁾. — Quis ergo Patres hos, quum tales sint, atque ita sentiant, jure platonismi adcusare audeat?

§. 42. Continuatio.

Patribus accedunt Martyres, ex quorum confessione ante mortem atque in martyrio edita procul dubio quam luculentissime perspicitur, quatenus fuerit fides primorum Christianorum. Atqui nihil est exploratius, quam confessos fuisse Christiani nominis athletas Christi divinitatem, antequam pro Christo extrema paterentur. Sic in actis Ignatii legitur, postquam eum Trajanus interrogaverat: *Quis est Theophorus?* eum respondisse: *Qui Christum habet in pectore* — *Unus enim est Deus, qui fecit coelum et terram, et mare, et omnia, quae in ipsis continentur, atque unus est Christus Jesus, Filius Dei unigenitus, cujus regno utinam potiar.* — Et iterum: *Meus Dominus et Deus Jesus Christus, primum quidem propter nos homo factus est, et propter nostram salutem, crucemque mortem et sepulturam sua sponte recepit* ²⁾. — In actis Symphorosae et septem filiorum ejus c. a. 120. respondet ipsa Hadriano: *Si pro nomine Christi, Dei mei, incensa fuero, illos daemones tuos magis exuro* ³⁾. — In actis SS. Felicitatis et filiorum ejus, a. 150. Martialis, inter hos natu minimus, sic respondet Publio: *Omnes, qui non confitentur, Christum verum esse Deum, in ignem aeternum mittentur* ⁴⁾. — In actis Achatii haec notatu digna occurrunt: *Quod discere semper optabam, (inquit praeses,) repente confessus es, errorem vestrae persuasionis et legis. Habet ergo, ut dicis, Filium Deus?* Respondit Achatius: *Habet.* Martianus ait: *Quis est filius Dei?* Respondit Achatius: *Verbum veritatis et gratiae.* Martianus ait: *Nomen explana.* S. Achatius respondet: *Jesus Christus vocatur.* Martianus ait: *Ex qua, dic, uxore conceptus est?* Respondit S. Achatius: — *Filius Dei Verbum veritatis ex Dei corde processit* ⁵⁾. — In actis Epodii ac Alexandri c. a. 178: *Sempiternum vero Dominum nostrum*

¹⁾ *De praescript.* n. 7 s. Opp. V. 1. p. 303.

²⁾ *Act. MM. sinc.* Ver. 1731. p. 14.

³⁾ n. 2. *Ib.* p. 21. c. 1.

⁴⁾ n. 3. *Ib.* p. 24.

⁵⁾ n. 4. *Ib.* p. 131. c. 1.

Jesum Christum, quem crucifixum memoras, resurrexisse non nosti, qui ineffabili mysterio homo pariter et Deus famulis suis tramitem immortalitatis instituit. — Christum cum Patre ac Spiritu S. Deum esse confiteor ¹⁾. — In actis Scillitanorum a. c. 200. S. Donata similiter ait: *Honorem Caesari reddimus, timorem autem aut cultum Christo, Deo vero praestamus* ²⁾. — In actis Pionii et sociorum MM. a. 250. *Quem Deum colis? (Polemon) respondit: Christum. Judices iterum dixerunt: Quem Deum colitis? Pionius respondit: Hunc, qui fecit coelum, etc. Tum illi: Hunc dicis, qui crucifixus est? Et Pionius: Illum dico, quem pro salute orbis Pater misit* ³⁾. — In actis SS. MM. Petri, Andreae et aliorum, a. 200. sub Decio. *Respondit Petrus: Oportet me magis Deo pivo et vero, Regi saeculorum omnium, Christo, sacrificium offerre orationis, deprecationis, compunctionis et laudis* ⁴⁾. — In actis Jacobi, Mariani, a. c. 259. *Mariani Mater: Inaestimabili Dei omnipotentis et Christi ejus in suos misericordia, qui in hoc paterna indulgentia semper operatur, ut in nos et hoc ipsum, quod Dei nostri sanguine rependi credimus, conferatur, cui gloria et imperium in saecula saeculorum, amen* ⁵⁾. — In actis Nicephori, a. c. 260. *Nos Christiani Christum Deum habemus Regem; quoniam ipse est solus verus Deus, et Creator coeli et terrae* ⁶⁾. — In actis Felicis, Presbyteri Nolani: *Credimus in Dominum nostrum Jesum Christum, — cum perfectus Deus esset, factus est simul et homo perfectus ex Virgine incarnatus* ⁷⁾. — In actis Claudii, Asteri, et Soc. a. 285.: *Deum colo et Christum ejus, qui fecit coelum et terram. — Nam dii vestri lapidei sunt, et lignei* ⁸⁾. — In actis Victoris, Alexandri et Soc. a. c. 290. Victor. *Jesum Christum verum Deum esse, publica oratione confirmans, ait: Deus permanens, homo factus apparuit. — Obedite sanctissimo, pulcherrimo justissimo, omnipotenti Creatori et amico vestro, cu-*

¹⁾ n. 5. 6. p. 65. c. 1 s.

²⁾ n. 9. 16. p. 122. 125 ...

³⁾ n. 1. p. 135. c. 1.

⁴⁾ n. 13. p. 199 s.

⁵⁾ n. 3. p. 210.

⁶⁾ n. 4. p. 216.

⁷⁾ n. 4. p. 235.

jus vos humilitas — sublimabit, paupertas dilabit, mors vivificabit ¹⁾). — In actis Maximiliani M. a. 295. *Jam habeo signum Christi Dei mei, — Dei vivi quem tu ignoras, qui passus est pro salute nostra* ²⁾). — In actis S. Felicis, Ep. et M. a. 302. *Clara voce dixit: Domine Deus coeli et terrae, Jesu Christe etc.* ³⁾). — In actis Saturnini, Dativi et Soc. a. 304. *Domine Jesu Christe, Christiani sumus, tibi servimus; tu es spes nostra. Tu es spes Christianorum, Deus sanctissime, Deus altissime, Deus omnipotens.* — In actis Eupli, Diaconi, a. 304. *Dixit Euplus: Patrem, et Filium, et Spiritum S. adoro, Sanctam Trinitatem adoro, praeter quam non est Deus. — Sacrifico modo Christo Deo me ipsum. — Dicebat semper: Gratias Christo Deo, — adoro Trinitatem inseparabilem, quae Trinitas unitas Deitatis est. Ego sacrifico, et immolo me ipsum Patri et Filio, et Spiritui S.* ⁴⁾). — In actis Vitalis et Agricolae c. a. 304. *Vitalis orationem ad Dominum fudit, dicens: Domine Jesu Christe, Salvator meus et Deus meus* ⁵⁾). — In actis Theodori, Ep. Iconii, a. c. 306 *Theodorus dixit: Mihi vero Deus est Christus* ⁶⁾). — In actis Phileas et Soc. a. 306. *Culcianus dixit: Est Deus crucifixus. Phileas respondit: Propter nostram salutem crucifixus est* ⁷⁾). — In actis Quirini, Ep. et M. a. c. 309. *Praeses dixit: Quis hac praecepit? Quirinus Episcopus respondit: Christus, qui verus est Deus, — (Ipse) semper nobiscum est; et ubicunque fuerimus, Dominus, quem colimus, subvenire potest. — Ipse est in coelo, et in terra, et in mari. Ipse est in omni loco, omnibus autem superior, quia intra se continet omnia, quoniam per ipsum cuncta facta sunt, et in ipso constant universa. — Nec vestris legibus acquiesco, quia Christi Dei mei legitima, quae fidelibus praedicari, custodio* ⁸⁾). — In actis Vincentii, a. 304. *Domini*

¹⁾ n. 2. 9. p. 257. c. 1. p. 259.

²⁾ n. 2. p. 263.

³⁾ n. 6. p. 314.

⁴⁾ n. 2. 3. Sec. confess. n. 1. p. 362.

⁵⁾ n. 1. p. 435.

⁶⁾ Or. Gregor. Nyss. n. 3. lb. p. 425.

⁷⁾ n. 2. p. 435.

⁸⁾ n. 2. 4. p. 438 s.

num Christum confiteor, Filium altissimi Patris unici unicum, ipsum cum Patre et Spiritu S. unum solum Deum profiteor ¹⁾. — In actis Eupolemi: *Patrem, et Filium, et Spiritum S. adoro, sanctam Trinitatem adoro, praeter quam non est.* — Bonosi et Maximiliani, sub Juliano Imperatore: *Bonosus dixit: Habemus Deum Patrem, et Jesum Christum, Filium ejus, et Spiritum S., per quem haec omnia superamus* ²⁾. — Quis jam est, his perfectis, qui non confiteatur, ante Synodum Nicaenam hanc communem fuisse fidem de vera supremaque Christi divinitate? Confessi sane sunt Martyres disertissimis verbis, Christum esse Deum vivum ac verum, cum Patre et Spiritu S. unum, Creatorem coeli et terrae, Conservatorem hujus universi, sanctissimum, omnipotentem, aeternum, immensum, summo cultu adorandum cum Patre et Spiritu S., hancque veritatem pro articulo fundamentalis ac characteristici fidei Christianae habent.

Hisce publicis SS. Martyrum confessionibus adjici possunt doxologiae in Ecclesia antiquissima jamjam usitatae: *Gloria Patri, et Filio, et Spiritui S.*, quam ab Apostolis originem trahere Baronius affirmat ³⁾, alii cum Socrate ⁴⁾, inventam ab Ignatio M. esse statuunt, seu *per Filium in Spiritu S.*, vel *cum Filio et S. Spiritu* ⁵⁾, quae tamen minus erant frequentatae, unde Basilius narrat, quum his formulae apud populum oraret, se propter vocum novitates in offensionem populi incurrisse, et compulsus esse, ut utramque formulam pluribus defenderet ⁶⁾, atque: *Cui (Christo) gloria cum Patre et Spiritu S. in saecula*, vel: *Cum quo gloria*

¹⁾ *a.* 5. p. 325.

²⁾ *n.* 4. p. 522. c. 2.

³⁾ *Ad a.* 325. n. 174. Col. Agripp. 1624. T. 3. c. 367.

⁴⁾ *H. E.* l. 6. c. 8. p. 272.

⁵⁾ Cf. *Can. Apost. Can.* 27. (35.) Cotel. *PP. apost.* Amstel. 1724. V. 1. p. 447. — *Const. Apost.* l. 8. c. 5—12. l. 8. c. 18—22. *Ib.* p. 305—408. 412—413. Theodoret. *H. E.* l. 2. c. 19. Opp. T. 3. p. 621. — Basili. *De Spir. S.* c. 25. Opp. T. 3. p. 49 s. c. 27. p. 54 ss. c. 29. n. 71—74. p. 59 ss. c. 7. p. 13. — Euthym. Zigab. *Panopl. P.* 2. tit. 12. c. 29. In *Biblioth. max. PP.* Lugd. T. 19. p. 140 s. — Philostorg. *H. E.* l. 3. c. 13. — Theodoret. et Evagr. *H. E.* ed. Vales. Aug. Taur. 1728. p. 448.

⁶⁾ *De Spirit. S.* c. 1. n. 3. Opp. T. 3. p. 6.

Deo et Patri, et Spiritui S. ¹⁾ Nec non monumenta publica, quae pariter communem fidem antiquae Ecclesiae in divinitatem Filii testantur. Nam in libris liturgicis, uti in Canone Missae, quem maximam partem repetimus ab aevo Apostolorum, in Liturgia S. Chrysostomi et S. Basilii Christum Dominum ubique verum Deum adpellari ac exhiberi, omnibus notum est.

Porro ipsi quoque haeretici, Judaei ac Pagani id ipsum confirmant, primaevam videlicet Ecclesiam, Christum Deum verum esse, tenuisse. Etenim sectae haeticorum aut, uti antiquissimae Nazaraeorum, Docetarum, et plerorumque Gnosticorum ²⁾, solis paucis Ebionitis, Cerintho, Theodotocoriano, Carpocrate, Paulo Samosateno et quibusdam aliis exceptis ³⁾, divinitatem Filii professae sunt, aut vero, uti posteriores, cum iis publica Apostolorum doctrina de Filio Dei, carnem induto objiceretur, non illam negabant, sed contendebant, discipulos Domini alia publice, alia secreto docuisse, quae sibi arrogabant, publicam et communem Traditionem relinquentes, aut plane impudentes asserebant, Apostolos omnia haud scivisse. ⁴⁾ — Judaei, ansam ex dogmate de divinitate Filii et mysterio SS. Trinitatis, perperam intellecto, sumentes, Christianos polytheismi ac idololatriae insimulabant, atque una cum Paganis eos exagitabant, quod dicere solerent, Deum hominum salutis causa in hunc mundum venisse, contententes, ex Christianorum doctrina de Incarnatione sequi, Deum esse mutatum, praeexistisse Deum ante saecula Christum, ac deinde etiam nasci hominem factum sustinuisse, nec hominem ex hominibus esse, id non solum ab opinione abhorrens esse, sed etiam stultum ⁵⁾.

¹⁾ Smyrn. *Eccles. Epist. de mart. S. Polycarp. n. 24. 22. 14. Co-teler. PP. apost. Amstel. 1724. V. 2. p. 204. 201.* — Ruinart. *Act. MM. Ignat. n. 6. Ver. 1731. p. 19. Felicit. etc. n. 1. p. 22. Scyllitan. n. 5. p. 75. Perpet. Felicit. etc. n. 21. p. 81.*

²⁾ Cf. Le Quien, *Dissert. Damasc. Diss. 7. Opp. J. Damascen. T. 1. p. CXX ss.*

³⁾ Cf. Iren. *Cont. haer. l. 3. c. 16. p. 204 ss.* — Origen. *In Joan. l. 10. n. 4. Opp. T. 4. p. 165.* — Pamphil. *Apolog. Orig. In Galland. Bibl. PP. T. 4. p. 23.* — Novatian. *De Trinit. Ib. T. 3. p. 306.* — Tertull. *Adv. Marcion. Opp. V. 2. p. 146 ss.*

⁴⁾ Cf. Iren. *Cont. haer. l. 3. c. 2. n. 1—2. p. 174 ss.* — Tertullian. *De praescript. n. 22. Opp. V. 1. p. 310 s.*

⁵⁾ Cf. Origen. *Cont. Cels. l. 4. n. 7. 8. 14. Opp. T. 1. p. 506. 510.* —

Ex quo adparet, agi hic de re exploratissima. Si his addantur, quae Plinius ad Trajanum ¹⁾, et Hadrianus ad Servianum, Alexandrinis exprobrans, ab aliis Serapidem, ab aliis adorari Jesum Christum, scribunt, nec non, quae habent Lucianus ²⁾, Christianos irridens, quod Christum Deo loco colant, et Julianus, qui fidem in Christum, atque ejus adorationem Christianis tanquam crimen objicit ³⁾: factum istud evidentissimum redditur, quod nunquam evertent adversarii.

Denique quid Ecclesia docens, cujus est judicare de veritate revelata, senserit, credendumque esse tenuerit, luculenter cognoscitur ex ejus agendi ratione cum iis, qui contrariam doctrinam proponere ausi sunt. Nam quam primum novatores aliqui impugnare adgressi sunt divinitatem Filii, Ecclesia illico eos damnavit, atque e sinu suo expulit. Ita se gessit adversus Ebionitas, qui Christi seu Filii divinitatem negarunt ⁴⁾, ita adversus Artemonem ac Paulum Samosatenum, eadem impietate obstrictos ⁵⁾, ita et postea adversus Arium. Etenim ut primum saec. IV. ineunte hic haeresiarcha caput erexisset, et falsae dogmata adversus doctrinam de Filii divinitate spargere coepisset: doctrinae novitas omnium Christianorum offendit animos, et ipse tanquam impius novator ac haereticus accusatus, communique suffragio in Synodo Alexandrina a. 318 (321.) condemnatus est, et ab Ecclesia, quae, uti loquitur Alexander, Episcopus Alexandrinus, *Christi divinitatem adorat*, ejectus ⁶⁾. Quoniam tamen vir turbulentus disseminare latius impiam doctrinam, incautos seducere, ac turbas movere non destitit, ad finiendam controversiam, quam excitaverat, a. 325. Nicaeae in Bythynia primum oecumenicum convocatum est Concilium, 318 Episcopis celebre, qui Arii impietatem et amentiam, atque *verbis blasphemiae plena*, uti in epistola Synodica loquuntur, ne audire quidem patienter sustinuerunt, solenni judicio *ὡς ὁμοουσίαν*, se consubstantialitatem Filii cum Patre definierant,

Justin. M. *Dial. c. Tryph. n. 68.* Opp. p. 173. — Arnob. *Adv. gent.* l. n. 36 ss. p. 21 ss.

¹⁾ l. 10. *epist.* 97.

²⁾ *De mort. Peregrin. c. 11, et 13.*

³⁾ Ap. Cyrill. Alex. *Cont. Julian. l. 6.* Opp. T. 6. P. 2. p. 193. Cf. l. 10. p. 327. 335.

⁴⁾ Euseb. *H. E. l. 3. c. 27.* ed. Zimmerm. L. 1622. p. 187 a.

⁵⁾ Euseb. *H. E. l. 5. c. 28.* p. 375.

⁶⁾ Theodoret. *H. E. l. c. 3.* Opp. T. 3. p. 526. B.

atque unanimi consensu, quinque tantum Episcopis contra sentientibus, Symbolum ita concinnatum publice, ingenti totius Ecclesiae approbatione, promulgarunt: *Credimus in unum Deum, Patrem omnipotentem, omnium visibilibus et invisibilibus factorem. Et in unum Dominum Jesum Christum, Filium Dei, ex Patre natum, unigenitum, id est ex substantia Patris; Deum ex Deo, lumen ex lumine, Deum verum et Deo vero; natum (genitum γεννητόν), non factum, consubstantiali Patri (ὁμοούσιον τῷ πατρί), per quem omnia facta sunt, etc.* In fine autem ita concludunt: *Eos autem, qui dicunt: Erat tempus, quando non erat, et antequam nasceretur, non erat, et quia ex his, quae non sunt (ἐξ οὐκ ὄντων), factus est; aut ex alia substantia vel essentia dicunt esse, vel creatum esse, vel mutabilem, vel convertibilem (εἰσπτόν) Filium Dei; anathematizat Cath. et Apost. Ecclesia¹⁾.* — Sylvester autem R. P. Romae cum 275 Episcopis Synodum celebrans ita decrevit: *Quidquid in Nicæa Bythiniae constitutum est ad robur S. matris Ecclesiae Catholicae et Apostolicae a sanctis Sacerdotibus 318, nostro ore conformiter confirmamus. Omnes, qui ausi fuerint, dissolvere definitionem sancti et magni Concilii, quod apud Nicæam congregatum est sub praesentia piissimi et venerandi principis Constantini Augusti, anathematizamus²⁾.*

Accedunt antiqua in singulis Ecclesiis particularibus usitata symbola, quae omnia, tum in Oriente, tum in Occidente, habent articulum hunc: *Credo in Christum Jesum, unicum Filium ejus, Dominum nostrum, vel: Filium ejus unigenitum sempiternum³⁾.*

¹⁾ Conc. Nic. I. In Mansi Coll. Conc. T. 2. c. 666 s.

²⁾ Ib. T. 2. c. 1081.

³⁾ Cf. Hahn, *Bibliothek der Symbole u. Glaubensregeln der apost. kathol. Kirche*. Bresl. 1842. Cf. Theodoret. *H. E. l. 1. c. 11*. Opp. T. 3. p. 553. Sozrat. *H. E. l. 1. c. 8*. p. 16 ss.

A r t i c u l u s III.

De Spiritu S. vero Deo, Patri et Filio consubstantiali.

§. 43. Ingressio.

Patri et Filio Scriptura adjungit Spiritum S., quem pariter Deum verum esse, uterque revelationis divinae fons clamat.

Ariani, qui divinitatem Filii impugnarunt, de divinitate quoque Spiritus S., qui de eo, quod Filii est, accipit, atque a Filio mittitur, orthodoxe sentire non poterant; attamen primus, qui post obscuros quosdam haereticos, ut meminit Ignatius ¹⁾, publicus insurrexit divinitatis Spiritus S. hostis et impugnator, erat Macedonius, e secta Arianorum, sub Imperatore Constantio Praesul Constantinopolitanus intrusus. Hic nempe docuit, Spiritum S. esse a Filio procreatum, ac proinde natura et dignitate longe inferiorem, Patris et Filii servum ac ministrum, cultu divino haud proseguendum ²⁾.

Πνευματομάχοις hisce accensendi quoque sunt recentiores Sociniani, qui tamen non directe divinitatem Spiritus S. aggrediuntur, sed ejus *ὑπόστασις*, contendentes, illum non esse personam subsistentem, verum nonnisi Dei virtutem, seu vim et efficaciam ³⁾. Quam impietatem instaurarunt Rationalistae recentissimi, asserentes, nullibi in SS. Litteris *ὑπόστασις* Spiritui S. tribui.

§. 44. Probatur divinitas Spiritus S.: A. Ex SS. Litteris.

Spiritus S. seu *Spiritus Dei*, *πνεῦμα ἅγιον*, seu *πνεῦμα θεοῦ*, et *רוּחַ יְהוָה* seu *רוּחַ אֱלֹהִים* non raro in SS. Litteris divinitatem ipsam ⁴⁾, aut virtutem divinam significat, nec non interdum rem extraordinariam, a Deo seu Spiritu divino imme-

¹⁾ *Epist. ad Trallian. n. 6. Coteler. PP. apost. Amstel 1724. V. 2. p. 62.*

²⁾ Cf. Augustin. *Haer. 52. Opp. T. 8. c. 18. — Theodoret. H. E. l. 2. c. 5. Opp. T. 3. p. 587 s. — Haer. fab. l. 4. c. 5. T. 2. p. 238. — Gregor Naz. Or. 44. Opp. T. 1. c. 629. C. — Epiphan. Haer. 73. et 74. Opp. T. 1. p. 845 s. et 886 s. — Cassian. De Incarn. l. 1. c. 2. p. 963. c. 2. — Philostorg. Haer. 58. In Galland. Bibl. PP. T. 1. p. 494.*

³⁾ Cf. *Catech. Cracov. q. 271. II. fol. 652. c. 2.*

⁴⁾ Cf. Gen. 1, 2. Is. 40, 13. Ps. 138, 7.

diate effectam, uti sapientiam ¹⁾, animi fortitudinem ²⁾, robur ³⁾, *ἰσχυροσυναγωγή* ⁴⁾. Attamen in plerisque, praecipue N. T. locis Spiritus S. seu Spiritus Dei eodem prorsus modo, ut *Λόγος* vivus ac per se subsistens exhibetur, ita ut non sit neque virtus, neque effectus, sed suppositum operans, a Patre et Filio distinctum, cujus propria est sanctificatio et communio ⁵⁾. Interim vero hic loci non tam de Spiritu S. personali subsistentia, quam de eo agitur, Spiritum S., quatenus tanquam per se subsistens Patri et Filio opponitur, esse verum Deum, Patri et Filio consubstantialem, ejusdemque cum Patre et Filio majestatis et dignitatis.

Spiritum S. Deum verum esse, ex SS. Litteris sequentibus argumentis probatur. Et quidem

1. id jam ex verbis Christi clare colligitur, quibus Apostolos in universum orbem ablegavit, ad omnes gentes doctrinam suam edocendas, et per Baptismum in Ecclesiam adscribendas, atque ait: *Euntes docete omnes gentes, baptizantes eos in nomine Patris, et Filii, et Spiritus S.* ⁶⁾. Nam primo in hoc loco Spiritus S. cum Patre et Filio nominatur, et in unum velut honoris ac dignitatis consortium adjungitur, quod nefas foret, siquidem creatura esset Spiritus S.. Deinde baptizare ex doctrina S. Scripturae in nomine Patris idem est, ac cultui religioso Patris initiare ⁷⁾, simulque autem ejus gratia ac virtute a peccatis abluere seu regenerare ⁸⁾. Quum autem jubeamur a Christo Domino aequae in nomine Filii et Spiritus S., ac Patris baptizari: pari modo, prout Patris, ita et Filii ac Spiritus S. cultui divino per Baptismum mancipamur, atque virtute Filii et Spiritus S. non minus ac Patris abluimur et renascimur; et hinc, cum religio nonnisi Deo possit exhiberi, et spiritalis hominis regeneratio nonnisi divina virtute ac gratia possit

¹⁾ Exod. 31, 3.

²⁾ Jud. 6, 34.

³⁾ Jud. 14, 6. 19. 16, 14.

⁴⁾ Matth. 12, 28. coll. Luc. 11, 20.

⁵⁾ Matth. 28, 19. Joan. 14, 16. 17. 26. 15, 26. 16, 7. 8. 13—15. 1. Cor. 12, 4—6. 7—11. 2. Cor. 13, 13. 1. Thess. 2, 12. Ephes. 4, 30. 1. Petr. 1, 2. Matth. 3, 16. Marc. 1, 10 s. Luc. 3, 22. Joan. 1, 32. 33. Act. 2, 3. 4.

⁶⁾ Matth. 28, 19.

⁷⁾ Significat quidem illud: *in nomine alicujus baptizare*, etiam ad profitendam traditam ab illo fidei doctrinam obstringere, ut Act. 19, 4. 1. Cor. 1, 13. 10, 2; quam significationem tamen in loco nostro materia substrata respuit.

⁸⁾ Cf. Joan. 3, 5—6. Rom. 5, 5. 1. Cor. 6, 11. 12, 13. 2. Thess. 2, 12. Tit. 3, 5—7.

perfici, Filius et Spiritus S. pariter ac Pater Deus sint necesse est. Coniunguntur ergo cum Patre Filius et Spiritus S., ut ostendatur, eos aequae ad substantiam divinam pertinere, atque ad gratiam regenerationis efficiendam necessarium esse eorum consortium ¹⁾. — Huc quoque pertinet alter locus, ubi idem Salvator ait: *Cum autem venerit Paracletus, quem ego mittam vobis a Patre, Spiritum veritatis, qui a Patre procedit, ille testimonium perhibebit de me* ²⁾. Quibus pari modo Spiritus sancti cum Patre unitas quoad essentiam ac identitas declaratur, cum Spiritus S. dicatur a Patre procedere, uti Filius exire a Patre dicitur, ita ut non possit esse factus aut creatus, sed emanans.

2. Alterum argumentum pro divinitate Spiritus S. atque ejus cum Patre et Filio *ὁμοουσία* inde deducitur, quia ei adscribuntur attributa divina, nominatim sapientia et scientia infinita; quod necessario naturam divinam, adeoque cum Patre et Filio identitatem arguit. *Nobis autem*, ait Apostolus, *revelavit Deus per Spiritum suum, Spiritus enim scrutatur*, i. e. novit perfectissime omnia ³⁾, *etiam profunda Dei. Quis enim hominum scit, quae sunt hominis, nisi spiritus hominis, qui in ipso est? Ita et, quae Dei sunt, nemo cognoscit, nisi Spiritus Dei* ⁴⁾. Quibus perfecta Dei entis infiniti ejusque consiliorum notitia Spiritui S. tribuitur, quae solummodo in Deum cadit. Etenim, ut bene jam adnotat Paschasius, seu quicumque auctor est operis *De Spiritu S.*, ei a S. Gregorio M. adscripti, *de solo Deo legimus: „Qui solus nosti corda hominum.“ Et iterum: „Ipse enim novit occulta cognoscere“, et hoc si divinitatis est proprium, quanto magis scrutari profunda Dei summi in persona Spiritus S., majesticis insigne est* ⁵⁾. Quapropter et Spiritus S. verita-

¹⁾ Cf. Basil. *Cont. Eunom.* l. 5. c. 3. Opp. T. 1. p. 299. — Athanas. *Epist. 1. ad Serap.* n. 11. Opp. T. 1. P. 2. p. 660. *Epist. 3. ad Serap.* n. 6. p. 695. — Didym. *De Spirit. S.* n. 23. In Galland. *Biblioth. PP.* T. 6. p. 272. — Gregor. Naz. *Carm. 3. Arc.* Opp. T. 2. c. 140. — Isidor. Pelusiot. l. 1. *Epist.* 109. p. 22. c. 2.

²⁾ Joan. 15, 26.

³⁾ Cf. Ps. 7, 10.

⁴⁾ 1. Cor. 2, 10—11. Cf. Matth. 11, 27.

⁵⁾ *De Spir. S.* l. 2. c. 1. *Bibl. maz. PP.* Lugd. T. 8. p. 813. F. Cf. Athanas. *Epist. 1. ad Serap.* n. 19. Opp. T. 1. P. 2. p. 667. — Epiphani. *Anach. n. 12.* Opp. T. 2. p. 17. — Cyrillus Alex. *Theol. Assert.* 33. T. 5. P. 1. p. 333 s. — Theodoret. *Haer. fab.* l. 5. c. 3. Opp. T. 4.

ipsa ¹⁾, atque auctor omnis veritatis ac sapientiae ²⁾ praedicatur.

3. Tertio probatur Spiritus S. divina majestas et cum Patre et Filio ejusdem communio substantiae ex operibus et illarum rerum efficientia, quas cum solus Deus praestare possit: eae tamen Spiritui S. proprie ac velut auctori tribuuntur, vel non minus illi, quam Patri et Filio. *Quorum aulem, ut ait Didymus, una est operatio, una est et substantia* ³⁾. Spiritui S. enim vindicatur

a. Legatorum divinatorum eorumque scriptorum inspiratio. *Cum autem, ait Christus ad Apostolos, venerit ille Spiritus veritatis, docebit vos omnem veritatem. Et quae ventura sunt, annuntiabit vobis* ⁴⁾. Atque Apostolus: *Non enim, inquit, voluntate humana allata est aliquando prophetia Scripturae: sed Spiritu S. inspirati locuti sunt sancti Dei homines* ⁵⁾.

b. Spiritui S. assignatur porro hominis justificatio ac sanctificatio. *Nisi quis, ait Christus ad Nicodemum, renatus fuerit ex aqua, et Spiritu S., non potest introire in regnum Dei. Quod natum est ex carne, caro est: et quod natum est ex Spiritu, spiritus est* ⁶⁾. Paulus: *Et haec (magni peccatores) quidem fuistis: sed abluti estis, sed sanctificati estis, sed justificati estis in nomine Domini nostri Jesu Christi, et in Spiritu Dei nostri* ⁷⁾. Et iterum: *Nos autem debemus gratias agere Deo semper pro vobis, fratres dilecti Deo, quod elegerit vos Deus primitias in salutem in sanctificatione Spiritus, et in fide veritatis,*

p. 258. — Ambros. *De Spir. S. l. 2. c. 12.* Opp. T. 2. c. 658 bb. — Jdac. *Adv. Varim. Bibl. max. PP. Lugd. T. 5. p. 749. D. 3.* — Fulgent. *Epist. 14. n. 9.* Opp. p. 235.

¹⁾ 1. Joan. 3, 6.

²⁾ Joan. 15, 26. 14, 17.

³⁾ *De Spir. S. n. 17.* In Galland. *Bibl. PP. T. 6. p. 270.* Cf. Basil. *Epist. 139. ad Eustath. n. 7.* Opp. T. 3. p. 280. — Gregor. Nyss. *De Trinit. Opp. Par. 1615. T. 2. p. 943. C. D.* — Cyrill. Alex. *Thes. Assert. 33.* Opp. T. 5. P. 1. p. 338.

⁴⁾ Joan. 16, 13. Cf. Matth. 10, 20. Luc. 10, 20.

⁵⁾ 2. Petr. 1, 21. Cf. Matth. 22, 43. Act. 1, 8. 13. 4, 8. 25 a. 31. 8, 29. 10, 19—20. 11, 12. 23. 13, 2. 16, 6—7. 20, 23. 21, 4. 11. 23, 25—26. 1. Tim. 4, 1. Hebr. 9, 8. 10, 15. 1. Petr. 1, 12. Apoc. 2, 7. 4, 2. 13, 13. 17, 3. 21, 10.

⁶⁾ Joan. 3, 5—6.

⁷⁾ 1. Cor. 6, 11.

(sanctificatione per Spiritum accepta, et obsequio verae doctrinae praestito) ¹⁾. Atque Petrus: *Electis — secundum prae-scientiam Dei Patris* (pro decreto Dei Patris), *in sanctificationem Spiritus, in obedientiam et aspersionem Jesu Christi: gratia vobis, et pax multiplicetur* ²⁾. Propterea et dicitur *charitas Dei diffusa esse in cordibus nostris per Spiritum S.* ³⁾, ipseque *datus nobis* ⁴⁾, habitare in nobis ⁵⁾, effusus abunde in nos ⁶⁾, qui *postulat pro nobis gemitibus inenarrabilibus*, i. e. vices nostras quasi agit, suspiria tacita in nobis excitando ⁷⁾. Ipse est porro, qui illuminat, atque in bono faciendo adjuvat, ita ut nemo Dominum Jesum possit profiteri, nisi a Spiritu S. adjutus ⁸⁾, Ecclesiamque regit ac gubernat ⁹⁾. Deinde.

c. Spiritus S. non tantum effectus extraordinarios, in mundo sensibili, qui nonnisi divina fieri possunt potentia, producit ¹⁰⁾, sed et facultatem, illos edendi hominibus concedit. *Alii quidem, scribit Paulus, per Spiritum datur sermo sapientiae: alii autem sermo scientiae secundum* (per) *eundem Spiritum: alii fides in eodem Spiritu: alii gratia sanilatum in uno Spiritu: alii operatio virtutum, alii prophetia, alii discretio spirituum, alii genera linguarum, alii interpretatio sermonum. Haec autem omnia operatur unus, atque idem Spiritus, dividens sin-*

¹⁾ 2. Thess. 2, 12.

²⁾ 1. Petr. 1, 2.

³⁾ Rom. 5, 5.

⁴⁾ Ib.

⁵⁾ Rom. 8, 9 ss.

⁶⁾ Tit. 3, 5. 6.

⁷⁾ Rom. 8, 26. Cf. Matth. 10, 20.

⁸⁾ 1. Cor. 12, 3. Cf. Act. 8, 17. 19, 6. 5, 32. 6, 3. 7, 55. 10, 45. 15, 28. Joan. 14, 16—17. Rom. 15, 13. 16. 1. Cor. 2, 12. Gal. 5, 22. Ephes. 1, 13. 2, 22. 5, 18. 4, 30. 2. Cor. 1, 21 ss. — Athanas. *Epist. 1. ad Sempron.* n. 19—24. Opp. T. 1. P. 2. p. 667 ss. — Cyrill. Alex. *Thes. Assert. 34.* Opp. T. 5. P. 1. p. 353 ss. — Didym. *De Spir. S. l. 1. n. 4. ss.* In Gal-land. *Bibl. PP.* T. 6. p. 264 ss. — Ambros. *De Spir. S. l. 1. c. 6.* Opp. T. 2. c. 616. — J d a c. *Ad Varim.* In *Bibl. max. PP.* Lugd. T. 5. p. 747.

⁹⁾ Act. 20, 28. 13, 2. Cf. Epiphani. *Haer. 74. n. 5.* Opp. T. 1. p. 892.

¹⁰⁾ Rom. 8, 11. Luc. 1, 35. Matth. 1, 20. Cf. Augustin. *Cont. Masi-* min. l. 2. c. 17. n. 2. Opp. T. 8. c. 715 s. — Cyrill. Alex. *Thes. Assert. 34.* Opp. T. 5. P. 1. p. 343. — J d a c. l. c. p. 749.

gulis, prout vult ¹⁾). Ubi Spiritus S. Domino, cui *divisiones ministrationum*, atque Deo, i. e. Patri, cui *divisiones operationum* tribuuntur, opponitur, ideoque ei par cum Patre et Filio dignitas et auctoritas vindicatur, et ipse dona illa pro liberrima voluntate distribuere dicitur, quae, uti inspiratio atque sanctificatio ²⁾, manifeste a solo Deo repeti possunt. Quapropter et quae hoc respectu per Spiritum S. dicta aut facta commemorantur, alibi Deo assignantur ³⁾).

4. Quartum argumentum, Spiritum S. verum esse Deum, atque unius ejusdemque propterea cum Patre et Filio substantiae, nobis praebent ea S. Scripturae loca, in quibus ipse expresse Deus nominatur. Huc prae omnibus pertinent verba, quibus Petrus Ananiam affatus ait: *Cur tentavit satanas cor tuum, mentiri te Spiritui S., et fraudare de pretio agri? Nonne manens tibi manebat, et venundatum in tua erat potestate? Quare posuisti in corde tuo hanc rem? Non es mentitus hominibus, sed Deo* ⁴⁾. Eundem ergo, quem antea Spiritum Petrus dixerat, tum Deum adpellat. — Verum huc illa quoque loca spectant, ubi fideles a Paulo modo *templum Spiritus S.*, modo *templum Dei* vocantur. *Nescitis, quia templum Dei estis, et Spiritus Dei habitat in vobis* ⁵⁾. — *An nescitis, quoniam membra vestra templum sunt Spiritus S., qui in vobis est, quem habetis a Deo; et non estis vestri? Eml enim estis pretio magno. Glorificate, et portate Deum in corpore vestro* ⁶⁾. Hinc quoque Spiritus S.,

¹⁾ 1. Cor. 12, 8—11. Cf. Cereal. Adv. Maximin. c. 14. In Bibl. max. PP. Lugd. T. 8. p. 673. — Paschas. De Spir. S. l. 1. c. 9. Ib. p. 810 s.

²⁾ Cf. Athanas. Epist. 1. ad Serap. n. 22—23. Opp. T. 1. P. 2. p. 671. — Cyrill. Alex. De Trinit. Dial. 7. Opp. T. 5. P. 1. p. 617. 667. C. Argum. etc. T. 2. p. 329. c. 1. p. 330. c. 2. E. — Thes. Assert. 34. T. 5. P. 1. p. 359. — Augustin. Cont. serm. Arian. c. 32. n. 30. Opp. T. 8. c. 645. — Paschas. De Spir. S. l. 1. c. 11. In Bibl. max. PP. Lugd. T. 8. p. 812. l. 2. c. 7. p. 816 s. — Theodoret. Haer. fab. l. 5. c. 3. Opp. T. 4. p. 258.

³⁾ Hebr. 3, 7—9. coll. Ps. 94, 7—8. Act. 28, 25. coll. Is. 6, 9. Cf. Hebr. 1, 1. coll. Act. 4, 25. Exod. 4, 12. Act. 3, 18. 21. 2. Tim. 3, 16. — Gregor. Nysa. Cont. Eunom. l. 1. Opp. Par. 1615. T. 2. p. 60. — Basil. Cont. Eunom. l. 5. c. 4. Opp. T. 1. p. 300. — Jdac. Ad Varim. l. c. p. 745 ss. — Cyrill. Alex. Capit. argum. de Spir. S. etc. Opp. T. 5. P. 1. p. 680 ss.

⁴⁾ Act. 5, 3—4.

⁵⁾ 1. Cor. 3, 16.

⁶⁾ 1. Cor. 6, 16. Rom. 8, 9—11. 2. Cor. 6, 16. — Athanas. Epist. ad Serap. n. 24. Opp. T. 1. P. 2. p. 672. Epist. 3. ad Serap. n. 3. Ib. p. 692 s.

quoniam verus est Deus, *παράκλητος* Christi, adeoque ei par et aequalis declaratur, et Sanctus *καὶ ἁγιός*, utpote cui sanctitas est propria, et *οὐκ αἰσθητός*, non accedens et naturae adjuncta, cognominatur ¹⁾.

5. Ultimam tandem argumentum pro divinitate Spiritus S. ejusque eadem cum Patre et Filio maiestate nobis praesto est in cultu laetiae, uti dicitur, qui ei aequae ac Patri et Filio assignatur. Id in mandato illo obtineret, quo jubet Christus Dominus omnes gentes in nomine Patris, et Filii, et Spiritus S. baptizari, supra ostendimus. Id ipsum autem et fit formulis illis, quibus Apostoli fidelibus gratiam, uti a Patre et Filio, ita et a Spiritu S. precantur. *Gratia*, ait Paulus, *Domini nostri Jesu Christi, charitas Dei, et communicatio Spiritus S., sit cum omnibus vobis* ²⁾.

Quibus expositis concludimus cum Fulgentio, Ruspensi Episcopo, ob strenuam Chatholicae fidei contra Arianos defensionem his in exilium ejecto († a. 533.): *Dicitur igitur, ait ipse, si coelorum virtutem potuit firmare, qui non est Deus? et potest vivificare, qui non est Deus? si potest in Baptismatis regeneratione sanctificare, qui non est Deus? si potest charitatem tribuere, qui non est Deus? si potest in credentibus habitare, qui non est Deus? si potest templum membra Christi habere, qui non est Deus? et digne Spiritus S. negabitur Deus. Rursus dicitur, si ea, quae digne Spiritu S. commemorata sunt, potest aliqua creatura facere? et digne Spiritus S. dicetur creatura. Si autem haec creatura possibilis nunquam fuerunt, et inveniuntur in Spiritu S., quae tamen soli compellunt Deo: non debemus naturaliter diversum a Patre Filioque dicere, quem in operum potentia diversum non possumus invenire — ac si ex unitate operis unitas est agnoscenda virtutis; nec quisquam dubitet, Patrem e*

De comm. essent. P. et F. et Sp. S. n. 9. T. 2. p. 6. etc. — Didymus De Spir. S. n. 25. 40. In Galland. Bibl. PP. T. 6. p. 272. 276. — Eusebius De Spir. S. c. 21. Opp. T. 3. p. 46. Adv. Eunom. l. 9. n. 5. T. 1. p. 210. D. — Cyrill. Alex. Thes. Assert. 32. Opp. T. 5. P. 1. p. 337. In Joann. 14, 18. T. 4. p. 813. — Theodoret. Haer. fab. l. 5. c. 3. Opp. T. 1. p. 260.

¹⁾ Cf. Basill. Adv. Eunom. l. 5. c. 1. et ult. n. 2. Opp. T. 1. p. 300. 321 a. — Cyrill. Alex. Thes. Assert. 34. Opp. T. 5. P. 1. p. 351. D. Trinit. Dial. 7. lb. p. 658. Cap. argum. etc. lb. p. 665. D. E.

²⁾ 1. Cor. 13, 13. Cf. Athanas. Epist. 3. ad Serap. n. 9. Opp. T. 1. P. 2. p. 604 a. — Cyrill. Alex. Thes. Ass. 34. T. 5. P. 1. p. 338 a.

Filium, et Spiritum S., personarum Trinitate servata, unum Deum naturaliter dicere; qui potuit universam sola voluntate condere; qui cuncta potest virtutis omnipotentia gubernare; qui omnia potest immensitate divinitatis implere¹⁾.

Observe. Obmovent quidem adversarii Spiritus S. saepius nullam fieri mentionem, ubi Pater et Filius dominantur. — Attamen, licet Spiritus S. saepius reticeatur, nullibi tamen negatur; atque etiam Filius saepius commemoratur, quin Patris fiat mentio; an inde consequitur, Deum Patrem non dari? — Verba autem Pauli: *Ipsae Spiritus postulat pro nobis gemitibus inenarrabilibus*²⁾, tam parum divinitati Spiritus S. obstant, ut potius, quum sensus illorum sit, contextu orationis postulante, Spiritum in nobis efficere, ut veras preces ad Deum fundamus, argumentum pro ea contineant; nam nemo, nisi Deus precum genuinarum spiritum in nobis potest excitare³⁾. — Ad illud autem, quod pariter obijciunt, de Spiritu S. legi videlicet: *Non loquetur a semetipso, sed quaecunque audiet loquetur*⁴⁾, atque ipsum modo a Patre, modo a Filio mitti⁵⁾, jam respondit Augustinus, qui quoad prius ait: *Non loquetur a semetipso: quia non est a semetipso. Sed quaecunque audit, loquetur: ab illo audit, a quo procedit. Audire illi scire est: scire vero esse. Quia ergo non est a semetipso, sed ab illo, a quo procedit, a quo illi est essentia, ab illo scientia; ab illo igitur audientia, quod nihil aliud est, quem scientia*⁶⁾. Quoad posterius autem: *Si ergo missus dicitur (Filius), in quantum adparuit foris in creatura corporali, qui intus in natura spiritali oculis mortalium semper occultus est, jam in promptu est intelligere de Spiritu S., cur missus et ipse dicatur. Facta est enim quaedam creaturae species ex lumine, in qua visibiliter ostenderetur Spiritus S. — Haec operatio visibiliter expressa, et oculis oblata mortalibus missio Spiritus S. dicta est*⁷⁾.

¹⁾ Ad. Transm. l. 3. c. 35. Opp. p. 143. Cf. Chrysostom. Hom. 2. de Pentec. Opp. T. 2. p. 468 ss.

²⁾ Rom. 8, 26, s. c.

³⁾ Cf. Augustin. De don. persev. c. 23, n. 64. Opp. T. 10. c. 846.

⁴⁾ Joan. 16, 13.

⁵⁾ Joan. 15, 16, 26, 16, 7.

⁶⁾ Tract. 99. in Joan. n. 4. Opp. T. 3. P. 2. c. 746.

⁷⁾ De Trinit. l. 2. n. 10. T. 8. c. 777. Cf. Ambros. De Spir. S. l. 3. c. 1. n. 7—8. Opp. T. 2. c. 666.

§. 45. B. Ex Traditione.

Quemadmodum SS. Patres disertos testes divinitatis Filii vidimus, ita quoque eos strenuos assertores divinitatis Spiritus S. deprehendimus. Ex magna autem testimoniorum copia tantum principaliora seligimus. Ignatius scribit, ut Clementem Rom. silentio praetereamus ¹⁾: *Studele igitur, ut confirmemini in dogmatibus Domini et Apostolorum, ut omnia, quae facitis, prospere vobis succedant, carne et spiritu, fide et charitate, in Filio et Patre et Spiritu S. — Subjecti este Episcopo et vobis mutuo, ut Jesus Christus Patri, secundum carnem, et Apostoli Christo et Patri et Spiritui ²⁾. — Polycarpus, qui precationem, quam in rogo ligatus dixerat, ita claudit: Quapropter de omnibus laudo te, benedico te, glorifico te, cum sempiterno et coelesti Jesu Christo, dilecto tuo Filio; cum quo tibi et Spiritui S. gloria, et nunc et in futura saecula. Amen ³⁾. Quibus verbis quoque Smyrnensis Ecclesia suam de martyrio hujus Episcopi finit epistolam: Valere, ait, vos optamus, fratres; ac incedere in evangelico sermone Jesu Christi; cum quo gloria Deo et Patri, et Spiritui S. ob sanctorum electorum salutem ⁴⁾. Justinus l. s. c.: Quis igitur sanae mentis homo non fateatur, atheos nequaquam nos esse, qui opifcem hujusce universitatis colimus. — Nostrum autem harum rerum doctorem, natum ad hoc munus Jesum Christum ac sub Pontio Pilato, Judaeae temporibus Tiberii Caesaris praeside, crucifixum, veri Dei Filium esse, edocti, ipsumque secundo loco, Spiritum autem propheticum tertio habentes ordine, non sine ratione a nobis coli demonstrabimus ⁵⁾. — Et: Super eo, qui regenerari voluerit, et peccatorum poenitentiam egerit, parentis omnium et Domini Dei nomen pronuntiatur. — Sed et in nomine Jesu Christi sub Pontio Pilato crucifixi, et in nomine Spiritus S., qui per Prophetas omnia ad Jesum spectantia praenuntiavit, is, qui illuminatur, abluitur ⁶⁾. — Athenagoras: Quis igitur non miretur, cum atheos vocari audiat eos, qui Deum Patrem, et Filium*

¹⁾ 1. Cor. n. 46. Coteler. PP. apost. Amstel. 1724. V. 1. p. 174.

²⁾ Epist. ad Magnes. n. 13. Ib. V. 2. p. 21. Cf. Epist. ad Ephes. n. 9. 18. p. 47. 51.

³⁾ Eccles. Smyrn. Epist. de mart. S. Polycarp. n. 14, Ib. p. 201.

⁴⁾ Ib. n. 22. p. 204.

⁵⁾ Apol. I. n. 13. Opp. p. 51.

⁶⁾ Ib. n. 61. p. 82. E.

Deum et Spiritum S. asserunt, ac eorum et in unione potentiam (δύναμις) et in ordine distinctionem demonstrant ¹⁾. — Theophilus, primus τοῖς ἀδελφοῖς, Trinitatis, nomine usus, Triadem vocat Deum, et Verbum ejus, et Sapientiam ejus, i. e. Spiritum S. *Tres illi dies, ait, qui ante luminaria fuerunt, imago sunt Trinitatis, Dei, ejus Verbi, ejusque Sapientiae* ²⁾. — Irenaeus: *Etenim Ecclesia, tametsi per universum orbem usque ad extremos terrae fines dispersa, fidem eam ab Apostolis eorumque discipulis acceptam, quae est in unum Deum Patrem omnipotentem; — et in unum Jesum Christum, Filium Dei, nostrae salutis causa incarnatum; et in Spiritum S., qui per Prophetas Dei dispensationes, et adventus praedicavit etc.* ³⁾. Et infra: *Adest ei (Deo) semper Verbum et Sapientia, Filius et Spiritus, per quos, et in quibus omnia libere et sponte fecit* ⁴⁾. — Clemens Alex.: *O miraculum mysticum! Unus quidem est universorum Pater. Unum est etiam Verbum universorum, et Spiritus S. unus, et ipse est ubique* ⁵⁾. — Uberius idem disputat de mysterio SS. Trinitatis in multis Stromatum locis, cujus scilicet operis finis praecipuus est, iis, qui jam rudimenta doctrinae Christianae edocti sunt, adcuratorem ejus subministrare cognitionem ⁶⁾. — Origenes de Spiritu S. ait: *Ita sanctus est, ut non sit sanctificatus. Non enim ei extrinsecus et aliunde accessit sanctificatio, quae ante non fuerat, sed semper est sanctus, nec initium sanctitatis accepit. Similique modo de Patre et Filio intelligendum est. Sola enim Trinitatis substantia est, quae non extrinsecus accepta sanctificatione, sed sui natura sit sancta. Omnis vero creatura vel dignatione S. Spiritus, vel meritorum ratione sanctificata sancta vocatur* ⁷⁾. — Alius a Patre Filius, et non idem Filius, qui et Pater. — Alius et ipse (Spiritus S.) est a Patre et Filio. Est ergo haec trium distinctio personarum in Patre et Filio et Spiritu S., quae ad pluralem puteorum numerum revocatur. Sed horum puteorum unus est fons. Una enim sub-

¹⁾ Legat. pro Christ. n. 10. lb. p. 305. D. Cf. n. 12. p. 307.

²⁾ Ad. Autol. l. 2. n. 15. lb. p. 385. A. Cf. n. 10. p. 378 s.

³⁾ Cont. haer. l. 1. c. 10. n. 1. Opp. p. 48.

⁴⁾ l. 4. c. 20. n. 1. Cf. ss. p. 253. l. 5. c. 12. n. 2. p. 306.

⁵⁾ Paedag. l. 1. c. 6. Opp. T. 1. p. 123.

⁶⁾ Praesertim huc spectat l. 5. c. 14. p. 710. Cf. etiam: Quis dives salvatur. c. 34. T. 2. p. 954.

⁷⁾ Hom. 11. in Num. n. 8. Opp. T. 2. p. 310. c. 1.

stantia est, et natura Trinitatis ¹⁾. — Atque: De Spiritu S., quod sit, multae nos Scripturae docuerunt. — Ex quibus omnibus didicimus, tantae esse auctoritatis et dignitatis substantiam Spiritus S., ut salutaris Baptismus non aliter, nisi ex excellentissimae omnium Trinitatis auctoritate, id est Patris, et Filii, et Spiritus S. cognominatione compleatur, et ingenito Deo Patri, et unigenito ejus Filio nomen quoque Spiritus S. copuletur. Quis ergo non obstupescat, quanta majestas sit Spiritus S., cum eum, qui dixerit verbum in Filium hominis, audiat sperare veniam posse, eum vero, qui in Spiritum S. blasphemaverit, veniam non habere, neque in praesenti saeculo, neque in futuro. — Usque ad praesens nullum sermonem in scriptis sanctis invenire potuimus, per quem Spiritus S. factura esse vel creatura diceretur ²⁾. Hippolytus: Necesse est ergo, ut, quamvis nobis, constet Patrem Deum omnipotentem, et Christum Jesum Filium Dei Deum factum hominem, cui omnia Pater subjecit praeferens et Spiritum S. ³⁾. — Et: Unus est Deus, qui mandata Patris; qui obedit, Filius; qui docet scientiam, Spiritus S. Pater, qui est super omnia, Filius per omnia, Spiritus S. in omnibus, Aliter Deum unum intelligere non possumus, nisi vere Patri et Filio et Spiritui S. credamus ⁴⁾. — Dionys. Alex.: Mens, quae per linguam pronuntiatur, alia est a verbo, quod in corde existit. Hoc enim, postquam illam praemisit, remanet, estque, quale antea erat: illa vero praemissa avolat, et circumquaque fertur: et sic utrumque in utraque est, tametsi aliud ab altero; et unum sunt, licet duo sint. Sic namque Pater et Filius unum esse, et in se invicem esse dicti sunt. Singula nomina a me prolata a se invicem nec separari queunt, nec dividi. Patrem dixi, et prius quam Filii mentionem facerem, jam eum in Patre significavi. Filium adjunxi; ac Pater etiam eum non prius nominassem, jam omnino in Filio comprehensum fuerat. Spiritum S. addidi: sed simul unde et per quem processerit subtexui. — In manibus autem illorum est Spiritus, qui neque a mittente, neque a ferente separari potest. — Ita quidem nos unitatem indivisibilem in Trinitate dilatamus

¹⁾ Hom. 12. in Num. n. 1. p. 312. c. B. C.

²⁾ De princ. l. 1. c. 3. n. 2—3. T. 1. p. 60. c. 2. 61. c. 1. Cf. l. 1. T. 4. p. 1. In Jer. Hom. 8. n. 1. T. 3. p. 170.

³⁾ Cont. Noët. c. 8. In Galland. Bibl. PP. T. 2. p. 459.

⁴⁾ Ib. c. 14. p. 461 a.

et rursum Trinitatem, quae minui nequit, in Unitatem contrahimus ¹⁾). — Gregorius Thaumaturgus Trinitatem dicit perfectam, quae gloria et aeternitate, ac regno atque imperio non dividitur, nec abalienatur. Non igitur creatum quid, aut servum in Trinitate: neque superinductum aliquid et adventitium quasi prius non existens; posterius vero adveniens. Non ergo defuit unquam Filius Patri: neque Filio Spiritus: sed immutabilis et invariabilis eadem semper manet Trinitas ²⁾). — Athanasius: Sancta et beata Trinitas individua atque ipsa secum unila est, ita ut ubi Patris mentio fiat, ejusdem statim Verbum, ac in Filio Spiritus debeat intelligi. Quodsi Filius nominetur, similiter in Filio est Pater, nec extra Verbum est Spiritus S. Siquidem una est Patris gratia, quae per Filium in Spiritu S. completur. Una pariter divinitas, et unus Deus est, qui est super omnia, et per omnia, atque in omnibus ³⁾). — Basilius de Spiritu S. Deo specialem librum ad Amphiloichium composuit ⁴⁾, et alios quinque adversus impium Eunomium de Patris et Filii aequalitate, atque de Spiritu S., quod non sit creatura ⁵⁾. In priore opere omnia SS. Patrum testimonia, qui ante ipsum vixerunt, uti Clementis Romani, Irenaei, Dionysii Rom. et Alexandrini, Origenis, Julii Africani, Gregorii Neocaesar., Eusebii Caesar., Firmiliani, et aliorum, collegit. Illiusque verba sunt: *Constet oportet Deum Patrem, Deum Filium, Deum Spiritum S., uti eloquia divina, et qui ea sublimius intellexerunt, docuerunt* ⁶⁾. Alibi ait: *Eadem est essentiam inter et hypostasim differentia, ac inter commune et singulare. — Quapropter essentiam quidem unam in divinitate constemur, adeo ut essentiae definitio non diverse reddatur: hypostasim vero propriam et singularem, ut inconfusa nobis et clara de Patre et Filio et Spiritu S. insit notio* ⁷⁾. — Gregorius Naz. item pecu-

¹⁾ Euseb., et Apol. n. 7—9. In Galland, Bibl. PP. T. 3. p. 497 s. Athanas., De sentent. Dionys. n. 23. 17. Opp. T. 1. P. 1. p. 259. 254 s.

²⁾ In Mansi, Coll. Conc. T. 1. c. 1029.

³⁾ Epist. ad Serap. de Spir. S. 1. n. 14. Opp. T. 1. P. 2. p. 663. Verumtamen tota haec meretur legi epistola, quemadmodum et ad eund. 3. et 4. p. 690 ss. nec non Ep. ad Adelph., ad Maxim. Philos., etc. p. 911 ss.

⁴⁾ Opp. T. 3. p. 1 ss.

⁵⁾ T. 1. p. 207—322.

⁶⁾ Epist. 8 (151) n. 2. T. 3. p. 81.

⁷⁾ Epist. 236. p. 363 s.

Et tertius a sole apex ex radio ¹⁾. — *Filium non aliunde deduco, sed de substantia Patris. — Spiritum non aliunde puto, quam a Patre per Filium* ²⁾. — *Duos definimus Patrem et Filium, et jam tres cum Spiritu S., secundum rationem oeconomiae, quae facit numerum. — Duos tamen deos et duos dominos nunquam ex ore proferimus, non quasi non e-* ³⁾ *Pater Deus, et Filius Deus, et Spiritus S. Deus, et Deus unusquisque* ⁴⁾. — Cyprianus: *Si peccatorum remissionem consequutus est, et sanctificatus est, et templum Dei factus est, si sanctificatus est, et templum Dei factus est, quaero cujus Dei? Si Creatoris, non potuit, quia in eum non credidit: si Christi, nec hujus fieri potuit templum, qui negat Deum Christum: si Spiritus S., cum tres unus sint, quomodo Spiritus S. placatus esse ei potest, qui autem Filius aut Patris inimicus est* ⁵⁾? — Dionysius Rom.: *Necesse est, ait, divinum Verbum Deo universorum esse unitum, et Spiritum S. in Deo manere et inhabitare; adeoque e divinam Trinitatem in unum, quasi in quendam verticem, h. e. in Deum universorum omnipotentem, reduci atque colligi* ⁶⁾. — Hilarius Pictaviensis (†. 368) peculiare opus *De Trinitate* exaravit ⁷⁾. — Ambrosius praeter illa, quae habet de SS. Trinitate in libris *de fide* ⁸⁾, composuit libros tres *de Spiritu S.*, in quibus ad preces Gratiani Imperatoris de Spiritu S. divinitate et ejusdem cum Patre et Filio consubstantialitate disputat ⁹⁾. — Eodem, quo vixit Ambrosius, tempore, prodiit quoque Martini Turonensis brevis *Expositio fidei De S. Trinitate* ¹⁰⁾. — Augustinus praestantissimos elucubravimus *de S. Trinitate* libros quindecim ¹¹⁾. Idem permulta ejusdem argumenti habet in libro *de vera Religione*, ad cujus

¹⁾ *Adv. Prax.* n. 8. Opp. V. 1. p. 411.

²⁾ *Ib.* n. 4. p. 406.

³⁾ *Ib.* n. 13. p. 417. Cf. n. 2. p. 404 s. s. c.

⁴⁾ *Epist.* 73. *ad Jubaj.* n. 8. Opp. T. 1. p. 219. Cf. n. 12. p. 222. et al. pass.

⁵⁾ *Epist. can. ad Sabellian.* c. 1. In Galland. *Bibl. PP.* T. 2. p. 538.

⁶⁾ Opp. T. 2. c. 1—444.

⁷⁾ Opp. T. 2. c. 443 ss.

⁸⁾ *Ib.* c. 599 ss. Cf. *In Symb. Apost.* Append. 322 ss.

⁹⁾ In Galland. *Bibl. PP.* T. 7. p. 599.

¹⁰⁾ Opp. T. 8. c. 745—1004. Cf. *Cont. Maximin.* l. 1. c. 19. T. 8. c. 689 s. l. 2. c. 10. c. 697 ss.

finem docet, *convenire nos — ipsum donum Dei (Spiritus S.) cum Patre et Filio aequae incommutabile colere et tenere: unius substantiae Trinitatem, unum Deum, a quo sumus, per quem sumus, in quo sumus — : Deum, qui dixit: Fiat; et Verbum, per quod factum est omne, quod substantia-liter et naturaliter factum est; et Donum benignitatis ejus, quo placuit, et conciliatum est auctori suo, ut non interiret, quidquid ab eo per Verbum factum est*¹⁾. — Vincentius Lerin.: *Beata inquit, Catholica Ecclesia, quae unum Deum in Trinitatis plenitudine, et item Trinitatis aequalitatem in una divinitate veneratur; ut neque singularitas substantiae personarum confundat proprietatem, neque item Trinitatis distinctio unitatem separet deitatis*²⁾. — Prosper:

Quodque Deo minus est, non est Deus: a Patre natum

Verbum, et qui amborum Spiritus est, Deus est.

*Una eademque trium quoniam est essentia, quae se Nunquam vel major, vel minor esse potest*³⁾.

Quibus adnumerandi adhuc sunt: Cerealis, qui *De fide SS. Trinitatis adv. Maximinum* opusculum scripsit⁴⁾; incertus quidam Scriptor, qui *De Trinitate*, seu *De unita Trinitate Deitatis* libros duodecim composuit⁵⁾; Paschasius (juxta Gregorium M., Faustus Regiensis juxta Gennadium), qui *De Spiritu S.* duos libros exaravit⁶⁾; atque Fulgentius Ruspensis, qui tractatum *de S. Trinitate*; item *Quaestiones de processione Spiritus S.* scripsit⁷⁾.

Observ. Patres ante Synodum Nicaenam, et etiam, qui post illam adversus Pneumatomachos strinxerunt calamum, velut Basiliius, parci quidem admodum fuerunt in nomine *Dei* Spiritui S. tribuendo. Id tamen ex quadam cautione ab ipsis factum est, tum ne offenderent infirmos, qui, quamquam Spiritum S. Deum esse crederent, tamen ab ea adpellatione abstinendum esse putarunt, nescio, quibus causis ducti, tum ne nimium exacerbarent Macedonianos, quos secum contra Arianos unitos esse censebant.

¹⁾ C. 55. n. 113. T. 1. c. 788.

²⁾ Common. c. 18. p. 57.

³⁾ Epig. 55. Opp. 646.

⁴⁾ In Bibl. maz. PP. Lugd. T. 8. p. 671 ss.

⁵⁾ Una c. Opp. Viten sis, ed Petr. Fr. Chifflet. Dunon. 1664. 4.

⁶⁾ In Bibl. Maz. PP. Lugd. T. 8. p. 807 ss.

⁷⁾ Opp. p. 328 ss. 663.

§. 46. Continuatio.

Porro quemadmodum fidem universalem Ecclesiae antiquissimae in divinitatem Filii, ita quoque in divinitatem Spiritus S. testantur confessiones, quas Martyres, ante judicium, publice ediderunt, quibusque confirmarunt, se cum Ecclesia universa aequè in Spiritum S. Deum, ac Deum Patrem et Deum Filium credere. Ejusmodi confessiones sunt suppletae Epodii et Alexandri, Eupli, Vincentii, Eupolemi, porro Scillitanorum MM., Felicitatis et septem filiorum MM., Victoris, Alexandri et sociorum MM. c. a. 290., Agapae et sociorum MM. a. 304., Aerae M. c. a. 405., Firmi et Rustici MM. a. 305. et aliorum, quae apud Ruinartum legi possunt ¹⁾.

Id ipsum valet quoque de doxologia: *Gloria Patri, etc.* nec non de clausula precum: *Per Dominum nostrum Jesum Christum, etc.* jam in antiquissima Ecclesia usu receptis, prout de *τρισάκης*, de more vetustissimo, se cruce signandi *in nomine Patris, et Filii et Spiritus S.*; ex quibus omnibus consuetudo primae Ecclesiae colendi et invocandi Spiritum S. colligitur.

Dein Symbolum Apostolicum, quemadmodum inde ab ortu Ecclesiae in usu erat, parili fide in Spiritum S., ac in Deum Patrem et Filium ejus unicum, fideles credere jubet, i. e. illum confiteri, adorare, eique se prorsus mancipare, ut bene exponit Paschasius, quum ait: *Credo in illum, hoc est dicere, confiteor illum, colo illum, adoro illum, totum me in jus ejus ac dominium trado, atque transfundo. In professionis hujus reverentia universa divino nomini debita continentur obsequia* ²⁾.

Tandem hanc fuisse a Christo Domino in sinu Ecclesiae repositam et ab illa custoditam fidem, Spiritum S. videlicet verum esse Deum, et ejusdem cum Patre et Filio majestatis et dignitatis, seu Patri et Filio consubstantialem, nobis patefacit condemnatio haeresis Macedonianae. Cum enim Macedonius Spiritum S. Filii creaturam esse diceret: omnes contra eundem insurrunt, fidem avitam de ejus divinitate attestantes. Primo Macedonius condemnatus fuit in Concilio Alexandrino a. 36

¹⁾ *Acta Martyrum*. Ver. 1731. Cf. *Epist. Eccl. Vienn. et Lugd.* n. 1 p. 60.

²⁾ *De Spir. S. Praef.* In *Bibl. max. PP.* Lugd. T. 8. p. 808.

³⁾ *Mansi, Coll. Conc.* T. 3. c. 347.

deinde in Conc. Illyrico a. 365., vel potius 372. ¹⁾, tum in Conc. Romano a. 372. sub Damaso ²⁾, atque Iconiensi a. 379. ³⁾, tandem in Conc. Constantinopolitano I. a. 381., in quo solenniter proscripta est doctrina Macedonii ⁴⁾, et definitum, Spiritum S. ejusdem esse cum Patre et Filio naturae et essentiae, aequalis potestatis ac dignitatis, cum Patre et Filio adorandum et conglorificandum. Quam definitionem in epistola ad Occidentales ita exponunt ⁵⁾: *Ista fides tum a nobis, tum a vobis, tum ab omnibus, qui verbum verae fidei non pervertunt, approbari debet; quippe cum et antiquissimas sit, et lavacro Baptismatis consentanea, et nos doceat credere in nomen Patris, Filii, et Spiritus S., hoc est, in divinitatem, potentiam et substantiam Patris, et Filii, et Spiritus S., aequalem dignitatem, et coaeternum regnum, in tribus perfectissimis hypostasibus, sive in tribus perfectis personis* ⁶⁾. Atque Symbolo Nicaeno, quod solummodo nudum habebat articulum: *Credimus in Spiritum S.*, addidit: *Dominum, et vivificantem, ex Patre procedentem, et cum Patre et Filio simul adorandum et conglorificandum: qui locutus est per Prophetas* ⁷⁾. In quibus additamentis, licet Spiritus S. expresso Deus nominatus non sit, eum tamen verum Deum esse, Patri et Filio aequalem, ex aequali adoratione, ei adjudicata, sat adparet. Causa autem, cur Patres Concilii a voce *Deus* Spiritui S. in Symbolo apponenda abstinuerint, videtur haec fuisse, quia contradictionibus contra vocem *ὁμοούσιος* experti fuerant, quantaes lites propter vocabulum excitari possint per eos ipsos, qui caeterum doctrinam eo expressam haud impugnent. — Quae decreta Concilii mox ab omnibus Orientis Ecclesiis approbata sunt; sed et non multo post ab Occidentalibus sunt agnita, ita ut sic Concilium illud Constantinopolitanum auctoritatem Conciliorum oecumenicorum nancisceretur, praecipue quum eodem tempore Damasus Papa cum multis Episcopis occidentalibus Concilium Romae celebrasset, in quo pronuntiato contra Sabellium, Photinum et Apollinarem anathe-

¹⁾ *Epist. Synod.* Ib. c. 385.

²⁾ *Epist. Synod.* Ib. c. 457.

³⁾ Ib. c. 505. et 507.

⁴⁾ *Can. 1.* Ib. T. 3. c. 557 s. et 565.

⁵⁾ Cf. *Or. Gregor. Naz. in Syn. CP. I. habita.* Ib. c. 546.

⁶⁾ Ib. c. 585—586.

⁷⁾ Ib. c. 565—566.

mate statutum est: *Anathematizamus Arium etque Eunomium, qui pari impietate, licet sermone dissimili Filium et Spiritum S. esse asserunt creaturas. Anathematizamus Macedonianos, qui de Arii stirpe venientes, non perfidiam mulaverunt, sed nomen. — Si quis non dixerit, Spiritum S. de Patre esse vere et propriè sicut et Filium, de substantia divina, et Deum verum; anathema sit* ¹⁾. Confirmatum autem est Concilium illud a Damaso in Conc. Romano a. 383. habito ²⁾. Ne tamen ullum dubium superesset, Concilium Const. IV. a 869. disertè enuntiat, Spiritum S. esse Patri et Filio consubstantialem, definiens: *Credimus in unum Deum in tribus consubstantialibus et divinis ac principalibus personis: — unum quidem et singularem Deum secundum rationem substantiae, trinum autem, vel tria secundum rationem personarum praedicamus. — Anathematizamus Macedonium, neque in personarum discretionem differentiam substantiae Patria, et Filii, et divini et principalis Spiritus juxta praedictos haeresiarchas recipientes, neque in una eademque substantia personas secundum amentissimum Sabellium confundentes* ³⁾.

T i t u l u s II.

Pater et Filius et Spiritus S. tres personae realiter distinctae, in una tamen ac individua natura et substantia.

§. 47. Ingressio.

Erant quidem, qui minime negarent, Patrem et Filium et Spiritum S. dici in SS. Litteris Deum, et tamen eorum doctrina ab Ecclesia rejecta est eo, quod realem distinctionem inter Patrem et Filium et Spiritum S. non admitterent, contententes, hos tres tantum diversa nomina esse, diversos sese Dei manifestandi modos, seu diversa divinas operationes ejusdem unius divinae personae significantia, aut vero Filium et Spiritum S. esse solummodo duas speciales Divines, seu duo specialia divina attributa absoluta. Antitrinitarii audiunt. — Patrem, Filium et Spiritum S. non nisi diversa nomina, quibus una eademque divina insigniatur persona pro diversi

¹⁾ Ib. c. 486.

²⁾ Ib. c. 642.

³⁾ Termin. S. Syn. lb. T. 16. c. 180.

se patefaciendi modis, defenderunt saec. II. Noëtus et Praxas, statuentes, Deum quatenus homines ad salutem inde ab aeterno destinaverit, esse Patrem; quatenus in Christo humanam sibi associaverit naturam, passus ac mortuus sit, Filium; quatenus pro homines sanctificet, Spiritum S. vocari. — Filium autem

Spiritum S. quasdam virtutes esse divinas, docuit saec. II. Sabellius, qui inter Antitrinitarios longe plurimos nactus est discipulos, unde et error Antitrinitariorum, licet in varias excreverit ramos, uno Sabellianismi nomine comprehenditur. Sabellium secuti sunt saeculo III. adhuc Paulus Samositanus, et saec. IV. Photinus, Episcopus Sirmiensis. — Alii deinde exstiterunt, qui Christum merum hominem asserentes, eo ipso neque personalem Verbi subsistentiam agnoscere non poterant, si ignoratur, quid proprie de ea senserint; Spiritum S. autem probabiliter pro vi divina habuerunt. Ad hanc classem pertinent Theodotus uterque, Artemon et alii. Quibus porro accedunt Nestoriani, qui contendunt, Christum propter supernaturalem conceptionem Dei Filium, propter altiores vero dotes, et speciatim propter potentiam et majestatem post assumptionem in coelum accessum nonnunquam, sed sensu improprio in SS. Litteris Deum vocari, propter hanc altiorem dignitatem etiam adorandum et invocandum esse, atque Spiritum S. dumtaxat virtutem et efficaciam divinam esse; nec non Rationalistae, quos etiam Deistas et Naturalistas, seu Unitarios dicunt ¹⁾.

Quemadmodum autem Antitrinitarii statuunt, unam tantum dari divinis personam, prout una solummodo divina datur substantia: ex adverso alii tres numero non tantum personas, sed et prorsus a se distinctas substantias, inter se aequales, assumsere. Adhuc error hic tritheismus, cujus accusatur saec. VI. Joannes Philoponus, Grammaticus Alexandrinus, et ante eum jam Theodorus Ascesnaghes, philosophus Syrus ²⁾, saec. XI. Roscelinus, a Concilio Suessionensi damnatus, saec. XVII. Scherck, Faydit, et alii.

Rejecto jam utroque errore, docet Ecclesia Catholica, Patrem et Filium et Spiritum S. tres esse personas distinctas, in una tamen ac individua substantia et natura, omnibus ex aequo communi, seu, ut

¹⁾ Cf. Klein, *Hist. Eccl. Christ. Graec.* 1828. T. 1. p. 172 ss. T. 2. 348 ss.

²⁾ Cf. *Chron. Greg. Bar. hebr.* Aasemann, *Bibl. orient.* T. 2. p. 328.

habet Symbolum Athanasianum, ab universa Ecclesia receptum: *Fides Catholica haec est, ut unum Deum in Trinitate, et Trinitatem in unitate veneremur; neque confundentes personas, neque substantiam separantes. Alia est enim persona Patris, alia Filii, alia Spiritus S.; sed Patris, et Filii, et Spiritus S. una est divinitas, aequalis gloria, coaeterna maiestas.*

Cum scilicet haeresis Sabelliana sanum verbum depravare non poterat non magisterium Apostolicum hanc sublimem doctrinam adcuratius definire. Quod aptissime eo fiebat, si certa vocabula elegit, quibus doctrina vera sine erroris periculo pauca et adcurate simul exprimeretur. Ecclesiae autem jus esse talia vocabula seu dicendi formulas eligendi, quamvis non sint revelata, in propatulo est. Etsi enim ipsa nova dogmata condere non potest, sed in iis definiendis per omnia adstricta est verbo Dei revelato: orta tamen controversia, certas, easque breves et distinctas dicendi formulas, vel etiam vocabula statuere poterit, quibus non novum dogma aliquod cuditur, sed antiqua veritas modo quidem novo, ast convenienti exprimitur, et velut tessera continetur. Tali enim ratione discrimen inter doctrinam orthodoxam et haeticorum errores manifestius patet, nec periculo exponuntur fideles facile a veritate revelata aberrandi. *Quid igitur restat*, ait Augustinus, *nisi ut fateamur, loquendi necessitate parta haec vocabula, cum copiosa opus esset disputatione adversus insidias vel errores haeticorum* ¹⁾. Et S. Thomas: *Ad inveniendum nova nomina, antiquam de Deo fidem significantia, coëgit necessitas disputandi cum haeticis* ²⁾. Suo jure usa est itaque Ecclesia, cum Sabellianis quaerentibus: quid ergo Pater et Filius et Spiritus S., si non sunt diversi divinitatis existendi aut operandi modi, neque diversae divinae virtutes? respondit, esse tres subsistentias, seu personas, quin tamen dividatur aut separetur propterea divina essentia, natura seu substantia.

Antequam tamen hancce Ecclesiae definitionem ex revelationis divinae fontibus demonstremus: e re erit, prius exponere, quod ex mente Ecclesiae sub illis diversis nominibus essentiae, naturae, substantiae, subsistentiae ac personae ver-

Sub essentia, sensu latiori accepta, et etiam natura intelligitur illud omne, quo res id est, quod est, adeoque

¹⁾ *De Trinit. l. 1. c. 4. n. 9. Opp. T. 8. c. 860. Cf. n. 7—8. c. 8*

²⁾ *1. q. 29. art. 3. ad 1. Opp. T. 20. p. 180, c. 1.*

tantum interna rei ratio, cui ejusdem proprietates inhaerent, sed et hae ipsae simul proprietates illi inhaerentes. Id ipsum significat *οὐσία* Graecorum. SS. Patres tamen, vocabulum hoc, prout et vocabulum *φύσις* pro essentia seu natura definita acceperunt, ita ut ipsis utraque vox idem sit, ac *ὑπόστασις* seu *persona* ¹⁾. Quo sensu *οὐσίαν* Sabelliani intellexerunt, quum Filium et Spiritum S. Patri *ὁμοούσιον* praedicarent; unde et in Concilio Antiocheno contra illos a. 341. coacto definitum est, propriam esse Patris, Filii et Spiritus S. substantiam, i. e. personam ²⁾. Verum jam dudum Ecclesiae universae consuetudine receptum est, ut nomine *οὐσίας* et etiam *φύσεως* sensu latiori significetur id, quod rem proprie conficiat, seu quod nos essentiam ac naturam (die Natur und die Wesenheit), Scholastici entitatem, quidditatem, constitutivum vel etiam formale rei adpellarunt ³⁾. Sensu tamen strictiori (essentia metaphysica) essentiae nomine venit substantia accidentibus subjecta, seu illud, quod proprie rem ab omni alia distinguit, et radix proprietatum ejus ac causa est.

Substantia dicitur id, quod nullo alio indiget tanquam subiecto, cui inhaereat, ad existendum, seu paucis, quod exstat per se. Hinc sub substantia intelligitur

a. ens absolutum, seu Deus, per excellentiam, utpote qui solus, quia prorsus independenter ab omni re, vere per se existit;

b. omne ens etiam finitum, quatenus, licet dependendo a Deo, tamen non alteri finito subiecto inhaerendo, attributi aut actionis instar, et hoc sensu pariter per se exstat; atque tandem

c. illud in entibus finitis, cui tanquam subiecto durabili accidentia, uti sunt attributa, adfectiones et actiones, inhaerentia cogitantur, quo sensu substantia ab essentia sensu strictiori accepta, haud differt ⁴⁾.

Id ipsum pro suo etymo notat graecum *ὑπόστασις*, et in eo sensu etiam revera a veteribus Patribus usurpatur ⁵⁾. Postea tamen usus invaluit, ut vox haec nonnisi de persona adhiberetur.

¹⁾ Cf. Petav. *De Trinit. l. 4. c. 1. n. 2—3. De theol. dogm. Antv. 1700. T. 2. p. 184. et c. 2. p. 189 ss.*

²⁾ Cf. Hilar. *De Syn. n. 31 ss. Opp. T. 2. c. 480 ss.*

³⁾ Cf. Petav. *l. c. p. 192 ss.*

⁴⁾ Cf. Petav. *l. c. c. 3. p. 194 ss.*

⁵⁾ Cf. Athanas. *Epist. ad Afr. Episc. n. 4. Opp. T. 1. P. 2. p. 894. De decr. Nic. Syn. n. 27. T. 1. P. 1. p. 232. — Iren. *Cont. haer. l. 5.**

Subsistentia, *τρόπος τῆς υπάρξεως*, est existentia substantiae, das *Wirksein*, das *Insbesonderesein*, qua haec singularis, completa, et ideo alteri incommunicabilis redditur; deinde autem hanc ipsam singularem, completam et alteri incommunicabilem substantiam significat, quo sensu idem ac suppositum est.

Suppositum itaque est substantia, seu natura per se subsistens, non alii tanquam subjecto inhaerens, singularis ac individua, i. e. non pluribus communis, atque completa, *αὐτοσλής*, i. e. non destinata cum altera ad tertium aliquod componendum seu constituendum, et ideo alii tanquam supposito incommunicabilis, seu certo subsistendi, vel per se existendi modo determinata.

Persona, *προσώπον, ὑπόστασις, ὑποστασίον* tandem est suppositum rationale, seu suppositum intellectu et voluntate praeditum, adeoque sui, et quidem tanquam finis in se (*Selbstzweck*), ut ajunt, conscium ¹⁾.

Si jam haecce personae descriptio doctrinae Catholicae, juxta quam tres divinae dantur personae realiter distinctae, adcommo-
datur: consequitur, tria dari in divinis supposita intelligentia et voluntia, a se invicem distincta, attamen nequaquam a se invicem sejuncta. Quapropter bene est attendendum, ne etiam id, quod personae in creatis adhaeret, ut scilicet non tantum subsistentiam, sed et substantiam sibi unice propriam habeat, in personas divinas transferatur; quum hae substantiam seu essentiam divinam communem et indistinctam habeant. Sunt itaque tres personae in Deo, si substantiam divinam in omnibus eandem mente subtraxeris, tres diversi subsistendi modi, (Paternitas, Filiatio et Spiratio), qui nostra cogitandi ratione ipsi divinae substantiae supervenire concipiuntur, quam afficiunt et singularem in unaquaque persona reddunt, re ipsa autem ad divinam naturam, in qua nihil da-

C. 36. p. 336. — Epiphani. *Ancor.* n. 67. Opp. T. 2. p. 71. *Haer.* 69. n. 70. T. 1. p. 796 s. — Cyrilli. Alex. *Schol. de Incarn.* c. 11. Opp. T. 5. P. 1. p. 785. et al. — Cyrilli. Hieros. *Cat.* 6. n. 5. 7. 13. p. 89. 90. 95. *Cat.* 16. n. 24. p. 257. — J. Damas. *Dial.* c. 42. Opp. T. 1. p. 45. — Mar. Victorin. *De Homous.* n. 1. In Galland. *Bibl. PP.* T. 8. p. 198. — Hieronym. *Epist.* 15. ad Damas. n. 4. Opp. T. 1. c. 40. — Cont. Nicaen. *Symb.* Mansi, *Coll. Conc.* T. 2. c. 668. — Conc. Roman. a. 372. lb. T. 3. c. 457. B.

¹⁾ Cf. Basil. *Hom. in illud: In princ. erat Verbum.* n. 3. Opp. T. 2. p. 130. B. — Petav. l. c. 1. 3. c. 4. p. 191 ss. c. 5. p. 219 ss.

tur accidens, pertinent, uti attributa absoluta, et hinc neque personae possunt confundi, neque substantia separari ¹⁾.

§. 48. Pater persona.

Ecclesiae autem doctrina de trina persona in natura divina hoc sensu exposito per partes non difficulter probatur. Etenim

Patrem SS. Literae ubique tanquam suppositum intelligens ac volens exhibent, quod per actiones, quae ipsi adscribuntur, manifestum redditur. Pater enim secundum effata Christi et Apostolorum cognoscit ²⁾, docet ³⁾, revelat ⁴⁾, vult ⁵⁾, discernit ⁶⁾, diligit ⁷⁾, operatur ⁸⁾, disponit ⁹⁾, mittit ¹⁰⁾, ignoscit ac peccata dimittit ¹¹⁾, salvificat ¹²⁾, exaudit ¹³⁾, sibi complacet ¹⁴⁾, clarificat ¹⁵⁾, quae manifesto non nisi enti intellectu ac voluntate suique conscientia praedito tribui possunt.

§. 49. Filius persona a Patre distincta.

Idem valet de Filio. Etiam hic ubique in SS. Litteris tanquam suppositum intelligens et volens, et quidem a Patre distinctum proponitur, ut ex supra pro divinitate Filii citatis locis luculenter apparet. Nam dicitur in eis Filius oves suas cognoscere, vitamque dare eis aeternam, ita ut de manu sua, prouti de manu Patris, eas non rapiat quisquam, qui et ipse unum sint ¹⁶⁾. Porro declaratur, ipsum operari, sicut Pater usque modo operetur, non posse facere quidquam a se, nisi quod viderit Patrem

¹⁾ Cf. Petav. *De Incarn. l. 13. c. 13. n. 3. De theol. dogm. T. 5. p. 149.* — Staubenmaier, *Die chriftl. Dogmatik. Freib. 1844. 2. B. p. 212 ss.*

²⁾ Matth. 6, 4. 8. 11, 27. 24, 36.

³⁾ Joan. 8, 28. 38. 12, 49.

⁴⁾ Matth. 16, 17.

⁵⁾ Joan. 5, 30. 6, 39. Matth. 6, 10.

⁶⁾ Matth. 20, 23. Luc. 22, 29. 12, 32.

⁷⁾ Joan. 3, 16. 35. 5, 20. 14, 21. 15, 9. 1. Joan. 4, 9 s.

⁸⁾ Joan. 5, 17. Cf. 5, 19.

⁹⁾ Act. 1, 7.

¹⁰⁾ Joan. 5, 36. 3, 17. 6, 39. 8, 16. Rom. 8, 3. Gal. 4, 4. 6, 1. Joann. 4, 9.

¹¹⁾ Matth. 6, 14. Luc. 23, 34.

¹²⁾ Joan. 12, 27.

¹³⁾ Joan. 16, 23. Matth. 7, 11. Luc. 11, 13.

¹⁴⁾ Matth. 3, 17. 12, 18. 17, 5. Marc. 1, 11. Luc. 8, 22. 2. Petr. 1, 17.

¹⁵⁾ Joan. 17, 5.

¹⁶⁾ Joann. 10, 28—30.

facientem, quaecunque autem ille fecerit, haec et Filium similiter facere, atque sicut Pater suscitet mortuos et vivificet, sic et Filium, quos velit, vivificare, ¹⁾, esse rerum omnium Dominum, utpote cui Pater, qui habeat vitam in semetipso, dederit pariter habere vitam in semetipso ²⁾. Denique docetur, neminem nosse Patrem, nisi Filium, et cui voluerit Filius revelare ³⁾, qui habeat potestatem vitam suam, corporalem scilicet, ponendi, et eam iterum sumendi ⁴⁾, etc. ⁵⁾. Haec quidem Christus ipse. Simili ratione autem docent Apostoli, Verbum seu Filium Dei esse vitam, i. e. auctorem vitae, quae erat apud Patrem, et apparuerit nobis ⁶⁾, lucem veram, quae illuminet omnem hominem venientem in hunc mundum ⁷⁾, eum, per quem mundus factus sit ⁸⁾, qui in propria venerit, ac dederit hominibus potestatem, filio Dei fieri ⁹⁾, quique sit Unigenitus a Patre ¹⁰⁾; porro eum semetipsum exinanivisse, formam servi accipientem, in similitudinem hominum factum, et habitu inventum ut hominem ¹¹⁾, qui portet omnia verbo virtutis suae, peccatorum purificationem faciens, atque sit Deus ¹²⁾, et Dominus vivorum et mortuorum ¹³⁾. In hisce per omnia de Filio in oppositione Patris est sermo ¹⁴⁾, atque ei talia adscribuntur, quum ipse vita absoluta fruatur, cognoscat ¹⁵⁾, velit, atque ad extra agat ¹⁶⁾, quae necessario sui conscientiam, intellectum ac liberam voluntatem exigunt. Quin imo id ipsum jam ex compellatione Filii Dei, quae nonnisi personae tribui potest, nec non ex ipso

¹⁾ Joan. 5, 17—21.

²⁾ Joan. 5, 25—26.

³⁾ Matth. 11, 27.

⁴⁾ Joan. 10, 18.

⁵⁾ Cf. §. 34. p. 237.

⁶⁾ 1. Joan. 1, 2.

⁷⁾ Joan. 1, 9.

⁸⁾ Joan. 1, 10.

⁹⁾ Joan. 1, 11. 12.

¹⁰⁾ Joan. 1, 14.

¹¹⁾ Philipp. 2, 7.

¹²⁾ Hebr. 1, 3. 8.

¹³⁾ Rom. 14, 9.

¹⁴⁾ Cf. insuper Joan. 5, 30. 8, 28. 7, 18. 38. 10, 17. 12, 26. 14, 6. 16, 32. 23. 28. 20, 17. Matth. 10, 32. Luc. 22, 29. 24, 49.

¹⁵⁾ Cf. Luc. 10, 22. Joan. 17, 25.

¹⁶⁾ Cf. Joan. 1, 18. 8, 38. 15, 15. Matth. 11, 27. Luc. 24, 49. etc.

Dei nomine necessario colligitur, quum SS, Litterae alium, quam personalem Deum haud noverint.

§. 50. Spiritus S. persona a Patre et Filio distincta.

Sed et Spiritus S. exhibetur tanquam persona, eaque distincta a Patre et Filio. Ait enim Christus: *Et ego rogabo Patrem, et alium Paraclitum dabit vobis, ut maneat vobiscum in aeternum, Spiritum veritatis* ¹⁾. — *Paraclitus autem Spiritus S., quem mittet Pater in nomine meo, ille vos docebit omnia, et suggeret vobis omnia* ²⁾. — *Cum autem venerit Paraclitus, quem ego mittam vobis a Patre, Spiritum veritatis, qui a Patre procedit, ille testimonium perhibebit de me* ³⁾. — Atque: *Cum autem venerit ille Spiritus veritatis, docebit vos omnem veritatem. Non enim loquetur a semetipso; sed, quaecunque audiet, loquetur; et quae ventura sunt, annuntiabit vobis. Ille me clarificabit, quia de meo accipiet, et annuntiabit vobis* ⁴⁾. Quibus in locis clare docetur, Spiritum S. alium esse, ac Patrem et Filium, utpote qui datur a Patre ad preces Filii, mittitur a Patre in nomine Filii, mittitur a Filio, de eo, quod est Filii, accipit, a Patre procedit, et testimonium de Filio perhibet. Una autem in iisdem idem S. Spiritus suppositum sui conscium, intelligens ac libere agens declaratur; nam docet, testimonium perhibet, audit, loquitur, ac futura annuntiat, atque παράκλητος cognominatur, quae vox consolatorem, doctorem, interpretem alterius sententiae, patronum, advocatum significat, et ideo nonnisi ad personam designandam adhiberi potest. — Ita quoque juxta Apostolos Spiritus S. omnia scrutatur, etiam profunda Dei ⁵⁾; porro, ut Dominus ministraciones, et operationes Deus (Pater), ita Spiritus dona extraordinaria dividit, prout vult ⁶⁾; atque ipse est, qui tentatur a peccantibus ⁷⁾, regit Ecclesiam ⁸⁾, revelat ⁹⁾, illuminat ¹⁰⁾, charitatem

¹⁾ Joan. 14, 16 s.

²⁾ Joan. 14, 26.

³⁾ Joan. 15, 26.

⁴⁾ Joan. 16, 13—14. Cf. Luc. 12, 12.

⁵⁾ 1. Cor. 2, 10.

⁶⁾ 1. Cor. 12, 4—11.

⁷⁾ Act. 5, 3. 4. 9.

⁸⁾ Act. 20, 28. 13, 20.

⁹⁾ Ephes. 3, 5. 1. Tim. 4, 1.

¹⁰⁾ Act. 15, 28. 1. Cor. 12, 3. Rom. 8, 26. Act. 10, 20.

diffundit, sanctificat, ungit, obsignat, atque unit ¹⁾; quae omnia solummodo ad personam referri possunt. — Discrimen trium divinarum personarum clarissime exprimitur quoque in formula Baptismi. Nam cum sub Patre certo persona intelligenda sit, atque Filius et Spiritus S. eodem loco et ordine collocentur cum Patre: etiam Filius et Spiritus S. personae sint necesse est. Sane absurdum foret assumere, Christum baptizari mandasse in nomine Patris, personae divinae, et duarum proprietatum aut efficientiarum divinarum, quae in una eademque divina essentia ac persona, ut supponitur, necessario includuntur, ut taceamus cultum, ad quem per Baptismum, Filio et Spiritui S. aequae, ac Patri exhibendum obstringimur, nonnisi personae tribui posse. Unde et hac formula Baptismi Patres antiqui contra Sabellianos ²⁾ usi sunt, nominatim Constantinopoli a. 381. congregati, teste Theodoro ³⁾. Id ipsum valet de precatione Pauli: *Gratia Domini nostri Jesu Christi, et charitas Dei, et communicatio Spiritus S. cum omnibus vobis* ⁴⁾. Et de salutatione Petri: *Electis — secundum praescientiam Dei Patris, in sanctificationem Spiritus, in obedientiam, et aspersionem sanguinis Jesu Christi: Gratia vobis et pax multiplicetur* ⁵⁾.

Quae autem sensa fuerint Ecclesiae antiquae, jam ex trina mersione, qua semper Baptismus administrabatur ⁶⁾, et praecipue ex condemnatione haeresis Sabellianae colligere primum est. Nam quamprimum haecce nata fuerat: Patres contra eandem insurrexerunt, atque fidem catholicam propugnarunt. Ad quos pertinent: Cajus, Presbyter Romanus ⁷⁾, Malchion, Presbyter Antiochenus ⁸⁾, Tertullianus ⁹⁾, Hippolytus ¹⁰⁾,

¹⁾ Rom. 8, 15, 30. 1. Cor. 6, 11. 2. Thess. 2, 12. Tit. 3, 5—6. 2. Cor. 1, 21—22, 13, 13.

²⁾ Cf. Didym. Alex. *De Spir. S. n. 23. 24.* In Galland. *Bibl. PP. T. 6* p. 272. — Tertull. *Adv. Prae. n. 26.* Opp. V. 2, p. 436. — Hilar. *De Trinit. l. 2, n. 1 ss.* T. 2, c. 25 ss.

³⁾ *H. E. l. 5, c. 9.* Opp. T. 3, p. 716. C.

⁴⁾ 2. Cor. 13, 13.

⁵⁾ 1. Petr. 1, 1—2.

⁶⁾ Cf. Tertull. *Adv. Prae. n. 26.* Opp. V. 2, p. 436.

⁷⁾ In libello: *Parvus Labyrinthus, adversus Artemonem directo*, cujus tamen nonnisi fragmenta apud Eusebium. *H. E. l. 5, c. 28.* ed. Zimmerm. Francof. 1822, p. 375 ss. supersunt.

⁸⁾ *Epist. Synod. adv. Paul. Samos.* In Galland. *Bibl. PP. T. 3, p. 558 ss.* *Fragm. disp. cont. Paul. Samos.* Ib. p. 562.

⁹⁾ *Adv. Prae. V. 2, p. 403—442.*

¹⁰⁾ *Tract. cont. haer. Noët.* In Galland. *Bibl. PP. T. 2, p. 451 ss.* *Cont. Beron. et Hehc.* p. 465 ss.

Novatianus ¹⁾, Dionysius, Rom. P. ²⁾, Eusebius Caesareensis ³⁾, Athanasius ⁴⁾, Basilius ⁵⁾, et Gregorius Nyssenus ⁶⁾. Praeterea error ille in Synodo Romana a. 263. solemniter damnatus, atque Sabelliani jussi sunt, praeter veram divinitatem, quam agnoverunt, una profiteri, esse Christum non sola cogitatione, sed realiter a Patre distinctum, quod orthodoxa fides doceat.

O b s e r v. Contra subsistentiam personalem Spiritus S. a Patre et Filio distinctam quidem obmovent, Spiritum S. in SS. Litteris comparari cum spiritu hominis ⁷⁾, qui non sit ab homine distinctus, et opponi spiritui mundi ⁸⁾, qui pariter subsistentia peculiari destituatur. — Attamen Spiritus S. cum spiritu hominis tantum comparatur quoad scientiam eorum, quae sunt in homine, non autem etiam quoad ejus relationem ad hominem. Porro opponitur Spiritus S. spiritui mundi solummodo in suis effectibus, nequaquam respectu sui per se existendi seu subsistendi modi, ita ut ex hac oppositione tam parum sequatur, Spiritum S. non existere tanquam suppositum a Patre et Filio distinctum, quam inde, quod Christus eidem spiritui mundi opponatur, sequitur, illum propria subsistentia carere.

§. 51. Pater et Filius et Spiritus S. unus Deus.

Verumtamen tres personae divinae, Pater et Filius et Spiritus S. non existunt extra se, neque uniuntur tantum ad invicem, sed una eademque numero sunt substantia divina, ita ut non sint neque tres dii, neque etiam se ad invicem habeant ut tres par-

¹⁾ *De Trinit. c. 18—19. Ib. p. 300 ss.*

²⁾ *Adv. Sabell. Ib. p. 538 ss. Ap. Athanas. De decr. Syn. Nic. n. 26. Opp. T. 1. p. 231 ss.*

³⁾ *Adv. Marcellum ejusque σύμμαχον, et De eccles. Theologia. Una c. ejusd. Demonstr. Evang. ed Morelli. Par. 1628. S. 2. p. 1—195. De fide adv. Sabell. In Bibl. max. PP. Lugdun. T. 4. p. 1 ss.*

⁴⁾ *Refutatio hypocrisis Meletii, Eusebii adv. constant. — Or. De Incarn. Dei Verbi adv. Paul. Samos. — Or. cont. Sabell. gregal. de aetern. F. et Sp. S. c. D. existentia, Opp. T. 2. p. 31 ss. — 33 ss. — 37 ss.*

⁵⁾ *Hom. 24. Opp. T. 2. p. 189—197. Epist. 64. T. 3. p. 313—318.*

⁶⁾ *Serm. adv. Arium et Sabell. In Maji Coll. nov. vett. Script. V. 8. P. 2. p. 1—9. Cf. Justin. Apol. 1. n. 13. Opp. p. 51. — Origen. De princ. 1. 1. c. 3. n. 1—3. Opp. T. 1. p. 60 s. In Luc. Hom. 25. T. p. 982. — Petr. Chrysol. Serm. 60. p. 92 s. — Vinc. Lerin. Common. p. 46.*

⁷⁾ 1. Cor. 2, 10—11.

⁸⁾ 1. Cor. 2, 12—16.

tes, verum sint tres subsistentiae relativae, identificatae uni substantiae absolutae, divinitati, adeoque sint unus, idemque Deus, κατ' ὑπόστασιν triplici modo subsistens. Quae altera dogmatis Catholici pars adeo certa et evicta est, quam certum et exploratum est, veritatem de uno Deo propriam et characteristicam revelationis Christianae esse, qua se haec grassanti polytheismo antiqui orbis terrarum opposuit.

A. In SS. Litteris enim, ut alibi demonstravimus, ex una parte ubique, unum esse solum verum Deum, docetur, ex altera parte, ut pariter ante evicimus, aequo certo traditur, Patrem, Filium et Spiritum S. verum Deum esse, ita ut, quemadmodum ipsae loquuntur, Filius sit in Patre, et Pater in Filio ¹⁾, atque Spiritus S., quamquam alius ac Pater et Filius, tamen Patris et Filii sit Spiritus, et in utroque existat, sicut spiritus hominis in homine ²⁾, mutuaeque personarum detur inexistencia, seu ut Scholastici loquuntur, circuminsessio, περιχώρησις, aeterna ac immensa.

B. Eodem prorsus modo SS. Patres, qui Patrem Filium et Spiritum S. tria a se invicem re distincta supposita esse tradunt, constantissime unitatem Dei defendunt. Quorum aliquos saltem audiamus: Athenagoras: *Ad futuram (vitam), ait, perducimur, si Deum ejusque Verbum cognoscamus; tum quae Filii cum Patre unio, quae Patris cum Filio communicatio, quid Spiritus, quae trium unio et in unitate distinctio, Spiritus, Filii, Patris* ³⁾. Et: *Deum dicimus et Filium ipsius et Spiritum S., unitos secundum virtutem (δυνάμιν, substantiam) Patrem et Filium et Spiritum S., quia mens, verbum et sapientia Filius Patris, effluvium autem, ut lumen ab igne, Spiritus* ⁴⁾. — Irenaeus: *Ecclesia, tametsi per universum orbem usque ad extremos terrae fines dispersa, fidem eam ab Apostolis eorumque discipulis acceptam, quae est in unum Deum Patrem omnipotentem, — et in unum Jesum Christum Filium Dei, — et in Spiritum S. — summo studio et cura, perinde atque unam domum incolens, conservat, ac velut animam unam, atque unum idemque cor habens, his aequae fidem accommodat, et miro consensu, quasi uno ore pra-*

¹⁾ Joan. 10, 38. 14, 10. 11. 20. Cf. 8, 9.

²⁾ 1. Cor. 2, 10. Gal. 4, 6. Rom. 8, 9. 1. Petr. 1, 11. Act. 16, 6—9.

³⁾ *Leg. pro Christian. n. 12.* Opp. Justin. p. 307.

⁴⁾ n. 24. p. 322. Cf. n. 10. p. 304 s.

dita, haec praedicat, docet ac tradit ¹⁾). — Clemens Alex.: *Laudemus unum Patrem et Filium — una cum Spiritu S., qui unus est omnia, (πάρτα τῶ ἐν), in quo omnia, per quem omnia sunt unum (δι' οὗ τὰ πάντα ἐν)* ²⁾). — Origenes: *Idem namque ipse, qui ibi Trinitas propter distinctionem personarum, hic unus Deus intelligitur pro unitate substantiae* ³⁾). Et: *Sunt enim nonnulli, qui annuntiant quidem et praedicant de Patre, et Filio, et Spiritu S.; sed non sincere, non integre: ut sunt omnes haeretici, qui Patrem quidem, et Filium et Spiritum S. annuntiant; sed non bene, neque fideliter annuntiant. Aut enim male separant Filium a Patre, ut alterius naturae Patrem, alterius Filium dicant: aut male confundunt, ut vel ex tribus compositum Deum, vel trinae tantummodo appellationis in eo esse vocabulum putent. Qui autem bene annuntiat bona, proprietates quidem Patri, et Filio, et Spiritui S. suas cuique dabit; nihil autem diversitatis esse confitebitur in substantia vel natura* ⁴⁾). — Dionysius Alex.: *Nos indivisibilem Unitatem in Trinitatem dilatamus, et Trinitatem iterum, quae imminui nequit, in Unitatem contrahimus* ⁵⁾). — Hippolytus: *Oeconomia consensionis redigitur ad unum Deum: unus enim est Deus, qui mandata, Pater; qui obedit, Filius; qui docet scientiam, Spiritus S. Pater, qui est super omnia, Filius per omnia, Spiritus S. in omnibus. Aliter Deum unum intelligere non possumus, nisi vere Patri et Filio et Spiritui S. credamus* ⁶⁾). — Cyrillus Hierosol. *Spes nostra est in Patrem, et Filium et Spiritum S. Non tres deos annuntiamus; verum cum S. Spiritu, per unum Filium, unum Deum praedicamus. Indivisa est fides, inseparabilis pietas. Neque separamus S. Trinitatem, neque confusionem facimus* ⁷⁾). — Gregorius Naz.: *Patrem igitur, et Filium, et Spiritum*

¹⁾ Cont. haer. l. 1. c. 10. n. 1. 2. p. 48 s.

²⁾ Paedag. l. 3. c. 12. Opp. T. 1. p. 311. Cf. l. 1. c. 6. p. 112 ss.

³⁾ In Cant. l. 3. 2, 9. Opp. T. 3. p. 84. c. 1. A.

⁴⁾ Comm. in Epist. ad Rom. l. 8. n. 5. T. 4. p. 626. c. 2. Cf. l. 7. n. 13. p. 612 c. 2. In Exod. Hom. 9. n. 3. T. 2. p. 163. c. 2. E. De princ. Praef. n. 4. T. 1. p. 47. In Num. Hom. 11. n. 8. T. 2. p. 310. c. 1. D. In Jer. Hom. 18. n. 9. T. 3. p. 251.

⁵⁾ Athanas. De sent. Dionys. n. 17. Opp. T. 1. P. 1. p. 255.

⁶⁾ Cont. Noët. n. 14. In Galland. Bibl. PP. T. 2. p. 461 s.

⁷⁾ Cat. 16. c. 4. Opp. p. 244 s.

tum S. adoramus, proprietates (ιδιότητας) quidem distinguentes, divinitatem autem copulantes (ἐνοῦντας τὴν Θεότητα) ¹⁾. Neque Filius est Pater, (unus enim est Pater), sed quod Pater: nec Spiritus S. est Filius, quia ex Deo est (unus enim unigenitus), sed hoc quod Filius. Tria haec unum, si divinitatem (Θεότητα) spectes, et unum tria, si proprietatum rationem habeas ²⁾. — Basilii: Unus Deus et Pater, unus Deus et Filius, non Dii duo, cum Filius identitatem (ταυτότητα) habeat cum Patre ³⁾. Et: Ubicunque Trinitatem conjunximus, noli velut unius rei indivisae partes tres animo tibi fingere (impia est enim haec cogitatio), sed trium incorporeorum perfectorum essentiam communem atque individuum intellige ⁴⁾. — Gregorius Nyss.: Dominus Christus — has voces apponit, ratus, si nos in Patris, et Filii, et Spiritus S. appellatione permaneamus, ad ejus, quod vere est, cognitionem sufficere, quod quidem et unum est, et non unum. Nam essentiae (οὐσίας) quidem ratione unum est, quocirca et in unum nomen respicere Dominus edixit: sed secundum eas proprietates, quibus divinae personae dignoscuntur, in Patris, et Filii et Spiritus S. fidem distinctum est, inseparabiliter in partes distributum et inconfuse unitum ⁵⁾. — Chrysostomus: Oportet et impiam illius (Sabellii) confusionem, et furiosam hujus (Arii) divisionem aversari et fugere, divinitatem Patris, Filii et Spiritus S. unam confitentes, tres autem hypostases adjicientes ⁶⁾. — Cyrillus Alex.: In Patre, ait, ipse existit, et unum cum ipso identitate naturae (τῇ ταυτότητι τῆς φύσεως) ⁷⁾. — Tertullianus: Perversitas haec damnanda est, quae se existimat, meram veritatem possidere, dum unicum Deum non alias pulat credendum, quam si ipsum eundemque et Patrem et Filium et Spiritum S. dicat: quasi non

¹⁾ Or. 29. Opp. T. 1. c. 341. B.

²⁾ Or. 37. c. 530. Cf. Or. 13. c. 190. B. C. Or. 12. c. 183. B. C. 189. Or. 49. c. 653. Or. 40. c. 593. B. Or. 23. c. 381. A. B.

³⁾ Cont. Sabellian. n. 3. Opp. T. 2. p. 191.

⁴⁾ Ib. n. 5. p. 193.

⁵⁾ Cont. Eunom. l. 1. Opp. Par. 1615. T. 2. p. 3.

⁶⁾ De Sacerd. l. 4. n. 4. Opp. T. 1. p. 410. A.

⁷⁾ Cont. Julian. l. 8. Opp. T. 6. P. 2. p. 265. E. Cf. Epist. ad Monach. T. 5. P. 2. p. 6. B.

sic quoque unus sit omnia, dum ex uno omnia, per substantiae scilicet unitatem; et nihilominus custodiatur oeconomiae sacramentum, quae unitatem in trinitatem disponit, tres dirigens, Patrem, et Filium, et Spiritum S. Tres autem non statu, sed gradu; nec substantia, sed forma; nec potestate, sed specie: unius autem substantiae, et unius status, et unius potestatis; quia unus Deus, ex quo et gradus isti et formae et species in nomine Patris et Filii et Spiritus S. deputantur. Quomodo autem numerum sine divisione patiantur, procedentes retractatus demonstrabunt ¹⁾. — Cyprianus: Ipse Christus gentes baptizari jubet in plena et adunata Trinitate ²⁾. — Dionysius Rom.: Illius (Sabellii) in eo consistit impietas, quod dicat Filium esse Patrem, et vicissim: illi autem tres Deos quodammodo praedicant, cum sanctam unitatem in tres diversas hypostases inter se omnino dividunt. Necesse est enim divinum Verbum Deo universorum esse unitum, et Spiritum S. in Deo manere et habitare, ac denique Trinitatem in unum, quasi in quemdam verticem, Deum universorum omnipotentem, reduci et colligi ³⁾. — Hilarius: Baptizantur in nomine Patris et Filii et Spiritus S., sed, quorum est una divinitas, sit una largitio; nomenque Trinitatis unus est Deus ⁴⁾. — Ambrosius: Nos Patrem et Filium et Spiritum S. confitemur; ita ut in Trinitate perfecta et plenitudo sit divinitatis, et unitas potestatis ⁵⁾. — Hieronymus: Ter mergimur, ut Trinitatis unum appareat Sacramentum. Et non baptizamur in nominibus Patris, et Filii, et Spiritus S., sed in uno nomine, quod intelligitur Deus ⁶⁾. — Augustinus: Credimus, et teneamus, et fideliter praedicamus, quod Pater genuerit Verbum, hoc est, Sapientiam, per quam facta sunt omnia, unigenitum Filium, unus unum, aeternus coaeternum, summe bonus aequaliter bonum; et quod Spiritus S. simul et Patris et Filii sit Spiritus, et ipse consubstantialis et coaeternus

¹⁾ Adv. Praez. n. 2. Opp. V. 2. p. 405. Cf. n. 12. p. 415 s.

²⁾ Epist. 73. ad Jubaj. n. 12. Opp. V. 1. p. 222.

³⁾ Epist. cont. Sabell. Ap. Athanas. De Syn. Nic. decr. n. 26. Opp. T. 1. p. 231.

⁴⁾ Comm. in Matth. c. 33. n. 3. Opp. T. 1. c. 811. Cf. In Ps. 122. n. 7. T. 1. c. 442 s. De Trinit. l. 4. n. 42. T. 2. c. 101 s.

⁵⁾ De fid. l. 1. c. 1. n. 10. Opp. T. 2. c. 425 s.

⁶⁾ In Epist. ad Ephes. 4, 5—6. Opp. T. 7. c. 670.

*ambobus: atque hoc totum et Trinitas sit propter proprietatem personarum, et unus Deus propter inseparabilem divinitatem, sicut unus omnipotens propter inseparabilem omnipotentiam: ita tamen, ut etiam, cum de singulis quaeritur, unusquisque eorum et Deus et omnipotens esse respondeatur; cum vero de omnibus simul, non tres dii vel tres omnipotentes, sed unus Deus omnipotens; tanta ibi est in tribus inseparabilis unitas, quae sic se voluit praedicari ¹⁾. Qui pulchre quoque eloquitur, quae de Deo adhibentur nomina, ejus infinitae essentiae minime esse adaequata, quum ait: *Loquendi causa de ineffabilibus, ut fari aliquo modo possemus, quod effari nullo modo possumus, dictum est a nostris Graecis una essentia, tres substantiae: a Latinis autem una essentia, tres personae* ²⁾. — *Dictum est tamen: tres personae, non ut illud diceretur, sed ne taceretur* ³⁾. — Atque Leo M.: *In Trinitate divina enim nihil dissimile, nihil impar est: et omnia, quae de illa possunt substantia cogitari, nec virtute, nec gloria, nec aeternitate discretu sunt. — Omnia quae habet Pater, habet et Filius, habet et Spiritus S.: nec unquam in illa Trinitate non fuit ista communio: quia hoc est ibi omnia habere, quod semper existere. Nulla ibi tempora, nulli gradus, nullae differentiae cogitantur. — Ideo enim hanc beatam Trinitatem unum confitemur Deum, quia in his tribus personis nec substantiae, nec potentiae, nec voluntatis nec operationis est ulla diversitas* ⁴⁾. —*

C. Fidem eandem in Deum in personis trinum, in substantia vero unum denique praedicant, ut supra jam ostendimus, omnia Symbola in Ecclesia usitata, enucleatius exponunt Concilia. Sic Concilium Constantinopolitanum II. a. 553. ait: *Si quis non constetur Patris, et Filii, et Spiritus S. unam naturam sive substantiam, et unam virtutem et potestatem, Trinitatem consubstantialem, unam*

¹⁾ *De civ. D. l. 11. c. 24. Opp. T. 7. c. 290. Cf. c. 10. n. 1. c. 279. De Trinit. l. 1. c. 4. n. 7. T. 8. c. 753. l. 5. c. 8. n. 9. c. 837. l. 7. c. 2. n. 4. c. 855. 857 ss. l. 15. c. 23. n. 43. c. 996. Cont. Maximin. l. 2. c. 10. c. 697 ss. Epist. 170. T. 2. c. 608 ss.*

²⁾ *De Trinit. l. 7. c. 4. n. 7. c. 857 s.*

³⁾ *Ib. l. 5. c. 9. n. 10. c. 838.*

⁴⁾ *Serm. 73. n. 3. Opp. p. 155 s.*

deitatem in tribus subsistentiis, sive personis adorandam (τριάδα ὁμοιούσιον, μίαν θεότητα ἐν τρισὶν ὑποστάσεων, ἥγουν προσώποις προσκυνούμενῃ); *talis anathema sit* ¹⁾. — Concilium Nic. II. a. 787.: *Credimus Trinitatem inconditam, indivisam, incomprehensibilem, incircumscriptam: eandem totam ac solam latria colendam, et adorandam, et venerandam: unam deitatem, unam dominationem, unam potestatem, unum imperium et potentiam, quae a personis dividitur indivise, et substantia copulatur divise* (τῇ οὐσίᾳ συνάπτεται διηρημένως) ²⁾. — Et Concilium Lateran. IV. a. 1215.: *Firmiter credimus, et simpliciter constemur, quod unus solus est verus Deus, aeternus, et immensus, omnipotens, incommutabilis, incomprehensibilis et ineffabilis, Pater, et Filius, et Spiritus S.; tres quidem personae, sed una essentia, substantia, seu natura simplex omnino. Pater a nullo, Filius autem a solo Patre, ac Spiritus S. ab utroque pariter, absque initio semper, et fine. Pater generans, Filius nascens, et Spiritus S. procedens; consubstantiales et coaequales, coomnipotentes et coaeterni, unum universorum principium. — Haec S. Trinitas secundum communem essentiam individua, et secundum proprietates discreta — doctrinam humano generi tribuit salutarem* ³⁾. — *Nos autem* (opposite ad errores Abbatis Joachim), *sacro et universali Concilio approbante, credimus et constemur cum Petro (Lombardo), quod una quaedam summa res est, incomprehensibilis quidem et ineffabilis, quae veraciter est Pater, et Filius, et Spiritus S., tres simul personae; ac singulatim quaelibet earundem. Et ideo in Deo Trinitas est solummodo, non quaternitas: quia quaelibet trium personarum est illa res, videlicet substantia, essentia, sive natura divina, quae sola est universorum principium, praeter quod aliud inveniri non potest. Et illa res non est generans, neque genita, nec procedens: sed est Pater, qui generat, Filius, qui gignitur, et Spiritus S., qui procedit: ut distinctiones sint in personis, et unitas in natura. Licet igitur alius sit Pater, alius Filius, alius Spiritus S., non tamen aliud: sed id quod est Pater, est Filius et Spiritus*

¹⁾ C. 1. Mansi, Coll. Conc. T. 9. c. 375.

²⁾ Act. 4. Decret. Ib. T. 13. c. 130.

³⁾ C. 1. De fid. Cath. Ib. T. 22. c. 981.

tus S., idem omnino: ut secundum orthodoxam, et Catholicam fidem consubstantiales esse credantur. Pater enim ab aeterno Filium generando, suam substantiam ei dedit, juxta quod ipse testatur: „Pater quod dedit mihi, majus est omnibus.“ Ac dici non potest, quod partem suae substantiae illi dederit, et partem retinuerit ipse sibi: cum substantia Patris indivisibilis sit, utpote simplex omnino. Sed nec dici potest, quod Pater in Filium transtulerit suam substantiam generando, quasi sic dederit eam Filio, quod non retinuerit eam sibi: alioquin deesset esse substantia. Patet ergo, quod sine ulla diminutione Filius nascendo substantiam Patris accepit, et ita Pater et Filius habent eandem substantiam, et sic eadem res est Pater et Filius, nec non Spiritus S., ab utroque procedens ¹⁾.

Observ. Licet doctrina de SS. Trinitate per revelationem Christianam demum hominibus perfecte innotuerit: non erat tamen omnibus, qui ante Christum vixerant, prorsus incognita. Patriarchis enim et Prophetis, nec non aliis viris sanctitate conspicuis, quibus datum erat quasi ex specula in venturum Messiam prospicere, patefactio mysterii SS. Trinitatis denegari non potuit, sine qua ipsos conditio futuri Sospitatoris ejusque regni, quod erat conditurus, prorsus latere debuisset, quamvis reliquis Judaeis haud esset concessa, ne scilicet iisdem, utpote populo rudi et ad idololatriam propenso, gravior sarcina ingereretur ²⁾. Sicut enim sol exortu suo lucem terris afferens, non eo ipso, quo oritur, puncto plenum ac perfectum efficit diem, sed quibusdam illuminandi gradibus et incrementis: sic Deū divinarumque rerum cognitio non se tota repente permisit humanis ingeniis, sed paulatim pro captu temporum explicata, novis accessio- nibus pervenit ad summum. Hinc et sat clara indicia plurium personarum in divinitate, speciatim Filii Dei, verum etiam Spiritus S. in libris A. F. occurrunt, licet cum iis, quae in N. F. adsunt, nonnisi a longe comparari queant. Huc referuntur a SS. Patribus omnia illa loca, in quibus Angelus Jehovae commemoratur, qui modo cum יְהוָה, modo cum אֱלֹהִים aut אֱלֹהִים commutatur ³⁾. Porro effata: *Faciamus hominem ad imaginem, et similitudinem nostram* ⁴⁾. — *Et ait (Dominus Deus): Ecce Adam quasi unus*

¹⁾ Ih. c. 2. c. 983 s.

²⁾ Cf. Matth. 13, 17. Joan. 8, 56. — Epiph. *Haer.* 5. n. 5. Opp. T. 1. p. 18. — Cyrill. Alex. *Cont. Julian.* l. 1. Opp. T. 6. P. 2. p. 18 s. — Theodoret. *De curat. graec. affect.* *Serm.* 2. Opp. T. 4. p. 496 ss.

³⁾ Gen. 16, 7. 13. 31, 11—16. 19, 24. 22, 11—16. Jud. 6, 11—16. 20—23.

⁴⁾ Gen. 1, 26. Cf. 11, 7. Is. 6, 3.

ex nobis factus est ¹⁾. — *Unus est altissimus Creator omnipotens, et Rex potens, metuendus nimis, sedens super thronum illius, et dominans Deus. Ipse creavit illam (Sapientiam) in Spiritu S.* ²⁾. — *Numquid ego, qui alios parere facio, ipse non pariam?* dicit Dominus: *si ego, qui generationem caeteris tribuo, sterilis ero* ³⁾? — *Dominus dixit ad me (Messiam): Filius meus es tu, ego hodie genui te* ⁴⁾. — *Dilexisti justitiam, et odisti iniquitatem: propterea unxit te Deus, Deus tuus oleo laetitiae prae consortibus tuis* ⁵⁾. — *Dixit Dominus Domino meo: Sede a dextris meis.* — *Dominus, יְיָ אֱלֹהֵינוּ, a dextris tuis confre-*

git in die irae suae reges ⁶⁾. — *Dominus possedit me (Sapientiam) ab initio.* — *Nisi tu dederis sapientiam, et miseris Spiritum S. tuum de altissimis* ⁷⁾. — *Effundam Spiritum meum super omnem carnem, et prophetabunt filii vestri* ⁸⁾. — *Et Spiritum tuum bonum dedisti, qui doceret eos* ⁹⁾. Et alia ¹⁰⁾.

Facta autem Patriarchis atque Prophetis mysterii SS. Trinitatis revelatione, et etiam in SS. Litteris reposita, non poterat non fieri, ut ipsum pedetentim in vulgus innotesceret. Judaeos tempore Christi, Messiam Filium Dei fore, persuasum habuisse, et ideo plures personas divinas saltem implicite credidisse, jam ex ipsa argumentandi ratione a Christo Domino contra eosdem adhibita colligere licet. Inde quoque explicatur, quomodo in paraphrasis Chaldaicis Verbum *ἰσοσταυρόν*, in Talmude et in scriptis antiquorum Rabbiorum tres personae in una divina essentia commemorantur.

¹⁾ Gen. 3, 22.

²⁾ Eccl. 1, 6.

³⁾ Is. 66, 9.

⁴⁾ Ps. 2, 7.

⁵⁾ Ps. 44, 8.

⁶⁾ Ps. 109, 1. 5.

⁷⁾ Prov. 8, 22. — Sap. 9, 10.

⁸⁾ Joël. 2, 28.

⁹⁾ Neh. 9, 20.

¹⁰⁾ Gen. 41, 38. Jud. 3, 10. Ps. 50, 13. 142, 10. Sap. 12, 1. Cf. Justin. *Dial. c. Tryph.* 61—62. p. 165 ss. — Euseb. *Praep. Evang.* l. 7. c. 5. p. 303. — Tertullian. *Adv. Prae.* n. 12. Opp. V. 2. p. 415. — Ambros. *De fid.* l. 1. c. 3. Opp. T. 2. c. 447 ss. — Augustin. *De Trinit.* l. 6. c. 1. Opp. T. 8. c. 843 s. — Gregor. M. *Mor.* l. 19. c. 3. n. 3. Opp. T. 1. c. 605. In *Ezech.* l. 2. hom. 4. n. 7. T. 1. c. 1345. *Hom.* 9. n. 11. c. 1409. *Hom.* 4. n. 9. c. 1346 s.

SS. Patres quidem, prout et alii viri docti recentiores, sibi deprehendere videntur vestigia quoque hujus veritatis apud Indos, Persas et alios populos, nec non apud philosophos, nominatim apud Pythagoram, qui numerum ternarium sacrosanctum et naturae mysterium existimat, et Platonem, qui distinguit Patrem, mentem paternam seu λόγον, mundi opificem, atque animam, qua cuncta contineantur, non tamen Patri aequales, sed eo inferiores ¹⁾). Nec est, cur id negetur, etsi fateri debet, Patres saepe consensum placitorum sapientium gentilium justo plus ursisse, et nonnunquam exaggerasse, ut eo facilius paganorum animos religionis Christianae mysteriis conciliarent. Recentiorum autem conaminibus contraria consilia subesse, in propatulo est, unde et longe petita, et saepe ridicula congerunt. Non posse tamen doctrinam Christianam de SS. Trinitate ex ejusdem vestigiis, quae apud Gentiles et philosophos inveniuntur, repeti, jam ex eorum collatione cum illa, quae specie externa quidem iisdem convenit, re ipsa autem prorsus est diversa, nec non jam inde cognoscitur, quod haecce vestigia indiciis in SS. A. T. LL. occurrentibus longe obscuriora sint. Omnia potius, quae hoc respectu in variis religionis systematibus populorum et in scriptis philosophorum deprehenduntur, tanquam reliquiae revelationis originariae, protoparenti a Deo factae, atque per ejus posteros ad omnes gentes propogatae, quamvis vario modo immutatae, atque etiam foedatae, sunt consideranda, aut etiam ex doctrina Judaeorum eorumque sacrorum Librorum sunt derivata. Nam philosophos graecos, nominatim Platonem libros Moysis saltem novisse, alibi ostendimus, et ipsum exordium Timaei cum Genesi comparatum demonstrat ²⁾).

§. 52. Mysterium SS. Trinitatis.

Ex dictis itaque constat, juxta SS. Litteras, divinam Traditionem antiquissimae Ecclesiae, atque solennem Magisterii ecclesiastici definitionem, revera tres esse divinas personas unius ejusdemque numero substantiae divinae. Quoniam ergo in uno

¹⁾ Cf. Justin. *Cohort. ad Gent.* n. 14. ss. Opp. p. 17 ss.

²⁾ Cf. Euseb. *Praepar. Evang.* l. 11. c. 9. p. 523 s. — Theodoret. *De princ. Serm.* 2. Opp. T. 4. p. 498 ss. — Huet. *Alnet. quaest. de concord. rat. et fid.* l. 1. c. 3. de SS. Trinit. Ven. 1761. p. 69 ss. — Gfrörer *Geschichte des Urchristenthums.* Stuttg. 2. Th. p. 87. 1. Th. p. 245 s. — Stollberg, *Geschichte der Rel. Jesu.* 1. Th. 5. B. — Wisemann, *Zusammenhang der Ergebnisse der wissensch. Forschung mit der geoffenb. Religion.* Regensburg. 1841. p. 479.

Deo trina datur hypostasis: appellatur quoque Deus triunus, atque divinitas dicitur Trinitas, quasi Triunitas.

Veritatem hanc revelationi divinae in acceptis referendam esse, et hoc respectu ad mysteria pertinere, consentiunt omnes. Verum utrum valeat per rationem sufficienter probari, adeoque num et hoc sensu mysterium vocanda sit, nec ne, nostris temporibus quaestio denuo resuscitata est. Sunt enim alii, qui, ut ita dicam, ab usu rationis in omni, et praecipue in augusto SS. Trinitatis mysterio, omnium altissimo, abstinendum esse censeant, et qui ideo ad SS. Litteras provocent, secundum quas *Deum nemo vidit unquam*¹⁾, porro ad SS. Patres, qui doceant, *sic Trinitatem excelsere omne, quod cogitare vel sapere possumus, sicut superat, quod sumus*²⁾, et propterea *sacramentum hoc magnum esse, et quidem venerandum, non scrutandum*³⁾, nec non ad Gregorium XI., qui propositionem Lulli, omnia mysteria per rationem posse evidenter probari, condemnavit, et Pauli V., qui similem de SS. Trinitate atro stigmate notavit. Alii autem oppositam sententiam tenent, defendentes, revelationem non esse quidem infra, sed neque supra rationem, verum pro ratione, et hinc ejus etiam veritates, quae communiter mysteria audiunt, ei prorsus impervias esse laud posse, sed ipsam potius ad illa investiganda, uti sua natura impelli, ita pro sua dignitate tuenda teneri, donec perfectam eorum cognitionem, i. e. tum claram ac perspicuam omnino notionem, tum internae necessitatis certam ac inconcusam notitiam sibi comparaverit. Eapropter ipsos SS. Patres, uti Basilium M., utrumque Gregorium, Joannem Damascenum, Augustinum et alios ejusmodi profundiori veritatum revelatarum investigationi sese dedere haud fuisse veritos. Quod eo magis esse necessarium, quoniam non nisi hac singularem veritatum fidei pertractatione disciplina nostra nomine scientiae condecorari mereatur.

Interim tamen illi vera via incedere videntur, qui ostensa veritate mysteriorum divina argumentis positivis, ex fontibus divina auctoritate pollentibus depromptis, veritatem quoque, quam dicunt

¹⁾ Joan. 1, 18. Cf. Matth. 11, 27. 1. Cor. 2, 6 ss.

²⁾ Fulgent. *Ad Trisim.* l. 2. c. 1. Opp. p. 88. Cf. Athanas. *In illud*, *Omnia mihi tradita sunt*, etc. n. 6. Opp. T. 1. p. 107. *Epist. ad Serap.* 1. n. 17—19. T. 1. P. 1. p. 665 ss. — Ambros. *De fid.* l. 1. c. 10. Opp. T. 2. c. 456. — Augustin. *De Symb. Serm. ad Catech.* c. 9. Opp. T. 6. c. 574. C. Non videtur tamen genuinus Augustini foetus esse.

³⁾ Bernard. *De Cons.* l. 5. c. 8. 18. Opp. c. 459.

internam, i. e. eorum necessitatem, ostendere pro modulo viri-um finitarum rationis nostrae satagunt; nequaquam autem rati, ac si mysteria illa tam clare ac certo per rationem possint evinci, ut ipsa auctoritas divinae revelationis, ni pro omnibus fidelibus, saltem pro viris perspicacioribus ac in philosophia instructoribus superflua fiat, quin tamen timeant, ne propterea injuriosi sint in rationem humanam; quum revelatio quidem eo sensu pro ratione data sit, ut illam apprehendamus, i. e. sensum singularum sententiarum assequamur, et de earum origine divina nobis persuadeamus, minime autem eas comprehendamus, seu ipsam earum indolem ac necessitatem internam perspectam omnino habeamus, quod ne in rebus naturae quidem nobis concessum est. Hac quoque ratione, et non alia, laudati SS. Patres, et post eos Theologi scholastici, aliique usque ad nostra tempora divina mysteria scrutati, et ea sensui ac intelligentiae nostrae propius admoveere conati sunt; quum ipse Apostolus fassus sit: *Videmus nunc per speculum in aenigmate: tunc autem facie ad faciem. Nunc cognosco ex parte: tunc autem cognoscam, sicut et cognitus sum* ¹⁾. Et quidem:

I. Alii dicunt, Trinitatem in rerum natura adumbratam ubique conspici, ita ut conclusio in promptu sit, *ὅμοιος* hunc creaturae impressum necessario *ἀρχιτυπος* in Creatore habere. Nam in tempore praeteritum, praesens et futurum, in spatio vero longitudo, latitudo et altitudo discernitur. Tria dantur rerum creaturarum genera, natura spiritualis, corporea atque humana, ex utraque quasi communis. In corporibus coelestibus dantur stellae fixae, planetae et cometae; in terra alia corpora sunt firma, alia liquida, alia vero expansibilia, uti loquuntur; et ipsa imponderabilia, quae vocantur, ad lucem, calorem et vim electro-magneticam revocantur. Triplex porro distinguitur regnum naturae, fossilium, plantarum et animalium; atque in quavis planta radix, stirps et corona, prout in quovis animali caput, truncus et partes extremae discernuntur. Ipsi denique animae triplex inest facultas, cognoscendi, appetendi ac felicitate fruendi, atque in ea praeter *σῆμα*, cognitio et amor sui deprehenditur. Ut alia de igne, splendore et lumine, de triplici aquae proprietate, de fonte, fluvio et haustu, de sono quolibet vocis et chordae, in quo tonus principalis, eidemque consonantes tertius et quintus percipiuntur, de tribus partibus iudicii, ratiocinii, etc. omittamus.

¹⁾ 1. Cor. 13, 12.

Hisce autem quidem excitari possumus, quo assensum mysterio de Deo triuno alacrius praebeamus; et ex iis illud forsitan suspicari, minime autem, quum nequaquam ex ipsa indole substantiae divinae, sed tantum a rebus externis sint petita, prorsus probare licet.

Alii statuunt, foecunditatem inter perfectiones jam entium finitorum numerari, et ideo eo magis de Deo praedicandam esse; qui itaque, quum extra se sui aequalem producere non possit, quivis enim alius post unum Deum non est Deus, intra se foecundus sit necesse est. *Nefas est dicere*, ait Joannes Damascenus, *Deum naturali foecunditate caruisse. Foecunditas porro in eo posita est, ut quis ex se ipso, id est, ex propria substantia, prolem natura similem sui edat* ¹⁾. Et Cyrillus Alex.: *Si Deo ademeris Patrem esse: foecunditatem e divina natura sustuleris: ita ut perfectus nequaquam sit, cum generandi facultate careat. Documentum itaque perfectionis est foecunditas, et signum, quod Patrem perfectum esse ostendit, est Filius, qui ex ipso ab aeterno processit* ²⁾.

Hanc expositionem haud quaquam satisfacere, jam inde colligitur, quoniam tantum generationem Filii, nequaquam autem etiam processionem Spiritus S. explicat, ut taceamus, conclusionem a foecunditate naturarum finitarum, quae pereunt, ad ens infinitum, quod manet, haud legitimam aut firmam esse videri.

Alii in notione entis absolute actnosi, ceu quod Deus necessario mente concipi debeat, demonstrationem SS. Trinitatis deprehendisse sibi videntur. — Nam ens, ajunt, in genere quae tale ceu notio intelligentiae nostrae primigenia repraesentari aliter nequit, quam quod est determinata quadam ratione actuosum. Eadem notio sub se comprehendit a) subjectum; cui b) determinata illa ratio agendi sive actuositas inest, ex qua actus sive virtus activa procedit, adeoque determinatam actuositatem subjecto inhaerentem, attamen ab eo distinctam per relationem sibi oppositam; et c) actum procedentem a subjecto juxta determinatam actuositatem. Hanc generalem entis notionem fac adplicet enti absoluto, et habebis subjectum absolute actuosum; cui inest actuositas absoluta, a qua et illo procedit actus absolutus. — Quidquid absolutum cogitas, istud tibi aliter repraesentare non poteris, quam realiter existens. Ergo ens absolutum, ens

¹⁾ *De Ad. orth. l. 1. c. 8. Opp. T. 1. p. 133. B.*

²⁾ *Theos. Assert. 3. Opp. T. 5. P. 1. p. 37. D. E.*

perfectissimum cogitari a nobis haud quiverit sine tribus istis proprietatibus realiter distinctis et sibi necessario coëxistentibus. Hinc entis actuosissimi, Dei, tres eaeque individuae personae sive hypostases nobis perspicuae fiunt. Distingui, non autem separari debet absoluta actuositas ab absoluto subjecto, et virtute absoluta. Pater, Filius, et Spiritus S., hypostases individuae, igitur non tres, sed unum Deum efficiunt. Operationes cujusque personae uni eidemque Deo, non aequae autem reliquis duabus personis divinis conveniunt. Actio Patris qua personae non est actio Filii, et Spiritus S. etc. Filius qua persona divina humanam naturam assumere potuit, quin Pater vel Spiritus S. homo factus esse credatur; pari modo illabi in Apostolos, eosdemque docere dicimus Spiritum S., non personam Patris, non Filii ¹⁾).

Attamen in hacce ratiocinatione, quamvis plura, ut ita dicam, phaenomena in mysterio SS. Trinitatis explicari videantur, id, quod praecipuum rei est, haud ostenditur, nempe absolutam actuositatem atque absolutum actum necessario, ut subjectum absolute actuosum, esse supposita intelligentia et volentia, sui conscia, quibus itaque substantia divina communicari debeat, ut alia taceamus.

Alii sequentem in modum ratiocinantur: Das allerrealste, absolut vollkommenste Wesen kann unmöglich anders von uns gedacht werden, als in so fern es etwas Allerrealstes, absolut Vollkommenstes, und also von Ewigkeit her, das ist, vor aller Zeiten Anfang bewirkt — hervorbringt. Ein allerrealstes Wesen, ohne etwas Allerrealstes zu bewirken, ist ein Un-ding, ist ebenso wenig denkbar, als eine Ursache ohne Wirkung. Nun können wir aber ohne offenbaren Widerspruch mit uns selbst nur Ein absolut vollkommenes Wesen uns denken. Alles, was nicht Gott ist, ist beschränkt, hat Mangel an Realitäten, ist nicht absolut reel. Das Bewirkte, absolut Vollkommene kann daher nicht anders als in Gott subsistirend gedacht werden, es muß selbst Gott, Gott von Gott sein. —

Aus eben dem Grunde kann das Hervorgebrachte, Bewirkte, in Gott subsistirende absolut Vollkommenste nur dadurch als ein solches gedacht werden, daß es gleichfalls ein absolut Vollkommenstes durch eine ebenfalls immanente Handlung von Ewigkeit her als Gott von Gott, aus sich bewirkt und hervorbringt.

¹⁾ Cf. Klyppfel. *Inst. Theol. Dogm. op. et st. Greg. Thom. Ziegler.* Vienn. 1821. P. 1. T. 2. p. 50 s.

Da nun auf solche Weise auch dieß zweite Bewirkte, in Gott von Ewigkeit subsistirende absolut Vollkommenste, Gott von Gott ist; so ist es kein Zweifel, daß auch dieses Hervorgebrachte etwas absolut Vollkommenstes bewirken müsse, um von uns als Gott, als absolut vollkommen gedacht werden zu können. Weil aber der Begriff des Hervorbringens und des Hervorgebrachten, welcher bereits seine Vollständigkeit erreicht hat, nur deswegen in Gott gedacht werden muß, damit dieser als ein absolut vollkommenstes Wesen gedacht werden kann: so erreicht jetzt der Begriff des absolut vollkommensten Wirkens dadurch seine Vollständigkeit, daß dieß Dritte in der Gottheit die Ersten zwei, von welchen beiden es ausgeht, und in welchen beiden es subsistirt, in sich einige. Erst diese unendlich und absolut vollkommenste Einigung verschafft dem Ideal der Gottheit seine absolute Vollständigkeit. Denn wir denken in Gott bloß

a. die Idee aller Ideen d. i. alle höchsten Ideen, und

b. das Eine Subject, in welchem alle höchsten Ideen ihre Realität erhalten. Dieß sind die einzigen wesentlichen, gedachten Bestandtheile des höchsten Ideals der Gottheit. Nun hat es sich aber gezeigt, daß die Allerrealität der Gottheit unsern ursprünglichen Denkgesetzen gemäß nur in den besagten drei ewigen, absolut vollkommensten Subsistentien (*ὑποστάσεις*) des absolut vollkommensten Einen letzten Subjectes; dieß Eine der Gottheit aber bloß durch eine absolut vollkommenste Einigung; und diese nur als von einer absolut vollkommensten Subsistenz vollzogen von uns gedacht werden können. Rennt man überhaupt vernünftige Subjecte eben dieser vortrefflichen Eigenschaft wegen Personen; so können und müssen die drei Subsistentien der Gottheit κατ' εἶδος Personen genannt werden. Ebenso kann auch die Verschiedenheit derselben nicht richtiger angegeben und ausgedrückt werden, als wenn man die erste davon Vater, die zweite Sohn, und die dritte heiliger Geist nennt. Man muß sogar bekennen, daß diese Worte gerade in der Anwendung auf die drei göttlichen Personen ihre eigentlichste, oder besser zu reden, ihre einzig eigentliche und volle Bedeutung erhalten ¹⁾.

Verumtamen in hisce non dicitur, quod prae omnibus dicendum erat, quare Deus necessario tanquam aliquid realissimum seu absolute perfectum producens cogitandus sit; deinde non perspicitur, quare productio alterius suppositi haud sufficiat, et alia adhuc sit necessaria, quum in hoc producto, utpote infinite perfecto, infinita efficacia exhausta esse videatur; tum si sup-

¹⁾ Peutinger, Religion, Offenbarung und Kirche. Salzb. 1795. p. 378 ss.

positum alterum non sufficit, cur efficientia divina in tertio supposito finiatur, cujus eadem indoles est, ac secundi; nec non quomodo suppositum ex ambobus prioribus, et non potius tantum ex secundo, cui ex dictis soli originem debet, procedere dicatur; atque tandem quare secundum suppositum recte Filius, tertium autem Spiritus, secundum statutam hypothesin adpellandum sit, quum ex disputatis origo utriusque prorsus ejusdem indolis ac naturae esse videatur.

Alii iterum sic disserunt: So wie in dem Selbstbewußtsein des enblichen, menschlichen Geistes es drei Momente des Sages, Gegensages und Gleichsages gibt, wovon aber die beiden letzteren wegen der Bedingtheit unseres Geistes keineswegs substantial, sondern bloß phänomenisch sind: so muß auch in Gott, das absolute Sein, und daher die absolute Persönlichkeit, der sich nothwendig Selbstbewußte, sich selbst, und zwar, weil er unbedingt ist, nicht bloß im Phänomen, sondern unmittelbar als Prinzip gegenständlich werden, d. h. sich zum Gegensage verobjectiviren, da ohne diesen eine Selbstanschauung in Gott, die Grundbedingung des absoluten Selbstbewußtseins nicht gedacht werden kann, und sich dann in der gleichfalls substantialen, weil absolut vollkommenen Anschauung, die das Resultat Beider, des Sages und Gegensages ist, d. i. in dem, dem Sage und Gegensage vollkommen gleichen, und daher gleich wesenhaften und objectiven, von Beiden ausgehenden Gleichsage wiederfinden. Auf solche Weise gestaltet sich das göttliche Sein zu einem dreifachen durch die wechselseitige Beziehung, Entgegensetzung und Zurücknahme sich wissender Subjecte, oder Substanzen, dem Vater, (Sag), Sohne (Gegensag) und dem heil. Geiste (Gleichsag); wovon der Sohn und der heil. Geist sich nicht weiter gegenständlich zu werden brauchen, da sie, der Sohn am Vater, und der h. Geist an dem Vater und dem Sohne ihren Gegensatz haben.

Hiergegen dringen sich aber folgende Bedenken auf: Einmahl scheint das Fundament, worauf diese Erklärung und wissenschaftliche Rechtfertigung der christlichen Trinitätslehre basirt ist, der Festigkeit, weil der Wahrheit, zu entbehren. Denn nicht drei, sondern nur zwei Momente sind es, die man in dem menschlichen Selbstbewußtsein unterscheidet, da dieses das Wissen des Ichs um

¹⁾ Cf. Zuckrigl, *Wissensch. Rechtfertigung der christl. Trinitätslehre*. Wien, 1846. p. 242 ss. Affine est illud Leibnitii: *Pater intellectivum, Filius intelligibile, Spiritus S. intellectio. Defens. Trin. Opp. ed Dutena, Gen. 1768. T. 1. p. 14.*

sich selbst, und daher das Subject und Object in demselben Eines und Daselbe, ein nicht einmal im Gedanken sich Entgegengesetztes ist. Ja gerade hierdurch unterscheidet sich das Selbstbewußtsein, das Wissen um sich wesentlich von jedem andern Wissen um die Dinge außer uns, und läßt eben deshalb keine Uebertragung der Analogie von diesem auf sich selbst zu. — Dann gibt es in Gott keinesfalls eine Anschauung, die durch den Gegenstand bestimmt, also auch als durch diesen bedingt zu denken wäre, indem das Wissen Gottes eben so, als sein Sein, ein absolutes ist; vielmehr muß in Gott die Anschauung dem angeschauten Gegenstande stets als vorangehend, und dieser durch jene als bestimmt gedacht werden; so daß diesem gemäß nicht der Gleichsatz als hervorgehend aus dem Gegensatze, als vielmehr dieser aus jenem zu denken wäre; wodurch jedoch allerdings für obige Erklärungsweise nichts verloren ginge, vielleicht nur eine größere Annäherung an die kirchliche Anschauungsweise des Dogmas gewonnen würde. — Ferner ist wohl nach dieser Darstellung ersichtlich, wie drei Substanzen ¹⁾, d. h. Personen in Gott subsistiren, aber durchaus nicht anschaulich zugleich gemacht, wie alle Drei dieselbe numerisch Eine Wesenheit und Substanz sind, so daß der Gedanke an eine dreifache, gesonderte Substanz ganz nahe gelegt wird. Dagegen wird freilich ausdrücklich Protest eingelegt, wodurch aber zwar die Orthodorie des Willens bezeugt, doch nicht die Richtigkeit des Gedankens vermittelt wird. — Zu dem läßt sich nach der besprochenen Erklärung wohl denken, daß der Sohn an dem Vater seinen Gegensatz, und im heil. Geiste seinen Gleichsatz finde, doch für den heil. Geist, der an dem Vater und dem Sohne, von welchen er als Einem Prinzipie nach der Lyoner und Florentiner Synode ausgeht, seinen Gegensatz hat, bleibt kein Gleichsatz übrig, so daß er in diesem Systeme als eine unvollendete Person, weil nämlich mit unvollendetem Bewußtsein erscheint; abgesehen davon, daß der Umstand, der Vater wisse sich als Vater, der Sohn als Sohn und der heil. Geist als solcher, in diesem Systeme keine Erklärung findet. — Auch die processio Spiritus S. erscheint da-

¹⁾ Prout patroni hujus mysterium SS. Trinitatis explicandi modi de tribus substantiis in Deo, ita quoque de tribus principiis loquuntur (Cf. *Zutrigl*, l. c. p. 252 s.), quum tamen juxta doctrinam Ecclesiae in Deo tantum una substantia, et duo principia dentur, licet alio sensu vocibus hisce acceptis; attamen usus loquendi ecclesiasticus, solennibus definitionibus ac continuo multorum saeculorum usu consecratus, non est facile negligendus.

rin keineswegs als gerechtfertigt. Denn der Gleichsatz, durch den der Vater sich im Sohne findet, kann wohl als von diesem bedingt, keineswegs aber als von ihm ausgehend im Sinne der Kirche, und von ihm zugleich die göttliche Substanz empfangend, nach der gegebenen Erklärung erkannt werden; dann ist durchaus nicht gezeigt, daß die Synthese, durch welche der Sohn sich im Vater schauet, mit jener, wodurch der Vater im Sohne sich findet, eine und dieselbe sei, und sein müsse. — Endlich wird von den Vertheidigern dieses Systems von einer absoluten Ichheit, dem Einen, realen, absoluten, unmittelbaren Selbstbewußtsein Gottes von Sich als absolutem Urgrunde gesprochen, also nebst dem dreifachen Bewußtsein des Vaters, Sohnes und h. Geistes noch gleichsam ein Gesamtbewußtsein angenommen, woraus eine Quaternität der Personen in Gott hervorgehen würde, während doch das katholische Dogma nur eine Trinität Gottes kennt.

Alii tandem ita disputant: Deus tanquam ens perfectissimum perfectissima quoque sui cognitione seu scientia, qua simul omnia, quaecunque sunt, aut esse possunt, exhaurit, gaudeat necesse est. Cognitionis autem, quae etiam verbum mentis, sive interior sermo dicitur, tanquam interna in mente quasi expressa rei similitudo, eo verior ac perfectior est, quo magis cum re sua convenit, quo magis ad *ταυτότητα* ejusdem accedit; et hinc cognitio absolute perfecta est, quando rem prorsus exaequat objectiva, ut ajunt, aequalitate, seu cum ipsa re, cum suo objecto prorsus congruit ac coalescit, ei, ut loquuntur, identificatur. Quapropter in Deo necessario ejusmodi cognitio seu imago, cui essentia divina, quae utpote infinita ac simplicissima nullam multiplicationem, nullamque divisionem admittit, communicata ac identificata est, dari debet. — Porro Deus, qui in infinita sui cognitione semet qua summum bonum intuetur, se quoque, et quidem amore perfectissimo ac infinito amare debet. Amor vero eo est perfectior, quo cum perfectiori conscientia conjungitur, quo enim imprudentior, eo ignobilior; et ideo amor absolute perfectus erit, qui cum absolute perfecta conscientia est sociatus, quae nonnisi in essentia divina datur. Quapropter etiam amoris huic, ut ad absolutam perfectionem evehatur, natura seu substantia divina communicetur, eique identificetur necesse est.

Tali ergo modo existentia absoluta in Deo, intellectu ac voluntate infinita instructa, in absolutam sui cognitionem, eidem substantiae divinae, adeoque et eidem perfectissimo intellectui atque perfectissimae voluntati identificatam, et in amorem, ex utraque procedentem, sed pariter cum una substantia divina,

intellectu ac voluntate absolute perfecta unitum, abit. Sicque tres dantur in Deo subsistentiae relativae, tria supposita, sibi quidem opposita, intelligentia ac volentia, et hinc sui absolute conscia, seu tres personae, sed simul unius ejusdemque naturae, illis absque ulla multiplicatione identificatae. Seu, ut Klee scribit: Als absolutes Selbst, Leben, Geist, ist Gott dreipersonlich. Der unendlich Persönliche ist nach dem dreifachen Momente des Seins, Erkennens und Wollens dreifach personirt. Das absolute Selbst denkt auf die vollkommenste, somit substantiellste Weise sein Wesen, und ist so Vater, und die dem Vater wesensgleiche Selbst-Erkennniß oder Aussprache oder Wort ist der Sohn. Wäre das Wort nicht substantial, und dem Vater consubstantial, so wäre es nicht das seinem Grunde und Objecte gleiche, nicht das vollkommenste. Erst durch das Denken Seiner ist das absolute Selbst Vater, darum denkt es sich nicht als Vater, sondern dadurch, daß es sich denkt, ist es Vater. Der höchst vollkommene, mithin substantiellste Wechselwille (?) des Vaters und des Sohnes, als des vollkommensten Gleichbildes seines Wesens, ist der eben deshalb beiden consubstantiale heilige Geist ¹⁾.

Praeter haecce tria, existentiam, cognitionem atque amorem, atque praeter duas divinas vires, intellectum et voluntatem; per quas Deus, spiritus infinitus intra se producere potest, quarumque cujuslibet terminus, utpote in natura infinita positus, infinitus, totam virtutis divinae foecunditatem exhaurit, et ideo unicus in suo ordine est, in divinitate nihil datur ²⁾. Hinc neque Filius, licet intelligens, qua talis quidquam gignit aut producit, quum sit terminus, non principium intellectionis divinae, seque non tanquam gignentem, sed potius tanquam genitum scit, neque etiam Spiritus S., quamvis volens, ex eadem ratione, quoniam scilicet ipse terminus τῆς βουλῆσεως seu dilectionis divinae, nequaquam autem hujus, aut etiam intellectionis divinae principium est, et se tanquam procedentem, minime tanquam gignentem novit ³⁾. Eapropter neque pauciores, neque plures personae divinae dantur, aut dari possunt. Per Verbum Pater cognoscit tam

¹⁾ Kathol. Dogmatik. Mainz, 1835. 2. B. p. 109. s.

²⁾ Cf. Augustin. *Adv. Maximin.* l. 2. c. 12. n. 3. Opp. T. 8. c. 701.

³⁾ Cf. Athanas. *Or. 3. cont. Arian.* n. 4. Opp. T. 1. P. 1. p. 553. — Cyrill. Alex. *Comm. in Joan.* l. 1. c. 5. Opp. T. 4. p. 45 ss. — Augustin. *Tr. 21. in Joan.* n. 3. Opp. T. 3. P. 2. c. 457. *Tr. 40. n. 3* ss. c. 565 ss. et al.

se ipsum, quam caetera omnia, quorum expressa est imago Verbum, sed naturae divinae imprimis et essentiae; Filius seu Verbum per semetipsum intelligit; et etiam Spiritus S. quaecunque cognoscit, per idem Verbum comprehendit; neuter autem hoc producit, quia jam productum est. Ita quoque Spiritui S. alio amore opus non est, quo amet ipse, cum amor amore, hoc est, seipso amet, quidquid amari potest. Quare nec aliud Verbum, amoremve alium, sive alias personas existere necesse est, quamvis quaelibet persona intelligat et amet, quum eadem sit prorsus numero perceptio seu intellectio, eademque dilectio, licet notionibus distincta.

Hic triplex divinae substantiae seu naturae subsistendi modus, sive haec triplex Dei persona nequaquam est tantum accidens et ad essentiam divinam adjecta, sed ad naturam divinam pertinens, necessaria ac aeterna, quum in Deo nil accidens detur ¹⁾. Quapropter et una persona ab alia non procedit sola voluntate ac libertate, sed naturae divinae necessitate, quae ab ejus summa perfectione profluit, quaque fit, ut Pater intelligendo non possit non producere Verbum, et Pater et Filius sese (necessario ac libere) amando non possint non producere Spiritum S.; Deus enim semetipsum negare non potest. Quaevis porro harum subsistentiarum est in se infinita, cui nil deest, cum defectus tantum ibi obtineat, ubi enti alicui quidquam deficit, quod ei, ut in suo genere esset perfectum, praesto esse deberet.

Quoniam autem porro cognitio, seu ut loquuntur Scholastici, intellectio (*das Erkennen*) ad perfectam similitudinem cognoscentis exprimendam tendit, quod generationis est, dilectio autem non item, sed per modum impulsus vitalis fiat: explicatur, quare Deus, quatenus se cognoscens seu intelligens cogitatur Pater, cognitio autem, in qua se cognoscit Filius, ideo etiam Sapientia, imago Dei dictus ²⁾, atque amor, in quo se uterque diligit, Spiritus S., etiam charitas propterea, communio, unitas, amplexus cognominatus, nuncupatur ³⁾. Simul autem cognoscitur, quare Pater Filium, Pater et Filius Spiritum S. mittere dicatur, Pater autem non mittatur.

¹⁾ Cf. Augustin. *De Trinit.* l. 5. c. 5. n. 6. Opp. T. 8. c. 834 s. — Arnob. jun. *Conflict. c. Serapion.* In *Bibl. mnx. PP.* Lugdun. T. 8. p. 206. D. s.

²⁾ 2. Cor. 4, 4. Col. 1, 15. Hebr. 1, 3. Cf. Joan. 8, 19. 14, 9.

³⁾ Cf. Augustin. *De Trinit.* l. 15. c. 17. n. 29. 31. Opp. T. 8. c. 988 s. — S. Thom. 1. q. 39. art. 8. Opp. T. 20. p. 288 s.

Similia jam prisci Doctores habent. Sic Augustinus: *Est quaedam, inquit, imago Trinitatis ipsa mens, et notitia ejus, quod est proles ejus ac de se ipsa verbum ejus, et amor tertius, et haec tria unum atque una substantia. Nec minor proles, dum tantam se novit mens, quanta est; nec minor amor, dum tantum se diligit (mens), quantum novit, et quanta est¹⁾*. Et auctor tractatus *De cognitione verae vitae: Summus Pater Verbum suum se ipsum cogitando genuit. — Nihil aliud Spiritus S., quam amor Dei intelligitur, unde et Deus charitas dicitur. Constat aulem, quia Pater Filium ut se ipsum diligit, et item Filius Patrem tanquam se ipsum diligit; vita namque diligit se sapere, et iterum sapientia diligit se vivere: vitae autem et sapientiae probata est una essentia esse. Igitur dilectio vel amor, vel charitas, quod est Spiritus S., in substantia Patris et Filii coëssentialis existit; et ideo ab utroque aequaliter procedit²⁾*. Tali modo porro disseruerunt de SS. Trinitatis mysterio viri pii ac docti usque ad nostra tempora, uti nominatim Hugo³⁾ et Richardus a S. Victore⁴⁾, Anselmus⁵⁾, Card. de Cusa⁶⁾, Taulerus⁷⁾ et alii, e quorum numero solus adhuc audiatur Comes de Stolberg, qui sequentibus versibus canit sacrosanctum Trinitatis mysterium:

Bon Ewigkeit war
Und wird sein, der da ist.
Bon Ewigkeit schaute,
Wird schauen und schaut
Sein Wesen der Vater;
Seinem Schauen entströmte,
Wird entströmen, entströmt
Der ewige Sohn.

¹⁾ De Trinit. l. 9. c. 12. n. 18. Opp. T. 8. c. 888. Cf. l. 14. n. 7 ss. c. 951 ss.

²⁾ c. 17—18. Opp. Augustin. T. 6. append. c. 174. Cf. Basil. Hom. 16. in illud: *In princ. erat Verb. n. 3.* Opp. T. 2. p. 136 s. — Cyril. Alex. Thes. Assert. 6. Opp. T. 5. P. 1. p. 45. In Joan. l. 1. c. 5. T. 4. p. 45 ss. — Fulgent. *Ad Momin. l. 3. c. 7.* Opp. p. 49 s. — Petav. *De Trinit. l. 2. c. 11. n. 7. De theol. dogm. Antv. 1700. T. 2. p. 110.*

³⁾ *De Sacram. l. 1. p. 2. c. 21.* Opp. Rothom. 1648. T. 3. p. 508 s. *De Trinit. summ. per visib. agnit. c. 21. p. 51.*

⁴⁾ *De tribus appropriatis personis in Trinit. ad S. Bernard. Opp. p. 271. c. 2. C. D. De Trinit. l. 3. c. 2. 11—19. p. 231. 234—237.*

⁵⁾ *De ad. Trinit. c. 2.*

⁶⁾ *De docta ignorat. l. 1. c. 24.* Opp. Basil. 1565. p. 19 s. *De Berillo. c. 22 s. p. 275 s. Exercitat. l. 5. p. 497. De pace. fid. c. 7 s. De cribrat. Alcoran. l. 2. c. 3—6. p. 989. etc.*

⁷⁾ *Predigten, Frankfurt. 1826. 1. B. p. 90 s.*

Von Ewigkeit scholl,
 Wird schallen und schallt
 Des Vaters Gedanke: das Wort,
 Der ewige Sohn.

Von Ewigkeit glühte,
 Wird glühen und glüht
 Die Liebe des Vaters zum Sohne,
 Die Liebe des Sohnes zum Vater;
 Und Beiden entstrahlte,
 Wird entstrahlen, entstrahlt
 Der heilige Geist.

Nec non ipse Catechismus Romanus habet: *Oret, — ut aliquando in aeterna tabernacula receptus dignus sit, qui videat, quae tanta sit Dei Patris foecunditas, ut se ipsum intuens, atque intelligens, parem et aequalem sibi Filium gignat; quoque modo duorum idem plane et par charitatis amor, qui Spiritus S. est, a Patre et Filio procedens, Genitorem et Genitum aeterno, atque indissolubili vinculo inter se connectat; atque ita divinae Trinitatis una sit essentia, et trium personarum perfecta distinctio* ¹⁾).

Obser v. 1. Quodsi autem et hocce systemate mysterium SS. Trinitatis haud explicaretur: id certum ac evictum est, nullum mysterium illud continere cum principiis rationis repugnantiam. Haec enim tunc tantum locum haberet, si idem eodemque respectu de divinitate affirmaretur et negaretur, quod tamen nequaquam obtinet. Neque mysterio SS. Trinitatis obstat principium illud, quae sint eadem uni tertio, esse quoque eadem inter se. Nam quae sunt eadem uni tertio, sunt quidem etiam eadem inter se, attamen tantum eo respectu, quo sunt eadem uni tertio, non alio. Tres divinae personae autem sunt tantum eadem in divinitate, unde et sunt eadem hocce respectu, nempe sunt idem Deus, at non sunt idem in personalitate, unde non sunt quoque eadem illo respectu, seu non sunt eadem persona.

Quod porro ad illud attinet, cuilibet personae divinae, utpote ab aliis realiter distinctae, aliquid quidem inesse, quod aliis desit, sed simul aliquid deesse, quod his insit, et ideo nullam personam divinam esse absolute perfectam: observandum est, notiones illas, quibus singulae personae a se invicem differunt, non esse perfectiones absolutas, sed tantum relativas, quarum quaevis summa est in

¹⁾ Ed. Vienn. 1833. p. 19.

suo ordine attamen tantum in illa persona, cui competit, non autem etiam in altera, cui nec competere potest. Filiatio enim tantam habet excellentiam, quantam Paternitas, atque tantam habet necessitatem absolutam existendi in Deo, quantam haec. Similiter aequè perfectum est, in divinis esse Spiritum, ac Patrem et Filium. Insuper persona quaevis personis aliis necessario conjuncta cogitari debet, minime autem ab iis separata mente concipi potest, ita ut, habita ratione unionis hujus, nulla destituta esse videatur perfectione, quae illis inest. *Nam, ait Athanasius, sancta et beata Trinitas indivisa atque ipsa secum unita est, ita ut, ubi Patris mentio fiat, ejusdem statim Verbum, ac in Filio Spiritus debeat intelligi. Quod si Filius nominetur, similiter in Filio est Pater, nec extra Verbum Spiritus est* ¹⁾).

Observe. 2. Quo abstrusius et a communi hominum sensu longius remotum est SS. Trinitatis mysterium, eo major adhibenda cautio, ut castigata et adcurata sit nostra de eo loquendi ratio. Quod ut fiat, iis duntaxat utendum vocibus, quas aut Scriptura aut Traditio aut Ecclesiae totius vel scholae catholicae usus consecraverit, omnisque propterea verborum profana novitas hic caute est declinanda.

T i t u l u s III.

De processionibus ac notionibus divinis.

§. 53. Ingressio.

Cum attributa absoluta tribus in divinitate personis exaequo competant, conditiones temporis autem vel spatii in divinam substantiam non cadant: illud, quo ipsae a se differunt, nonnisi ex earum ad invicem relatione, in qua unice sibi opponuntur, repeti potest, quatenus una ab altera originem habet, seu una ab altera procedit. Nam quamvis Filius eandem cum Patre habeat divinitatem, et Spiritus S. eandem cum Patre et Filio; tamen Filius eam sibi communicatam accipit a Patre, et Spiritus S. a Patre et Filio; et hinc datur inter illos certus ordo, qui minime immutari potest, in formula Baptismi a Christo Domino expressus, dan-

¹⁾ *Epist. ad Serapion. n. 14. Opp. T. 1. P. 2. p. 663. A. Cf. Epiph. Haer. 73. n. 19. Opp. T. 1. p. 866. Ancor. n. 10. T. 2. p. 15 s. — Basil. Epist. 38. n. 4. Opp. T. 3. p. 118.*

turque certae notae, quae characterem cujusque personae proprium constituunt, quo ab invicem distinguuntur. Quapropter praecedentibus tractatibus necessario adhuc tractatus praesens de divinis processionibus ac notionibus adjicitur; quum, negatis hisce, personae divinae a se invicem haud differrent. Hinc, quae hic dicenda veniunt, minime sunt talia, quae solummodo ad vanam speculationem inserviant.

§. 54. Quid processio ac notio? — Doctrina Catholica.

Sub processione in genere intelligitur origo rei unius ab alia. Distinguitur autem processio duplex, externa et interna, seu, ut ajunt, ad extra et ad intra. Prior obtinet, quando res orta, seu producta extra causam suam existit, cui originem debet; altera vero, quae etiam immanens appellatur ¹⁾, locum habet, si id, quod oritur, principio, ad quod ejus origo est referenda, insitum manet. Ubi de processionibus divinis agitur, nonnisi de processionibus posteriori sensu acceptis sermonem fieri posse, quemadmodum etiam, ab eis omne tempus, omneque accidens secludendum esse, per se intelligitur.

Est ergo processio divina immanens, aeterna ac necessaria origo unius personae ab altera, et sumitur aut active (prolatio), tanquam actio divina, qua datur esse personae divinae, aut passive (emanatio), tanquam receptio τοῦ esse, quod datur per processionem activam.

A processione distinguitur missio, quae est unius personae per aliam prolatio, quatenus isthaec una ad effectum aliquem ad extra producendum vel productum refertur.

Sub notionibus (*ιδιώματα, ιδιότητες*) divinis intelliguntur notae, quae characterem cujusvis personae proprium, seu illud, quod uniuscujusque trium personarum proprietatem personalem constituit, exprimunt.

Doctrina autem Catholica de processionibus ac notionibus divinis haec est:

1. Pater a nullo alio principio procedit, seu est ingenuitus, ἀγέννητος;
2. Filius procedit a Patre, et quidem per generationem; et

¹⁾ Cf. Joan. 1, 18. 10. 38. 17, 10.

3. Spiritus S. procedit a Patre Filioque tanquam uno principio per simplicem processionem seu spirationem. Hinc proprium

1. Patri est, quod non sit genitus, neque procedens, (ἡ ἀγενεσία);

2. Filio, quod sit genitus, (ἡ γένεσις); et

3. Spiritui S., quod procedat (ἡ προέλευσις). Atque

1. Patri competit relate ad Filium Paternitas (πατρότης), Filioque relate ad Patrem Filiatio (υιότης); et

2. Patri Filioque relate ad Spiritum S. Spiratio activa (προβολή), huicque relate ad Patrem et Filium spiratio passiva (ἐκπόρευμα καὶ πρόβλημα) ¹⁾.

Caeterum quid proprie discriminis sit inter generationem et processionem seu spirationem, non enuntiamus, sequentes Augustinum, qui ait: *Quid inter nasci et procedere intersit, de illa excellentissima natura loquens, explicare quis potest? Non omne, quod procedit, nascitur, quamvis omne procedat, quod nascitur; sicut non omne, quod bipes est, homo est, quamvis bipes sit omnis, qui homo est. Hoc scio: distinguere autem inter illam generationem et hanc processionem nescio, non valeo, non sufficio. Ac per hoc, quia illa et ista est ineffabilis* ²⁾.

§. 55. Pater ingenuus, ἀγέννητος.

Pater ἀγέννητος est, i. e. uti increatus, ita quoque a nullo procedens, neque per generationem, neque per spirationem, sed ἀναρχος, sine principio necessario cogitandus. Summum dici potest natura divina proferre, sed tantum virtualiter paternitatem, quatenus ipsa ob infinitam suam excellentiam necessario exigit, ut subsistat in paternitate, filiatione et spiratione passiva.

Esse autem Patrem ἀγέννητον seu ἀναρχον,

A. SS. Litterae eo tradunt, quod ubique Patrem tanquam principium Filii et Spiritus S. exhibent, nunquam autem, et ne a longe quidem vice versa Filium aut Spiritum S. principium Patris esse indigitant, quin imo, quominus de eo cogitemus, ipsa Patris denominatione inibent.

B. SS. Patres autem Patrem diserte ἀνακτιον, sine principio, ut Gregorius Naz. ³⁾, ἀνύπόθεον, Deum, i. e.

¹⁾ Cf. J. Damascen. *Epist. de Trisag.* n. 28. Opp. T. 1. p. 497. C.

²⁾ *Adv. Maximin.* l. 2. c. 14. n. 1. Opp. T. 8. c. 703. D.

³⁾ *Arc. carm.* 1. v. 34. Opp. T. 2. c. 137. C.

personam divinam a se, uti Origenes ¹⁾, *πρῶτον Θεόν*, Deum principem quasi, uti idem Origenes ²⁾, adpellant, atque de ipso *ἀπερρέειν*, ut Justinus M. ³⁾, Clemens Alex. ⁴⁾, Origines ⁵⁾, Basilus M. ⁶⁾, Gregorius Naz. ⁷⁾, Gregorius Nyss, ⁸⁾, Cyrillus Alex. ⁹⁾, Eusebius Caes. ¹⁰⁾, Alexander Alex. ¹¹⁾ J. Damascen. ¹²⁾, et *ἀνάρχον*, ut Gregorius Naz. ¹³⁾, Basilus M. ¹⁴⁾, Joan. Damascenus ¹⁵⁾, Cyrillus Alex. ¹⁶⁾, *Canones Apostolorum* ¹⁷⁾, i. e. esse ingentum atque sine principio, praedicant, atque ipsum potius *ἀρχήν* principium, ultimam rationem, ut Athanasius ¹⁸⁾, Gregorius Naz. ¹⁹⁾, Basilus ²⁰⁾, et *ἐνότητα*, ultimam unitatem, ad quam omnia tandem revocentur, uti Irenaeus ²¹⁾, Epiphanius ²²⁾ et Augustinus ²³⁾, vocant.

C. Tandem Symbolum Athanasianum diserte habet: *Pater a nullo est factus, nec creatus, nec genitus*. Atque eapropter etiam, quia Pater principium Filii et Spiritus S. est, ipse autem sine principio, ubique in doxologiis et precum clausulis in primo loco positus deprehenditur.

¹⁾ In Joan. tom. 2. n. 2—3. Opp. T. 4. p. 50 s.

²⁾ Cont. Cels. l. 6. n. 47. 61. T. p. 669. 679.

³⁾ Apol. II. n. 6. Opp. p. 95. Apol. I. n. 49. p. 74. D.

⁴⁾ Strom. l. 6. c. 7. Opp. T. 2. p. 769.

⁵⁾ In Joan. t. 1. n. 27. T. 4. p. 31. De princ. l. 1. c. 2. n. 3. T. 1. p. 55.

⁶⁾ Epist. 38. n. 6. Opp. T. 3. p. 120.

⁷⁾ Or. 23. Opp. T. 1. c. 380. D.

⁸⁾ Cont. Eunom. l. 1. Opp. ed. Par. 1638. T. 2. p. 342.

⁹⁾ De Trinit. Dial. 2. Opp. T. 5. P. 1. p. 419.

¹⁰⁾ Demonstr. Evang. l. 1. c. 5. p. 11. D.

¹¹⁾ Ap. Theodoret. H. E. l. 1. c. 3. Opp. T. 3. p. 534. C.

¹²⁾ De fid. orthod. l. 1. c. 13. Opp. T. 1. p. 151.

¹³⁾ Or. 29. Opp. T. 1. c. 432. D. Arc. Carm. 2. v. 29. T. 2. c. 138. B.

¹⁴⁾ Epist. 38. n. 4. Opp. T. 3. p. 117. Epist. 52. n. 2. p. 145.

¹⁵⁾ De fid. orthod. l. 1. c. 9. T. 1. p. 143.

¹⁶⁾ Thes. Assert. 5. T. 5. P. 1. p. 35. B.

¹⁷⁾ Can. 41 (49). Coteler. PP. apost. V. 1. p. 449.

¹⁸⁾ De Syn. n. 50. Opp. T. 1. P. 2. p. 763. Cont. Arian. Or. 4. n. 1. T. 1. P. 1. p. 617.

¹⁹⁾ Or. 29. T. 1. c. 432. D.

²⁰⁾ Cont. Eunom. l. 2. n. 12. T. 1. p. 247.

²¹⁾ Cont. haer. l. 4. c. 20. n. 6. p. 255.

²²⁾ Haer. 73. n. 12. Opp. T. 1. p. 859.

²³⁾ Doctr. Christ. l. 1. c. 5. n. 5. Opp. T. 3. c. 6 s.

§. 56. Filius a Patre genitus.

Filius procedit a Patre, et quidem per generationem, eamque, ut per se intelligitur, aeternam, ita ut Pater semper, absque initio ac fine sit generans, Filiusque nascens, atque nascendo existat, et existendo nascatur. Porro procedit Filius a Patre, ut ab illo accipiat proprietatem personalem, nempe filiationem per productionem seu generationem, essentiam autem divinam per communicationem; quae quidem essentia necessario exigit communicari Filio, eique identificari. Quare essentia seu natura divina etiam, ut est in Filio, haud est producta, sed ens a se, et Filius tanta necessitate interna suae naturae existit, quanta Pater, atque tanta necessitate habet divinitatem, quanta Pater. Nam ipsa essentia divina tam postulat, esse in Filio et Spiritu S., quam esse in Patre, atque tam necesse est, Filium et Spiritum S. esse Deum, quam necesse est, Patrem esse Deum.

Gigni autem Filium a Patre,

A. docent SS. Litterae; nam

1. non tantum tradunt:

a. Filium a Patre esse. *Ego scio, ait Christus, cum: quia ab ipso sum, et ipse me misit* ¹⁾.

b. A Patre habere vò esse a se. *Sicut enim Pater habet vitam in semetipso: sic dedit et Filio habere vitam in semetipso* ²⁾. Unde et Pater dicitur omne iudicium ei dedisse ³⁾, opera ipsi demonstrare ⁴⁾ omnemque tradidisse potestatem ⁵⁾.

c. A Patre processisse ac missum esse, et quidem qua Deum, in quem missio per imperium, aut consilium, aut plane impetum nequaquam cadit, sed nonnisi ea, quae est per processionem, quatenus scilicet Filius et hoc habet a Patre, ut homo factus in mundum venerit. *Ego enim ex Deo processi, et veni, neque enim a me ipso veni, sed ille me misit* ⁶⁾. *Exivi a Patre, et veni in mundum* ⁷⁾. Et: *Qui non*

¹⁾ Joan. 7, 29.

²⁾ Joan. 5, 26.

³⁾ Joan. 5, 22.

⁴⁾ Joan. 5, 20. 36.

⁵⁾ Matth. 28, 18.

⁶⁾ Joan. 8, 42. Cf. 13, 3.

⁷⁾ Joan. 16, 28.

honorificat Filium, non honorificat Patrem, qui misit illum ¹⁾. Sed et

2. eum constanter Filium Dei adpellant ²⁾; filii autem ac patris relatio solummodo per generationem oritur. Atque

3. illum expressis verbis a Patre genitum esse enuntiant. *Qui locutus est ad eum (Christum): Filius meus es tu, ego hodie genui te* ³⁾. *Vidimus gloriam ejus, gloriam quasi (tanquam) Unigeniti a Patre.* ⁴⁾.

B. Haec quoque unanimes est doctrina SS. Patrum, quorum tamen nonnisi unicum citamus, utpote in re notissima, et ab omnibus admissa, videlicet Joannem Damascenum, qui scribit: *Deus — Verbum suum ex se genitum semper habet, non quod ad instar nostri non subsistat, et in aërem diffuat, sed in se consistens, vivumque et perfectum, atque ejusmodi, ut extra ipsum non progrediatur, sed in ipso semper existat* ⁵⁾.

C. Symbolum autem Nicaeno — Constantinopolitanum diserte habet: *Et in — Jesum Christum, Filium Dei unigenitum, ex Patre natum (γεννηθέντα) ante omnia saecula, Deum de Deo, lumen de lumine, Deum verum de Deo vero. Genitum (γεννηθέντα), non factum, consubstantialem Patri.* E Symbolum Athanasianum: *Filius a Patre solo est: non factus, nec creatus, sed genitus.* Atque Concilium Lateran. IV. a. 1215.: *Pater a nullo, Filius a solo Patre, ac Spiritus S. ab utroque pariter absque initio, semper, et sine. Pater generans, Filius nascens, et Spiritus S. procedens* ⁶⁾.

D. Denique si Filius ex supra disputatis est ipsa Dei perfectissima sui cognitio seu contemplatio, atque eapropter etiam Filius per intellectum divinum originem suam habet; quum conceptio intellectus ad exprimendam similitudinem objecti sui, hic naturae divinae, directe tendat, imo per se perfectissima sit naturae divinae repraesentatio et expressio, ideo sibi communicatae: Filius necessario a Patre procedere, et quidem per generationem dicendus est; generationis enim est perfecte simile producere.

Non statui autem propterea, quod Filius a Patre generetur, illum hocce posteriorem, uti ordine, ita etiam tempo-

¹⁾ Joan. 5, 23.

²⁾ Cf. Rom. 8, 32. et II. s. §§. 34—40. cc. p. 237 ss.

³⁾ Hebr. 5, 5. Cf. 1, 5. Ps. 2, 7.

⁴⁾ Joan. 1, 14.

⁵⁾ *De fide orthodoxa*, l. 1. c. 6. Opp. T. 1. p. 129. C.

⁶⁾ C. 1. *De fide Cath.* Mansi, Coll. Conc. T. 22. c. 981—2.

re, per se ex supra dictis intelligitur; quum Deus perfectissimus tam parum unquam sine perfectissima sui cognitione, ipse aeternum λογικός, ut Athenagoras ait, sine λόγῳ cogitari possit, quam sol splendens sine splendore. Hinc et SS. Patres unanimiter docent, dissimilem esse generationis divinae rationem ac illius, quae in creaturarum rerum productione cernitur. Quum enim divina substantia supra omne tempus sit: etiam generatio divina in tempore fieri nequit; atque Pater semper est generans, et Filius semper nascens, neque Filius prius generatur atque postea existit, sed, ut supra jam monuimus, nascendo existit, et existendo nascitur ¹⁾.

Observ. Generationem Filii esse naturalem, i. e. non esse liberam, etsi etiam non invitam, jam dictum est ²⁾.

§. 57. Spiritus S. procedit a Patre.

Alterum dogma de Spiritus S. processione duabus constat partibus, quarum prima, Spiritum S. videlicet procedere a Patre, sequentibus probatur rationum momentis:

1. Spiritus S. adpellatur Patris Spiritus. *Nec enim vos estis, qui loquimini, sed Spiritus Patris vestri, qui loquitur in vobis* ³⁾. Patris autem Spiritus dici non posset Spiritus S., si per processionem originem seu τὸ esse ei non deberet; quum alia relatio, quam quae per processionem nascitur, in divinis personis prorsus cogitari non possit.

2. Dicitur Spiritus S., uti Filius, a Patre mitti. *Paracletus autem Spiritus S., quem mittet Pater in nomine meo, ille vos docebit omnia* ⁴⁾. Missio autem, ut supra jam ostendimus, nihil aliud in divinis est, quam προβολή, seu actio divina illa, quae cum τῷ esse Spiritui S. datur quoque, ut per effectum aliquem

¹⁾ Cf. Gregor. Nyss. *Cont. Eunom. Or. 2.* Opp. T. 2. p. 86. *Or. 8.* p. 235. — Basil. *Cont. Eunom. l. 2. n. 12. 17.* Opp. T. 1. p. 247. 252. — Athanas. *De decr. Nic. Syn. n. 12.* Opp. T. 1. p. 218 a. — Cyrill. Alex. *Thes. Assert. 6.* Opp. T. 5. P. 1. p. 35. — Hilar. *De Trinit. l. 12. n. 21. 28—32.* Opp. T. 2. c. 420. 421—6. — Augustin. *In Ps. 2. n. 6.* Opp. T. 4. c. 5. *Serm. 17. de verb. Ev. Joann. n. 9 s. T. 5. c. 392 a. Collat. c. Maximia. n. 13. T. 8. c. 655. etc.*

²⁾ Cf. Epiphani. *Haer. 69. n. 27.* Opp. T. 1. p. 751. — Cyrill. Alex. *Thes. Assert. 7. T. 5. P. 1. p. 53—55.* — Athanas. *Or. 3. cont. Arian. n. 61. 62.* Opp. T. 1. P. 1. 609. 611.

³⁾ Matth. 10, 20. Cf. Luc. 12. 12. 1. Cor. 2, 12.

⁴⁾ Joan. 14, 26.

externum specialem, uti e. gr. est immutatio Apostolorum, hominibus patefiat. Unde et Patribus graecis ἐκπεμψις seu emissio prorsus idem est, ac latinis processio. *Patris proprietates haec est*, ait Theologus, ἡ ἀγέννητος, *quod ingenuus sit: Filii ἡ γένεσις, quod genitus: et Spiritus S. ἡ ἐκπεμψις, quod procedat* ¹⁾.

3. Tandem expressis verbis dicitur Spiritus S. procedere a Patre. *Cum autem venerit Paracletus, quem ego mittam vobis a Patre, Spiritum veritatis, qui a Patre procedit, ille testimonium perhibebit de me* ²⁾.

Quapropter jam Concilium Constantinopolitanum I. a. 381. contra Macedonianos, qui Spiritum S. ad solum Filium, et quidem tanquam creaturam et ministrum referebant, processionem ex Patre inficientes, Symbolo Nicaeno addidit: *In Spiritum S., Dominum et vivificantem, ex Patre procedentem, τὸ ἐκ τοῦ πατρὸς ἐκπορεύμενον* ³⁾.

§. 58. Et a Filio.

Ast non tantum a Patre procedit Spiritus S., verum etiam a Filio, ab utroque tamen non tanquam a duobus, sed uno principio. En alteram dogmatis nostri partem, in qua adversarios habemus Graecos schismaticos.

Incertum est, quo tempore coeperit prima de dogmate nostro controversia, et quo potissimum auctore. Verosimile tamen est, eam ab Arianis et Macedonianis originem habuisse. Primi, qui publice ac directe processionem Spiritus S. a Filio negaverunt, erant Nestoriani, ut ex eorum libello expositionis Symboli, in Concilio Ephesino Patribus oblato, cognoscitur ⁴⁾; quibus quoque consensisse videtur Theodoretus, quum anathematismum 9. Cyrilli, in quo illa asseritur, perstrinxerit ⁵⁾. — Jurgium de eadem pariter excitarunt Monotheletae ex occasione Epistolae synodicae Martini I., teste Maximo Homologoeta. — Iterum dein litem de ipsa hac processione Spiritus S. a Filio movit Constantinus Copronymus cum suis Iconomachis, eo quod se proscriptum ab Apostolica Sede audiverat ⁶⁾. Sopitam fere controversiam impotenti furore Photius

¹⁾ Or. 23. In laud. Heron. Opp. T. 1. c. 381. B. ed. Coll. Agripp. 1699. T. 1. p. 426. Cf. Or. 37. T. 1. c. 529. D. Or. 39. c. 559. D.

²⁾ Joan. 15, 16.

³⁾ Mansi, Coll. Conc. T. 3. c. 565.

⁴⁾ Act. 6. Mansi, Coll. Conc. T. 4. c. 1348.

⁵⁾ Repreh. 12. cap. Cyrill. repr. an. 9. Opp. T. 4. p. 718.

⁶⁾ Dissert. Damasc. Diss. 1. n. 4—11. Opp. J. Damasc. T. 1. p. III—VI.

excitavit, ut suum schisma cohonestaret, et ulcisceretur damnationem, a Nicolao I. in se prolatam. Saeculo IX., postquam Graeci ad pacem et concordiam cum Ecclesia redierant, denuo schisma ac litem de Spiritu S. processione a Filio quoque instauravit Michaël Caerularius, qui primus Ecclesiam Romanam de adjecta Symbolo particula *Filioque* reprehendit ¹⁾. In oecumenicis Conciliis Lugdunensi et Florentino ad unionem cum Ecclesia latina redierunt Graeci, approbantes et profitentes dogma de processione Spiritus S. a Patre et Filio, una cum additamento Symbolo inserto, donec, agente potissimum Marco Ephesino, rursum ad pristinum schisma, a Florentina Synodo vix digressi, plerique relapsi sint. A Graecis transiit error ad Ruthenos quoque, qui, licet diu cum Ecclesia occidentali conjuncti, serius tamen ab ipsa quoque se separarunt, et in hoc pariter fidei articulo cum reliqua Ecclesia schismatica sentire maluerunt ²⁾. In Academia tamen Kiovensi nihilominus saltem tanquam propositio verosimilis etiam posthac, Spiritum S. etiam a Filio procedere, defendebatur ³⁾.

Demonstramus ergo dogma Catholicum contra hosce ejus adversarios, Graecos et Ruthenos schismaticos, et quidem

A. ex S. Scriptura iisdem prorsus argumentis, quibus illi probant nobiscum processionem Spiritus S. a Patre. Etenim

1. sicut in SS. Litteris Spiritus S. vocatur Patris Spiritus, ita quoque adpellatur Spiritus Christi. *Scrutantes*, ait Petrus, *in quod, vel quale tempus significaret in eis (Prophetis) Spiritus Christi: praenuntians eas, quae in Christo sunt passiones, et posteriores glorias* ⁴⁾. Lucas: *Transeuntes (Paulus et Timotheus) Phrygiam, et Galatae regionem, velati sunt a Spiritu S. loqui verbum Dei in Asia. Cum autem venissent in Mysiam, lentabant ire in Bithyniam: et permisit eos Spiritus Jesu* ⁵⁾. Non est autem, ut ostendimus, alio sensu Spiritus S. Spiritus Patris, nisi quod a Patre procedat; ergo cum Spiritus S. Spiritus Christi seu Jesu vocetur, ab eo quoque procedat necesse est.

2. Dicitur Spiritus S. mitti a Filio, sicut mittitur a Patre. *Cum autem venerit Paraclitus, quem ego mittam vobis a*

¹⁾ *Ib.* n. 19—32. p. XII—XX.

²⁾ Cf. Theophil. Procopowicz, *Tr. de process. Spir. S.* Gothae, 1772.

³⁾ Cf. *Diar. de relig.* Mogunt. 5. B. 2. Stül. p. 63.

⁴⁾ 1. Petr. 1, 11.

⁵⁾ Act. 16, 6—7. Cf. Gal. 4, 6. Philipp. 1, 19. Rom. 8. 9.

Patre, Spiritum veritatis, qui a Patre procedit, ille testimonium perhibebit de me ¹⁾. Et: *Si non abiero, Paraclitus non veniet ad vos: si autem abiero, mittam eum ad vos* ²⁾. Itaque cum missio Spiritus S. a Patre originem seu processione[m] Spiritus S. a Patre indicet: idem quoque de missione Spiritus S. per Filium statuendum est.

3. Christus Dominus, dicit Spiritum S. scientiam habere ab ipso; quod nonnisi obtinere potest, si ab eo accipit *τὸ* esse, et ideo quoque communicatam habet divinam naturam seu essentiam; atque tanquam causam hujus adducit suam cum Patre *ταυτότητα*, *Dießelbigkeit*, ob quam omnia sibi cum illo communia sint, adeoque et potentia communicandi cum Spiritu S. essentiam, quam cum illo communicat Pater. *Cum autem, inquit, venerit ille Spiritus veritatis, docebit vos omnem veritatem. Non enim loquetur a semetipso; sed quaecunque audiet, loquetur; et quae ventura sint, annuntiabit vobis. Omnia, quaecunque habet Pater, mea sunt. Propterea dixi, quia de meo accipiet, et annuntiabit vobis* ³⁾. Non loquitur ergo Spiritus S. a semetipso, i. e. alia forsitan ac Christus Dominus, docet, sed quaecunque audit, scilicet a Filio, audit autem ab illo, ut Augustinus observat ⁴⁾, a quo scit, et scit ab eo, a quo est.

B. Id ipsum tradunt SS. Patres, tam graeci quam latini, qui ad doctrinam suam confirmandam passim ad ea ipsa, quae laudavimus, provocant S. Scripturae testimonia. S. Athanasius: *Quaecunque, inquit, Spiritus habet, haec a Verbo habet* ⁵⁾. — Basilius: *Cur necesse est, si dignitate ac ordine tertius est Spiritus S., natura quoque eum esse tertium? Dignitate (seu ordine) quidem secundum esse a Filio, (cum ab ipso esse habeat, et omnino ab illo tanquam sua origine et causa pendeat)*

¹⁾ Joan. 15, 26.

²⁾ Joan. 16, 7. Cf. 20, 22.

³⁾ Joan. 16, 13—15. Cf. Epiphan. *Ancor.* n. 11. Opp. T. 2. p. 16. — Didym. *De Spir. S.* n. 38. In Galland. *Bibl. PP.* T. 6. p. 277. — Cyrilli Alex. *In Joan.* l. 10. Opp. T. 4. p. 925. — Anselm: *De process. Spir. c.* 11. Opp. p. 55. c. 1. — Vers. Pers. Arab. *Aethiop. Syr.* Walton. SS. *Bibl. Polygl.* T. 5. p. 488 s.

⁴⁾ Tr. 99. in Joan. n. 4. Opp. T. 3. c. 746.

⁵⁾ Or. 3. cont. Arian. n. 24. Opp. T. 1. P. 1. p. 574. Cf. *Epist. 1. ad Serap.* n. 25. P. 2. p. 673. *Epist. 3. n. 1. 2.* p. 691. 692. *Epist. 4. n. 6.* p. 701. *De Trinit. et Spir. S.* n. 19. p. 978 s. *De Incarn. et cont. Arian.* n. 9. p. 877. etc.

tradit fortasse pietatis sermo: at natura tertia uti, neque ex sanctis Scripturis edocti sumus, neque ex prius dictis ulla consecutione colligi potest. Quemadmodum enim Filius ordine quidem a Patre secundus est, quoniam ab illo est: dignitate vero, quoniam origo ejus est et causa ea re, quod ipsius est Pater — non autem natura secundus, quoniam deitas in utroque una est: ita profecto et Spiritus S., etsi tum ordine, tum dignitate secundus a Filio est —; tamen non jure sequi ut sit alienae naturae, hinc patet¹⁾. — Gregorius Nyss.: Idem de S. Spiritu docemus, in solo ordine differentia constituta. Quemadmodum enim Patri Filius conjungitur, et cum ex illo originem ducat, hypostasi tamen posterior non est, sic etiam Spiritus S. ad Filium se habet, nam in sola principii ratione Filius prius, quam Spiritus S. hypostasis concipitur. Temporales autem dimensiones in illa omne saeculum antegressa vita non inveniuntur: ita ut excepta principii ratione sanctissima Trinitas in omnibus probe sibi consonet²⁾. — Et alibi: Τὸ δὲ ἅγιον πνεῦμα καὶ ἐκ τοῦ πατρὸς λέγεται καὶ τοῦ υἱοῦ μαρτυρεῖται. εἰ γὰρ τις τὸ πνεῦμα τοῦ Χριστοῦ οὐκ ἔχει, οὗτος οὐκ ἐστὶν αὐτοῦ, φήσιν ἡ ἅγια γραφή. οὐκοῦν τὸ μὲν πνεῦμα τὸ ἐκ τοῦ Θεοῦ ὄν, καὶ Χριστοῦ πνεῦμα ἐστὶν³⁾. — Gregorius Naz. Misit (Christus) nobis Spiritum Sanctum de propria sua, et ex una eademque substantia⁴⁾. — Epiphanius: Spiritus S. semper est, non genitus, non creatus, — sed ex eadem Patris Filiiue substantia Spiritus S., Spiritus enim Deus est. — Spiritus Dei, ac Spiritus Patris, et Filii Spiritus: non compositione aliqua, quemadmodum in nobis anima corpusque conjungitur: sed inter Patrem et Filium medius, ex Patre Filioque procedens, et appellatione tertius⁵⁾. — Et iterum: Jam vero cum Christus a Patre profectus, Deus videlicet a Deo credatur: et Dei Spiritus a Christo, utpote qui ab utroque (παρ' ἀμφοτέρων) procedit: id quod Christus ipse testatur: „Qui a Patre procedit“, inquit, et, „hic de meo accipiet“⁶⁾. —

¹⁾ Adv. Eunom. I. 3. n. 1. Opp. T. 1. p. 272. Cf. De Spir. S. c. 18. n. 43. 47. T. 3. p. 36. 39. c. 26. n. 64. p. 63 s. Epist. 52. n. 4. T. 3. p. 146.

²⁾ Cont. Eunom. I. 1. Opp. ed. Par. 1638. T. 2. p. 428.

³⁾ In or. domin. In antiqq. PP. doctr. de Incarn. Verb. c. 1. In Maji Coll. T. 7. p. 6.

⁴⁾ Orat. 49. Opp. T. 1. c. 665 et 666.

⁵⁾ Ancorat. n. 7—8. Opp. T. 2. p. 12 s.

⁶⁾ Ib. n. 67. p. 70. Cf. n. 9. 70 p. 14. A. 75. C. Haer. 62. n. 4. 74. n. 7. 10. T. 1. p. 515. 895. 898.

Cyrillus Alex.: Quocirca ut qui novit omnia, quae sunt in voluntate unigeniti, omnia nobis annuntiat, non disciplina comparatam scientiam habens, ne ministri vicem implere videatur, et alterius sermones deferre, sed ut spiritus ejus, — et qui citra doctoris operam novit omnia, quae sunt ejus, ex quo est, et in quo est, divina sanctis revelat mysteria ¹⁾. Atque: Ecce enim, ecce cum Spiritum veritatis — dixerit, a Patre ipse ait procedere. Sicut enim proprius est Filii Spiritus, naturaliter et in ipso existens, et per ipsum procedens, ita etiam Patris ²⁾. Ita Patres graeci praeter alios ³⁾. — Ex latinis scribit Tertullianus: Tercius Spiritus S. a Deo et Filio, sicut tertius a radice fructus ex frutice, et tertius a fonte rivus ex flumine, et tertius a sole apex ex radio ⁴⁾. — Hilarius: Neque in hoc nunc calumnior libertati intelligentiae, utrum ex Patre, an ex Filio Spiritum Paracletum putent esse. Non enim in incerto Dominus reliquit: nam sub iisdem dictis ita locus est: „Adhuc multa habeo vobis dicere, sed non potestis portare illa modo. Cum venerit ille Spiritus veritatis, diriget vos in omnem veritatem. Non enim loquetur a semetipso. — Ille me honorificabit; quoniam de meo accipiet. — Omnia, quaecunque habet Pater meus sunt: propterea dixi, de meo accipiet, et annuntiabit vobis.“ A Filio igitur accipit, qui et ab eo mittitur, et a Patre procedit. Et interrogo, utrum id ipsum sit, a Filio accipere, quod a Patre procedere. Quod si differre credetur inter accipere a Filio, et a Patre procedere; certe id ipsum atque unum esse existimabilur, a Filio accipere, quod sit accipere a Patre. Ipse enim Dominus ait: „Quoniam de meo accipiet, et annuntiabit vobis. Omnia, quaecunque habet Pater, mea sunt: etc.“ Hoc quod accipiet, — Filius a se accipiendum esse dixit: et rursum hoc ipsum significat, accipiendum esse de Patre ⁵⁾.

¹⁾ Comm. in Joan. 14, 25—26. l. 10. Opp. T. 4. p. 837.

²⁾ In Joan. 15, 26—27. l. 10. p. 910. A. Cf. In Joan. 16, 13. p. 925. De Trinit. Dial. 7. T. 5. P. 1. p. 641—657. Thes. Assert. 34. lb. p. 345. A. p. 354. A. Adv. Nestor. l. 4. c. 3. T. 6. P. 1. p. 104 ss. De recli. fid. Or. 2. n. 51. T. 5. P. 2. p. 172. C. etc.

³⁾ V. Origen. In Joan. t. 2. n. 6. Opp. T. 4. p. 60 ss. — Didym. De Spir. S. n. 34. In Galland. Bibl. PP. T. 6. p. 276. Cf. n. 17. p. 270. — Anastas. Sin. De Incarn. Or. 3. n. 25. lb. T. 12. p. 251. C. — Ephrem Syr. Paren. 22. Opp. ed. Asseman. s. et l. Rom. 1732 ss. T. 3. p. 455.

⁴⁾ Adv. Prax. n. 8. Opp. V. 1. p. 411.

⁵⁾ De Trinit. l. 8. n. 20. Opp. T. 2. c. 227. Cf. l. 2. n. 29. l. 12. n. 56. 57. c. 43. 442. 444.

Idem porro ex certa processione Spiritus S. a Filio ejus divinitatem evincere studet ¹⁾. — Ambrosius: *Spiritus S. quoque cum procedit a Patre et Filio, non separatur a Patre, non separatur a Filio* ²⁾. — Augustinus: *Qui Spiritus S. secundum Scripturas SS., nec Patris solius est, nec Filii, sed amborum* ³⁾. *De quo (Patre) procedit principaliter Spiritus S., ideo autem addidi principaliter, quia et de Filio Spiritum S. procedere reperitur* ⁴⁾. Et: *Fatendum est, Patrem et Filium principium esse Spiritus S., non duo principia: sed sicut Pater et Filius unus Deus, et ad creaturam relative unus Creator et unus Dominus, sic relative ad Spiritum S. unum principium: ad creaturam vero Pater et Filius et Spiritus S. unum principium, sicut unus Creator et unus Dominus* ⁵⁾. — Fulgentius: *Firmissime tene, et nullatenus dubites, eundem Spiritum S., qui Patris et Filii unus est Spiritus, de Patre et Filio procedere* ⁶⁾. — Leo M., *Alium esse, ait, qui genuit alium, qui ab utroque processit* ⁷⁾. Sed non est opus, ut singuli Patres latini in medium proferantur, cum fides Ecclesiae occidentalis in processionem Spiritus S. a Patre Filioque semper ab Orientalibus erat agnita. Nam quoties schismatici ac haeretici orientales ab Ecclesia Rom. damnati sunt: non aliter valentes vindictam de ipsa sumere, eidem crimini vertebant, quod doceret, Spiritum S. a Patre Filioque procedere. Ita se gesserunt Monotheletae, porro Iconomachi, et tandem Photius ejusque in impietate successores ⁸⁾. Eandem autem in Ecclesia quoque orientali primis saeculis viguisse fidem, nobis non tantum laudatorum Patrum graecorum, sed et

¹⁾ *Ib. l. 12. n. 55. c. 441 s.*

²⁾ *De Spir. S. l. 1. c. 11. n. 120. Opp. T. 2. c. 625.*

³⁾ *De Trinit. l. 15. c. 17. n. 27. Opp. T. 8. c. 987.*

⁴⁾ *Ib. n. 29. c. 988.*

⁵⁾ *Ib. l. 5. c. 14. n. 15. c. 841. Cf. l. 4. c. 20. n. 29. c. 829. Cont. Maximin. l. 2. c. 14. n. 1. T. 8. c. 703. Gen. ad litt. l. 8. c. 19. n. 38. T. 3. P. 1. c. 239. De praedest. Sanct. c. 8. n. 13. T. 10. P. 1. c. 799.*

⁶⁾ *De fid. ad Petr. D. c. 11. n. 52. Opp. p. 523. Cf. c. 10. ib. Cont. Flavian. l. 7. fragm. 27. p. 611 ss. De Trinit. c. 2. p. 330.*

⁷⁾ *Epist. 15. ad Turrib. c. 1. Opp. p. 227. Mansi, Coll. Conc. T. 5. c. 1290. Cf. Paschas. De Spir. S. l. 1. c. 12. In Bibl. max. PP. Lugd. T. 8. p. 813. — Venant. Fortunat. Expos. fid. Cath. n. 1. In Galland. Bibl. PP. T. 12. p. 317. — Gregor. M. Hom. 26. in Evv. n. 2. Opp. T. 1. c. 1554. Etc.*

⁸⁾ Cf. Le Quien. *Dissert. Damasc. n. 10 ss. Opp. J. Damas c. p. VI ss.*

ipsorum Conciliorum oecumenicorum auctoritas praesto est. Nam Synodus Ephesina improbavit Symbolum Nestorianum, sibi a Charisio oblatum, in quo de Spiritu S. dicitur: *Sed nec Filium illum putamus, neque per Filium existentiam habentem* ¹⁾. Et praeterea expresse approbavit tanquam catholicos et orthodoxos anathematismos S. Cyrilli, una cum ipsius declarationibus, et epistola synodica suo et totius Ecclesiae Aegyptiacae nomine data ad Nestorium, quod item in Conc. Chalcedonensi factum est. In epistola autem illa haecce habet S. Praesul: *Nam etsi Spiritus in propria persona subsistat, eatenusque in seipso consideretur, quatenus Spiritus, et non Filius; non est tamen ab eo alienus; quando quidem Spiritus veritatis nominatur: Christus autem est veritas; et proinde quoque ab illo, atque a Deo Patre procedit* ²⁾. In anathematismo 9. Spiritum S. proprium Filii vocat, atque in declaratione ejusdem anathematismi non solum iterum Filium Spiritum S. proprium habere profitetur, sed aperte de eo asserit: *Qui ex ipso est, ipsique essentialiter inest* ³⁾. Nota porro erat Ecclesiae orientali Epistola Hormisdæ P. ad Imper. Justinum a. 521. conscripta, in qua haec occurrunt: *Notum est, quia proprium est Patris, ut generaret Filium: proprium Filii, ut ex Patre Patri nasceretur aequalis: proprium Spiritus S., ut de Patre et Filio procederet sub una substantia deitatis* ⁴⁾. Nec tamen quisquam Graecorum movit querelam. Hinc et Armeni nobiscum sentiunt, atque contra Graecos recentiores processionem Spiritus a Patre et Filio defendunt ⁵⁾. Quapropter

C. nonnisi antiquam fidem ac Ecclesiae doctrinam enuntiat Symbolum Athanasianum, quod habet: *Spiritus S. a Patre et Filio: non factus nec creatus, nec genitus, sed procedens*. Nec non eandem produnt Concilia illa, quae Symbolo Nicaeno - Constantinopolitano particulam adjecerunt, ut Conc —

¹⁾ Act. 5. Expos. Symb. deprav. In Mansi Coll. Conc. T. 4. c. 1347. Et Syn. decr. c. 1361 s.

²⁾ n. 10. Ib. c. 1079.

³⁾ Ib. T. 5. c. 15. Cf. Conc. Ephes. act. 1. Epist. Cyrill. ad Nestor n. 10. Ib. c. 1079. Conc. Chalced. act. 1. Ib. T. 6. c. 660 ss. Act. 2. c. 958 s. Conc. V. CPTn. II. Coll. 6. et 8. Ib. T. 9. c. 297—346. 367—388.

⁴⁾ Epist. 79. Ib. T. 8. c. 521. E.

⁵⁾ Cf. Conc. Armen. a. 1342. Ib. T. 25. c. 1188.

Tolet. I. a. 400 vel a. 407. ¹⁾, Conc. Tolet. III. a. 589. ²⁾, Conc. ForoJul. a. 791. ³⁾, Conc. Aquisgran. a. 809. ⁴⁾, et Concilium Arelat. a. 813. ⁵⁾. Solennis tamen definitio doctrinae in sinu Ecclesiae custoditae clarius prolata fuit in Concilio Lateran. IV. a. 1215., cui una cum aliis non paucis graecis Praesulibus interfuerunt Patriarchae Constantinopolitanus et Hierosolymitanus, et in quo consentientibus Orientalibus et Occidentalibus, at brevi pace rupta, definitum est: *Pater a nullo, Filius a Patre, Spiritus S. ab utroque pariter, absque initio, semper et sine* ⁶⁾. Tum a Conc. Lugdun. II. a. 1274. sub Gregorio X., ubi restituta unione, Graeci et Latini Symbolum cum particula: *Filioque*, bis decantarunt ⁷⁾. Demum a Conc. Florentino a. 1439. ubi omnibus, in quibus dissidebant Graeci et Latini, capitibus diligenter excussis, communi consensu definitum fuit, omnes Christianos profiteri debere, quod *Spiritus S. ex Patre et Filio aeternaliter est, et essentiam suam, suumque esse subsistens habet, ex Patre simul et Filio, aeternaliter ex utroque, Patre et Filio, tanquam ab uno principio, et unica inspiratione procedat*, simulque declaratum, additionem: *Filioque*, licite et rationabiliter Symbolo fuisse appositam, excepto Marco Ephesino, qui deinde nonnullos sequaces nactus est. Nulla tamen publica fidei professione impugnata sunt, quae in Synodo Florentina statuta et definita erant ⁸⁾.

D. Deinde Ecclesia utraque firmiter semper tenuit ordinem personarum, prout illum Christus Dominus verbis: *Baptizantes eos in nomine Patris, et Filii, et Spiritus S.*, indicavit, nullo modo immutari aut inverti posse ⁹⁾. Jam nulla ratio videtur subesse, quare Spiritus S. tertius ordine ponatur, nisi a Filio simul originem habeat.

Porro in divinis omnia sunt unum, ubi non obviat relationis oppositio; nam in Deo nulla alia oppositio relativa, quae non

¹⁾ Reg. Ad. Mansi, Coll. Conc. T. 3. c. 1003.

²⁾ Fid. S. 150. PP. C. Polit. Ib. T. 9. c. 981. Anath. 3. c. 985.

³⁾ Symb. Ad. Ib. T. 13. c. 842.

⁴⁾ Ib. T. 14. c. 17 ss.

⁵⁾ Can. 1. Ib. c. 58.

⁶⁾ C. 1. De fid. Cath. Ib. T. 22. c. 981—2.

⁷⁾ Ib. T. 24. c. 66.

⁸⁾ Defn. Ib. T. 31. c. 1026 ss.

⁹⁾ Cf. Basil. De Spir. S. c. 18. n. 46. Opp. T. 3. p. 40.

adversetur infinitae ejus perfectioni, dari potest praeter eam, quae fundatur in processione unius personae ab alia. Si ergo Spiritus S. non procederet a Filio: ab eo realiter non posset distingui ¹⁾).

Tandem si Spiritus S., ut supra ostendimus, non est, nisi amor absolutus, sui conscius, personalis, in quo Deus, se summum bonum in Verbo intelligens, se diligit; amor autem hic neque a Patre neque a Filio solo, sed a Patre et Filio simul procedit, utpote quia uterque amat essentiam divinam, quae in utroque una est, et quidem voluntate essentiali, pariter in utroque una, ita ut Spiritus S. amor utriusque concors, vel potius unicors sit: ex ipsa Spiritus S. indole patet, ipsum necessario, ut a Patre et Filio, et quidem tamquam uno principio procedentem cogitandum esse; quoniam, licet duo sint amantes, unus est tamen amor; quo se, seu essentiam divinam diligunt ²⁾).

Unde una colligitur, quare Spiritus S. non per generationem, uti Filius, sed per simplicem processionem seu spirationem a Patre et Filio procedat. Nam quum processio Spiritus S. fiat per actum voluntatis: non fit secundum rationem similitudinis, sed secundum rationem vitalis impulsus; amor enim non tendit ad exprimendam similitudinem amati, sed est inclinatio vitalis in illum. Spiritus S. quidem perfecte similis est Patri et Filio; at hoc non habet ex vi processionis suae, sed solum inde, quod natura divina amoris divino, utpote necessario sui conscio, communicetur ac identificetur.

Ex hucusque disputatis porro liquet, quid de eo sentiendum sit, quod nobis continuo Graeci objiciunt, ac si Ecclesia Catholica corruperit Symbolum Nicaeno-Constantinopolitanum, addendo particulam: *Filioque*. — Corruptio tunc tantum obtineret, si sententia jam definita illâ particulâ additâ fuisset eliminata, aut contraria ab illa statuta; quod autem nequaquam factum est. Non enim dixerat Concilium Constantinopolitanum: *qui a solo Patre procedit*, sed tantum: *qui a Patre procedit*, quod recte a Macedonianis negabatur, in medio relinquens, quae porro vera erant, et ipsum scivit de processione ejusdem Spiritus S. a Filio. Insuper causam hujus reticentiae assignare valemus. Macedonius scilicet, contra quem Concilium Constantinopolitanum I. convocatum erat, Spiritum S. creaturam Filii esse asserebat, ejusque servum, qui itaque ex Patre minime sit aut procedat ³⁾. A Filio quoque

¹⁾ Cf. Gregor Nyss. *Ad Ablav.* Opp. T. 2. p. 459.

²⁾ Cf. Anselm. *De process. Spir. S. c. 18.* Opp. p. 57.

³⁾ Cf. Basil. *Adv. Eunom. l. 2. n. 34.* Opp. T. 1. p. 271.

Spiritum S. procedere, noluit itaque Synodus adjicere, quoniam de hoc nemo quaerebat, neque dubitabat ¹⁾); vel ne occasio praeberetur Macedonianis opinandi, Ecclesiam vel a longe ex illorum parte stare. Caeterum, si objectio illa valeret: deberet quoque Concilium Constantinopolitanum accusari, quod Symbolum Nicaenum, cui plures articulos adjecit, corruperit. Le o III. quidem noluit additionem particulae: *Filioque*, Concilio Aquisgranensi a. 809. postulante, et ipso Carolo Magno auctoritatem suam interponente, adprobare atque ad universam Ecclesiam extendere, quamvis palam professus sit, ut testantur acta legationis, Spiritum S. etiam a Filio procedere ²⁾), partim quoniam nulla necessitas id exigebat, ut inter Sacrorum solemnia publice Symbolum cum illa additione decantaretur, partim quia praecipue nolebat inspectantibus Graecis contra litteram Concilii Ephesini agere, quo sancitum est, *alteram fidem nemini licere proferre, aut conscribere, aut componere, praeter definitam a SS. Patribus, qui in Nicaea cum Spiritu S. congregati fuerunt* ³⁾); quod tamen aperte de fide contraria aut diversa a fide in Symbolo Nicaeno proposita, aut vero de ulteriori declaratione per personas privatas addenda intelligendum est; alioquin Orientales ipsi primi fuissent hujus decreti violatores, quum Concilium Chalcedonense, licet renovaverit sanctionem Ephesinam, Symbolum a Patribus Constantinopolitanis erectum receperit, et in usum communem totius Ecclesiae deduxerit ⁴⁾). Unde et Patres Concilii Florentini, graeci et latini, declarare potuerunt, *explicationem verborum illorum: „Filioque“, veritatis declarandae gratia, imminente tunc necessitate, licite et rationabiliter Symbolo fuisse appositam* ⁵⁾).

Quod vero attinet Theodoretum, qui blasphemum ac impium esse dicit ⁶⁾), *ex Filio aut per Filium* existentiam habere Spiritum S.: constat, ejus scripta una cum scriptis Theodori Mopsuesteni et epistola Ibae in Concilio Constantinopolitano II. a. 553. condemnata esse. Caeterum ipse non nisi videtur negare Spiritum S. per Filium aut a Filio creatum esse, quod a Cyrillo verbis illis, *ipsum Spiritum Filii proprium esse*,

¹⁾ Cf. Epiphani. *Haer.* 74. n. 14. Opp. T. 1. p. 904.

²⁾ Cf. Conc. Aquisgr. a. 809. Mansi, *Coll. Conc.* T. 14. c. 18 ss.

³⁾ *Act. 6. Decr. de fid.* Ib. T. 4. c. 1362 s.

⁴⁾ *Act. 5. Ib.* T. 7. c. 114 s.

⁵⁾ *Def. S. oec. Syn. Flor.* Ib. T. 31. c. 1031.

⁶⁾ *Repreh. 12. capp. Cyrill. Alex. Repr. an.* 9. Opp. T. 4. p. 718.

assertum, animo praeoccupato obcoecatus, aut disputationis aestu abreptus, arbitratus est. Unde ait: *Docuit nos (Apostolus) etiam in his verbis unam divinitatis naturam. Sanctum enim Spiritum et Dei appellavit, et Christi: non quod, ut volunt execrandi, haeretici, ex Deo per Filium creatus sit, sed quia est ejusdem cum Patre et Filio substantiae, et ex Patre quidem procedit juxta Evangeliorum doctrinam: ejus autem gratia iis, qui digni sunt, per Christum suppeditatur* ¹⁾. Hinc Cyrillus quoque respondens ad confutationem sui anathematis, Theodoretum non arguit negatae processioneis Spiritus S. a Filio, sed tantum conqueritur de imposita sibi ab eo calumnia, quasi divinitatem Spiritus S. in dubium revocasset, neque Theodoretus contra hoc Cyrilli responsum, in quo diserte asserit, Verbum omnia communia habere cum Patre, una excepta Paternitate, reposuit, falso Cyrillum id adstruere, quando quidem communem cum ipso non habeat vim spirandi aut producendi Spiritum S., et etsi disertis ac expressis verbis non dicit, Spiritum S. a Filio procedere, ea tamen doctrinae proponit principia, ex quibus processio Spiritus S. a Filio aperte ac necessario colligitur.

Joannes Damascenus tandem quidem ait: *Spiritum S. et ex Patre esse dicimus, et Patris Spiritum nominamus. At verum ex Filio esse non dicimus, Filii tamen Spiritum vocitamus* ²⁾. Ast verbis hisce S. Pater tantum a Filio principalem causam divinarum processionum, quam Graeci τὴν προαγαγεμένην αἰτίαν adpellant, nequaquam autem ipsam processionem excludit. Nempe citatis verbis id unum ipse vult, Filium non esse principium absque origine, sed solum esse principium Spiritus S. cum origine, eo quod solus Pater tale principium sine origine sit; cum omnia, quae Filius habet, a Patre acceperit. Ideo confestim addit S. Doctor: *Solus Pater principium* i. e. primus fons, est, uti rerum omnium finitarum sua voluntate, ita sua natura ac essentia non tantum Filii, sed et Spiritus S.. Quae notio fuit apud Graecos pervulgata. Ita explicant hunc locum ipsi Doctores Graeci, Manuel Calecas, Demetrius, Bessarion ³⁾. Enimvero noluisse per citata verba Joannem Damascenum excludere processionem Spiritus S. a Filio, patet ex pluribus locis, in qui-

¹⁾ In *Epist. ad Rom.* 8, 11. Opp. ed. Sirmond. Hal. 1771. T. 3. p. 84.

²⁾ De *fid. orth.* l. 1. c. 8. Opp. T. 1. p. 141 s.

³⁾ Cf. Petav. De *Trinit.* l. 7. c. 17. n. 8 — 11. De *theol. dogm.* Antv. 1700. T. 2. p. 433 s.

bus expresse tradit, Spiritum S. a Patre per Filium produci vel procedere. Sic ab ipso dicitur Pater *Verbi genitor, ac per Verbum manifestantis Spiritus productor*; et Spiritus S. Filii quoque Spiritus, non velut ex ipso, sed per ipsum ex Patre procedens ¹⁾. Atque alibi: Spiritus S., ait, est ex Patre, siquidem per Filium et Verbum procedens, non tamen filiationis modo ²⁾. Et iterum: Spiritus S. Spiritus est Filii, sed non est ex Filio. Est tamen ad Filium, quia emanat per illum et ex illo. At non est ex Filio, quia Pater una est causa, tum Filii, tum Spiritus S., utriusque ex aequo ³⁾.

§. 59. Relatio personarum divinarum ad res creatas.

Ab interna trium divinarum personarum ad invicem relatione quoque modus divinae efficaciae ad extra pendet. Non potest enim Deus in mundum agere, nisi naturae suae convenienter; et hinc quaevis persona divina, licet opera divina ad extra sint indivisa, modo *ιδιότητι* suae congruo efficax sit, seu ad illa concurrat necesse est. Quoniam ergo Pater est principium Filii ac Spiritus S., ipse autem sine principio est: Pater quoque relate ad mundum principium primum, *ἡ αἰτία προγεννημένη* dicitur, atque ei prima cogitatio ac voluntas, seu consilium mundum omniaque, quae in eo dantur ac fiunt, procreandi adscribitur, quo sensu etiam Creator universi κατ' ἐξοχήν, seu ἀρχὴ τῶν ὄντων vel πάντων cognominatur ⁴⁾. Porro ex eadem causa quoque Pater immediate ad extra non agit, sed per Filium creat ac redimit, atque in Spiritu S. per Filium aut cum Filio sanctificat ac secum unit; et hinc ei prae Filio et Spiritu S. quasi *ἡ ἀρχαία* attribuitur ⁵⁾.

²⁾ *De fide orth. l. 1. c. 12.* Opp. T. 1. p. 148.

²⁾ *Epist. De hymn. Trisag. n. 28.* Ib. p. 497.

³⁾ *Exposit. fide. n. 2.* Ib. p. 664. c. 2. D. Cf. *De fide orth. l. 1. c. 13.* p. 151. B. *Cont. Manich. n. 5.* p. 432. etc. Le Quien. in not. ult. ad. c. 8. l. 1. *De fide orth.* p. 141.

⁴⁾ Cf. 1. Cor. 8, 6. Ephes. 4, 6. 3, 15. Matth. 26, 39. 42. 20, 23. 25, 34. Act. 1, 7. 1. Cor. 1, 1. 2. Cor. 1, 1. Ephes. 1, 1. 1, 4—6. 9, 11. Col. 1, 1. Hebr. 10, 7. 9. — Basil. *De Spir. S. c. 16. n. 37—38.* Opp. T. 3. p. 31 s. — Gregor. Nyss. *De Bapt. Christ.* Opp. T. 2. p. 804.

⁵⁾ Joan. 1, 18. 1. Joan. 4, 12. Col. 1, 15. 1. Tim. 6, 16. Cf. Matth. 5, 16. 46. 48. 7, 11. Jac. 1, 17. — Justin. *Dial. c. Tryph. n. 127.* Opp. p. 232. *Epist. ad Diognet. n. 7.* p. 249. — Iren. *Cont. haer. l. 4. c. 20. n.*

Filius vero, utpote cognitio ac sapientia Dei ὑποστατική, est rerum omnium ἰδέα et ἐνέργεια, secundum quem itaque, et per quem omnia fiunt ¹⁾. Quapropter et a Patribus jam δημιουργική αἰτία ²⁾, jam δημιουργὸς τῆς κτίσεως ³⁾ adpellatur. Prout enim Dei ἰδέα seu cogitatio sui ipsius vera et perfecta in Filio redditur, ita quoque Dei ἰδέα seu cogitatio mundi per Filium executioni mandatur; et qui interna Dei imago substantialis est, ille quoque auctor est externae imaginis; quique Patrem interne repraesentat, eum quoque externe manifestat. Eapropter autem porro non tantum per Filium ad ἰδέαν Patris mundus fieri, sed et a Deo avulsus illi restitui debuit. Unde Filius, uti Conditor, ita et mundi Salvator ac Redemptor est ⁴⁾.

Tandem quae Filius in nomine Patris agit, agit in Spiritu S., tanquam voluntate ac amore Dei substantiali, qui quemadmodum absolutam vitam deitatis perficit ac complet, etiam rerum extra Deum causa perficiens, τελειωτική αἰτία, seu τελειωτικὸν τῶν πάντων est ⁵⁾. Hinc Spiritus S. est, per quem Christus Dominus quoad carnem conceptus est ⁶⁾, ejiciebat daemones ⁷⁾, atque semetipsum obtulit immaculatum Deo ⁸⁾, quique eum ut hominem signavit ⁹⁾, unxit ¹⁰⁾, in desertum duxit ¹¹⁾, suscitavit a mortuis ¹²⁾,

6. 11. p. 254 s. 256. l. 5. c. 16. n. 2. p. 313. c. 1. — Origen. *Select in Gen.* 9, 68. Opp. T. 2. p. 32. In *Joan.* t. 32. n. 18. T. 4. p. 451. — Basil. *De Spir. S.* c. 18. n. 47. Opp. T. 3. p. 39. — Ephrem Syr. *Adv. Scrut. Serm.* 6. Opp. s. l. T. 3. p. 12. — Tertull. *Adv. Marcion.* l. 5. n. 19. Opp. V. 2. p. 398. *Adv. Prax.* n. 14. 15. p. 418. — Novatian. *De Trinil.* c. 18. In Galland. *Bibl. PP.* T. 3. p. 300. — Mar. Victorin. *Cont. Arian.* l. 3. n. 2. Ib. T. 8. p. 180.

¹⁾ Cf. Joan. 1, 3. 10. Col. 1, 16. Hebr. 1, 2.

²⁾ Basil. *De Spir. S.* c. 16. n. 38. Opp. T. 3. p. 31.

³⁾ Gregor Nyss. *De Bapt. Christ.* l. c. — Gregor. Naz. *Or.* 24. Opp. T. 1. c. 386. C.

⁴⁾ Rom. 5, 10. Joan. 2, 2. Cf. Joan. 1, 14.

⁵⁾ Cf. Basil. l. c. — Gregor. Nyss. l. c. *Quod non sint tres dii.* T. 2. p. 454 s. — Gregor. Naz. *Or.* 24. Opp. T. 1. c. 386. C. — Cyrill. Alex. *De fid. ad Reg. Or.* 2. n. 51. Opp. T. 5. P. 2. p. 171. — J. De-masc. *De fid. orth.* l. 2. c. 2. Opp. T. 1. p. 154.

⁶⁾ Matth. 1, 18. 20. Luc. 1, 30—35.

⁷⁾ Matth. 12, 28.

⁸⁾ Hebr. 9, 14.

⁹⁾ Joan. 3, 33—34.

¹⁰⁾ Luc. 4, 18. Act. 10, 38. Cf. Matth. 12, 18. Rom. 1, 4.

¹¹⁾ Matth. 4, 1. Luc. 4, 1. Cf. 4, 4.

¹²⁾ Rom. 8, 11.

ejusque opus redemptionis Ecclesiam regendo atque mentes fidelium illustrando ac sanctificando exequitur ¹⁾).

Ut ergo, quae hucusque dicta sunt, uno verbo comprehendamus: quaecunque a Deo ad extra fiunt, aut hominibus conceduntur, fiunt ac conceduntur a Patre per Filium in Spiritu S. Ita, ut scribit Athanasius, *unus Deus in Ecclesia praedicatur, qui est super omnia, et per omnia, et in omnibus. Super omnia quidem ut Pater, ut principium et fons: per omnia vero, nempe per Verbum: in omnibus denique, in Spiritu S.* ²⁾. Et Concilium Constantinopolitanum II: *Unus enim Deus et Pater, ex quo omnia; et unus Dominus Jesus, per quem omnia; et unus Spiritus S., in quo omnia* ³⁾. Vice versa autem Pater ultimus rerum omnium est finis. Ad Patrem ideo omnes nostrae cogitationes, actiones atque orationes in Spiritu S. coeptae per Filium dirigendae sunt, ita ut in uno Spiritu per Jesum ad Patrem accedamus ⁴⁾. Quapropter et *χαρὰ πνεύματος* Filii est *διὰ*, et Spiritus S. *ἐκ* vel *ἐν*, quin tamen inde, ut ex dictis per se patet, ad aliam quam originis dependentiam concludere liceat. Est, ait Cyrillus Alex., *secundum propriam hypostasim perfectissimus Pater: similiter Filius, et Spiritus S.: sed unius horum creatrix voluntas, quacunque in re versari dicatur, efficacia quidem est ipsius, verumtamen omnem divinitatem permeat, et supernaturalis substantiae est commune velut quoddam opus, sed unicuique*

¹⁾ Joan. 14, 16, 17, 26, 16, 8—15. Act. 5, 32, 8, 29, 39, 10, 19, 13, 4, 15, 28, 16, 6, 20, 22. Joan. 3, 5 s. Rom. 5, 5, 8, 9 s. 14, 1. Cor. 12, 13. Gal. 4, 6, 1. Cor. 6, 11. Philipp. 1, 19. Cf. Apoc. 5, 6, 1, 4. Ps. 103, 30. — Iren. *Cont. haer.* l. 3. c. 17. n. 2. p. 208. — Basil. *Epist.* 105. Opp. T. 3. p. 200. *De Spir. S.* c. 9. n. 23. T. 3. p. 20. — Augustin. *De mor. Eccl. Cath.* l. 1. c. 13. n. 23. Opp. T. 1. c. 696.

²⁾ *Epist. ad Serap.* 1. n. 28. Opp. T. 1. P. 2. p. 676 s.

³⁾ C. 1. Mansi, *Coll. Conc.* T. 9. c. 378. Cf. 1. Cor. 8, 6. — Athanas. *Epist. ad Serap.* n. 24. Ib. p. 673. *Epist.* 3. n. 5. p. 694. — Theophil. Antioch. *Ad Autol.* l. 2. n. 10. Opp. Justin. p. 378 s. — Iren. *Cont. haer.* l. 4. c. 20. n. 1—4. p. 253 s. — Origen. *De princ.* l. 1. c. 3. n. 4. Opp. T. 1. p. 61. — Basil. *De Spir. S.* c. 8. n. 19. Opp. T. 3. p. 16 s. — Cyrillus Alex. *Cont. Julian.* l. 3. Opp. T. 6. P. 2. p. 97. C. — J. Damasc. *De fide orth.* l. 1. c. 12. Opp. T. 1. p. 148. — Augustin. *De ver. rel.* c. 7. n. 13. Opp. T. 1. c. 752. — Hieron. *Quaest. hebr. in Gen.* 1, 1. Opp. T. 3. c. 305 s. Etc.

⁴⁾ Ephes. 2, 18. Cf. Matth. 6, 9, 18, 19 s. Joan. 14, 13, 15, 16, 16, 23, 24, 26. Ephes. 3, 21, 5, 20.

personae singillatim conveniens, tanquam per tres hypostases etiam seorsim unicuique congruat hypostasi, per se absolutissimae. Operatur itaque Pater, sed per Filium in Spiritu: operatur item Filius, sed tanquam virtus Patris, qui ex ipso et in ipso esse intelligitur secundum peculiarem existentiam. Operatur quoque Spiritus: Spiritus enim est Patris, et Filii, universorum opifex ¹⁾.

¹⁾ *De Trinit. Dial. 6. Opp. T. 5. P. 1. p. 618. D. ss.*



Pars Secunda.

De operibus divinis, seu de relatione Dei ad mundum universim.

(Κοσμολογία.)

§. 1. Ingressio.

Exposita doctrina de Deo, in se spectato, transimus ad tradendam doctrinam de operibus divinis, seu de Deo ad mundum relato. Quemadmodum enim Deus ad intra modo necessario sua infinita cognitione atque dilectione semetipsum generat ac producit, et hac ratione suam infinitam perfectionem atque absolutam vitam spiritualem testatam facit, ita ad extra libere mundum finitum ac contingentem, utpote sibi enti infinito ac necessario oppositum, procreat, suamque majestatem, existentiam, sapientiam, potentiam ac charitatem absolutam, quasi in speculo ac imagine manifestam reddit, ita ut *invisibilia ipsius — per ea, quae facta sunt, intellecta conspiciantur* ¹⁾).

§. 2. Mundus.

Mundi nomine, τοῦ κόσμου, venit complexio omnium, quae praeter Deum dantur, rerum spiritualium aequae ac corporearum cum suis existendi modis, proprietatibus, viribus, affectionibus, seu complexio omnium rerum finitarum, cum infinitus solus Deus sit.

In SS. Litteris mundus seu rerum natura plerumque *coelum, et terra* adpellatur, quibus *mare, et omnia, quae in eis sunt*, seu *omnis ornatus eorum* adjicitur ²⁾; porro *exercitus*, ⲕⲣⲩ, qua voce non stellae solum, sed omnes omnino res creatae intelliguntur, utpote quae omnes voluntatem divinam

¹⁾ Rom. 1, 20.

²⁾ Gen. 1, 1. Ps. 113, 15. Gen. 2, 1. Act. 4, 24. et al.

exequuntur ¹⁾; deinde quoque עוֹלָם et עוֹלָמִים, αἰὼν et αἰῶνες, *saeculum* et *saecula*, quoniam mundus in tempore seu cum tempore existit, continente quasi pro contento posito, vel quia perdurat, quae posterior notio etiam hebraicae voci חֵלֶךְ, de mundo pariter adhibitae, inest ²⁾. Isaias mundum חֵלֶל, *rem inanem*, *vanam*, adpellat, quae notio postea quoque vocabulo κόσμος, *mundus*, propter rerum finitarum inconstantiam atque incitationem ad malum subjecta est ³⁾.

Interdum mundus in S. Scriptura solum orbem terrarum ⁴⁾, vel etiam genus humanum ⁵⁾ tantum indicat.

§. 3. Divisio.

Non daretur autem mundus, nisi Deus eum condidisset, atque jugiter conservaret ac gubernaret, seu providentissimam ejus curam gereret. Quapropter tractatum huncce de mundo generatim spectato dividimus in duas sectiones, quarum

1. agit de creatione mundi, seu de Deo mundi Creatore;

2. de divina providentia, i. e. de mundi conservatione ac gubernatione, seu de Deo mundi Conservatore ac Governatore.

SECTIO I.

De creatione mundi, seu de Deo mundi Creatore.

§. 4. Creationis notio.

Deum esse mundi Creatorem, indubitatum et gravissimum fidei Catholicae dogma est. Creare autem est solo voluntatis actu aliquid, quod antea non exstitit, efficere

¹⁾ Cf. Ps. 102, 20—22.

²⁾ Ps. 49, 2. 4.

³⁾ 1. Joan. 2, 15—17. 5, 4—5.

⁴⁾ Marc. 16, 15.

⁵⁾ Joan. 3, 16.

Creatio itaque erit ea libera voluntatis divinae actio ad extra, qua solo nutu, sine instrumentis ac ullo conamine, res ex nihilo, i. e. quae antea prorsus non, neque quoad formam neque quoad materiam, exstiterunt, producuntur. Sic creatio abunde distinguitur a fabricatione, quae et materiam et instrumenta et laborem exigit. Et haec quidem est creatio sensu strictissimo, ac quam maxime proprio accepta. Nam vera ac propria quoque est creatio, quando Deus ex materia praejacente, quaecunque vult, operatur. Sensu latiori autem ac improprio creatio sumitur, quando subinde de quacunque rei fabricatione adhibetur ¹⁾).

Solent inter creationem primam et secundam distinguere, quamvis diversi modo diverso. Alii enim sub creatione prima intelligunt procreationem materiae inhabilis ac indigestae; sub secunda ex hacce rerum corporearum omnium formationem, quibus constat mundus aspectabilis ²⁾). Alii primam creationem eam esse dicunt, qua factum est, ut res omnes, substantiae cum viribus suis, esse inciperent, et secundam, seu continuatam, mediatam, quae per causas secundas, i. e. vires ac leges naturae, perpetuo cursu continuatur, quaque efficitur, ut res aliae perpetuo maneant, aliae vero novae in locum priorum intereuntium succedant ³⁾). Aliis iterum creatio prima illa est, qua mundus ante multa annorum millia sit factus et secunda, qua fuerit reformatus seu restitutus.

Dogma Catholicum, Deum mundi esse Creatorem, itaque dicit, Deum et non aliud ens aliquod, mundum, i. e. omnia omnino entia finita, ex nihilo, seu cum antea prorsus non essent, neque quoad formam neque quoad materiam, solo omnipotenti ac liberrimo voluntatis suae actu in, vel potius cum tempore excitasse.

§. 5. Mundus a Deo creatus.

Licet veritas de creatione mundi ex nihilo, incognita Gentilibus, ex revelatione divina Christianis plena luce illuxerit: nihilominus non pauci primis statim a Christo nato temporibus Gentilium tenebras divinae revelationis luminibus praeferre amabant. Triplex est autem error, qui doctrinae Catholicae opponitur. Et quidem primo commentum Epicuri, quo statuitur, mundum atomorum fortuita quadam

¹⁾ Eccli. 24, 14.

²⁾ Cf. Sap. 11, 18.

³⁾ Cf. Gen. 1, 11. 22, 28. Job. 10, 8—12. Ps. 139, 13—16. Act. 17, 25—28.

ac turbulenta concursione per adhaesionem copulationemve esse ortum ¹⁾. — Deinde Hylozoismus, error primis Ecclesiae saeculis apud haereticos vulgarissimus, quo aeternam materiam (ὕλη ἀγέννητος) fuisse, ex qua mundus tum vel per Deum vel per Angelos, sive bonos sive malos, formatus sit, sumitur. Prius, mundum scilicet a Deo ex materia subjacente conditum esse, docuit post Platonem et alios graecos philosophos Hermogenes cum suis asseclis ²⁾. Posterius vero, mundum per Angelos formatum esse, contendebant Simon Magus, Menander et alii ³⁾. Cui errori affinis est sententia Marcionitarum, Manichaeorum et Priscillianistarum, materiam ac mundum corporeum, ex ea fictum, principio malo tribuentium ⁴⁾. — Tum systema mundi aeterni, quod bifariam in pantheismum, Deum cum mundo confundentem, et emanationis doctrinam abit. Cui systemati quoque Cabbalistae, radiationes divinae naturae defendentes ⁵⁾, et ex parte etiam Gnostici, varias generationes in eadem assumentes ⁶⁾, adhaerebant.

Contra huncce itaque triplicem errorem dogma Ecclesiae Catholicae defendendum est, atque ostendendum, mundum non ex materia aliqua jam praeexistente fabricatum, verum ex nihilo, quum omnis omnino abesset praeter Deum substantia, immediate a Deo esse conditum, et quidem ab ipso nulla vi aut necessitate coacto, sed sua sponte ac voluntate liberrima. Est autem haec

A. definita doctrina SS. Litterarum tum A. tum N. T. Quod ad A. T. attinet: veritas illa nobis in ipsius limine occurrit. Nam Moyses sic exorditur librum Geneseos: *In principio creavit, ברא, Deus coelum, et terram* ⁷⁾. Vox ברא quidem etiam *fingeri*,

seu *creare ex materia praejacente* significat, et hoc significatu adhibita statim inferius ⁸⁾ occurrit. Attamen in loco nostro de creatione sensu strictissimo sumi debet; quoniam non tantum nulla prorsus materiae mentio injicitur, sed de ulteriori mate-

¹⁾ Cf. Cic. *De nat. deor.* l. 1. n. 24. *De fin.* l. 1. n. 6 ss. — Lactant. *De ira D. c.* 9. Opp. T. 2. p. 142.

²⁾ Cf. Grîg, *Recherches*. Bürgb. 1828. 3. B. 79 ss.

³⁾ Cf. Id. ib. 5. B. 299 ss. 4. B. p. 329 s.

⁴⁾ Cf. Id. ib. B. 4. p. 264 ss. p. 226 ss. 362 ss.

⁵⁾ Cf. Kleucker, *Ueber die Natur und den Ursprung der Emanationslehre* b. d. Kabbalisten. Rig. 1786.

⁶⁾ Cf. Grîg, o. c. 3. B. p. 17 ss.

⁷⁾ Gen. 1, 1.

⁸⁾ v. 27. coll. 2, 7.

riae formatione primum in sequentibus versibus sacer auctor loquitur, et quidem in oppositione versus primi, ita ut in hocce non de illa ipsa, et ideo dumtaxat de vera et propria molis indigestae procreatione sermo esse possit. Sic quoque Judaei locum nostrum intelligebant. Nam nonnisi inde explicatur communis eorum fides in creationem mundi ex nihilo, cujus luculentissimum nobis praebent testimonium verba matris Machabaeae, quibus affatur septem filiorum adolescentiorem: *Peto, inquit, nale, ut aspicias ad coelum, et terram, et ad omnia, quae in eis sunt: et intelligas, quia ex nihilo, ἐξ οὐκ ὄντων, fecit illa Deus* ¹⁾. Quae sane verba pulcherrimus verborum Mosaicorum sunt commentarius. Porro in reliquis A. T. libris id ipsum ubique recurrit, et quidem ita, ut creatio tanquam actio certo divina describatur, et ceu nota characteristicum Dei veri sistatur. *Verbo Domini*, ait Psalmista, *coeli firmati sunt: et spiritu oris ejus omnis virtus eorum*. — *Quoniam ipse dixit, et facta sunt: ipse mandavit, et creata sunt* ²⁾. Et iterum: *Qui (Deus) fecit coelum, et terram, et omnia, quae in eis sunt* ³⁾. Atque: *Omnia quaecunque voluit, Dominus fecit in coelo, in terra, in mari et in omnibus abyssis* ⁴⁾. Porro Isaias: *Levate in excelsum oculos vestros, et videte quis creavit haec: qui educit in numero militiam eorum, et omnes ex nomine vocat: prae multitudine fortitudinis, et roboris, virtutis quoque ejus, neque unum reliquum fuit* ⁵⁾. Et: *Haec dicit Dominus redemptor tuus, et formator tuus ex utero: Ego sum Dominus, faciens omnia, extendens coelos solus, stabiliens terram, et nullus mecum* ⁶⁾. Jeremias: *Qui facit terram in fortitudine sua, et prudentia extendit coelos* ⁷⁾. Nehemias: *Tu ipse, Domine, solus tu fecisti coelum, et coelum coelorum, et omnem exercitum eorum: terram, et universa, quae in ea sunt: maria, et omnia, quae in eis sunt: et tu vivificas omnia haec, et exercitus coeli te*

¹⁾ 2. Machab. 7, 28.

²⁾ Ps. 32, 6—9.

³⁾ Ps. 145, 6.

⁴⁾ Ps. 134, 6. Cf. Ps. 101, 26. 123, 8. 113, 15.

⁵⁾ Is. 40, 26.

⁶⁾ Is. 44, 24. Cf. 37, 16. 45, 6—7. 12. 18. 48, 13. 51, 13. 66, 2. Mal. 2, 10

⁷⁾ Jer. 10, 12. Cf. 32, 17.

adorat ¹⁾. Et auctor libri Sapientiae: *Deus patrum meorum, et Domine misericordiae, qui fecisti omnia verbo tuo* ²⁾. In quibus locis itaque recte illud, quod Ecclesia Catholica docet, traditur, Deum nimirum, et non ens aliquod aliud, aut etiam Angelos, omnia, quaecunque secundum suam infinitam voluerit sapientiam, nullaque necessitate coactum, sola omnipotenti virtute sua, et nulla etiam materia praeexistente, condidisse. — In libris N. T. autem, et quidem in Actis Apostolorum ajunt Paulus et Barnabas ad Lystrenses, qui illis tanquam diis sacra facere volebant: *Viri quid haec facitis? et nos mortales sumus, similes vobis homines, annuntiantes vobis ab his vanis converteri ad Deum vivum, qui fecit coelum, et terram, et mare, et omnia, quae in eis sunt* ³⁾. Alibi scribit idem Paulus: *Quoniam in ipso (Filio) condita sunt universa in coelis, et in terra, visibilia, et invisibilia, sive throni, sive dominationes, sive principatus, sive potestates: omnia per ipsum, et in ipso creata sunt* ⁴⁾. Atque rursus: *Fide intelligimus, aptata esse saecula verbo Dei: ut ex invisibilibus visibilia, μή ἐκ φαινομένων τὰ βλέπομενα, i. e. τὰ ὄντα ἐξ ὄντων, fierent* ⁵⁾. Et Joannes: *Dignus es Domine Deus noster accipere gloriam, et honorem, et virtutem, quia tu creasti omnia, et propter voluntatem tuam, διὰ τὸ θέλημά σου, erant, et creata sunt* ⁶⁾. Docent ergo etiam auctores N. T., a Deo ad suum arbitrium omnia esse condita ex nihilo, ita ut ex non existentibus existentia fierent.

B. Ita quoque Ecclesiae Patres antiquiores dogma Catholicum contra errores varios supra expositos strenue defendunt, atque Deum esse rerum omnium Creatorem sensu quam maxime proprio docent. Sic sententiam de mundo ex fortuita atomorum concursione orto irridet Lactantius, et postquam ineptiam hujus commentum ostenderat, concludit hisce verbis: *Est igitur divina providentia, cujus vi ac potestate omnia, quae videmus, et facta sunt, et reguntur. Nec enim tanta rerum magnitudo, tanta dispositio, tanta in servandis ordinibus temporibusque constantia, aut olim potuit sine pro-*

¹⁾ 2. Esdr. 9, 6. Cf. 2. Machab. 1, 24.

²⁾ Sap. 9, 1. Cf. 1, 14. 13, 3—9. et Prov. 8, 22 ss.

³⁾ Act. 14, 14. Cf. 17, 24. 4, 24.

⁴⁾ Col. 1, 16. Cf. Joan. 1, 3.

⁵⁾ Hebr. 11, 3. Cf. Rom. 4, 17. 11, 36. 1. Cor. 8, 6. Hebr. 3, 4.

⁶⁾ Apoc. 4, 11. Cf. 10, 6. 14, 7.

et de arte artificis, qui constare tot saeculis sine incolae
potenti, aut in perpetuum gubernari sine perilo ac sentiente re-
lore: quod ratio ipsa declarat. Quidquid est enim, quod
habet rationem, ratione sit ortum necesse est. Ratio
autem sentientis sapientisque naturae est: sapiens vero sentiens-
que natura nihil aliud potest esse, quam Deus. Mundus autem, quo-
niam rationem habet, qua et regitur, et conatur, ergo a Deo factus
est ¹⁾. Et alibi: Nemo quaerat, ex quibus ista materiis tam magna,
tam mirifica opera Deus fecerit; omnia enim fecit ex nihilo ²⁾.

Errorem materiae Deo coaevae impugnant Theo-
philus Antioch., Tatianus, Athenagoras,
Origenes, Athanasius, Augustinus, et inprimis Ter-
tullianus. Theophilus Ant. inter alia ait: Quid autem
magni esset, si Deus ex materia subjecta mundum fa-
ceret? Opifex enim apud nos cum materiam ab aliquo acceperit,
ex ea quidquid placuerit, effingit. Dei autem potentia in eo
spectatur, ut ex nihilo faciat, quaecumque voluerit:
quemadmodum animam et motum dare, non est alterius cuiusquam
praeterquam Dei ³⁾. Et: Ac primo quidem summo consensu docuere
(Prophetarum), Deum ex nihilo omnia creasse. Nihil enim
Deo coaevum, sed eum sibi ipse locus sit, nec ulla re egeat, ac
saeculis antiquior sit, hominem facere voluit, cui innotesceret: huic
homini mundum praeparavit ⁴⁾. — Tatianus: Universorum
Dominus, quatenus quidem mundus nondum erat
creatus, solus erat. — Non enim caret initio mate-
ria, quemadmodum Deus: nec Deo, ut principii expers,
parem habet potestatem, verum creata est: nec ab
alio facta est, sed a solo universorum opifice pro-
ducta ⁵⁾. — Athenagoras: Nobis autem, qui Deum a mate-
ria disjungimus, — ac plurimo utrumque intervallo distare demon-
stramus (Deum enim increatum et aeternum esse, ac sola mente
ac ratione cognosci posse, materiam autem creatam et
corruptioni obnoxiam), nonne immerito atheorum nomen im-
ponitur ⁶⁾? — Origenes non solum creatam materiam affirmat,
sed et impietatis eos arguit, qui eandem Deo coaeternam esse

¹⁾ De ira Dei c. 10. Opp. T. 2. p. 151.

²⁾ Div. instit. l. 2. c. 9. T. 1. p. 145.

³⁾ Ad Autol. l. 2. n. 4. Opp. Justin. p. 373.

⁴⁾ Ib. n. 10. p. 378.

⁵⁾ Cont. Graec. n. 5. Cf. n. 12. Ib. p. 261 s. 268.

⁶⁾ Leg. pro. Christ. n. 4. Cf. n. 19. Ib. p. 300. 313 s.

effutierunt ¹⁾, et diserte tradit, hanc de temporaria mundi origine doctrinam ad articulos fidei Christianae pertinere, quum ait: *Species eorum, quae per praedicationem Apostolicam manifeste traduntur, sunt istae: primo quod unus Deus est, qui omnia creavit atque composuit, quique cum nihil esset, esse fecit omnia* ²⁾. — Athanasius: *Novit enim (Christi fides), res non fortuito factas esse, quia providentia gubernantur: neque ex materia prius existente, quia Deus imbecillis non est: sed Deum omnia, neutiquam prius existentia, ex nihilo per Verbum fecisse, ut essent, uti per Moysen ait: „In principio fecit Deus coelum et terram“* ³⁾. Et alibi: *An ita Deus creat, ut homo? — Deus quidem creat, ea, quae non erant, vocans, ut sint, nulla-que re ad creandum indigens* ⁴⁾. — Tertullianus: *Quod colimus, Deus unus est, qui totam molem istam cum omni instrumento elementorum, corporum, spirituum, verbo quo jussit, ratione qua disposuit, virtute qua potuit, de nihilo expressit in ornamentum majestatis suae, unde et Graeci nomen *κόσμος* accommodaverunt* ⁵⁾. Alibi, ubi regulam fidei, a Christo institutam et ab omnibus admissam, proponit, primum hunc articulum collocat: *Unum omnino Deum esse; nec alium praeter mundi Conditorem; qui universa de nihilo produxerit, per Verbum primo omnium demissum* ⁶⁾. Praecipue autem huc pertinet liber ejus *Contra Hermogenem*, qui totus in illo errore refellendo versatur ⁷⁾. — Augustinus: *Non enim debemus similes esse istis, qui omnipotentem Deum non credunt aliquid de nihilo facere potuisse, cum considerant fabres et*

¹⁾ *Ex Comm. in Gen. c. 1. v. 12. Opp. T. 2. p. 2 s.*

²⁾ *De Princ. Praef. n. 4. T. 1. p. 47. Cf. l. 1. c. 3. n. 3. p. 61. l. 1. c. 1. n. 4. 5. p. 78 s. In Joan. t. 32. n. 9. T. 3. p. 429. B. Mundum tamen praesentem Origenes nequaquam habet primum, sed (De princ. l. 3. c. 5. n. 3. T. 1. p. 149) alios ante hunc mundos exstitisse, a Deo creatos, statuit. Ad quam sententiam refutandam librum singularem De rebus creatis, περὶ γεννητῶν, Methodius conscripsit, cujus epitome in Photii Bibliotheca exstat, Cod. 235. Caeterum jam Clemens Alex. plures ante hunc orbem terrarum fuisse deinceps exortos docuerat. Cf. Phot. Bibl. Cod. 109.*

³⁾ *De Incarn. Verb. D. n. 3. Opp. T. 1. p. 49.*

⁴⁾ *Epist. de decr. Nic. Syn. n. 11. p. 217.*

⁵⁾ *Apolog. n. 17. Opp. V. 1. p. 42.*

⁶⁾ *De praescr. n. 13. V. 1. p. 306.*

⁷⁾ *V. 1. p. 349—381. Cf. Adv. Marc. l. 5. n. 1. V. 2. p. 347.*

quoslibet opifices non posse aliquid fabricare, nisi habuerint, unde fabriscent. — Omnipotens autem Deus nulla re adjuvandus erat, quam ipse non fecerat, ut quod volebat, efficeret. Si enim ad eas res, quas facere volebat, adjuvabat eum aliqua res, quam ipse non fecerat, non erat omnipotens: quod sacrilegum est credere ¹⁾. — Similia sunt, quae habent Ambrosius ²⁾, Fulgentius ³⁾.

Errorem asserentium, mundum ab aliqua creatura praecellente factum esse, vel a Deo quidem originem trahere, sed mediantibus Angelis, perstringunt Irenaeus, Epiphanius, Cyrillus Alex., Athanasius et omnes alii Patres, qui Verbum non creaturam, qua mundus conditus est, sed Deum esse, Patri consubstantialem, defendunt. Irenaeus ait: *Qui autem ab Angelis mundum dicunt fabricatum, vel ab alio quodam mundi fabricatore, praeter sententiam ejus, qui super omnia Pater est, primo quidem ex hoc ipso peccant, praeter voluntatem Dei talem et tantam conditionem Angelos fecisse dicentes: quasi efficaciores sint Angeli, quam Deus, etc. Si autem non praeter voluntatem ejus, sed volente et sciente; — jam non Angeli, vel mundi fabricator causae erunt fabricationis istius, sed voluntas Dei. — Sit fortasse hic sermo suasorius, sive seductorius apud eos, qui ignorant Deum, et qui hominibus assimilant eum inopibus, et his, qui non possunt statim aliquid ex parato fabricare, sed indigentibus multis organis ad eorum fabricationem: non autem verisimilis in totum apud eos, qui sciunt, quoniam nullius indigens omnium Deus, Verbo condidit omnia et fecit, neque Angelis indigens adiutoribus ad ea, quae fiunt; neque virtute aliqua valde inferiori ab illo, et ignorante Patrem; neque aliqua labe, neque ignorantia, ut is, qui inciperet eum cognoscere, homo fieret: sed ipse in semetipso, secundum id, quod est inenarrabile, et inexcogitabile nobis, omnia praedestinans fecit, quemadmodum voluit; omnibus consonantiam, et ordinem suum, et initium creationis donans; spiritualibus quidem spirituales et invisibiles, et supercoelestibus coelestem, et Angelis angelicam, et animalibus animalem, et natantibus aquatilem, et terrigenis terrigenam, omni-*

¹⁾ De Gen. cont. Manich. l. 1. c. 6. n. 10. Opp. T. 1. c. 649. Ad Oros. cont. Priscillian. c. 2. T. 8. c. 611 s. De lib. arbitr. l. 1. c. 2. n. 5. T. 1. c. 571. Conf. l. 12. c. 7. n. 7. T. 1. c. 211.

²⁾ Hexaëm. l. 1. c. 5. Opp. T. 1. p. 8—10.

³⁾ De Ad. ad Petr. c. 3. n. 25—26. Opp. p. 510 s.

bus aptam qualitatis substantiam: omnia autem, quae facta sunt, infatigabili Verbo fecit¹⁾. — Cyrillus Alex.: *Præcipua Dei veri proprietas est, ut a nihilo possit substantias producere*²⁾. Et: *Potestas creandi divinae solummodo inest naturae, et hæc est inter alias Deo convenientes dignitates præcipua*³⁾. non æqui manu

Dualismum speciatim rejiciunt Justinus⁴⁾, Cyrillus Hieros.⁵⁾, Tertullianus, qui quinque libros *Adversus Marcionem* conscripsit⁶⁾, Ambrosius⁷⁾ et Augustinus⁸⁾. Quorum Tertullianus inter alia ait: *Cum Deum nos gratia expellimus, cui nulla conditio tum propria et digna, quam Creatoris, testimonium præstignat, talem contraferentes impudentissimi Marcionitæ, convertuntur ad destructionem operum Creatoris. Nimirum, inquit, grande opus, et dignum Deo, mundus. Numquid ergo Creator minime Deus? Plane Deus. Ergo nec mundus Deo indignus, — etsi omne opus magisterius est suo artifice*⁹⁾.

Sententiam tandem, quæ statuit, mundum esse ab æternis, confutant Justinus, Basilius, Ambrosius, Augustinus et J. Damascenus. Justinus senem interrogantem adducit: *Sed tu an ipsum mundum ingentium dicis?* Cui respondet: *Sunt, qui dicant, sed his ego non assentior. Ad quæ senex respondit: Recte facis. Quam enim habet rationem corporis adeo solidum et durum et inaugmentatum, quod quæ immutatur, perit et nascitur quotidie, non ab aliqua causa ortum censere*¹⁰⁾? — Basilius: *Nos autem, ait, creaturis aeternitatis testimonium præbent, et creaturarum Dominum hac confessione privare, ejusdem esse amentis*

¹⁾ *Cont. hæc. l. 2. c. 2. n. 1—4. p. 117 s. Cf. l. 1. c. 22. p. 98. l. 2. c. 9. p. 126. l. 3. c. 8. n. 2—3. p. 185. l. 4. c. 2. n. 1—2. p. 226. l. 5. c. 20. n. 1—4. p. 253 s. l. 5. c. 16. p. 315. etc. Cf. Tattam: *Cont. Marc. n. 19. Opp. Justin. p. 277.**

²⁾ *Thes. 4. 6. c. 2. Opp. ad. Par. 1603. T. 1. p. 187. c. 1. Cf. l. 14. c. 6. p. 236. c. 1.*

³⁾ *Cont. Julian. l. 2. T. 2. p. 577. c. 2. C. D.*

⁴⁾ *Apol. I. n. 58—59. Opp. p. 86.*

⁵⁾ *Cat. 6. n. 12 ss. Opp. 94 ss.*

⁶⁾ *Opp. V. 2. p. 146—402.*

⁷⁾ *Hexæm. l. 3. c. 7. n. 82. Opp. T. 1. c. 45.*

⁸⁾ *De Gen. cont. Manich. l. 1. c. 16. h. 25—26. c. 21. n. 32. Opp. T. 1. c. 654 s. 658.*

⁹⁾ *L. 1. n. 13. p. 158.*

¹⁰⁾ *Dial. c. Tryph. n. 3. Opp. p. 411.*

arbitramur ¹⁾. — Ambrosius: *Quid tam inconueniens, quam ut aeternitatem operis cum Dei omnipotentis aeternitate conjungerent* (Peripatetici) ²⁾. — Augustinus: *Omnino incomparabilis est illa natura Trinitatis, et ob hoc ita aeterna, ut ei coaeternum aliquid esse non possit* ³⁾. — J. Damascenus: *Creatio autem in Deo, cum sit voluntatis opus, Deo profecto coaeterna non est. Haud enim natura comparatum est, ut quod ex nihilo producit, eandem cum eo, quod initio caret, e sempiternum est, aeternitatem aut perpetuitatem habeat* ⁴⁾.

In specie autem emanatismum aggrediuntur: Irenaeus, qui scribit: *Quod dicunt ex lacrymis Achamoth humectam prodixisse substantiam, a risu autem lucidam, a tristitia autem solidam, et a timore mobilem, et in his altum sapere, et inflatum esse, quomodo haec non digna irrisione, et vere ridicula? Qui non credunt quidem, quoniam ipsam materiam, cum sit potens et diues in omnibus Deus, creauit, nescientes, quantum potest spiritualis et diuina substantia; credentes autem, quoniam Mater ipsorum, quam foeminam a foemina vocant, a praedictis passionibus emisit tantam conditionis substantiam: et quaerentes quidem unde suppeditauit fabricatori conditionis substantia; non quaerentes autem unde Matri ipsorum, quam Enthymesi et impetum Aeonis errantis dicunt, lacrymas tantas, aut sudores, aut tristitias, aut reliqua materiae emissio. Attribuere enim substantiam eorum quae facta sunt, virtuti et voluntati ejus, qui est omnium Deus, et ueracibile, et acceptabile, et constans, et in hoc bene dicetur, quoniam „quae impossibilia sunt apud homines, possibilia sunt apud Deum.“ Quoniam homines quidem de nihilo non possunt aliquid facere, sed de materia subiacenti. Deus autem, quam homines hoc primo melior, eo quod materiam fabricationis suae, cum ante non esset, ipse aduenit. Dicere autem de Enthymesi Aeonis errantis protalam materiam, et longe quidem Aeonem ab Enthymesi ejus separalam; et hujus rursus passionem et affectionem extra ipsam quidem ejus esse materiam, et incredibile, et fatuum, et impossibile, et inconstans* ⁵⁾.

¹⁾ Cont. Eunom. l. 2. n. 17. Opp. T. 1. p. 253.

²⁾ Hezaem. praef. n. 2. Opp. T. 1. c. 2.

³⁾ De Gen. ad litt. l. 8. c. 23. n. 44. Opp. T. 3. P. 1. c. 240. Cf. De Gen. cont. Manich. l. 1. c. 2. n. 4. T. 1. c. 647. Conf. l. 11. c. 4—5. n. 6—7. T. 1. c. 197. De civ. D. l. 12. c. 10. 14. 17. T. 8. c. 308 s. 312. 315 ss.

⁴⁾ De fid. orth. l. 1. c. 8. Opp. T. 1. p. 133 s.

⁵⁾ Cont. haer. l. 2. c. 10. n. 3—4. p. 127.

Augustinus, qui ait: *Hanc ergo Trinitatem dici unum Deum, eumque fecisse, et creasse omnia, quae sunt, in quantum sunt, Catholica disciplina credi jubet, ita ut creatura omnis sive intellectualis sive corporalis, — non de Dei natura, sed a Deo sit facta de nihilo* ¹⁾. Et alibi: *Haec facta sunt: nec ea genuit de se ipso, ut hoc essent, quod ipse est; sed ea fecit de nihilo, ut non essent aequalia nec ei, a quo facta sunt, nec Filio ejus, per quem facta sunt* ²⁾. Pantheismum convellunt: Lactantius, qui habet: *Si Deus est mundus, et partes ejus ulique immortales sunt; ergo et homo Deus est, quia pars est (ut dicitis) mundi. Si homo; ergo et jumenta, et pecudes, et caetera genera bestiarum, et avium, et piscium; quoniam et illa eodem modo sentiunt, et mundi partes sunt. At hoc tolerabile est: nam et haec colunt Aegyptii. Sed res eo pervenit, ut et ranas, et culices, et formicae dii esse videantur, quia et ipsis inest sensus, et partes mundi sunt. Ita semper argumenta ex falso petita inepta et absurdos exitus habent* ³⁾. Porro Origenes ⁴⁾, Maximus ⁵⁾, Augustinus ⁶⁾, praeter alios ⁷⁾.

C. Id ipsum, Deum scilicet universum ex nihilo sua omnipotenti ac liberrima voluntate condidisse, semper quoque ac ubique Ecclesia tenuit ac publice professa est. Hoc sensu enim, et non alio intellexit primum articulum Symboli Apostolorum: *Credo in Deum, Patrem omnipotentem, Creatorem coeli et terrae*; et Symboli Nicaeno-Constantinopolitani: *Credo in Deum, Patrem omnipotentem, Factorem (ποιητήν) coeli et terrae, visibilium omnium et invisibilium*; quod adjectum est, ne quid a Deo non factum cogitari possit.

D. Solenniter autem definitum dogma est nostrum in pluribus Conciliis particularibus, ut in Conc. Tolet. I. a. 400 ⁸⁾ et Conc. Bracaren. a. 563. ⁹⁾, atque praecipue in Conc. oecum. La-

¹⁾ *De Gen. imperf.* c. 1. n. 2. Opp. T. 3. P. 1. c. 93.

²⁾ *De Genes. cont. Manich.* l. 1. c. 2. n. 4. T. 1. c. 647. Cf. *De lib. arbit.* l. 1. c. 2. n. 5. T. 1. c. 571.

³⁾ *Div. inst.* l. 2. c. 6. Opp. T. 1. p. 135.

⁴⁾ *De orat. n.* 23. Opp. T. 1. p. 236. A.

⁵⁾ *Schol. in Dionys. De coel. Hierarch.* c. 2. §. 3. Opp. Dionysii. T. 1. p. 27.

⁶⁾ *Enarr. in Ps.* 85. n. 12. Opp. T. 4. c. 909.

⁷⁾ Cf. P. 1. §. 6. p. 89.

⁸⁾ *Can. 1. et 9. Mansi, Coll. Conc.* T. 3. c. 1003 s.

⁹⁾ *Can. 13. Ib.* T. 9. c. 775.

teran. IV. a. 1215. quod in capite saepius jam citato de Deo dicit, quod sit *unum universorum principium, Creator omnium invisibilium et visibilium, spiritualium et corporaliū, qui sua omnipotenti virtute simul ab initio temporis utramque de nihilo condidit creaturam, spiritualem et corporalem, Angelicam videlicet et mundanam, ac deinde humanam quasi communem ex spiritu et corpore constitutam*¹⁾. Ubi addendo particulam *de nihilo* verbum *condidit* de vera et propria creatione quasi per definitionem explicavit; et coniungendo *utramque naturam* id magis declaravit. Est enim evidens spiritualem creaturam nonnisi per propriam creationem potuisse produci; cum autem eodem prorsus modo utramque naturam conditam esse Concilium statuatur, spiritualem et corporalem: hanc quoque ex nihilo productam esse, necessum est. Unde et Catechismus Rom. habet: *Deus enim non ex materia aliqua mundum fabricatus est, sed ex nihilo creavit; idque nulla vi aut necessitate coactus, sed sua sponte et voluntate instituit*²⁾.

E. Nec non tandem idem sana ratio statuere cogitur. Nam mundus hic, ut jam ex testimonio sensus nostri intimi, porro ex mutationibus continuis, et quidem non tantum internis ac ipsa natura insitis, sed et externis ac arbitrariis, quibus res mundum constituentes subjiciuntur, nec non ex harum finibus ac limitibus necessario colligitur, est contingens, qui etiam potest non existere, seu haud necessarius. Quod si vero mundus contingens est: temporalis quoque, qui aliquando non fuit, sit necesse est³⁾; nam mundus aeternus, qui ab alio ente haud repeteret suas origines, per se existere, adeoque absolute necessarius esse deberet. Si autem porro mundus temporalis est, qui prorsus non erat aliquando: ipse solummodo omnipotenti ac liberrima voluntate entis absoluti seu Dei ex nihilo oriri potuit, nec inter Creatorem Deum et creaturam quidquam dari potest interjectum ac medium.

Accedit, per ideam creationis solummodo, uti principiis rationis nostrae theoreticae, ita quoque libertati nostrae ac moralitati consuli. Qui enim creationem mundi per omnipotentiam voluntatis divinae negant: aut debent assumere, mundum casu fortuito esse ortum, aut mundum fatali necessitati adscribere, aut vero eum cum Deo confundere. Jam primum est insulsum, ut-

¹⁾ Cap. 1. de fide Cath. Mansi, Coll. Conc. T. 22, c. 961—2.

²⁾ Ed. Vienn. 1830. p. 22.

³⁾ Cf. Prov. 8, 22 ss. Ps. 101, 26.

pote rationem omnem destruens, quae necessario postulat, ut quaevis res existens rationem existentiae suae habeat, atque facit, ut sine hac prorsus cogitari nequeat; insuper ordinem in mundo ubique conspicuum inexplicatum sinit; atque legem moralitatis omni auctoritate, qua tamen carere non potest, exuit. Secundum mundum contingentem necessarium esse statuit, quod sibi repugnat, ut taceamus ex materia aeterna et ideo necessaria, si haec assumitur, mundum oriri haud potuisse, quum necessarium mutationis sit inscium. Paeterea, ut a casu fortuito nullus expectari potest ordo, ita quoque a fato nulla potest repeti libertas, a materia nulla spiritualitas. Quod ad tertium tandem attinet, quo mundus ejusdem naturae ac substantiae cum Deo esse asseritur, sive caeterum hujus explicatio aut evolutio, ut ajunt, sive emanatio sit: mundus tam parum Deus esse potest, quam per omnia finitum, imperfectum ac contingens simul esse infinitum, absolute perfectum ac necessarium. Insuper etiam systema hoc omnem libertatem moralem, et ideo omnem religionem evertit, atque Deum, prout actionum bonarum, ita etiam omniium scelerum, turbarum ac seditionum auctorem facit.

Asserere autem velle, mundum per aliud ens, quam Deum ipsum, creatum esse, idem est ac infinitam sapientiam ac potentiam, quae manifeste ad actum creationis requiritur, enti finito ac contingententi vindicare, quum tamen utraque nonnisi enti infinito ac independenti competere possit.

Caeterum nos actum creationis haud comprehendere, qui universim actui infinito percipiendo haud sumus pares, ultro fateamur; attamen id perspicimus, creationem in se nequaquam impossibilem esse, quod hic scire manifeste sufficit; quum ab omnipotentia divina omne, quodcunque impossibile non est, effici queat.

O b s e r v. Contra doctrinam Catholicam de mundi creatione objiciunt:

1. Ab omnibus hominibus admissum esse axioma illud, ex nihilo fieri nihil.

Attamen axioma hoc, vel potius adagium sensu suo genuino acceptum, quatenus enuntiat, nihil fieri posse absque efficiente causa jam existente, dogmati nostro de mundo ex nihilo creato non obstat, quum eo, mundum non ex nulla causa, sed ex voluntate divina processisse, statuatur. Alio sensu autem sumtum, ac si scilicet etiam a Deo nil, nisi ex materia subjacente, procreari posset, aperte falsum est, et etiam sensui communi minime probatum.

2. Distantiam inter rerum existentiam et nihilum esse infinitam, haud superandam.

Ast distantia inter nihilum et rerum existentiam, seu inter \varnothing non existere et \varnothing existere quidem, ut ajunt, negative infinita est, quatenus scilicet, tanquam a termino negativo progrediens, mensurari non potest; non autem positive infinita, et ideo a potentia infinita quoque superari potest. Ratio itaque illa nimium probat. Et sane si illa sententia vera esset: etiam rebus creatis novas formas, ipsis haud proprias, inducere haud possemus.

3. Voluntatem divinam esse efficacissimam; et hinc mundum, quum Deus tanquam absolute immutabilis, inde ab aeterno mundum creare voluit, etiam ab aeterno existere debuisse.

Attamen voluit sine dubio Deus ab aeterno, ut mundus fieret, sed non ab aeterno, quod repugnat, verum quando ipse disposuit ¹⁾.

4. Incredibile esse, Deum mansisse otiosum per infinita temporis, tunc ante creationem fluxere, spatia.

„*Assumptum quoniam Deus inde ab aeterno creare voluit, vel accuratius loquendo, creavit; eo ipso otiosus non fuit. Insuper de tempore ante mundum conditum, quicum primum tempus factum est, dicere fas non est.*“ Ceterum si lubet Deum eatenus otiosum dicere, quatenus nullas res ab ipso ante mundum conditum factas sit: *non tam hoc mihi habet absurdum; quoniam Deus sibi sufficiensissimus rebus creatis nullatenus indiget, et mundum, quem libere creavit, etiam nusquam creare potuisset.* Enimvero illo ratiocinio semel admisso, mundus necessario deberet esse aeternus, et hinc aut per se existere, aut, si ab aeterno creatus; Quocumque opinemur, tempore creatum, deum ante tempus infinita illa aeterna tempora spatia fluxissent, quibus Omnipotens sufficiens. Mundus autem per se haud existit, quum sit manifeste finitus ac contingens: aeterna autem creatio sibi ipsi repugnans Perbelle, in rem monstrantem canit Gregorius: *Namque si ante aeternitatem aeternus esset aliquid, quomodo posterius in condidit illi, quid ante* *Quam ferret, variisque tibi Deus undique formis* *Indet et imperitiam tanta multa in caeca patrabat?* *Imperfectum etenim non est nihil. Numen, iusque.* *Scilicet ille vult splendorem servare formae.*

¹⁾ Cf. S. Thom. *Cont. Gentes* I, 2, 1, 3 & 4. *Opp.* T. 18, p. 114 ss.

²⁾ Cf. Clem. Alex. *Strom.* l. 6. n. 16. Opp. T. 2. pp. 843, 774 Agapros.
Hefenp. G. l. c. c. n. 1. Opp. T. 1. p. 10. Augustin. *De civ. D. l.*
11. c. 5—6. Opp. T. 7. c. 276.

*Gaudebat, Numenque suum triplici parique
Luce nitens, soli ut notum est ipsique piisque.
Hoc quoque praeterea, quo se exerceret, habebat
Sancta Trias: mundi formas namque ipsa futuri,
Jam sibi praesentis, lustrabat mente beata.
Cuncta etenim, quae jam vel praeteriere, vel adsunt,
Quaeque etiam exstabunt, Triadi sunt promta, patentque.
Haec enim tempus mihi sic distinxit, ut illud
Ante sit, hoc retro; Deus autem prorsus in unum
Cuncta tenet, sinibusque suis collecta coercet.
Quocirca quidquid vel mens mea reperit unquam,
Aut etiam audivit, mens parturiebat id omne
Numinis aetherei, post autem foetus in ortum
Tempore maturo erupit, cum cuncta relexit
Unigenus Sermo, claraque in luce locavit ¹⁾.*

5. Tandem ipsam S. Scripturam aeternitatem materiae adstruere; quum in libro Sapiientia e legatur: *Omnipotens manus tua, quae creavit orbem terrarum ex materia invisâ, ἡ ἀπόρροον ὕλης, immittere illis multitudinem ursorum, etc* ²⁾).

Veruntamen S. Scriptor, loquens de punitis multiplici flagello idololatriis Aegyptiis, verbis illis solummodo dicere vult, non impossibile id Deo fuisse, qui per omnipotentiam suam e materia indigesta, quam e nihilo procreaverat, mundum finxit, et animalia in terra constituerit; minime autem materiae creationem negat ³⁾).

§. 6. Mundus a Deo ex liberrimo consilio aeterno-juxta sapientissimam illius ideam pariter aeternam creatus.

Si mundus a Deo, ut mox demonstravimus, creatus, i. e. ~~ex~~ nihilo solo voluntatis omnipotentis actu productus est: necessario inde consequitur, illum ex liberrimo consilio Dei atque secundum perfectissimam ejus cognitionem, seu secundum ideam quam inde ab aeterno conceptam de mundo Deus tenuit, factum esse; ita ut haecce sententia nonnisi praecedentis dogmatis uberior sit expositio ac perfecta ejusdem explicatio.

¹⁾ Arcan. Carm. 4. v. 19—29. Opp. T. 2. c. 142 s.

²⁾ Sap. 11, 18 ss.

³⁾ Cf. Augustin. De Gen. cont. Manich. l. 1. c. 5. n. 9. Opp. T. IV. c. 649.

Non Deus mundum creavit, quoniam hic, aut in se ~~spectatus~~, aut vero relate ad Deum consideratus, est necessarius, ~~sed quoniam~~ ipse voluit, ita ut voluntas divina liberrima vera ac propria causa mundi sit. Hoc docet

A. S. S c r i p t u r a, quae ubique defuitis verbis tradit, Deum omnia, quaecunque voluerit, fecisse, et secundum consilium voluntatis suae operari. Sic Psalmista: *Omnia, ait, quaecunque voluit, Dominus fecit in coelo, in terra, in mari, et in omnibus abyssis* ¹⁾. Et: *Deus autem noster in coelo: omnia, quaecunque voluit, fecit* ²⁾. Paulus: *In quo (Christo) etiam, et nos sorte vocati sumus praedestinati secundum propositum ejus, qui operatur omnia secundum consilium voluntatis suae* ³⁾. Et Joannes: *Dignus es Domine Deus noster accipere gloriam et honorem, et virtutem, quia tu creasti omnia, et propter voluntatem tuam erant, et creata sunt* ⁴⁾.

B. Ea est quoque doctrina Ecclesiae a SS. Patribus tradita. Sic Athenagoras ait: *Mundus autem non ideo factus, quod eo indigeret Deus. Omnia enim ipse sibi Deus est, lumen inaccessum, mundus perfectus, spiritus, potentia, ratio* ⁵⁾. — Irenaeus: *Neque ab aliquo motus, sed sua sententia et libertate fecit omnia* ⁶⁾. — Augustinus: *In eo vero, quod dicitur: Vidi Deus, quia bonum est; satis significatur, Deum nulla necessitate, nulla suae cujusque utilitatis indigentia, sed sola bonitate fecisse, quod factum est, id est, quia bonum est* ⁷⁾. — Catechismus Rom. autem disertis verbis pronuntiat: *Deus non ex materia aliqua mundum fabricatus est, sed ex nihilo creavit; idque nulla vi aut necessitate coactus, sed sua sponte, et voluntate instituit* ⁸⁾.

C. Tandem si Deus necessitate aliqua adactus mundum procreavisset: id aut propterea tantum factum esset, quoniam mundus pro sua natura, seu, ut loqui amant, pro sua notione

¹⁾ Ps. 139, 6.

²⁾ Ps. 118, 3.

³⁾ Ephes. 1, 11.

⁴⁾ Apoc. 4, 11. Cf. Jer. 18, 6.

⁵⁾ Legat. pro. Christ. n. 16. Opp. Justin. p. 310.

⁶⁾ L. 2. c. 1. n. 1. p. 116. Cf. l. 3. c. 8. n. 3. p. 183.

⁷⁾ De civ. D. l. 11. c. 24. Opp. T. 17. c. 291. Cf. De Gen. ad litt. l. 6. c. 15. n. 26. T. 3. P. 1. c. 207.

⁸⁾ Ed. Ven. 1833. p. 22.

(in Folge des Begriffes) erat necessarius, aut vero quia Deus prorsus mundo indigebat. Attamen mundus neque in se est necessarius, utpote contingens, neque ejus Deus indigus, quum sit pro sua perfectione infinita sibi sufficientissimus. Deus, qui per rerum naturam primum explicari aut evolvi, et in homine primum ad divinitatis conscientiam evehi debet, Deus non est. Quapropter et mundus neque ad essentiam Dei pertinet, neque ejus totum, neque ejus pars esse potest.

Quoniam autem ex liberrimo consilio, etiam haudquaquam imprudens, sed secundum sapientissimam cognitionem mundum creavit Deus. Quia res creandas bonas esse inde ab aeterno cognovit, illas etiam inde ab aeterno creare decrevit; et quia easdem creare decrevit, futuras quoque esse praescivit ¹⁾. Deum secundum sapientissimam suam cognitionem mundum condidisse, tradunt item

A. SS. Litterae. *Qui fecit*, canit de Deo Psalmista, *coelos in intellectu* ²⁾. Et Propheta: *Qui facit terram in fortitudine sua, praeparat in sapientia sua, et prudentia sua extendit coelos* ³⁾. Atque auctor Proverbiorum ait: *Dominus sapientia fundavit terram, stabilivit coelos prudentia* ⁴⁾. Et iterum: *Dominus possedit* (Sapientia loquens inducitur) *me in initio viarum suarum* (operum suorum), *antequam quidquam faceret a principio. Ab aeterno ordinata sum, et ex antiquis antequam terra fieret. Nondum erant abyssi, et ego jam concepta eram: necdum fontes aquarum eruperant: necdum montes gravi mole constiterant: ante colles ego parturiebar: adhuc terram non fecerat, et flumina, et cardines orbis terrae. Quando praeparabat coelos, aderam: quando certa lege, et gyro vallabat abyssos: quando aethera firmabat sursum, et librabat fontes aquarum: quando circumdabat mari terminum suum, et legem ponebat aquis, ne transirent fines suos: quando appendebat fundamenta terrae, cum eo eram cuncta componens: et delectabar per singulos dies, ludens coram eo omni tempore* ⁵⁾.

B. Ea quoque semper fuit doctrina ac fides Ecclesia — quae uti ab omni necessitate, ita et ab omni imprudentia. (Geba—

¹⁾ Eccli. 39, 25, 23, 29. Dan. 13, 42. Act. 15; 18.

²⁾ Ps. 135, 5.

³⁾ Jer. 10, 12.

⁴⁾ Prov. 3, 19.

⁵⁾ Prov. 8, 22—30.

ten- und Bewußtlosigkeit) ac coecitate in agendo ad extra in Deo assumenda abhorret. *Haec igitur, ait Augustinus, antequam fierent, ulique non erant. Quomodo ergo Deo nota erant, quae non erant? Et rursus, quomodo ea faceret, quae sibi nota non erant? non enim quidquam fecit ignorans. Nota ergo fecit, non facta cognovit. Proinde antequam fierent, et erant, et non erant. Erant in Dei scientia, non erant in sua natura ¹⁾. Et Catechismus Rom. iterum habet: Quemadmodum autem sua bonitate adductus, quaecunque voluit, fecit: ita non exemplum aliquod, aut formam, quae extra se posita esset, cum universa conderet, secutus est; verum quia omnium exemplar divina intelligentia contineretur, id summus artifex in se ipso intuens, ac velut imitatus, summa sapientia, et infinita virtute, quae ipsius propria est, rerum universitatem initio procreavit ²⁾.*

C. Denique id ipsum sana quoque ratio praecipit. Etenim quum Deus, ut demonstravimus, non coactus, sed sponte sua ac liberrime mundum creaverit: ad sapientissimam suam cognitionem consilium creandi mundum ceperit, et ideo mundum ad ideas suas condiderit necesse est; secus enim assumi deberet, Deum coeae, sine conscientia, ratione ac fine, et tamen libere ad extra agere, quod in se jam est impossibile, et cum infinita Dei perfectione, nec non cum ordine in mundo ubique conspicuo absolute conciliari non potest. Quod si enim mundus sine ratione esset conditus: necessario etiam sine ratione ac fine, sine lege ac harmonia existeret.

Idea divina definitur, quid mundus sit; consilio vero divino, ut revera sit. Et hinc, ut mundus existat, Deus et necessario eum cogitare et velle debet, atque creatio, qua nonnisi ejus cognitio perfectissima atque sapientissimum consilium perficitur, actus et scientiae vivae et voluntatis liberrimae ac efficacissimae est.

Idae porro rerum, non autem, quas Plato statuebat extra Deum subsistentes, sed quae inde ab aeterno in infinito Dei intellectu existunt sunt *πρωτότυπα* et *παράδειγμα*, seu exemplar mundi (*κόσμος νοητός*), quin imo, quoniam iisdem res earumque proprietates determinantur, vera ac propria ratio rerum, earum-

¹⁾ *De Gen. ad litt. l. 5. c. 18. n. 36. Opp. T. 3. P. 1. c. 193. Cf. Anselm. Monol. c. 9. (8). Opp. p. 7. — Thom. 1. q. 15. art. 1. Opp. T. 20. p. 101 s.*

²⁾ *Ed. Vien. 1833. p. 22.*

que lex, quae nonnisi illius phaenomenon externum sunt. Propterea autem minime idea mundi idea ipsius Dei est, et quidem tam parum, quam parum Deus mundus ipse esse potest. Unde si Deus idea mundi dicitur, id solummodo significat, Deum in se ideam mundi habere, in qua quidem aeterna ipse mundum tamen tanquam non aeternum intuetur, minime autem revera ipsam mundi ideam existere. Porro mundus quidem ad similitudinem Dei creatus est, quatenus attributa divina perfectissima in eo reasplendent, et manifeste conspiciuntur; cum Deus nonnisi perfectioni suae infinitae convenienter ad extra agere queat. Ast hoc non obstante mundus a Deo sua essentia differt, atque ei oppositus, non-Deus est, ita ut Deus nequaquam vere ac proprie mundi *πρωτότυπον*, sed nonnisi improprie dici possit, quatenus scilicet suam bonitatem cum illo, utpote finito, finite communicavit.

Tandem quum idea mundi ad cognitionem Dei infinitam pertineat, atque cognitio divina, pro infinita sua perfectione subsistens, Dei Filius, seu *Λόγος* sit: recte Filius tanquam verus bajulus ideae mundi cogitatur, atque jure statuitur in ipso mundum praeeexistisse, et per ipsum in Spiritu S., tanquam *βούλησι* divina, pariter per se existente, Patri et Filio communi, conditum esse. *Quia in ipso Verbo*, ait Augustinus, *omnia opera Dei. Quidquid enim facturus erat Deus in creatura, jam in Verbo erat; nec esset in rebus, nisi esset in Verbo: quomodo et in te non esset fabrica, nisi esset in consilio* ¹⁾. Hinc etiam Sapientia divina, seu *Λόγος*, quatenus scilicet rerum crearum causa exemplaris et dirigens est, *omnium artifex* adpellatur ²⁾.

Quoniam tamen idea mundi, uti omnis cognitio divina, a Patre originem habet, et quia uti Pater principium est reliquarum personarum divinarum, ita quoque creatio initium ac fundamentum quodammodo reliquorum operum divinorum: creatio, licet etiam Filio, nec non Spiritui S. adscribatur, tamen per appropriationem, ut ajunt, Patri attribuitur.

¹⁾ *Enarr. in Ps. 44. n. 5. Opp. T. 4. c. 384. Cf. Clem. Alex. Cohort. ad gent. n. 1. Opp. T. 1. p. 6.*

²⁾ *Sap. 7, 21. Cf. Joan. 1, 3. 10. Col. 1, 16. Hebr. 1, 2. — Justin. Cohort. ad Graec. n. 15. Opp. p. 19. — Tatian. Or. cont. Graec. n. 5. lb. p. 262. — Iren. Cont. haer. l. 5. c. 18. n. 2—3. p. 315. l. 5. c. 12. n. 6. p. 307. l. 5. c. 24. n. 4. p. 322. — Origen. In Joan. t. 1. n. 22. Opp. T. 4. p. 20. — Athanas. Or. cont. gent. n. 4. Opp. T. 1. p. 39.*

Observ. 1. Deum non omnia fecisse, quae possibilia sunt, prout Pantheistae contendunt, quorum dogma fundamentale est, nihil esse possibile, nisi quod actu existat, a nobis jam supra ostensum est ¹⁾ Argumentis ibidem pro sententia Catholica allatis adjici potest, eidem ipsam Conciliorum quoque suffragari auctoritatem. Nam in Conc. Senonensi a. 1140. Abaelardus errorem oppositum his coactus est ejurare verbis: *Deum ipsa ea solum facere credo, quae ipsum convenit, et quod multa facere posse, quae nusquam facit* ²⁾. Et Conc. Constantiense a. 1414. damnavit hasce Wicleffi propositiones: *Omnia de necessitate absoluta eveniunt. Atque: Deus nihil potest annihilare, nec mundum majorare vel minorare* ³⁾.

Errori illi proxima est opinio eorum, qui statuunt, Deum non alia facere posse, quam facit, non quidem quod agat necessitate naturae coactus, sed quod agat necessitate sapientiae et justitiae suae, quae non patitur, res vel alias vel alio ordine fieri, quam revera factas videmus. Quae pari modo a sana ratione rejici debet. Nam haec quidem intelligit, Deum, si agit, necessario sapienter et juste agere; attamen simul perspicit, per certum aliquem, quem Deus sequitur, agendi modum ac ordinem non omnes agendi modos ac ordines sapientes ac justos exhauriri, atque illo divinam sapientiam ac justitiam tam parum finiri, quam rebus revera existentibus omnipotentiam; quum infinita dari possint, quae si Deus agere vellet, juste et sapienter ageret ⁴⁾.

§. 7. Modus creationis.

Ad doctrinam certo revelatam dumtaxat pertinet, quod hucusque exposuimus, videlicet mundum a Deo uno ex nihilo, liberrimo consilio secundum sapientissimam suam cognitionem, in seu cum tempore esse productum; quae autem ulteriora sunt, quomodo scilicet haec creatio facta sit, num nempe uno temporis instanti,

Expos. fid. n. 2. p. 100. E. — Epiphan. Ancorat. n. 28. Opp. T. 2. p. 33. — Theodoret. In Col. 1, 15, 16. Opp. T. 3. p. 347. Etc.

¹⁾ P. 1. §. 20. p. 189 ss.

²⁾ Cf. Bail, *Sum. Con. Patav. 1723. T. 2. p. 560. c. 2.*

³⁾ Mansi, *Coll. Conc. T. 27. c. 751. T. 28. c. 121. Cf. Ambros. In Ps. 118. n. 37. Opp. T. 1. c. 1231 s. In Luc. l. 2. n. 75. Ib. c. 1305. — Hieronym. Matth. c. 3. Opp. T. 7. c. 18.*

⁴⁾ Cf. Thom. 1, q. 25. art. 5. Opp. V. 20. p. 162 s.

an vero per temporis aliquod spatium, et quod, dogmatice non constat.

Quod auctore Moyse desuper comperimus, huc redit:

1. *In principio*, i. e. in primis, ante omnia, quum nihil esset praeter Deum, *creavit* i. e. ex nihilo produxit, *Deus coelum et terram*, h. e. primordiale illam operis totius molem, *elementa seu semina omnium ac singularum rerum divina potestate efficiendarum continentem*, quae a Moyse *יְהוָה וְכֹהֵן*, juxta Septua-

ginta *ἀόρατος καὶ ἀκατασκευάστος*, *invisibilis et incomposita*, seu *informis*, juxta Vulgatam *inanis et vacua*, juxta Symmachum *ἀργὸν καὶ ἀδιακρίτον*, *rudis et indiscreta*, atque etiam *abyssus et aqua* adpellatur ¹⁾.

2. Indigestae illi moli nova creatione Deus formam addidit ²⁾, atque ut tellurem nostram formaret, et omnem ejus ornatum absolveret, usus est spatio sex dierum. Praemissa enim universi creatione Moyses solam terrae ulteriorem fictionem describendam sibi assumit, ac de coelo nonnisi obiter loquitur, quatenus nimirum systema coeleste cum systemate telluris conexum est.

a. Primo die dedit Deus luci originem, i. e. voluit, ut materia seu aether, aut potius vis lucis ac caloris, utrumque enim vox *אור* significat, et forsitan etiam reliquae vires pondere destitutae e mole rudi solverentur, utpote quae causae principales (*Grundbedingungen*) omnium rerum terrestrium sunt.

b. Secundo die originem dedit aëri, seu expanso illi, quod terram ambit, atque superioribus aquis, seu nubibus, ulterioribus causis rerum tam organicarum quam non organicarum; i. e. voluit, ut aër, qui massae indigestae commixtus sive ligatus inerat, evolveretur atque vapores modo exorientes reciperet.

c. Tertio die distinxit Deus aquas reliquas ab arida, et in mare collegit; terramque jussit producere herbas et arbores omnis generis, postquam, aqua excreta, fossilia, ut saltem con-
jicere licet, quoque oriri fecerat.

¹⁾ Cf. S. Basil. *Hom. 1. in hexaem. n. 7. Opp. T. 1. p. 8.* — Justin. *Apol. 1. n. 10. 59. Opp. p. 49. 80.* — Iren. *Cont. haer. l. 2. c. 10. n. 4. p. 127.* — Augustin. *De Gen. cont. Manich. l. 1. c. 5—7. n. 8—12. Opp. T. 1. c. 648 ss. Conf. l. 12. c. 3—6. T. 1. c. 210 s.* — Gregor. M. *Moral. l. 32. c. 12. n. 16. Opp. T. 1. c. 1055.* — Hugo a S. V. *Act. De Sacr. l. 1. c. 2. 4. Opp. ed. Rothom. 1648. T. 3. p. 488. 489.*

²⁾ Cf. August. *Conf. l. 12. c. 8. c. 211 s.* — Gregor. M. *Moral. l. c.* — Isidor. *De differ. spir. n. 9. Opp. p. 186.*

d. Quarto die constituit solem et lunam una cum sideribus reliquis, i. e. in terra nebulis sparsis, plene comparere fecit, vel, ut alii putant, astris vim aetherem lucis, ut luceat, concitandi indidit, aut, ut alii iterum autumant, materiam lucis ad sidera religavit.

e. Quinto die procreavit pisces et volucres cum reliquis animalibus in aëre et in aquis; atque

f. sexto die animalia terrestria ac imprimis hominem, maximum operis divini decus, rerumque omnium in orbe terrarum dominum.

3. *Die septimo requievit Deus ab universo opere, quod patrauerat*, i. e. destitit deinceps a novis rerum finitarum speciebus producendis, non autem a provida earundem cura, conservatione et gubernatione ¹⁾; *et benedixit diei septimo, et sanctificavit illum*, h. e. constituit, ut homo quoque a labore conquiesceret, diemque hunc studio Dei potentiam sapientiam ac bonitatem summam admirandi, beneficiorum ejus recordandi, eum semper magis cognoscendi atque diligendi impenderet, seu quieti animae in Deo dicaret ²⁾. Quomodo enim a Deo res ortum suum ita in ipso finem quoque ac terminum ultimum, ad quem tendant, habent.

Haec jam Moysis narratio a diversis diversimode exponitur. Alii enim illam sensu prorsus litterali accipiendam esse censent, ita ut de diebus naturalibus cogitent. Alii eandem pariter sensu litterali quidem sumunt, attamen sub diebus spatia longiora, indefinita, intelligenda esse praecipiant. Alii iterum litterali sensui quidem inhaerentes, opus sex dierum tamen, prout a Moyse refertur, non de primordiali molis indigestae formatione, sed de mundi collapsi in praesentem formam restitutione interpretantur, idque per verba: *Terra autem erat inanis et vacua*, quod idem sit ac: *Fada est inanis et vacua*, indicari autumant ³⁾. Alii narrationem nostram allegorice explicant, tradentes, omnia momento temporis creata esse, et sex dies nonnisi diversos ordines rerum creatorum significare, ut Clemens Alex. ⁴⁾, Origenes ⁵⁾,

¹⁾ Cf. Clem. Alex. Strom. l. 6. n. 16. Opp. T. 2. p. 813. — Theodoret. Quæst. in Gen. Interp. 21. Opp. T. 1. p. 23 s. — Chrysostom. Hom. 10. in Gen. n. 7. Opp. T. 4. p. 79 s. — Augustin. Cont. Adimant. Manich. c. 2. n. 1. Opp. T. 8. c. 112. — Thom. 1. q. 73, a. 1. ad 3. Opp. T. 20. p. 395.

²⁾ Cf. Augustin. De civ. D. l. 11. c. 8. T. 7. c. 277 s.

³⁾ Cf. Ruyter, Begriff der chr. Glaubenslehre Rempt. 1832.

⁴⁾ Strom. l. 6. c. 16. Opp. T. 2. p. 813 ss.

⁵⁾ De princ. l. 4. n. 16. T. 1. p. 174. s.

nec non Augustinus ¹⁾). Juxta mentem hujusce S. Patris mundus primo instanti unoque verbo creatus fuit, integro suo ornatu perfectus et pulcher; verum illum nonnisi per partes secundum sex diversa rerum creaturarum genera cognoverunt Angeli, et quidem quamvis partem primo in essentia divina, et dein in rerum natura intuentes, quapropter et cognitionem priorem, utpote multo clariorem ac lucidiorem, matutinam, posteriorem vero vespertinam dici. In libris tamen serius exaratis in eam descendit sententiam, quae sex dies creationis divinae defendit dies esse veros ²⁾). Alii tandem creationis narrationem Moysis mythum esse contendunt, cui nonnisi veritas, Deum auctorem esse universi, subjecta sit, reliqua omnia ornatus ac vestitus causa esse excogitata.

Quod jam has varias opiniones attinet: ante omnia tanquam certum ac exploratum statuendum est, mythicam expositionem narrationis Mosaicae prorsus rejiciendam esse. Etenim

1. Moyses Israëlitis, ut a nemine negatur aut ignoratur, historiam generis sui et Legem a Deo datam conscribere, atque sic populares suos in cultu veri Dei confirmare voluit. Cui fini aperte mythus in capite operis positus haudquaquam convenit, idque eo minus, quum narratis fides in unum Deum verum, lex sabbati, atque tota constitutio rei Mosaicae superstruatur. Legislatorem enim ac historiographum manifeste figmenta condere haud decet. Quemadmodum itaque in sequentibus veram historiam refert, ita quoque hic in nostro loco vera narrat, quibus populum de initiis mundi certiores reddat, a cultu astrorum, animalium ac plantarum, utpote propter hominem conditarum, deterreat, atque legem sabbati exemplo Dei quasi confirmet ³⁾).

2. Assumpto mytho in primis Geneseos capitibus, omnia incerta et vacillantia redduntur; quum eodem prorsus stylo eademque oratione narratio in his et sequentibus capitibus decurrat, atque haecce nonnisi ulteriorem explicationem ibi memoriae proditarum rerum contineant. Principium enim illud, ea esse rejicienda, quae facile haud perspicimus, i. e. quae nobis non arident, ne in historia profana quidem, et eo minus in historia sacra admitti poterit; nam tali principio adoptato nihil certum ac firmum stare poterit, sed omnia necessario concutientur ac subvertentur, prout id exempla eorum ostendunt, qui in interpretandis SS. Litteris

¹⁾ *De Gen. ad litt. l. 5. c. 5. n. 12—16. Opp. T. 3. P. 1. c. 185 ss.*

²⁾ *De catech. rud. c. 17. n. 28. T. 6. c. 282.*

³⁾ *Cf. Gen. 2, 3. Exod. 20, 9—11. 31, 15—17.*

vanis ingenii sui suggestionibus potius indulgere, quam litterae inhaerere maluerunt.

3. Si historia creationis, prout a Moyse narratur, non revelationi divinae in acceptis est referenda, sed Moysi aut alii auctori ante ipsum viventi: viri hi in perspicacissimos philosophos convertuntur, quales nec cultissima Graecorum ac Romanorum aetas tulit, et in illa prima generis humani aetate expectari aut assumi nullo modo possunt. Sane enim, si philosophorum aut poetarum qualiumcunque etiam in hacce re placita cum narratione Mosaica conferantur: sole clarius patet, ne a longe quidem hancce exaequare.

4. In aliis libris tam A. quam N. T., in omnibus locis, ubi de mundi exordiis sermo habetur, formatio terrae eodem modo prorsus enarratur, ubique verâ historiâ in prioribus Geneseos capitibus suppositâ aut assertâ, et ne unicus quidem est locus, ubi discussa mythi umbra, nude et simpliciter id, quod res sit, edisseratur.

5. SS. Patres narrationem Mosaicam de creatione secundum litteram intellexerunt consensione magna; atque etsi pauciores quidam illam allegorice interpretati sunt, mythice tamen nemo ¹⁾).

6. Quamvis Ecclesia definitionem de sensu historiae: creationis, prout a Moyse narratur, non tulerit: mythicam tamen interpretationem prorsus a mente ejus abhorrere, tam certum est, quam illam SS. Libros integros cum omnibus suis partibus pro inspiratis ac canonicis suscipere ²⁾; quum mythi cum inspiratione divina nullo modo conciliari possint.

7. Sententiam nostram quoque confirmant vetustissimarum gentium testimonia, quae omnia cum Moysis narratione mire consentiunt, quum omnes populi memoriam creationis intra septem dies aut longiora spatia servant, atque per hebdomadas digesta tempora habent.

8. Accedit, plures, eosque doctissimos geologos, ut Her-
menegildum Pini ³⁾, Henslerum ⁴⁾, De Luc ⁵⁾,

¹⁾ Cf. Exod. 20, 9—11. Deut. 5, 12—15. Ps. 32, 6 ss. 103, 19 ss. 135, 5 ss. Marc. 10, 5—6. Act. 17, 24 ss. 1. Cor. 11, 8. 2. Cor. 4, 6.

²⁾ Cf. Petav. *De oper. sex dier. l. 1. De theol. dogm. T. 3. p. 117 ss.*

³⁾ Cf. Conc. Trid. Sess. 4. *Decr. de can. Script.*

⁴⁾ Cf. *Observationes in Geneseos loca selecta.*

⁵⁾ Cf. *Geological essay. p. 35.*

⁶⁾ *Lettres sur l'histoire physique de la terre, adressées à M. Blumenbach. Par. 1798.*

André ¹⁾, Buckland ²⁾, Daubuisson, Humboldt, Steffens aliosque, affirmare, Mosaicam cosmogoniam apprime convenire cum suis observationibus, et speciatim, ut docent Br o c h i ³⁾, Demerson ⁴⁾ et Boubée ⁵⁾, seriem operum singulorum, dierum recte esse illam, quae per naturam rerum creatarum desideretur.

Caeterum non negamus, multa in narratione Mosaica, occurrere modo infantili, utpote solo primae aetati generis humani conveniente, adumbrata, atque actiones divinas, quae memoriae prodantur, esse symbolicas, quibus Deus auctori illius, narrationis vel protoparenti per visionem creationem rerum harumque indolem patefacere voluit. Huc pertinent varii sermones Dei, etc.

Si vero putant, Deo successivam terrae formationem indignam esse: observandum est, in successiva rerum creatione non minus, quam simultanea omnipotentiam et sapientiam ostendi, quum et illa et haec non tam ex tempore, sed potius ex multitudine ac praestantia rerum productarum aestimetur, quin imo per successivam creationem utramque magis, quam per simultaneam ob oculos hominum poni. Quemadmodum itaque Deus optimus Maximus uno temporis momento mundum sine dubio creare, ita quoque sine dubio illum aliquo temporis spatio, breviori aut longiori, efficere potuit. Quod autem elegerit, dumtaxat per revelationem edoceri possumus, licet intelligamus, posteriorem modum legi, uti ajunt, continuitatis atque parsimoniae, quam per totam rerum naturam ubique observatam cernimus, magis consonum esse. — Neque locus Ecclesiastici: *Qui vivit in aeternum, creavit omnia simul* ⁶⁾, ullam difficultatem parit; nam in textu graeco est *καὶ ὅλην*, quod est idem, ac *ad unum omnia, sine exceptione*, ita ut sensus huius loci sit: Omnia et singula Deus creavit, nihilque existit, quod aliunde, aut ab alio creatum sit.

Magis adridet sententia, quae narrationem Mosaicam sensu quidem historico accipit, attamen sub diebus longiora spatia indefinita intelligit, minime autem negat, Deum suam efficientiam immediatam interposuisse, ubi necessarium fuerit. Neque expo-

¹⁾ *Théorie de la surface actuelle de la terre*. Par. 1806.

²⁾ *Vindiciae geologicae*. Oxon. 1821; et *De la géologie et de la minéralogie dans leurs rapports avec la théologie naturelle*. Par. 1838.

³⁾ *Conchologia fossile subapennina*. Mil. 1814. T. 1. p. 217.

⁴⁾ *Géologie*. Par. 1829. p. 408. 461.

⁵⁾ *Géologie élémentaire*. Par. 1833. p. 63.

⁶⁾ Eccli. 18, 1.

sitioni huic quidquam obstat. Nam *dies* דִּי, ut apud Graecos et Latinos, non semper diem naturalem, sed et interdum tempus lucis ¹⁾, interdum vero indeterminatum temporis spatium significat, uti in ipso secundo Geneseos capite, ubi Moyses scribens ait; *Istae sunt generationes, coeli, et terrae, — in die, quo fecit Deus coelum, et terram, et omne virgultum agri etc.* ²⁾; atque *dies septima*, qua Deus ob omni opere, quod patrarat, quiescere perhibetur, aperte diem naturalem significare non potest, quum adhuc perduret. Et sane si Clementi Alex. ³⁾, Origeni ⁴⁾, ac praesertim S. Augustino ⁵⁾ licuit, salva fide, sex dies creationis allegorice interpretari, ac totum creationis opus momento temporis expletum asserere; si absque temeritatis nota plures Theologi eandem sententiam tueri potuerunt ⁶⁾, atque non admodum dissimilem expositionem primi Geneseos capitis Cajetanus et Melchior Canus impune dederunt ⁷⁾: aperte consequitur, nil obesse, quominus expositio de sex periodis indeterminatis admittatur, si evidentes observationes nos cogant, a communi interpretatione recedere, eo magis, cum jam S. Augustinus doceat, nil temere de natura dierum creationis pronuntiandum esse, *Quid, dies, enim ait, cujusmodi sint, aut perdifficile nobis aut etiam impossibile est cogitare, quanto magis dicere* ⁸⁾.

Mundum antiquum, aut plures plane collapsos, et exinde per Dei voluntatem novum factum esse, putamus sine sufficiente ratione statui. Nam e sacro textu id erui nequit ⁹⁾, et quae ad confirmandam hanc sententiam proferuntur, uti sunt in montibus conchae marinae, cadavera animalium, herbae et arbores in saxum conversae, cujusmodi terrae regiones, in quibus inveniuntur, nunquam tulere, alii ex diluvio universali explicant ¹⁰⁾. Opinio

1) Gen. 1, 5.

2) Gen. 2, 4—5. Cf. Ps. 19, 10. 2. Petr. 3, 18.

3) Strom. I. 6. c. 16. Opp. T. 2. p. 813.

4) De princ. I. 3. c. 5. Opp. T. 1. p. 148.

5) De gen. ad litt. imperf. T. 3. B. 1. c. 93 ss. De Gen. ad litt. I. 5. c. 2—6, n. 4—19. Ih. c. 183 ss.

6) Cf. Perrone, Prael. theol. Lov. 838 ss. T. 3, p. 82.

7) Cajetanus in Comment. in c. 1. Gen. v. 5. Comm. in S. Script. Lugd. 1639, T. 1. p. 6. — Melchior Canus ap. Banez. I. q. 74. a. 2. Schol. Comment. in S. Thom. Duac. 1613. T. 2. p. 96.

8) De cir. D. I. 11. c. 6. Opp. T. 7. c. 278 s. Cf. De Gen. ad litt. I. 4. c. 1. T. 3, P. 1. c. 159 s.

9) Cf. Gen. 2, 1.

10) Cf. 2. Petr. 3, 6. Ps. 103, 6—9.

tamen Origenis de infinita mundorum se excipientium a Deo creatorum serie ¹⁾ ab Ecclesia diserte condemnata est ²⁾.

Observ. Historiam creationis solummodo revelationi in accipitis referendam esse, quum utpote omnem hominum memoriam imo ipsam mundi originem excedens aliunde repeti nequeat, per se patet. Num autem illa primum Moysi contigerit, an vero jam protoparentibus data, et deinde per traditionem, sive ore siye scripto postea, propagata fuerit, perinde est; quoniam, si et posterius, quod reapse verosimilius esse videtur, obtinuerit, tamen narratio illa non sine speciali auxilio divino, quo universim Moyses usus est, litteris mandata est.

Observ. 2. Quae adversus narrationem Mosaicam obmoventur, ad haec redeunt:

1. Moysem terram universi cardinem habere, cujus commodis sol ac luna cum reliqua siderum multitudine inserviant, astra vero splendentia corpora esse in coelo expanso firmata. Inde etiam tantum explicari, quare ex mente Legislatoris populi Israëliti cum corporibus coelestibus fabricandis unus tantum dies sufficiat, in formanda instruendaque terra quinque dies consumantur.

Môyses quidem minime physicam et astronomiam docere voluit; verum etiam in mente ejus falsae physicae et astronomiae notiones minime haeserunt. Illud credidisse Moysem, quod ab adversariis obijcitur, nequaquam ex ejus verbis conjici potest. Quodsi enim exhibet solem, lunam et sidera terrae commodis inservientia, ratio in promptu est; voluit enim nonnisi historiam ortus telluris conscribere, et ideo de coelestibus corporibus tantum eatenus loqui, quatenus ad illam referuntur. Minime autem propterea ullo modo indigat, se sententiam tenere, aut docere velle, hunc unicum coelestium corporum finem esse, ut terrae utilitati inserviant; et multo minus asserit, ea corpora esse veluti in coeli fornice affixa.

2. Juxta chronologiam Mosaicam sex circiter annorum millia a primi hominis creatione effluxisse; quum tamen ex Aegyptiorum, Chaldaeorum, Indorum atque Sinensium annalibus et historiis monumentis constet, longe antiquius genus humanum esse epochâ illâ a Moyse constitutâ.

¹⁾ *De princ. l. 3. c. 5.* Opp. T. 1. p. 148 ss. Caeterum jam Clemens Alex. plures ante hunc orbem terrarum fuisse exortos, significaverat. Cf. Phot. *Bibl. C. 109.* Contra Origenis sententiam Methodius singularem librum: *De rebus creatis*, conscripsit. Ap. Phot. *Bibl. C. 235.*

²⁾ Conc. V. C. Polit. II. Coll. 8. *unath. 11.* Mansi, *Coll. Conc. T. 9. c. 383.* Cf. Justin. Imper. *L. adv. Orig. Ib. c. 487 ss.*

Ast haec frustra asseruntur. Nam objecta Babylonensia et Aegyptiaca chronica tanquam omni fide historica destituta ob omnibus viris antiquitatis peritis rejiciuntur. Varro, qui inter Romanos archaeologus scientissimus habebatur, annos bis mille ante aeram Christianam Aegyptiacis rebus assignat. Et certe quum Moyses libros suos coram Aegyptiorum gente universoque orbe scriberet: nullum poterat tunc monumentum exstare, quo falsitatis argui potuisset. Flavius Josephus in sua Archaeologia, ut probabiliora Romanis redderet Mosaica instituta, non semel imminuit facta prodigiosa; nunquam tamen aliquid immutat de Mosaica chronologia, imo eam consulto in libris contra Appionem tuetur. Celsus, inter religionis Christianae impugnatores satis eruditus, qui data opera creationis epocham Mosaicam aggreditur, post plures irritos conatus tandem vel invitatus fateri debuit mundi novitatem, neque gentem ullam aut monumentum aut factum reperiri, quod epocham a Moyse definitam praetergrederetur ¹⁾. Demum Democritus, peragratis Aegypti, Chaldaee, Persidis, Aethiopiae ac Indorum regionibus, prout refert Diogenes Laërtius ²⁾, omnibus documentis sedulo excussis, in Graeciam tandem se recipiens, mundum recens ortum proclamavit, nec ullum monumentum Thebarum bello aut Trojae excidio antiquius reperiri affirmavit. — Nec magis firmum fundamentum constitui potest in Sinensium annalibus. Tres enim in epochas dispertiri possunt. Prima ex integro mythologica est; fabulis anilibus altera plane scatet; postrema aliquam historiae speciem prae se ferre videtur, quae tamen vix ad tempus vocationis Abrahami assurgit ³⁾. — Ad Indicas vero antiquitates quod spectat: a sodalibus Anglorum societatis Calcutti demonstratum est, eas non ascendere ultra Sinensium atque Aegyptiorum monumenta ⁴⁾. Ezour Vedae autem codicem, cui tanta antiquitas et auctoritas tribuebatur, librum esse spurium, critici nuper deprehenderunt ⁵⁾. — Praeterea scientiarum atque artium initia et progressus infantiam generis humani invicte demonstrant. Ante Hebraeorum Legislatorem nullum indigitari potest germanae qualiscunque scientiae vestigium. Cadmus enim primus perhibetur, saltem ex communiori sententia, qui litteras in Graeciam detulerit XII. aut XVI.

¹⁾ Cf. Origen. *Cont. Cels.* l. 1. n. 20. Opp. T. 1. p. 338.

²⁾ L. 9. *segm.* 35.

³⁾ Cf. Gerdil. *Saggio d' istruzione teologica: De Deo creat.* Opp. ed. Rom. T. 10.

⁴⁾ Cf. *Bibliot. britannique.* Genev. 1801. T. 16. p. 337 ss.

⁵⁾ Cf. *Researches asiatic.* V. 14.

saeculo ante aeram Christianam. Ante Thaletem et Pythagoram vix audita est philosophiae notio. Pingendi atque sculpendi artes felicioribus, dumtaxat, temporibus apud Graecos excelluerunt, earumque auctores fore omnes noti sunt. Jam vero si hominis creatio tot annorum myriadibus, quas fabulantur adversarii, supra epocham Mosaicam altius ascenderet: undenam factum est, ut hominum ingenium incultum, prorsus tanto temporis spatio contra ipsius naturam permanserit? Accedunt observationes geologicae, juxta quas nusquam hactenus reperta sunt ossa fossilia humana, vel si qua novissimis temporibus reperta perhibentur, rarissima sunt, et etiam nulla instrumenta metallica, aut alia ab hominibus fabrefacta aut elaborata, in locis, et adjunctis, quae nimiam antiquitatem ostendant; ita ut ipse patere videatur, non modo genus humanum epocha Mosajca antiquius non esse, sed fortasse, etiam tempore diluvii Noëti non ita dispersum fuisse, nec ita multiplicatum, ut multi putant.

3. Chaldaei jam ab Alexandri M. aetate, teste Diodoro Siculo ¹⁾, astronomicas observationes servabant quadringentorum septuaginta, duorum, annorum millium, Herodotus praeterea refert, se accepisse a Sacerdotibus Aegyptiis, a primo ipsorum Rege Vulcano 330, Reges regnasse, usque ad Moërim, qui juxta illos regnabat a. 1350, a. Ch. n., et usque ad Setum alios 341 regnasse per annos 11,340; eosdemque ei ostendisse 345 lignea simulacra, imagines, prae se ferentia totidem Pontificum, qui a patre in filium, alter alteri successerant; addebant, tanto illo temporis spatio, his solem ortum esse, ad occidentem, his invicem ad orientem occidisse ²⁾. Observationes astronomicae Indorum atque Sincensium, ejusdem sunt aut majoris adhuc antiquitatis. Accedunt zodiaci cum planisphaerio non ita pridem detecti in templis Tentyrae atque Latoppolis (Esne), ex quibus patet, juxta regulas processionsis acquisitionum a duodecim ferme annorum millibus ea exsculpta esse.

Jam quod attinet observationes astronomicas Chaldaeorum, quas ad nos pervenerunt, L. a. Placc ostendit, eas octingentis annis non excedere aeram Christianam, neque antiquiorem esse astronomiam Aegyptiorum ³⁾. Et sane jam illa, quae de ortu et occasu solis, ipsi, narrasse, traduntur, satis ostendunt, quanta fuerit veterum Aegyptiorum scientia. Indorum autem tabulas recentiores esse adhuc, ac ipsa Ptolemaeo posteriores, idem Astronomus

¹⁾ *Bibl. l. 2. ed. Laur. Rhodoman. Hanov. 1604. p. 118.*

²⁾ *Herod. l. 2. ed. Henr. Stephan. 1566. p. 55. et 61.*

³⁾ *Exposition du système du monde L. 5. ch. 1. p. 291.*

evicit ¹⁾). Sinenses autem quod attinet: longe probabilius Delambre censet, eos mutuatos esse suam doctrinam astronomicam ab Indis primo, et deinde a Muhamedanis. Hoc porro certum est, omnes antiquas observationes, illis ipsis fatentibus, periisse, nec nisi a. 104. ante Christum Sse- Ma- Tasien nonnulla monumenta ac praecepta collegisse ad metiendum planetarum motum, et ad eclipses determinandas. Idem praeterea Delambre ostendit, omnes recensitos populos adhuc in infantia scientiae astronomicae versari, nec nisi elementares aliquot atque imperfectas illius notiones habuisse, vel etiam adhuc habere, quae nec scientiae nomen merentur ²⁾).

Quod autem attinet ad zodiacos et planisphaerium Tentyrenae: sunt inter eos, qui definire conati sunt aetatem eorum, tot sententiae, quot capita. Planisphaerium Lutetium delatum accurate examinavit Delambre, qui decernere non dubitavit, illud Alexandro M. posterius esse, et praesertim Biot, qui ex accuratis mensuris et calculis deduxit, illud exhibere coeli formam seu statum, prout erat a septingentis ante Christum annis, addit tamen, illud post aeram Christianam constructum esse. Verum hae disquisitiones fere inutiles sunt. Architectura enim et sculpta vel picta signa ostendunt, ad epocham non valde remotam pertinere templa Tentyrae et Latopolis. Deinde in templo Tentyrae, ubi erat planisphaerium, adest porticus, in qua adhuc zodiacus superest, quae, ut docet graeca inscriptio, consecrata fuit *Saluti Tyberii*. In minori templo Latopolis, quod jactabant aedificatum saltem a. 2700. vel 3000. ante Christum, adest columna sculpta et picta, et quidem eodem stylo, quo proximus zodiacus, a. 10. Antonini, seu a. 140. aerae Christianae. Praeterea divisio illa zodiaci, quam putabant solstitium indicare, nullam cum eo necessitudinem habet. Nam arca cadaveris juvenis cujusdam, defuncti a. 116. aerae nostrae, prae se fert zodiacum cum eadem prorsus distributione signorum, ut zodiacus in templo Tentyrae. Quae omnia argumento sunt invictissimo, inepta prorsus esse, quae increduli non ita pridem inde contra revelationem se interquere posse censebant ³⁾).

¹⁾ Ib., p. 294. Cf. Delambre, *Histoire de l'astronomie ancienne*, Par. 1817. t. 1, ca. 1. p. 11, s.

²⁾ Cf. Delambre, l. c. p. 350. a.

³⁾ Cf. Biot, *Recherches sur plusieurs points de l'astronomie égyptienne*, Par. 1823. — B e r r o n e, *Praelect. theol.* ed. Lov. 1838 ss. V. 3. p. 94—107.

4. Tandem obmovent, multa millia annorum requiri, ut lux proximae stellae fixae ad nos perveniat, ita ut jam inde pateat, saltem sidera longe antiquiora, quam ex Genescos narratione sequi videatur.

Haec objectio ad chronologiam Mosalicam, quae solam aetatem generis humani, non autem ipsius terrae aut universi exhibet, minime attinet. Insuper putamus, calculos, illos de lucis stellarum propagatione institutos haud solidis niti rationibus. Etenim primo non evictum est, omnem lucem eadem celeritate, ut hic assumitur, propagari. Deinde ipsa natura lucis non constat. Nam hypothesis, qua statuitur, lucem esse materiam e corporibus lucentibus emanantem, a plurimis physicis merito est derelicta, sed et altera hypothesis, vibrationis dicta, non omnia lucis phaenomena explicari possunt, ita ut illorum sententia fors praeferenda sit, qui lucem simplicem vim habent, cujus propagandi celeritas a sola densitate corporum pellucidorum, uti aëris, pendeat. Quod si verum esset, stellae omnes eodem fere temporis momento a nobis conspicerentur, et de tot myriadibus annorum, quibus opus est juxta sententiam adversariorum, ut lux viam a stellis fixis usque ad terram absolvat, cogitandum haud esset ¹⁾).

§. 8. Finis creationis ultimus.

Quum Deus infinite sit sapiens; sapientiae autem sit nil sine ratione ac fine agere: jure quaeritur, quamam causa motus fuerit, quidque intenderit Deus, ut mundum conderet.

¹⁾ Cf. Steffens, *Anthropologie* Bresl. 1824. — Chr. *Religionsphilosophie*. Bresl. 1839. — Schubert, *Symbolik des Traumes*. Hamb. 1814. — *Geschichte der Natur*. Erl. 1835—37. — *Die Umwelt und die Fixsterne*. Dresd. 1832. — *Ueber die Einheit im Bauplan der Erdfeste*. Münch. 1834. — Schrank, *Heraklites*, 2c. Augsb. 1829. — *Commentar. litter. in Gen.* Sallsh. 1835. — Schlegel, *Philosophie der Geschichte*. Wien, 1830. — Görres, *Ueber die Grundlage, Gliederung und Zeitenfolge der Weltgeschichte*. Bresl. 1836. — Urr, *Neues System der Geologie*. Wien. 1830. — Cuvier, *Sur les révolutions de la surface du globe*. — Schmid, *Uebereinstimmung der Geologie und der Genesis in Beziehung auf die Schöpfung*. In *Sengler's relig. Zeitschrift*. 1833. — Fuchs, *Ueber die Theorie der Erde*. Münch. 1837. — Pustuchen, *Die Urgeschichte der Menschheit*. Lemgo. 1821. — Marc de Serres, *De Kosmogonie des Mosés im Vergleiche mit den geolog. Thatfachen*. Tab. 1841. — Wisemann, *Zusammenhang der Ergebnisse wissenschaftlicher Forschung mit der geoffenbarten Religion*. Regensb. 1840. — Buckland, *Geologie und Mineralogie in Beziehung zur natürlichen Theologie*. Neuchât. 1838. — Waterkorn, *La religion et la foi sur l'oeuvre de création*. Liège. 1845.

Non agitur autem hic de fine proximo, quem singulis rebus creatis Deus praefixerit, quas scilicet, licet media aliarum, exceptis naturis intelligentibus, sint, simul tamen fines sibi proprios praescriptos habere cernimus; neque de omnium finium primo ac nobilissimo, cui reliqui quodammodo inserviunt ac subordinantur; sed agitur de causa ultima ac propria, qua Deus adductus mundum creaverit, seu de rerum fine omnium ultimo, et ideo etiam communi, qui omnes alios simul comprehendit ac excedit.

Non potest autem ultimus hic creationis finis, seu haec ultima rerum creatarum ratio extra Deum quaeri, quum ipse, utpote Bonum infinitum in se, nil extra se appetere queat ¹⁾, et propterea nil aliud esse, quam ipsa summa Dei perfectio ac bonitas. Hoc enim interest inter operantem Deum et creaturam, quod omnis creatura operatur, ut bona sit, i. e. ut perfectionem acquirat aut conservet, Deus autem operatur tantum, quia bonus est, i. e. ut perfectionem suam cum rebus finitis, quoad fieri potest, communicet, et sic illam ad extra manifestet, cum ipse nullius perfectionis indigeat, nec illius assequendae capax sit.

Creavit itaque Deus mundum, quia se tanquam ens perfectissimum ad extra exhibere, quia suam bonitatem seu perfectionem rebus finitis impertiri voluit. Id ipsum autem recte est, quod docent

A. SS. Litterae, quae disertis verbis tradunt, Deum mundum condidisse, prout exstat, ut suae infinitae perfectioni convenienter ageret, huiusque res finitas participes efficeret, et hinc quoque omnia ejus opera ejus virtutem ac majestatem patefacere, atque homines teneri ad bonitatem divinam in ejus operibus agnoscendam, suaque agendi ratione manifestandam. *Universa*, ait auctor Proverbiorum, *propter semetipsum* i. e. quoniam perfectus est, propter suam perfectionem, non ob aliquod externum commodum, *operatus est Dominus* ¹⁾. *Et omnem*, inquit nomine Jehovae Isaïas, *qui invocat nomen meum, in gloriam meam*, i. e. quia bonus sum, et ut bonitas mea naturis rationalibus patefiat, *creavi eum, et formavi eum, et feci eum* ²⁾. Psalmista: *Coeli enarrant gloriam Dei, et opera manuum ejus annuntiat firmamentum.*

¹⁾ Prov. 16, 4.

²⁾ Is. 43, 7.

Dies diei eructat verbum, et nox nocti indicat scientiam: non sunt loquela, neque sermones, quorum non audiantur voces eorum. In omnem terram exivit sonitus eorum: et in fines terrae verba eorum. ¹⁾ Paulus: *Invisibilia enim ipsius, a creatura mundi per ea, quae facta sunt, intellecta conspiciuntur: sempiterna quoque* (scilicet) *ejus virtus, et divinitas* ²⁾. Christus Jesus ipse: *Sic luceat lux vestra coram hominibus: ut videant opera vestra bona, et glorificent Patrem vestrum, qui in coelis est; quod vobis scilicet talem gratiam concesserit* ³⁾. Eandem ob causam et se omnia facturum esse, quae homines Patrem in nomine suo petierint, ut scilicet *glorificetur Pater in Filio*, i. e. ut et Pater et Filius tanquam omnipotens atque benignissimus cognoscatur ⁴⁾, promittit. Et Paulus iterum: *Sive ergo manducatis, sive bibitis, sive aliud quid facitis, omnia in gloriam Dei facite*, i. e. in omnibus bonitatem divinam sese prodehntem agnoscite ⁵⁾.

B. Deum mundum ob suam bonitatem condidisse, docent quoque SS. Patres Ecclesiae. Sic Athenagoras ait: *Deus autem nec frustra hominem fecit; est enim sapiens, nullum autem sapientiae opus inutile: nec ad proprium suum usum, nulla enim re indiget; qui autem nulla re indiget, sua ei opera nihil ad proprium usum attulerint. Sed nec ob aliquam feram vel bestiarum hominem condidit. — Quamobrem si nec sine causa, nec frustra creatus est homo —, nec ad ipsius Creatoris usum, nec ad alterius cujuspiam rei ab ipso conditae; liquet Deum, si prima et latius patens consideretur ratio, propter se ipsum et eluculentem in omnibus ipsius operibus bonitatem et sapientiam adductum fuisse ut hominem faceret; si vero prior et ipsis hominibus creatis interior ratio spectetur, propter ipsorum vitam, quae quidem non ad breve aliquot tempus succendenda, ac postea omnino extinguenda est* ⁶⁾. — Origenes: *Cum in principio crearet ea, quae creare voluit, id est rationales naturas, nullam illam habuit creati causam, nisi propter se ipsum, id est bonitatem suam* ⁷⁾.

¹⁾ Ps. 18, 2—5.

²⁾ Rom. 1, 20. Cf. Eccl. 17, 7. 38, 6. Bar. 3, 35.

³⁾ Matth. 5, 17. Cf. Luc. 17, 18. Ezech. 28, 22. Deut. 26, 19.

⁴⁾ Joan. 14, 13. Cf. 8, 49.

⁵⁾ 1. Cor. 10, 31. Cf. Col. 3, 17. Ephes. 1, 16. 1. Petr. 4, 11.

⁶⁾ De resurr. mort. n. 12. Opp. Justin. p. 345 a.

⁷⁾ De princ. l. 2. c. 9. n. 6. Opp. T. 1. p. 99. c. 1.

Joan. Damascenus: Quoniam igitur bonus, omnique bonitatis præstantior Deus, non satis habuit sua ipse contemplatione frui; sed pro nimia sua bonitate quædam esse voluit, quæ ipsius afficerentur beneficiis, ejusque bonitatis participes forent, eamque ob causam producit conditque universa ¹⁾. — Tertullianus: Deus unus est, qui totam molem istam cum omni instrumento elementorum, corporum, spirituum, verbo quo fuit, ratione qua disposuit, virtute qua potuit, de nihilo expressit in ordinamentum majestatis suæ ²⁾. — Augustinus: Completis omnibus inferens (Scriptura): „Et vidit Deus omnia, quæ fecit, et ecce bona valde: nullam aliam causam faciendi mundi intelligi voluit, nisi ut bona fierent a bono Deo ³⁾. Atque hinc

C. C a t h e c i s m u s Rom. nonnisi antiquam Ecclesiæ fidem expressit, ubi ait: Neque alia fuit causa, quæ illum (Deum) ad opus creationis impelleret, nisi ut rebus, quæ ab ipso effectus essent, bonitatem suam impertiretur ⁴⁾. Tandem

D. ipsa ratio, quemadmodum intelligit, aliqua causa Deum pro sua infinita sapientia motum esse debuisse, ut potius mundum crearet, quam non crearet, ita quoque perspicit, Deum non posse ad efficaciam, nisi infinita sua perfectione ac bonitate moveri ⁵⁾. Quod si autem Deus, seu voluntas divina ad agendum dumtaxat absoluta perfectione destinatur: ipse quoque solummodo se ipsum, Bonum infinitum, atque quod sibi conveniens est, suamque imaginem, i. e. bonitatem ac perfectionem præ se fert, velle, et ideo etiam tantum eatenus ac propterea mundum, seu res extra se producere potest, ut cum illa bonitatem suam communicet, seu in eisdem se sapientissimum, omnipotentem, benignissimum, sanctissimum, justissimum, etc. exhibeat. Hinc et omnia Dei opera infinitam ejus perfectionem prædicant. Quod autem res vita et ratione carentes necessario faciunt, id naturas rationales voluntarie præstare oportet.

¹⁾ De Ad. orth. l. 2. c. 2. Opp. T. 1. p. 154.

²⁾ Apolog. c. 17. Opp. V. 1. p. 42.

³⁾ De civ. D. l. 11. c. 23. Opp. T. 7. p. 280. Cf. c. 24. c. 291. Enchir. c. 9. T. 6. p. 198. Conf. l. 13. c. 21. T. 1. c. 225. Epist. 102. n. 17. T. 2. c. 279. Epist. 138. n. 6. c. 412. et al. sæp.

⁴⁾ Ed. Vienn. 1833. p. 22.

⁵⁾ Cf. S. Thom. 1. q. 44. art. 4. Opp. T. 20. p. 260. Cōhtr. Gentil. l. 1. c. 93. n. 7. T. 18. p. 82. l. 3. c. 17 s. p. 230 ss.

Quoniam tamen in communicatione perfectionis charitas se manifestam facit: recte quoque statuitur, rationem, qua Deus permotus mundum creaverit, charitatem esse, seu Deum ex charitate mundum condidisse. Quod pariter S. Scriptura edisserit, quum ait: *Diligis enim omnia, quae sunt, et nihil odisti eorum, quae fecisti: nec enim odians aliquid constitui, aut fecisti* ¹⁾).

Observ. 1. Cum his, quae modo de ultima rerum creaturarum causa seu ratione disputavimus, minime pugnant, quae inferius ostensuri sumus, scilicet rationem seu finem creaturarum naturarum rationalium esse studium veri ac honesti ex amore Dei, seu cognitionem atque cultum Dei, summi Boni, cum respondente aliquando futura beatitudine, atque naturarum animalium, praeter hominum commodum, propriam felicitatem, quod, uti ex indole harum rerum per rationem cognoscitur, ita etiam in SS. Litteris verbis definitis traditur ²⁾. Nam finis ille rerum creaturarum tam ratione praeditarum, quam carentium, finis earundem quidem proximus, non vero ultimus est; quoniam manifeste Deus homines et Angelos ad sanctitatem ac respondentem felicitatem, et animalia ad felicitatem condidit, ut se in iisdem, suam ipsis perfectionem communicando, benignissimum, sanctissimum ac justissimum demonstraret. Item dictis de ultima rerum conditarum causa, seu creationis fine haud adversatur, quando statuitur, mundum, seu terram nostram propter hominem, utpote inter res creatas orbis terrarum nobilissimum, esse conditam; nam et hic finis ultimam creationis causam haud excludit, sed potius ejus effectus est. Unde ipsae SS. Litterae, nec non SS. Patres eundem finem orbi terrarum assignant. Sic Deus, hominem creaturus, ipse ait: *Faciamus hominem ad imaginem, et similitudinem nostram, et praesit piscibus maris, et volatilibus coeli, et bestiis universaeque terrae, omnique reptili, quod movetur in terra* ³⁾. Et Psalmista: *Constitui eum (hominem) super opera manuum tuarum. Omnia subjecisti sub pedibus ejus, oves, et boves*

¹⁾ Sap. 11, 25. Cf. Augustin. *De civ. D. l. 11. c. 24.* Opp. T. 7. c. 291.

²⁾ Cf. Marc. 16, 15 s. Joan. 17, 3. Matth. 6, 33. 1. Tim. 2, 4. — Matth. 19, 17. 5, 3. 10. 16, 6, 9—10. 7, 21. 22, 27—40. Rom. 2, 13. Gal. 5, 5—6. Col. 3, 12 ss. Hebr. 12, 11 ss. 13, 16. Jac. 1, 25. 2, 14. 24. 26. 1. Petr. 1, 15—16. 2. Petr. 1, 10. — Matth. 25, 31—46. Rom. 6, 22—23. 2. Tim. 4, 7—8. Hebr. 12, 11. 2. Petr. 3, 7. 14. etc.

³⁾ Gen. 1, 26. Cf. 1, 28.

universas: insuper et pecora campi. Volucres coeli, et pisces maris, qui perambulant semitas maris ¹⁾. — Justinus autem scribit: *Cum bonus sit (Deus), omnia illum ab initio ex informi materia propter homines condidisse accepimus* ²⁾. — Tatianus: *Opus ab eo nostra causa conditum adorare nolo. Sol et luna propter nos creati sunt* ³⁾. — Origenes: *Multis nos accusat (Celsus), quod a Deo omnia propter hominem facta esse dicamus* ⁴⁾. Similiter quoque loquuntur Cyrillus Hierosolym. ⁵⁾, Gregorius Naz. ⁶⁾, Tertullianus ⁷⁾ et Lactantius ⁸⁾.

Observ. 2. Porro quando Deus dicitur omnia ad nominis sui gloriam condidisse: eo minime, Deum aut proprii commodi studiosum, aut vero sibi haud esse sufficientissimum, adstrui, ex supra pertractatis non potest esse dubium. Nam sensus illius sententiae nequaquam est, Deum perfectionem seu bonitatem ad extra manifestasse, ut sic externo honore frueretur, aut plane hac gloria indigeret, sed quia in se bonus est, etiam in operibus, quum se negare non possit, bonum esse, cum iisque suam perfectionem participare, et sic se summum Bonum simul in illis naturis rationalibus cognoscendum exhibere voluisse.

§. 9. Mundi perfectio.

Perfectum esse mundum, atque ad finem aptissimum, ad quem a Deo creatus est, nemo dubitabit, quicumque de bonitate sapientissimi et potentissimi rerum architecti persuasus fuerit. Moyses historiam creationis describens rerumque creaturarum seriem recensens, saepe saepius repetit istiusmodi verba: *Et vidit Deus, quod esset bonum, quod fecit* ⁹⁾. Et in fine creationis addit: *Viditque Deus cuncta, quae fecerat, et erant valde bona*, i. e. optima et perfecta ¹⁰⁾. Atque in Cantico suo ait: *Dei per-*

¹⁾ Ps. 8, 7—9.

²⁾ Apol. I. 10. Opp. p. 49.

³⁾ Or. cont. Graec. n. 4. lb. p. 280.

⁴⁾ Cont. Cels. l. 4. n. 74. Opp. T. 1. p. 559.

⁵⁾ Catech. 12. n. 5. Opp. p. 165.

⁶⁾ Orat. catech. c. 5. Opp. ed. Par. 1638. T. 3. p. 51. Cf. De Hom. opif. c. 2. T. 1. p. 50 s.

⁷⁾ Adv. Marcion. l. 1. n. 13. Opp. V. 2. p. 138.

⁸⁾ Instit. div. l. 7. c. 3. Opp. T. 1. p. 522 s. De ira D. c. 13. T. 2. p. 155 ss.

⁹⁾ Gen. 1, 10. 12. 18.

¹⁰⁾ Gen. 1, 31.

fecta sunt opera, et omnes viae ejus judicia, i. e. justae ¹⁾. Similia in aliis S. Scripturae libris leguntur. Sic Siracides docet: *Opera Domini universa valde bona* ²⁾. Et Apostolus: *Quia omnis creatura Dei bona est* ³⁾.

Ecclesia autem Manichaeos et alios haereticos contrariam sententiam defendentes e sinu suo ejecit.

Et ita quoque ratio intelligit, Deum in opere suo ab hoc, quod bonum est ac perfectum, recedere non posse. Non potest enim Deus optimus nisi bonum velle; opera autem ejus voluntati sanctissimae necessario respondere debent. Juvat ingentem rerum copiam, miram magnitudinem, diversitatem stupendam, graduum ascendentium et descendentium, specierum et generum ordinem tam concinnum, ubertate ac virtute ornatissimum, multitudinem pulcherrimam et copiosissimam pulchritudinem, res inter maximas minimasque arctissimum intueri nexum. Res una alteri opem praestat, manumve altera porrigit alteri. Nil sibi soli, quam unus Deus. Leges, quae eadem in rebus minimis et maximis, imo in universo conspiciuntur, sunt simplicissimae, vires diversissimae, effectus maximi, mediis usque exiguis excitati. Tanta est rerum ad diversos fines ordinarum abundantia, tanta mediorum simul parsimonia ac sufficientia, ut nonnisi sapientissimus praedicari possit hujus operis Conditor. Quare ab initio statim res creatas adpellarunt κατ' ἐξοχήν κοσμόν, *ornatum*, conspectum pulcherrimum. Terra, quam incolimus, stellis majoribus adnumerari quidem nequit; eidem tamen 21 planetae socii et 18 comites adsistunt praeter cometarum majorem numerum. His omnibus antecellit sol, qui *tanquam sponsus procedens de thalamo suo*, ut gigas iter carpens velox. *A summo coelo egressio ejus, et occursus ejus usque ad summum ejus: nec est, qui se abscondat a calore ejus* ⁴⁾. Sol vero hic tantus ac talis ad aliud systema stellarum, quas fixas nominant, refertur, sicut terra ad solem. Astra, quae viam lacteam constituunt, totidem systemata solarum secundi ordinis esse videntur, quae iterum circa aliquem communem solem centralem moventur, et systema solare tertii ordinis efficiunt. Viae lacteae autem quarum, uti Astronomi docent, plures dantur, sine dubio rursus omnes ad punctum aliquod medium referuntur, quo in *systema*

¹⁾ Deut. 32, 4.

²⁾ Eccli. 39, 21. Cf. Ps. 103, 24. Is. 6, 3.

³⁾ 1. Tim. 4, 4.

⁴⁾ Ps. 18, 7.

mundi absolutum uniuntur. Quae nobis proxima est istius generis stella, tantum a terra distat, quantum annui cursus terrae diameter quadragesies millies protensus metitur. Stellarum fixarum ingens est numerus. In via lactea, ad quam systema nostrum pertinet, sola ultra octoginta milliones ab Astronomis recensentur. Stellis fixis praesto sunt planetae ac cometae innumerabiles. Quam mirabilia opera Domini! Quis est potentiae ac bonitatis ejus numerus?

Observ. 1. Multum et acriter inde a Leibnitii temporibus inter Theologos ac Philosophos disputatum est, utrum hic mundus sit optimus, nec ne. Putamus autem, distinguendum esse, quo sensu mundus optimus intelligatur. Nam si mundus eatenus optimus dicitur, quatenus sapientiae divinae hunc mundum condere quam maxime conveniebat, aut quatenus eidem finis quam maxime congruens praefixus; aut vero quatenus ipse ad hunc finem aptissimus constitutus est: mundus sine dubio optimus est; Dei enim perfecta sunt opera, atque valde bonum est, quodquod ipse fecit. — Si autem mundus optimus diceretur, ac si esset absolute bonus, seu bonus in se ac per se; aut quasi esset inter omnes mundos possibles unicus optimus; aut tanquam si res singulae, seorsim spectatae, perfectiores esse non possint; aut vero ut si mundus per lapsum generis humani non sit corruptus: certe optimus haud est. Nam bonum absolutum unus solummodo est Deus; atque plures, quin immo innumeri mundi dari possunt, quorum quemcunque Deus condidisset, quoad ejus infinitam sapientiam ac sanctitatem perinde esset; porro, res singillatim consideratas perfectissimas non esse ¹⁾, testatur experientia; mundum autem per peccatum protoparentum in deterius mutatum esse, docet revelatio.

Observ. 2. Quaecunque existunt, nonnisi voluntate divina existunt; malum autem sanctitati divinae repugnat. Unde malum, prout principio in mundo adesse haud poterat, ita essentia seu substantia esse nequit, atque vera ac propria existentia careat est necesse. Haec quoque est unanimis doctrina SS. Patrum. Sic Ambrosius ait, Dominum non creasse malitiam, *quum utique non substantialis, sed accidens sit malitia, quae a naturae bonitate deflexit* ²⁾. Et Prosper: *Cum Deus incommutabiliter bonus, omnes creaturas fecerit bonas, nec ulla omnino, nisi ab ipso sit creata natura:*

¹⁾ Cf. S. Augustin. *De civ. D. l. 11. c. 22.* Opp. T. 7. c. 288. *Cont. Faust. l. 21. c. 5.* T. 8. c. 351.

²⁾ *Hexaëm. l. 1. c. 8. n. 27.* Opp. T. 1. c. 16.

nulla est substantia mali; quia quod auctorem Deum non habet, non est ¹⁾. Simili modo loquuntur de natura mali Origenes ²⁾, Basilius ³⁾, Gregorius Naz. ⁴⁾, Fulgentius ⁵⁾, Isidorus ⁶⁾, Dionysius Areop. ⁷⁾ et Augustinus ⁸⁾.

Observ. 3. Quum tanta atque tam mirabilia sint opera Domini ex nihilo condita, in quorum nullo non resideat et effulgeat Dei Creatoris magnitudo, sapientia et benignitas summa, ita ut vel minimum animalculum lucidissimum sit ejus speculum: nullam occasionem praetermittamus pios sensus admirationis ac laudis Dei in nobis eliciendi; dignus enim est honore et gloria, qui tot et tanta virtutis suae dedit documenta. — Simul autem memores simus tenuitatis nostrae, utpote qui aliquando nihil fuimus, et abesse quoque possumus, salva Dei nulla re egentis beatitudine, quique quidquid sumus, per gratiam Dei sumus, gratiasque perpetuas referamus Creatori benignissimo. Ad quas eo magis excitabimur, si perpenderit, mundum, a Deo conditum, totum nostris inservire commodis. Caelum et terra, ignis, aqua, aër, et quidquid in eis continetur, famulantur homini, ejusque subduntur dominio. *Vide homo*, scribit quidam, *dicit mundus, quomodo amaverit te, qui propter te fecit me: servio tibi, quia factus sum propter te, ut servias illi, qui fecit et me et te: me propter te, et te propter se. Si sentis beneficium, redde debitum: si accipis benignitatem, redde charitatem.* — Praecipue autem in id intendamus omnes vires nostras, ut in vita nostra ad Dei sanctissimam legem instituta summam ejus sapientiam ac benignitatem manifestam reddamus; ne, qui Angelos judicaturi sumus, a rebus ratione destitutis aliquando condemnemur.

¹⁾ *Sentent. ex Aug. S. 177 (176). Opp. c. 568.*

²⁾ *De princ. l. 2. c. 9. n. 2. Opp. T. 1. p. 97.*

³⁾ *Basil. M. Hom. Deum non esse auct. malor. Opp. T. 2. p. 72. Cl. Hom. 2. in Hexaëm. n. 4. T. 1. p. 16.*

⁴⁾ *Or. 40. Opp. T. 1. c. 595 a.*

⁵⁾ *De remiss. pecc. l. 1. c. 16. Opp. p. 372.*

⁶⁾ *De sum. bon. l. 1. c. 11. Opp. p. 417.*

⁷⁾ *De nom. div. c. 4. n. 18—35. Opp. T. 1. p. 570—589.*

⁸⁾ *De ver. rel. c. 13. n. 26. T. 1. c. 756. De civ. D. l. 11. c. 9. T. 1. 279. E. c. 22. c. 288. E. Conf. l. 7. c. 12. n. 18. T. 1. c. 140, etc.*

SECTIO II.

De divina providentia, seu de Deo mundi Conservatore et Governatore.

§. 10. Providentia divina.

Quemadmodum certum est ac exploratum, Deum mundi esse Creatorem atque architectum, ita quoque evictum est, ipsum esse mundi Conservatorem atque Governatorem. Prout enim mundus non est sine omnipotentia et sapientia divina ortus atque constitutus, sic etiam non sine summa potentia et summa ratione conservatur ac administratur. Unum ab altero divelli non potest. Hinc non propterea solum res universae a Deo pendent, quod illas condiderit, quasi satis sit, foetum edere, et simul cum eo omnem illius projicere curam; sed etiam eo, quod cunctis, quae edidit, provideat, seu causa sit, ut res omnes singulis momentis persistent, tam quoad suam substantiam, quam quoad agendi vires cuilibet insitas, nec non iis, quae ad subsistendum sunt necessaria, praesto sint, atque ut singulae ad fines, quos sibi praescriptos habent, perveniant.

Est igitur providentia divina, quae creationis nonnisi continuatio est, ea Dei actio ad extra libera, qua ipse rerum omnium ac singularum curam gerit ¹⁾, seu qua res creatas omnes ac singulas conservat, et juxta sua sapientissima consilia gubernat.

Si autem dicimus, providentiam divinam esse curam, quam Deus omnipotens, benignissimus ac sapientissimus rerum omnium gerat: more humano loquimur, et minime curam intelligimus, qualis in nobis est, cum metu ac dubitatione, aut labore et defatigatione conjunctam; cum haec aperte cum summa Dei perfectione componi haud queat. Deus enim sicut solo voluntatis nutu absque labore aut virium intensione universa condidit, ita eodem simplicissimo actu omnia tuetur ac gubernat.

Porro comprehendit providentia divina duas velut partes, unam, qua Deus omnia conservat, et alteram, qua omnia ordi-

¹⁾ Cf. Nemes. *De nat. hom. c. 42.* In Galland, *Bibl. PP. T. 7. p. 418.* — J. Damascen. *De fid. orth. l. 2. c. 29.* Opp. T. 1. p. 196.

nat et ad fines suos dirigit, seu conservationem et gubernationem mundi. Quapropter prius de illa, et deinde de hac disseremus.

Doctrina de divina conservatione et gubernatione mundi seu providentia inter gravissimas religionis Christianae sententias refertur. Persuasio enim de divina providentia verae sapientiae ac pietatis fundamentum et basis est. Nam ipsa animum in rebus adversis fortem ac tranquillum reddit, spem certam auxilii divini atque laetioris faustiorisque sortis in futura vita exspectandae excitat ac fovet, studioque virtutis ac honestatis constantiam et alacritatem addit. Unde praecipue nostris temporibus quam maxime confirmanda est atque excitanda, partim quia ab adversariis acriter impugnatur, partim quoniam ipsis rerum publicarum et privatarum vicissitudinibus et conversionibus in orbe terrarum factis fides in Dei providentiam in multis concussa ac debilitata esse videtur.

Observ. In SS. Litteris vocabulum *providentia*, cui Graecorum *πρόνοια* respondet, de cura rerum divina tantum in libro Sapientiae 14, 3 et 17, 2 atque Eccl. 5, 5. occurrit; eandem tamen rem significant: ὁ πάντα ἐπορῶν, *qui universa conspicit* ¹⁾, et ejusmodi.

§. 11. Conservatio.

Prima ergo quasi pars providentiae divinae est mundi conservatio, sub qua ex mente Ecclesiae Catholicae intelligimus eam Dei omnipotentis actionem liberam, ad extra transeuntem, qua fit, ut res creatae omnes et singulae, i. e. tum quatenus secum connexae totum constituunt, tum quatenus ceu individua subsistunt, et quidem tam quoad substantiam, quam quoad vires suas esse pergant, quousque pro earundem natura atque ad universum relatione, seu consiliis sapientiae divinae conveniens fuerit.

Per hancce itaque notionem conservationis mundi divinae excludimus omnem casum fortuitum, cui Epicurei prout originem, ita et perseverationem mundi tribuebant. Cum Epicureis quoad conservationem atque gubernationem mundi sentire non dedecori sibi duxerunt ex recentioribus Thom. Hobbes et Voltaire, praeter alios ²⁾. Pari modo arcemus porro con-

¹⁾ 2. Mach. 15. 2.

²⁾ Cf. Wiest. *Instit. theol.* Ingolst. 1788. T. 4. p. 740 s.

servationem mundi per se ipsum, prout et omnem coecam necessitatem, ac si videlicet res per vires solas, sibi a Creatore inditas, atque leges harum ab ipso constitutas persisterent, uti somniarunt Naturalistae; aut quasi Deus in perpetuitate mundi se ipsum nonnisi continuo produceret, quae est Pantheistarum sententia; aut vero, quod ad idem reddit, tanquam si fato omnia fierent, quemadmodum contendebant Stoici. Non enim conservat Deus mundum tanquam substantia rerum, per quas et in quibus se immediate explicet ac manifestet, quod ipsam ideam conservationis tolleret, nam ens absolute necessarium conservatione prorsus non indiget; neque autem quatenus supra mundum prorsus elatus est, nam sic mundus contingens atque una necessarius assumi deberet; sed quatenus sua omnipotenti substantia ac virtute ubique praesens atque operans, non quidem res ipsas novas efficit, verum substantiam rerum atque vires earundem naturales, seu causas secundas, persistere sua omnipotenti voluntate facit, quarum illae effectus sunt. Deus itaque mundum conservans inexistit ei, non tamen ita, ut a mundo non sit diversus, eumque non simul transcendat, atque a mundo differt eumque transcendit, non ita tamen, ut simul mundo non inexistat, seu, ut ajunt, immaneat. Tandem notione illa prohibetur etiam sententia, quae assumit, providentiam divinam ad sublunaria se non extendere, quem Aristotelis errorem primis Ecclesiae saeculis quidam Christiani adoptasse videntur ¹⁾, divina enim conservatione, uti creatione, nulla res est indigna, nullaque non indigens; nec non opinio ea, quae conservationem mundi in eo reponit, quod Deus mundum non destruat, quod propugnarunt ex Ariminianis Phil. a Limborch et Sim. Episcopus, ex Socinianis Osterodus, et alii ²⁾.

Quum conservatio omnia comprehendat, atque ad res tam singulas, quam in suo nexu cosmico constitutas referatur, eaque fiat, ut non tantum individua rerum, sed et earum species ac genera, individuis certo tempore elapso intereuntibus, continua aliorum propagatione persistent: distingui solet conservatio individuorum et conservatio specierum, licet relate ad Deum unus idemque actus simplicissimus sit.

¹⁾ Cf. Ambros. *De offic.* l. 1. c. 13. n. 48. Opp. T. 2. c. 14. — Augustin. *De Gen. ad litt.* l. 5. c. 21. n. 42. Opp. T. 3. P. 1. c. 195.

²⁾ Cf. Wiest, *Inst. theol.* Ingolst. 1788. T. 4. p. 736 ss. Riet, *Schröb. der Dogmengeschichte.* Mainz, 1837. 1. B. p. 330.

Conservari autem a Deo mundum, seu omnes ac singulas res creatas, luculenta testantur A. S. Scripturae effata. Et quidem docetur:

a. Deum esse, cujus voluntate omnipotenti omnia et singula persistent. Sic legitur in Psalmis: *Fundasti terram, et permanet. Ordinatione tua perseverat dies*, i. e. tempus, seu ea, quae in tempore existunt: *quoniam omnia serviunt tibi*, i. e. a te pendent ¹⁾. In libro Sapientiae: *Diligis omnia, quae sunt, et nihil odisti eorum, quae fecisti: nec enim odiens aliquid constituisti, aut fecisti. Quomodo autem (enim) posset aliquid permanere, nisi tu voluisses? aut quod a te vocatum (existere) jussum non esset, (quomodo) conservaretur* ²⁾? Apud Isaïam: *Levate in excelsum oculos vestros, et videte quis creavit haec: qui educit in numero militiam eorum*, i. e. oriri facit ordine quaeque suo, et vice, et loco, sibi assignato, *et omnes ex nomine vocat* i. e. omnia ita nutui suo obsequentia habet, ut jussa mox instar promptissimorum militum adcurrant, et pareant ³⁾. Et rursus: *Dominus Deus creans coelos, et extendens eos: firmans (conservans) terram: et quae germinant ex ea: dans flatum populo, qui est super eam, et spiritum calcantibus eam* ⁴⁾. — Christus autem ait: *Pater meus usque modo operatur, et ego operor* ⁵⁾. Atque Apostolus: *Deus, qui fecit mundum, et omnia, quae in eo sunt, hic coeli, et terrae cum sit Dominus, non in manufactis templis habitat, nec manibus humanis colitur indigens aliquo, cum ipse det omnibus vitam, et inspirationem, et omnia: fecitque ex uno omne genus hominum inhabitare super universam faciem terrae, definiens statuta tempora, et terminos habitationis eorum, quaerere Deum, si forte attrectent eum, aut inveniant, quamvis non longe sit ab unoquoque nostrum. In ipso (tanquam causa existendi), enim vivimus, et movemur, et sumus* ⁶⁾. Et alibi: *Et ipse (Filius) ante omnes* (πρὸ πάντων, prior aut excelsior omnibus), *et omnia in ipso constant* ⁷⁾. Atque iterum: *Qui cum sit splendor gloriae, et figura*

¹⁾ Ps. 118, 90—91.

²⁾ Sap. 11, 25—26.

³⁾ Is. 40, 26.

⁴⁾ 42, 5.

⁵⁾ Joan. 5, 17.

⁶⁾ Act. 17, 24—28.

⁷⁾ Col. 1, 17.

substantiae ejus, portansque omnia verbo virtutis suae, purgationem peccatorum faciens, sedet ad dexteram majestatis in excelsis ¹⁾).

b. Deum porro esse, qui singulis rebus creatis subministret quae ad existendum ipsis sunt necessaria. Quod pulchre eloquitur Psalmista, quum canit: *Qui emittis fontes in convallibus: inter medium montium pertransibunt aquae. Potabunt omnes bestiae agri: expectabunt onagri in siti sua. Rigans montes de superioribus* (nubibus videlicet): *de fructu operum tuorum* (i. e. qui provenit opera tua,) *satiabitur terra: producens foenum jumentis, et herbam servituti* (seu servientibus) *hominum.* — *Omnia a te expectant, ut des illis escam in tempore. Dante te illis, colligent: aperiente te manum tuam, omnia implebuntur bonitate*, i. e. bonis, scilicet alimentis. *Avertente autem te faciem, turbabuntur: auferes spiritum eorum, et deficient, et in pulverem suum revertentur. Emilles spiritum* (i. e. halitum tuum vivificantem) *tuum et creabuntur: et renovabis faciem terrae* ²⁾. Nec non auctor Jobi, quum ait: *Quis praeparat corvo escam suam, quando pulli ejus clamant ad Deum, vagantes, eo quod non habeant cibos* ³⁾? Id ipsum edisserunt verba Sapientis, quibus omnia sine exceptione Deum cura sua complecti docet: *Quoniam pusillum, et magnum ipse fecit, et aequaliter cura est illi de omnibus* ⁴⁾. Omnium autem pulcherrime Christus Dominus ipse doctrinam de divina rerum omnium cura ob oculos ponit, quum ait: *Ne solliciti sitis animae* (i. e. vitae) *vestrae, quid manducetis; neque corpori vestro, quid induamini. Nonne anima plus est, quam esca: et corpus plus, quam vestimentum? Respicite volatilia coeli, quoniam non serunt, neque metunt, neque congregant in horrea: et Pater vester coelestis pascit illa. Nonne vos magis pharis estis illis? Quis autem vestrum cogilans potest adjicere ad staturam suam cubitum unum? Et de vestimento, quid solliciti estis? Considerate lilia agri quomodo crescunt: non laborant, neque nent. Dico autem vobis, quoniam nec Salomon in omni gloria sua coopertus est sicut unum ex istis. Si autem foenum agri, quod hodie est, et cras in clibanum mittitur, Deus sic vestit: quan-*

¹⁾ Hebr. 1, 3.

²⁾ Ps. 103, 10—11. 27—30. Cf. Ps. 146. 9—9 45, 1. 61, 1.

³⁾ Job. 38, 41.

⁴⁾ Sap. 6, 8. Cf. 12, 13.

to magis vos modicae fidei ¹⁾. Quapropter nos admonet Petrus: *Omnem sollicitudinem vestram projicientes in eum, quoniam ipsi est cura de vobis* ²⁾. Atque Deus est, ut ait Paulus, *qui praestat nobis omnia abunde ad fruendum* ³⁾. Et: *Qui in praeteritis generationibus non sine testimonio semetipsum reliquit benefaciens de coelo, dans pluvias, et tempora fructifera, implens cibo, et laetitia corda nostra* ⁴⁾.

c. Tandem Deum esse speciatim, qui nobis vires necessarias, per culpam generis humani imminutas, addat, quibus officio nostro satisfaciamus, salutemque consequamur. *Nemo enim, ait Christus, potest venire ad me, nisi Pater, qui misit me, traxerit eum* ⁵⁾. Et Paulus: *Fiduciam autem talem habemus per Christum ad Deum* (seu hanc persuasionem ratione Dei habita nacti sumus): *non quod sufficientes simus cogitare aliquid a nobis, quasi ex nobis; sed sufficientia nostra ex Deo est* ⁶⁾. Atque rursus: *Deus enim est, qui operatur in vobis, et velle, et perficere pro bona voluntate* ⁷⁾.

B. Ea est quoque SS. Patrum atque Ecclesiae omnium saeculorum doctrina. SS. Patres enim unanimi consensu agnoscunt et tradunt naturam conservatione, uti creatione, divina et indigere, et ejusdem revera participem esse. *Sciamusque, ait Hieronymus, nos nihil esse, nisi, quod donavit, in nobis ipse servaverit. — Velle et currere meum est; sed ipsum meum, sine Dei semper auxilio non erit meum. Dicit enim idem Apostolus: „Deus est, qui operatur in nobis et velle et perficere“; et Salvator in Evangelio: „Pater meus usque modo operatur, et ego operor.“ Semper largitor, semperque donator est. Non mihi sufficit, quod semel donavit, nisi semper donaverit* ⁸⁾. — Gregorius Naz. *Quonam modo universa haec rerum moles vel producta unquam fuisset, vel consisteret, nisi Deus omnia in rerum naturam protulisset, atque conservaret* ⁹⁾. — Augustinus: *Sic credamus, aut si possumus, etiam intelligamus, us-*

¹⁾ Matth. 6, 25—30.

²⁾ 1. Petr. 5, 7.

³⁾ 1. Tim. 6, 17.

⁴⁾ Act. 14, 15—16. Cf. 17, 25.

⁵⁾ Joan. 6, 44.

⁶⁾ 2. Cor. 3, 4—5.

⁷⁾ Philipp. 2, 13.

⁸⁾ *Epist. 133. ad Ctesiph. n. 6. Opp. T. 1. c. 1033.*

⁹⁾ *Orat. 34. Opp. 1. c. 476. C.*

que nunc operari Deum, ut si conditis ab eo rebus operatio ejus subtrahatur, intereant ¹⁾. Atque Gregorius M.: *Cumcta ex nihilo facta sunt, eorumque essentia rursus ad nihilum tenderet, nisi eam auctor omnium regiminis manu retineret* ²⁾. Tribuunt autem conservationem rerum Deo ita, quin propterea efficaciam earum per vires a Deo sibi inditas excludant ³⁾.

Patres sequuntur Theologi scholastici, prout illi docentes, absque divina conservatione res omnes necessario in nihilum recasuras; quum existentia earundem nonnisi effectus operationis virtutis divinae sit, atque ideo desinente hac, etiam ille desinere debeat ⁴⁾, et annihilatio rerum non sit, nisi cessatio communicationis *τοῦ εἶναι*, seu cessatio continuatae creationis ⁵⁾.

Mentem Ecclesiae perbelle explicat Catechismus Rom., qui habet: *Nec vero ita Deum creatorem, atque effectorem omnium credere oportet, ut existimemus, perfecto absolutoque opere, ea, quae ab ipso effecta sunt, deinceps sine infinita ejus virtute constare potuisse. Nam quemadmodum omnia ut essent, creatoris summa potestate, sapientia et bonitate effectum est; ita etiam nisi conditis rebus perpetua ejus providentia adesset, atque eadem vi, qua ab initio constituta sunt, illas conservaret, statim ad nihilum reciderent. — Porro: Non solum autem Deus universa, quae sunt, providentia sua tuetur atque administrat; verum etiam, quae moventur, et agunt aliquid, intima virtute ad motum atque actionem ita impellit, ut quamvis secundarum causarum efficientiam non impediat, praeveniat tamen; cum ejus occultissima vis ad singula pertineat* ⁶⁾.

C. Id ipsum denique jam ipsa ratio exigit, quae ex una parte mundum, rerum diversas species, res singulas perseverantes, earumque vires, atque subsistendi media eis ubique supeditata videt, ex altera parte autem simul intelligit, illa omnia, utpote non necessaria, nullo temporis momento rationem suae existentiae in se habere, et ideo necessario a Deo, ente absoluto,

¹⁾ *De Gen. ad litt. l. 5. c. 20. n. 40.* Opp. T. 3. P. 1. c. 194. Cf. l. 4. c. 12. c. 167. s.

²⁾ *Mor. l. 16. c. 37. n. 45.* Opp. T. 1. c. 518. Cf. Basil. *De Spir. S. c. 8. n. 19.* Opp. T. 3. p. 16. — Chrysost. *In Gen. hom. 10. n. 7.* Opp. T. 4. p. 80. — Hilar. *In Ps. 91. n. 7.* Opp. T. 1. c. 269.

³⁾ Cf. Basil. *De Spir. S. c. 5. n. 7.* Opp. T. 3. p. 7. Augustin. — *De Trinit. l. 3. c. 8. n. 13.* Opp. T. 8. c. 799 s.

⁴⁾ Cf. S. Thom. *Summ. 1. q. 104. art. 1.* Opp. T. 20. p. 568 ss.

⁵⁾ *Id. 1. q. 104. art. 2. p. 570 s.*

⁶⁾ Ed. Vien, 1833, p. 24 s.

pendere, seu dumtaxat ejus omnipotenti voluntate existere, suamque existentiam continuare posse. Quod statui debet de omnibus et singulis rebus earumque viribus, nec non suppeditis ad subsistendum adjumentis; quum manifeste omnes res in mundo earumque vires sint contingentes, et contingens quoque sit, quod iisdem, quibus ad subsistendum indigent, non desint. Et sane facies mundi, qualis nunc est, talis fere semper erat, ex quo mundus esse coepit. Corpora coelestia per tot jam saeculorum milia aequabili cursu moventur, et in ordine suo permanent. Rerum omnium, quas cernimus, species inde a mundi editi exordiis ad hanc usque diem perdurant. Genus humanum inter tot vitae discrimina, tot morborum myriades et bella continua perseverat. Natura rerum omnium semper eadem est. Omnibusque naturis animalibus ubique ac semper praesto sunt, quibus egent, vitae subsidia. Et tamen contingens tam parum potest sine absoluto consistere, quam parum cogitatio sine mente, radius sine sole, umbra sine corpore dari. Si mundus sine Deo est, Deus amplius non est Deus, sed mundo, utpote absoluto ac necessario, quod non nisi unum esse potest, locum cessit. — Accedit per malum morale in mundum invectum, quo vinculum creaturam cum Creatore uniens abruptum est, ipsam naturam, jure existendi in homine amisso, ad nihilum ac interitum tendere, a quo solummodo voluntate divina ob eum, qui restauraturus universa in orbem terrarum venerat, sustentata a ruina custodiri potest.

Observ. Prout rerum creatio, et quodvis opus divinum externum, ita quoque conservatio omnibus tribus personis divinis ex aequo competit, et quemadmodum, ut monstravimus, omnia a Patre per Filium in Spiritu S. condita sunt, ita etiam omnia a Patre per Filium in Spiritu S. sustentantur. Unde in SS. Litteris atque in scriptis SS. Patrum rerum conservatio modo Patri ¹⁾ modo Filio ²⁾, modo Spiritui S. ³⁾ adscribitur.

¹⁾ Act. 17, 24 ss. Joan. 5. 17. 16, 23. Matth. 5, 45. 6, 11. 26. 32. — Clem. 1. Cor. n. 20. — Cotelier. *PP. ap.* Amstel. 1724. V. 1. p. 159 s.;

²⁾ Col. 1, 17. Hebr. 1, 3. Joan. 1, 3. 10. 5, 17. — Iren. *Cont. haer.* l. 5. c. 18. n. 3. p. 315. — Athanas. *Cont. Gent.* n. 41. Opp. T. 1. p. 40. *De Incarn. Verb.* n. 17. p. 61 s. — Basil. *De Spir. S. c. 8. n. 19.* Opp. T. 3. p. 16. — Chrysost. *In Hebr. hom.* 2. n. 3. T. 12. p. 17 s. Euseb. *Demonstr. Evang.* l. 4. c. 2. p. 146. — Theodoret. *In Col.* 1. 17. Opp. T. 3. p. 347.

³⁾ Rom 8, 11. 1. Cor. 12, 4 ss. — Athanas. *Epist. 1. ad Serap.* n. 19. T. 1. P. 2. p. 667 s.

§. 12. Modus conservationis.

Ostensa veritate seu, ut ajunt, realitate divinae mundi conservationis pauca adhuc de modo ejusdem adjicienda veniunt. Quemadmodum enim sunt, qui mundum per se solum conservari asserunt, aut vi primitivae dispositionis divinae, aut quoniam Deum cum mundo confundunt: sic etiam alii existunt, qui mundum, licet non per substantiam divinam, tamen per voluntatem ac efficacitatem Dei immediate per omnia sustineri affirmant, ita ut universa, quae in mundo sunt aut fiunt, unica voluntate divina sint et fiant, atque res creatae, seu earum instinctus aut voluntas tantum occasionem praebeant Dei efficientiae, inde et Occasionalistae dicti, inter quos eminent Nic. Malebranche ¹⁾ et Cartesius ²⁾. Verumtamen SS. Litterae, quamvis omnia in mundo ad omnipotentem virtutem Dei conservatricem referant, una rebus ipsis propriam subsistentiam atque efficientiam, etsi non a Deo prorsus independentem, tribuunt. *Quia ipse dixit, ait Psalmista, et facta sunt: ipse mandavit, et creata sunt. Statuit ea in aeternum, et in saeculum saeculi: praeceptum posuit, et non praeteribit* ³⁾. — *In aeternum, Domine, verbum tuum permanet in coelo. In generationem, et generationem veritas tua: fundasti terram, et permanet. Ordinatione tua perseverat dies: quoniam omnia serviunt tibi* ⁴⁾. Idem quoque, ut supra jam indicavimus, tradunt SS. Patres, nec non Theologi scholastici, et nominatim S. Thomas. Et sane Deus mundum condidit, ut aliud a se esset, adeoque etiam ut tanquam a se diversus, non tanquam ipsi inhaerens, sed per se, licet non independentem ab illo, subsistens esisteret. Unde quum per conservationem solummodo, quod initio a Deo fuit constitutum, perseveret: per eandem illa mundi subsistentia per se minime potest tolli; neque autem etiam Dei efficientia excludi, quum vires illae seu causae secundae, quibus res in mundo sunt aut gignuntur, prout et ipsa harum substantia, a Deo tanquam causa prima prorsus dependant, et nonnisi immediatae voluntati divinae existentiam ac effica-

¹⁾ Cf. *De la recherche de la vérité*. Par. 1674. 1712. 4.

²⁾ Cf. Tennemann, *Grundriß der Gesch. d. Philosophie*. Ed. Wendt. §. 328.

³⁾ Ps. 148, 5—6.

⁴⁾ Ps. 118, 89—91.

⁵⁾ 1. q. 104. art. 32. Opp. T. 20. p. 570 s.

ciam debeant. Hinc conservatio non est talis, ac si fiat sine Deo, sed et non ejusmodi, ac si fiat sine rerum conditarum concursu. Sed conservatur mundus et per se, quatenus res mundanae viribus naturae procreantur ac per se invicem sustentantur, et per Deum, quatenus per ipsum solum, i. e. voluntatis ejus nutum vires illae agunt atque sunt, nec non rerum substantia perstat. Unde conservatio mundi divina est, quatenus spectat ad rerum vires ac substantias, immediata, quatenus autem refertur ad illarum effectus, mediata. Quod si autem divinam mundi conservationem immediatam adpellamus: id manifeste tantum eatenus fit, quatenus vires naturae ac substantia rerum immediatus effectus omnipotentis voluntatis divinae sunt, nequaquam autem forsitan ac si mundum pro immediata substantiae divinae manifestatione haberemus; quod Pantheistarum commentum est, et conservationem mundi, imo ipsam Dei supramundani existentiam destruit.

Observ. Quum Deus mundum conservando vires naturarum, quibus hae operantur, i. e. certos effectus producant, sustentet, et illae ab ipso per omnia tanquam causae secundae a causa prima pendeat: ad effectus illos concurrere ac naturis cooperari dicitur. Hinc concursus ac cooperatio divina, *συγκόρησις, συνεργασία*, Theologorum. Est itaque concursus divinus nil aliud, quam virium, quibus res creatae ad agendum praeditae sunt, sustentatio. Ab hoc concursu divino, qui ad omnes res conditas refertur, et ideo generalis adpellatur, vel etiam physicus, distinguitur concursus specialis seu graciosus, quo nos Deus per gratiam suam in operibus bonis adjuvat, et specialissimus, qui in inspiratione obtinet. Ideo autem Deum ad malitiam pravorum operum haud concurrere, seu auctorem peccati non esse, per se facile intelligitur. Nam quum Deus concursu suo solummodo vires nostras earumque efficientiam, indeterminate spectatam, sustentet, usum vero illarum naturis liberis permittat: causa peccati nequaquam ipse, sed voluntas nostra prava est.

§. 13. Gubernatio.

Verum ut mundus fini suo satisfaciat, non sufficit, ut solummodo a Deo conservetur, sed ad conservationem accedere debet quoque ejus gubernatio. Est autem haec ea Dei actio ad extra libera, qua res omnes in mundo secundum ipsius sapientissima consilia disponuntur ac diriguntur, ut fines, quos sibi praescriptos habent, attingant, adeoque naturae inferioris ordinis naturis ordinis superioris inserviant, porro naturae vita animali quidem

praeditae, attamen ratione carentes, felicitate, naturae vero ratione ac libertate instructae perfectione morali et aliquando beatitate congrua potiantur, in omnibus autem infinita Dei perfectio manifestetur.

Pro gubernatione itaque mundi divina, nil in mundo accidit aut fit, Deo inscio aut nolente, nil sine justa dispositione, nilque sine ratione ac fine, atque per eandem omnis imprudentia seu *ἀνοία*, ac temeritas seu *ἀβουλία καὶ μάτιον*, alle Gedankenlosigkeit und Planlosigkeit, excluditur, et ideo quoque omnis casus aequae ac fatalismus, prout error Manichaeorum ¹⁾, Priscillianistarum et Catharorum ²⁾, nec non Gnosticorum, quorum illi mala omnia cujuscunque generis a principio malo, hi vero ab aeonibus e Deo emanatis et semper magis ab ipso recedentibus derivabant.

Porro licet gubernatio relate ad Deum unus ac simplex actus sit; quum tamen indoli entium creatorum adcommodari debeat, entiaque alia in mundo dentur ratione ac libertate destituta, utpote ad fines solummodo physicos destinata, alia praedita, utpote ad moralitatem creata: duplex quoque mundi gubernatio, physica ac moralis, discerni potest, quarum illa ad mundum physicum refertur, haec ad entia libera in mundo attinet. Gubernatio physica itaque constat in mundi physici seu rerum ratione carentium dispositione et ad fines sibi praefixos directione, atque in ea necessitans obtinet influxus, nec aberrationi datur locus. Moralis autem mundi gubernatio in directione entium moralium ad finem suum ultimum consistit, atque vim cogentem seu, ut ajunt, necessitantem respuit.

Tandem gubernatio, prout conservatio, physica ac moralis, tam ad res simul sumtas, quam ad singulas, et posterior iterum tum ad totum genus humanum, tum ad regnum Dei in mundo visibile seu ad Ecclesiam, tum ad singulum quemvis hominem refertur, et hinc etiam quatenus omnia una comprehendit, generalis seu universalis, quatenus autem ad res singulas spectat, specialis, vel vero, uti passim receptum est, quatenus ad partes totius, et speciatim ad Ecclesiam refertur, specialis, et quatenus ad res singulas nominatim ad singulos homines attinet, specialissima audit.

¹⁾ Cf. Tit. Bostrens. *Adv. Manich. l. 1. n. 1.* In Galland. *Bibl. PP.* T. 5. p. 269.

²⁾ Cf. *Relig. Dogmeng.* Mainz, 1837. 1. B. p. 328.

Gubernationem divinam, et quidem tam generalem quam specialem ac specialissimam, seu rerum creaturarum tam simul sumtarum quam singularum dari, docent

A. quam plurima SS. Litterarum testimonia. Huc

a. pertinent loca, quae generalem gubernationem tradunt, uti sunt: *Attingit* (pertingit Sapientia) *a fine usque ad finem fortiter* (suâ scilicet potentiâ vegetans ac movens omnia), *et disponit* (regit, administrat) *omnia suaviter* (gr. utiliter, adeo videlicet, ut nulla res in toto universo reperiatur, quae suo officio non apte fungatur, finique suo non respondeat) ¹⁾. — *Tua, Pater, providentia gubernat: quoniam dedisti, et in mari viam, et inter fluctus semitam firmissimam* (navim scilicet dirigendo ac tuendo) ²⁾. — *Considera opera Dei*, (i. e. persuasus esto, omnia sapientissime omnipotenti Dei virtute disponi,) *quod nemo possit corrigere, quem ille despexerit*, (vel potius juxta textum originale *quod ille incurvavit*, i. e. nemo potest immutare, quod Deus fieri decrevit). *In die bona frui bonis, et malam diem praecave* (seu *paratus exspecta*): *sicut enim hanc, sic et illam fecit Deus* ³⁾. Quaecunque itaque fiunt ex voluntate ac ordinatione divina fiunt ⁴⁾, et quidem ita ut vel minimas et vilissimas res haud negligat, et etiam ea, quae nobis casu fieri videntur, ab ipso sint ordinata. *Nonne duo passeret, ait Christus Dominus, asse veneunt; et unus ex illis non cadet super terram sine patre vestro*, (i. e. Patre inscio et nolente)? *Vestri autem capilli capitis omnes numerati sunt* ⁵⁾. Et in Proverbiis legitur: *Sortes mittuntur in sinum, sed a Domino temperantur* ⁶⁾.

b. Speciatim autem curam hominum habet, eorumque fata dirigit. *Sit nomen Domini*, ait Daniel, *benedictum a saeculo, et usque in saeculum: quia sapientia, et fortitudo ejus sunt. Et ipse* (pro hac scilicet summa sapientia ac fortitudine) *mutat tempora et aetates: transfert regna, atque constituit: dat sapientiam sapientibus, et scientiam intelli-*

¹⁾ Sap. 8, 1.

²⁾ Sap. 14, 3.

³⁾ Ecc. 7, 14—15.

⁴⁾ Cf. insuper Job, 5, 9 ss. Jer. 5, 23—24. 2. Par. 7, 13 ss.

⁵⁾ Matth. 10, 29—30. Cf. 6, 25 ss.

⁶⁾ Prov. 16, 33.

gentibus disciplinam ¹⁾). Psalmista: *Dominus in coelo paravit sedem suam: et regnum ipsius omnibus dominabitur* ²⁾). Sapiens: *Non est alius Deus, quam tu, cui cura est de omnibus*, i. e. pro contextu, qui cunctis populis prospicit de debito cuique praemio vel poena ³⁾). Non tantum autem universis populis, sed et

c. singulis hominibus Deus pro infinita benignitate ac sapientia providet. *Dominus regit me*, canit Psalter, *et nihil mihi deerit. In loco pascuae ibi me collocavit. Super aquam refectiois educavit me: animam meam convertit* (i. e. ovem quasi erraticam ex inviis ad caulas reduxit). *Deduxit me super semitas justitiae, propter nomen suum* (i. e. propter semetipsum, quia scilicet Deus Redemptor est). *Nam, et si ambulavero in medio umbrae mortis* (i. e. in mediis periculis, in maximis angustiis), *non timebo mala: quia tu mecum es. Virga tua, et baculus tuus* (i. e. pastoralis tua cura et sustentatio): *ipsa me consolata sunt* ⁴⁾). Auctor Proverbiorum: *Cor hominis disponit viam suam: sed Domini est dirigere gressus ejus* ⁵⁾). — *Multae cogitationes in corde viri: voluntas autem Domini permanebit* ⁶⁾). — *A Domino diriguntur gressus viri: quis autem hominum intelligere potest viam suam* ⁷⁾? Et Psalmista iterum: *Ecce oculi Domini super metuentes eum: et in eis, qui sperant super misericordia ejus. Ut eruat a morte animas eorum: et alat eos in fame* ⁸⁾). — Nominatim docet S. Scriptura, vitae terminum cuique a Deo constitutum esse. *Breves dies hominis sunt, numerus mensium ejus apud te est: constituisti terminos ejus, qui praeteriri non poterunt* ⁹⁾). — Una autem traditur, fieri hanc omnem divinam dispositionem atque hominum directionem salva singulorum in agendo libertate et in precando pietate ¹⁰⁾).

¹⁾ Dan. 2, 20—21. Cf. Is. 10, 5—12. Jer. 18, 7. Amos. 3, 6. Judith. 9, 4—5.

²⁾ Ps. 102, 19. Cf. 22, 1 ss. 25, 9 ss. 90, 1 ss. 91, 6 ss. 118, 17 ss. 144, 13. Eccli. 1, 8—10. Job. 12, 13 ss.

³⁾ Sap. 12, 13.

⁴⁾ Ps. 22, 1—4.

⁵⁾ Prov. 16, 9.

⁶⁾ Prov. 19, 21.

⁷⁾ Prov. 20, 24.

⁸⁾ Ps. 32, 18—19. Cf. Act. 18, 21. 1. Cor. 16, 7.

⁹⁾ Job. 14, 5.

¹⁰⁾ Cf. Matth. 6, 6, 26, 39 ss. Joan. 16, 23 ss. 1 Tim. 2, 1, 2, 8. Jac. 1, 5, 5, 14 ss.

B. Quemadmodum conservationem, ita et divinam mundi gubernationem Ecclesia semper tanquam principalem fidei Christianae articulum professsa atque contra Aristotelicos ¹⁾, qui limitem ei lunam constituerant, Epicureos ac Stoicos, nec non Gnosticos ac Manichaeos tuita est. SS. Patres ubique de ea sermonem instituunt, et Theodoretus singularem librum *de providentia* ²⁾ exaravit; traduntque, doctrinam de divina providentia seu gubernatione ad publica fidei dogmata pertinere. Sic Irenaeus ait: *Nobis confidentibus, quia nihil omnino horum, quae facta sunt, et quae fiunt, et fiunt, scientiam Dei fugit, sed per illius providentiam unumquodque eorum et habitum, et ordinem, et numerum, et quantitatem accipere et accepisse propriam, et nihil omnino neque vane, nec ut provenit factum aut fieri, sed cum magna aptatione et consonantia (conscientia) sublimi, et esse admirabilem rationem, et vere divinam, quae possit huiusmodi et discernere, et causas proprias emuntiare* ³⁾. — Porro docent, providentiam seu gubernationem divinam in ordine mundi ubique conspicuo manifestari. Minucius Felix: *Quid enim potest, ait, esse tam apertum, tam confessum, tamque perspicuum, cum oculos in coelum sustuleris, et quae sunt infra circaque lustraveris, quam esse aliquod numen praestantissimae mentis, quo omnis natura inspiretur, moveatur, alatur, gubernetur* ⁴⁾. — Clemens Alex.: *Manifesta (est) divina providentia ex aspectu omnium, quae videntur, effectorum, quae arte constant et sapientia* ⁵⁾. — Lactantius: *Secundus vero (gradus sapientiae est), perspicere animo, quod unus sit Deus summus, cujus potestas ac providentia effecerit a principio mundum, et gubernet in posterum* ⁶⁾. Nec non, eandem in lege morali nobis insita ⁷⁾, atque malorum punitione et bonorum remuneratione ⁸⁾, et in revelatione per Christum Dominum data

¹⁾ Origen. *In Ps.* 35, 6. Opp. T. 2. p. 652. — Theodoret. *H. F.* 1. 5. c. 10. Opp. T. 4. p. 275.

²⁾ *De prov. Orat.* 10. Opp. T. 4. p. 319—459.

³⁾ *Cont. haer.* 1. 2. c. 26. n. 3. p. 154.

⁴⁾ *Octav. n.* 17. In Galland. *Bibl. PP.* T. 2. p. 390.

⁵⁾ *Strom.* 1. 5. n. 1. Opp. T. 2. p. 646.

⁶⁾ *De ira D. c.* 2. Opp. T. 2. p. 129. — Chrysost. *Ad eos, qui scandalizati sunt.* c. 5. 7. Opp. T. 3. p. 473. 476—482.

⁷⁾ Chrysost. *Ib.* c. 8. p. 482. — Tit. Bostr. *Cont. Manich.* 1. 2. n. 11. In Galland. *Bibl. PP.* T. 5. p. 304.

⁸⁾ Id. *In Ps.* 9. n. 4. T. 5. p. 98 ss.

conspici ¹⁾. — Tandem tradunt, gubernationem seu providentiam divinam omnia, summa et ima, complecti ²⁾; sed simul agnoscunt, curam divinam pro majori aut minori rerum necessitate aut dignitate, majorem quoque vel minorem dicendam esse ³⁾. Gubernationis divinae necessitatem vero partim inde, quoniam omnia a Deo sunt condita ⁴⁾, partim quia secus frustra ad virtutis studium excitaremur ⁵⁾, repetunt. Ita Patres singuli.

Ecclesia autem universalis ipsa fidem suam, Deum omnia disponere atque res singulas et omnes ad finem suum dirigere, omnibus suis orationibus publicis, quibus ad Deum confugit, ut a nobis mala avertat aut auxilium suum ferat, palam profitetur.

C. Denique cum revelatione perfectissime quoque consentit sana ratio. Nam mens nostra, res creatas attente considerans, non potest non advertere, omnia sapientissime esse constituta et inter invicem disposita, atque res omnes ac singulas ad certos tendere fines, sibi omnino congruos, ubique ordinem ac fines rebus praestitutos, harumque ad illos convenientiam deprehendi, consilium ac rationem manifestari. Id comprobant innumera varia systemata corporum coelestium, comprobant noster orbis terraqueus, comprobant res singulae, minimae aequae ac maximae, comprobant earum mutua necessitudo. Quod quidem valet de mundo physico. Ast et ordinem mundi moralem dari, tam certum est, quam certum ac evictum, legem moralem nobis non frustra esse insitam, redemptionem ac revelationem non frustra factam. Quae ratio dissimulare haud potest. Ex altera parte autem simul necessario intelligit, omnia, quaecunque in mundo dantur et fiunt, contingentia esse. Quum autem omne, quod contingens est, nonnisi per voluntatem entis absoluti existere queat: necessario ratio omnem mundi dispositionem ac moderationem ad Deum refert, idque eo

¹⁾ Id. *Ad eos, qui scandalizati sunt*, c. 8. p. 482.

²⁾ Iren. *Cont. haer.* l. 3. c. 25. n. 1. p. 223. l. 5. c. 18. n. 3. p. 315. — Tertull. *Adv. Jud.* n. 2. Opp. V. 1. p. 265. — Minuc. *Fel. Octav.* c. 17. In Galland. *Bibl. PP.* T. 2. p. 390 s.

³⁾ Origen. *Cont. Cels.* l. 4. n. 74. 99. Opp. T. 1. p. 559. 576 s. — Hieronym. *In Habac.* 1, 14. Opp. T. 6. c. 604. — Iren. *Cont. haer.* l. 5. c. 18. n. 3. p. 316.

⁴⁾ Athenag. *Leg. pro. Christ.* n. 8. Opp. Justin. p. 304. — Nemes. *De nat. hom.* c. 43. In Galland. *Bibl. PP.* T. 7. p. 419. Cf. c. 42. p. 416 ss.

⁵⁾ *Recogn. Clement.* l. 8. n. 10. Coteler. *PP. apost.* Amstel. 1724. T. p. 568.

lubentius, quum perspiciat, si Deus non gubernaret mundum, omnia fato regi debere; quo semel admissa libertas, atque omne boni et mali discrimen tolleretur, nullusque praemio vel supplicio esset locus, sed parata nasceretur ad omne facinus audacia, omnisque moralis ordinis confusio.

Accedunt luculenta vestigia divinae providentiae in historia populorum, praecipue populi Judaici atque Ecclesiae, nec non singulorum virorum, uti Josephi, Moysis, Pauli, etc., imo in vita propria cujusvis hominis.

Observ. Etiam gubernationem mundi omnibus personis divinis adscribendam esse, non potest ex iis, quae supra de relatione SS. Trinitatis ad opera divina externa dicta sunt, esse dubium. Hinc et revera a SS. Patribus modo SS. Triadi ¹⁾, modo Patri ²⁾, modo Verbo ³⁾ tribuitur.

§. 14. Modus gubernationis.

Mundus, licet unus, in duas tamen abit partes, a se essentia diversas, mundum scilicet physicum et moralem; quorum ille, utpote rebus ratione carentibus constans, necessitati paret, hic vero, naturas intelligentes comprehendens, libertate ad finem suum tendit. Quapropter et, ut supra jam monuimus, gubernatio divina, quum pro summa, quae Dei est, sapientia indoli rerum convenire debeat ac adcommodari, spectata harum natura, alia mundi physici et alia mundi moralis sit necesse est. Et hinc gubernatio physica, sequens naturam rerum ratione ac libertate destitutarum, vim necessitantem in easdem exerit, ita ut non possint non finem sibi praestitutum obtinere, ut pariter jam supra diximus. Gubernatio vero moralis, naturam libertate praeditam respiciens, tribus quodammodo constat partibus sive actionibus, ipsaque efficitur: primo, ut omnes omnino homines seu naturae rationales finem suum, moralem perfectionem seu con-

¹⁾ Augustin. *De ver. relig.* c. 7. n. 13. Opp. T. 1. c. 752. — Athan. *Epist. 1. ad Serap.* n. 24. Opp. T. 1. P. 2. p. 673. n. 28. p. 676. *Epist. 3.* n. 5. p. 694.

²⁾ Athanas. *In illud: „Omnia mihi tradita sunt.“* n. 1. T. 1. P. 1. p. 103 a.

³⁾ Iren. *Cont. haer.* l. 5. c. 18. n. 3. p. 315. — Clem. *Strom.* l. 7. n. 2 Opp. T. 2. p. 831 ss. — Athanas. *Cont. Gent.* n. 42—44. T. 1. P. 1. p. 41—43. *De Incarn. Verb.* n. 17. p. 61. — Petr. Chrysol. *Serm.* 21. p. 38. c. 2. f. — Euseb. *Dem. Evang.* l. 4. c. 2. p. 146. Cf. Petav. *De Deo* l. 8. c. 1—4. *De dogm. theol.* Antv. 1700. T. 1. p. 314—29.

junctionem cum Deo, summo Bono, consequi possint; deinde, ut illi, qui sincere voluerint, illam revera consequantur; tum, ut omnibus aliquando dignitati ipsorum condigna sors contingat. Quaevis alia mundi moralis gubernatio aut libertatem nostram laedit, aut Deo est indigna.

Quod autem ad ulteriorem modum gubernationis mundi divinae attinet: ipsa, uti rerum conservatio, partim mediata, partim immediata est. Si enim gubernatio per omnia immediata esset: necessario subsistentia rerum, qua tanquam substantiae a Deo diversae, seu per se, voluntate ipsius existunt, tolleretur. Si vero per omnia tantum mediata obtineret: aut naturae intelligentes deberent desinere esse liberae, aut vero fines divini possent everti. Gubernat itaque Deus mediate mundum physicum per leges naturales, quibus vires rerum creaturarum omnium adstrinxit, et etiam mundum moralem per legem moralem, quam nobis per rationem et revelationem tulit; sed gubernat etiam mundum immediate. Etenim quoniam homo sibi relictus nunquam ad sui conscientiam, et ideo etiam Dei cognitionem cultumque evectus fuisset; porro quia ipse per abusum libertatis mundi ordinem moralem ac physicum perturbavit, imo, quantum in ipso erat, destruxit; atque insuper et nunc homo consilia divina per eundem libertatis abusum irrita reddere, absolute loquendo, potest: necessarium erat, ac est, ut Deus per revelationem primaevam educationem hominis in se susciperet, atque per revelationem subsequam datam et conservatam ordinem per peccatum disturbatum restitueret, et ut continuo, quam primum per perversam hominum agendi rationem consilia sua everti possent, actionem externam, illaesa libertate, immediata pariter sua efficientia impediat, vires aut etiam vitam mala meditantibus auferendo, ut in Sodomitis ¹⁾ et Aegyptiis Israëlitas persequentibus ²⁾ factum est, aut occasionem peccati removendo velut in Saule ³⁾, aut vero majorem potentiam opponendo, ut in Absolone accidit ⁴⁾.

Ex hac gubernationis divinae descriptione porro intelligitur, quod per eam vis necessitasque nobis minime inferatur, seu libertas nostra haud tollatur, quamvis Deus in suis dispositionibus nunquam fallatur. Nam, ut diximus, Deus mundum moralem gubernando

¹⁾ Gen. 19, 9 ss.

²⁾ Exod. 14. 27.

³⁾ 1. Reg. 19, 11 ss.

⁴⁾ 2. Reg. 18. 1 ss.

nonnisi efficit, ut consecutio finis nostri ultimi cuilibet reddatur possibilis, et solummodo eos, qui voluerint, ad huncce adducat. Hinc nemo salutem suam, nisi voluerit, consequitur. Ex altera parte autem, licet homo libertate sua abutendo fines quidem, etiam quos Deus absolute vult, irritos reddere posset; quum usus libertatis non ad interna, quae ad nos attinent, restringatur, sed et in effectibus externis locum obtineat: id tamen nunquam eveniet, quoniam effectus externi, consiliis divinis contrarii, illaesa voluntatis nostrae libertate praepediri ac tolli possunt, et etiam a Deo praepediuntur ac tolluntur. Neque asseri potest, saltem in iis, qui saluti suae operam non navant, Deum consilio suo frustrari; nam finem illum ultimum, quem Deus absolute intendit, ut se scilicet perfectum, sanctum ac justum in nobis exhibeat, in quo vis assequitur; finem autem proximum, moralem nostram perfectionem, cui desumus, aut a qua deficimus, non vult absolute, sed tantum hypothetice, eatenus scilicet tantum, quatenus nos voluntati ipsius obsecuturos esse praevidet.

Caeterum etiamsi vera indoles necessitudinis ejus, quae obtinet inter libertatem hominis et providentiae seu gubernationis divinae efficacitatem intellectui demonstrari, ab eoque plane comprehendendi non posset: neutram tamen ideo in dubium vocare possemus; cum utraque manifeste per revelationem divinam tradatur, imo per ipsum sensus nostri intimi atque rationis testimonium sit evicta, ut nemo sanus suique conscius persuasionem de sua libertate deponere, aut vero necessitatem gubernationis divinae in mundo contingenti negare queat; nosque insuper minime latere possit, quam plurima dari in humanis aliisque rebus, quorum modi intelligentiam nostram fugiant, quamquam ipsa sint certissima.

§. 15. Theodicaea.

Quod si vero Deus sanctissimus, benignissimus ac justissimus gubernat mundum: quomodo mala in mundo dari possunt, tam moralia, quam physica, quorum illa perfectioni morali, ad quam naturae rationis participes a Deo creatae sunt, repugnant, haec autem earundem et reliquarum felicitatem impediunt aut tollunt, et ideo cum sanctitate ac benignitate divina reconciliari haud posse videntur? et quomodo tanta anomalia ac inaequalitas sortis externae in singulis hominibus cum eorum dignitate morali saepius deprehenditur, ita ut dum justi summis premantur malis, improbi affluant omnis generis bonis?

Attamen non sunt haecce talia, quae cum divina providentia componi non possint; licet fides in antecessum persuasissimum habeat, mundum non obstantibus illis malis atque illa felicitatis disconvenientia esse Deo provido, sapientissimo, benignissimo ac sanctissimo dignissimum.

Quod jam primo ad existentiam mali moralis seu peccati attinet: haec ex iis, quae supra de modo gubernandi mundum moralem disputavimus, prorsus nullam parit difficultatem. Nam Deus peccatum non efficit, sed tantum permittit, idque solummodo propterea, quoniam secus homini libertatem adimere, et ideo omni dignitate eum exuere deberet; illa enim instructi, sumus actionum nostrarum domini, ad honestatem ac virtutem sectandam idonei, cui absolutum inest pretium, et per hanc ad felicitatem eniti possumus inenarrabilem. Quodsi autem liberi sumus: possibilitas a nostro fine aberrandi seu peccandi nobis data sit necesse est; haec enim ad naturam entis rationalis finiti necessario pertinet, et ab illo, quamdiu in praeparationis stadio versatur, abesse prorsus non potest.

Quoad mala physica vero in mundo observandum est:

1. Malum saepe non est, quod malum nobis in praesentia esse videtur; quin imo quae a nobis, caligantibus oculis res contemplantibus, mala aut nociva existimantur, ad totam rerum compagem relata, sunt necessaria, et non raro nobismet ipsis proficua ¹⁾. Omnia enim inter se aptissime sunt connexa, nos autem, qui totum perspicere non possumus, deformitate partium facile offendimur, assimilati iis, qui intrantes officinam alicujus artificis rationem ac usum variorum instrumentorum haud intelligunt, aut qui legere nescientes monstrosas formas litterarum in charta depictarum ridet. Displicet sane color niger, sed in pictura cum toto pulcher est ²⁾.

2. In mundo, in quo regnat peccatum, mala physica prorsus sunt necessaria, partim ad homines peccantes puniendos, partim ad eos emendandos et ad altiora evehendos, quum virtus dumtaxat per varia rerum discrimina exerceatur ac perficiatur ³⁾. Denique

3. etiam hoc non est praetermittendum, in mundo creato nil absolute perfectum esse posse. Quaecunque a Deo facta sunt, bona

¹⁾ Cf. Sap. 4, 11. 14. Ps. Prosper, *Carm. de provid.* Opp. c. 785—824 Ambros. *Hexaëm.* l. 1. c. 8. n. 31. l. 3. c. 9. Opp. T. 1. c. 18. 47 a.

²⁾ Augustin. *De ordin.* l. 1. c. 7. Opp. T. 2. c. 322.

³⁾ Cf. Origen. *Cont. Cels.* l. 6. n. 44. Opp. T. 1. p. 606.

quidem sunt, sed haud (absolute) perfecta; bona, quia a Deo, imperfecta, quia facta

Quoad disconvenientiam tandem inter hominis internam dignitatem atque externam ejus sortem advertendum est:

1. Non omnes, qui videntur justi ac probi, revera semper justi sunt; et ita etiam nequaquam omnes, qui mali habentur, vere improbi sunt. Homo cernit, quae parent, Deus autem intuetur cor. Quapropter et monet Apostolus: *Nolite ante tempus judicare, quoadusque veniat Dominus* ¹⁾.

2. Vera virtus jam remuneratione interna, animi scilicet tranquillitate ac beatitate, quae in his terris sane bonorum omnium est maximum, et una suavissimum aerumnarum lenimentum, atque saepe etiam externa felicitate non caret ²⁾. Impius vero, quamvis commodis voluptatibusque affluat, vera felicitate veroque gaudio privatur, utpote pectus remorsibus conscientiae dilaniatum ubique secum gestans, et insuper non raro, licet saepe post longum intervallum, res suas secundas in adversas commutatas, sibi inflictas poenas promeritas videt ³⁾.

3. Nemo justorum ab omni prorsus labe immunis est ⁴⁾, quem admodum et nemo ita corruptus, ut quaedam non peragat bona. Deus autem justissimus, prout pro minimo peccato infligit congruam poenam, ita pro minimo opere bono congruam largitur mercedem. Quod si ergo Deus his in terris jam bonum, quod faciunt mali, quos post mortem felicitas manet nulla, remuneratur, et malum in bonis punit, ut statim vita egressi, felicitate fruantur coelesti: quis eum injustitiae aut insipientiae insimulet?

4. Insuper malis physicis justis a vitiis retrahuntur, atque virtus in iis promovetur ac perficitur ⁵⁾; bonis vero physicis non raro homines peccatis dediti ad resipiscentiam excitantur; ita ut

¹⁾ 1. Cor. 4, 5.

²⁾ Cf. Ps. 96, 10. 11. Is. 3, 10.

³⁾ Cf. Ps. 36, 38 ss. 72, 1 ss. Job. 15, 20 ss. Augustin. *Enarr. in Ps. 53. n. 8. Opp. T. 4. c. 497 s. Omnes Sancti adjuvantur a Deo, sed intus, ubi nemo videt. Quomodo enim magna est poena impiorum conscientia, sic magnum gaudium piorum ipsa conscientia. Et al.*

⁴⁾ 1. Joan. 1, 8.

⁵⁾ Cf. Rom. 8, 28. 18. 2. Cor. 4, 17. 12, 7. 1. Petr. 1, 6—7. 4, 1. Act. 14, 21. — Augustin. *Cont. Faust. l. 22. c. 20. Opp. T. 8. c. 371 s. ubi inter alia ait: Nullus enim hominum est tanta justitia praeditus, cui non sit necessaria tentatio tribulationis, vel ad perficiendam, vel ad confirmandam, vel ad probandam virtutem.*

utraqne, mala et bona, pro diversis media emendationis excitandae et virtutis promovendae sint.

5. Tandem gubernatio divina nequaquam in hocce mundo aspectabili absolvitur. Hic in stadio praeparationis tantum versamur, manetque nos altera vita, in qua harmonia illa inter dignitatem moralem atque felicitatem restituetur, cujus spem metumve virtutis praemia scelerisque supplicia in hac vita nondum aequa lance distributa foveant ¹⁾).

Illa tamen bonorum inter omnes aequalis distributio, de qua multi nostris diebus somniant, quamque tam vehementer anhelant ipsi, qui ea omnium minime essent digni, uti in se impossibilis, ita sapientissimis consiliis divinis contraria est, pro quibus in genere humano multa sunt membra diversae conditionis ac dignitatis, unum tamen corpus necesse est ²⁾).

Observ. 1. Cum Deus sit, in quo vivimus, movemur et sumus, quique sollicitus est de rebus omnibus nostris, gratias ei agamus pro illis innumeris beneficiis, quibus jugiter accumulat nos.

Observ. 2. Porro cum ipse sit, qui omnia juxta sapientissima sua consilia disponat ac dirigat :

a. Persuasum habeamus nil eorum, quae accidunt, sine sapientissimo consilio Dei seu casu aut fortuito accidere, *Dominus enim pauperem facit, et dilatat, humiliat, et subleat. Suscitatur de pulvere egenum, et de stercore elevat pauperem* ³⁾).

b. Ideo nostra sorte semper contenti simus, atque vera animi pietate nos, resque nostras divinae curae committamus, nec sollici-

¹⁾ Cf. Matth. 13, 28—30. 1. Cor. 15, 19. — Augustin. *De Trinit.* l. 13 c. 16. n. 20. T. 8. c. 941. *De civ. D.* l. 20. c. 2. T. 7. c. 574. Gregor. M. Mor. l. 23. c. 24. n. 46. s. Opp. T. 1. c. 754. *Pio quidem Dei consilio agitur, ut hujus peregrinationis tempore electorum vita turbetur; via quippe vita est praesens, qua ad paradisum tendimus, et idcirco occulto judicio perturbatione conterimur, utne viam pro vita diligamus.* — August. *Enarr. in Ps.* 48. n. 3. T. 4. c. 436 s. *Tamdiu videtur herba laetior quam arbor, quamdiu hyems est. Herba enim per hyemem viget; arbor per hyemem quasi arida est: cum sol exierit ferventior tempore aestatis, arbor, quae per hyemem arida videbatur, expletur foliis, profert fructus, herba autem arescit: videbis honorem arboris, herba arida est. Sic et modo justi laborant, antequam veniat aestas*

²⁾ 1. Cor. 12. 12 ss. Quo respectu pulchre ait Theodoretus, *Graec. affect. cur. Serm.* 6. Opp. T. 4. p. 571. *Qui hanc rerum varietatem graviter ferunt eoque indignantur, quod non omnes eadem adepti sumus: pictores quoque accusant, quod non uno tantum colore utantur, sed ex rariis imagines suas perpoliant. Accusant et lyrarum artifices ipsosque adeo fidicines, quod non aequalem eundem sonum chordae omnes emittunt. Etc.*

³⁾ 1. Reg. 1, 7—8. Cf. Jac. 4, 13—15.

tudine vana mentem nostram excruciemus, sed Deo confisi, ejusque regimini sapientissimo ac optimo, mentem per omnia hilarem geramus, et in omnibus, quaecunque obtingunt, adversis ad eum respiciamus, firmiter persuasi, omnia ab ipso sapientissime ordinari, et ne capillum quidem capitis nostri sine ipsius voluntate decidere ¹⁾).

c. Attamen simul temerariam fiduciam vitemus, sed media naturalia ad mala vitae hujus avertenda adhibere, praecipue autem potentissimam opem divinam implorare haud negligamus. Quae vero a nobis auferre sapientiae divinae visum non fuerit, tanquam praesidia ad vitam honestam ducendam, beatamque assequendam ab ipsa nobis suppeditata, patienter perferamus; nam *non sunt condignae passiones hujus temporis, ad futuram gloriam, quae revelabitur in nobis* ²⁾).

¹⁾ Cf. Hebr. 12, 6.

²⁾ Rom. 8, 18.



Pars tertia.

De natura spirituali, seu de Angelis.

(*Ἀγγελολογία*).

§. 1. Ingressio.

Mundo universim considerato, ad singulas naturas creatas, ex quibus componitur, convertimur, ut earum indolem et relationem ad nos, quatenus id ad salutem nostram consequendam necessarium est, cognoscamus.

Omnes quidem naturae creatae unum universum conficiunt, non tantum quoniam ex una eademque origine emanarunt, ex nihilo scilicet per omnipotentiam divinam excitatae, et quoniam omnes omnino, utpote creatae, sunt finitae, atque hac ratione enti infinito oppositae ¹⁾, sed praecipue quia ad se invicem referuntur, inter se invicem conjunguntur, et unaquaeque, licet finem sibi proprium praefixum habeat, simul propter alteram adest, aut utilitatem aliquam ex ea percipit. Attamen ideo nequaquam unum idemque quoad substantiam sunt, verum potius ratione hujus a se invicem prorsus differunt; aliud enim est spiritus seu natura spiritualis, aliud φύσις, seu natura mundana, aliud homo, qui illam utramque in se conjunctam habet, et hinc jure ut alter mundus, seu μικρόκοσμος in μακρόκοσμος considerari potest ²⁾, quum ipse in se coelos et terram consociatos gestet, nilque de mundo ei desit ³⁾. Quapropter mundus tribus constat regnis, a se ipsa substantia seu essentia, τῷ ὄντι, diversis: natura spirituali, corporali et humana. In qua sua ἐνότητι et τριάδι mundus Dei trini una et ἕκτυπον et ἀντίτυπον exhibet; prius,

¹⁾ Hebr. 1. 10—12.

²⁾ Cf. Gregor Naz. Or. 34. Opp. T. 1. c. 488 D.

³⁾ Augustin. Ad Oros. c. 8. n. 11. Opp. T. 8. c. 616 ss.

quia mundus, ut Deus, unus et trinus est, posterius autem quoniam Deus substantiâ unus, et subsistentiâ seu existendi modo trinus, mundus vero substantiâ trinus, et subsistentia unus est, idque pariter nullam aliam ob causam, quam quia finitus est, et quidem per se, attamen non absolute existit, atque tantum, quatenus ejus capax est, imperfectam, haud in se necessariam, sui cognitionem, meram imaginem seu *σικάν*, et imperfectam pariter sui dilectionem, meram animi affectionem, exhibet, ideoque realem distinctionem, nisi sit substantiae, seu essentiae, non admittit. Refert itaque mundus Dei imaginem, sed modo finito, atque est ejus revelatio, ast nequaquam absoluta ¹⁾).

Cum ergo mundus triplex genus naturarum creaturarum, a se ipsa essentia seu substantia distinctarum, comprehendat: jure doctrinam revelatam de his in tres partes dividimus, quarum praesens, ut supra jam dictum est, agit de natura spirituali seu angelica, sequens de natura humana, et ultima de natura corporali, seu physica, vel, ut Concilium Later. IV. eam adpellat, mundana, quin tamen propterea mutuam harum trium universi partium necessitudinem negligamus.

§. 2. Notio Angeli.

Primum locum inter res creatas sine dubio tenet natura spiritualis, *οὐσία πνευματικὴ*, perfectissimum *ἔκτυπον* Dei, quae sunt spiritus inter Deum et homines interjecti, quos caeteri *daemones* sive *genios*, nostri autem *Angelos* adpellarunt ²⁾, una autem diversis his denominationibus diversas notiones subijcientes.

Ex mente Ecclesiae Catholicae nomine Angelorum intelliguntur naturae spirituales, finitae, hominibus superiores, quae terram hanc quidem non incolunt saltem non modo sensibili, attamen nobiscum connectuntur, atque salutem nostram vel promovere, vel vero etiam impedire satagunt, pro sua scilicet vel bona vel mala indole. Unde et Angeli boni et mali discernuntur.

¹⁾ Cf. Rom. 1, 19—20.

²⁾ Cf. S. Augustin. *De civ. D. l. 9. c. 19. Opp. T. 7. c. 233.*

Angeli boni, praeterquam quod *boni* ¹⁾ cognominentur in SS. Litteris, etiam *Angeli electi* ²⁾, *Angeli lucis* ³⁾, *Angeli coelorum* ⁴⁾, *Angeli Domini* ⁵⁾, *Angeli Dei* ⁶⁾, *Angeli virtutis Domini* ⁷⁾, *ministri Dei* ⁸⁾, *Sancti* ⁹⁾, *Filii Dei* ¹⁰⁾, vel simpliciter *Angeli* adpellantur. Nomen אַנְגֵּל, ἐγγήγορος, *vigil*, Syris valde

usitatum, tantum apud D a n i e l e m ¹¹⁾ legitur. Nomina propria, singulis Angelis tributa, tria in SS. Libris canonicis, *Michaëlis* ¹²⁾, *Gabrielis* ¹³⁾ et *Raphaëlis* ¹⁴⁾, occurrunt. In libris apocryphis, l. 4. Esdrae ¹⁵⁾ et l. Henoch, etiam *Uriel* commemoratur; quibus medio aevo adhuc alia, *Raguelis*, *Tubuelis*, *Iniae*, *Tubuae*, *Simielis*, etc. adjecta sunt ¹⁶⁾, sed a Conc. Rom. a. 745. ¹⁷⁾ rejecta. — Mali Angeli autem dicuntur *spiritus mali*, *spiritus nequam*, πνεύματα πονηρά, πνευματικά τῆς πονηρίας ¹⁸⁾, *spiritus immundi*, πν. ἀκάθαρτα ¹⁹⁾, *daemones*, δαίμονες ²⁰⁾, *daemonia*, δαιμόνια ²¹⁾, *mundi rectores tenebrarum*, κοσμοκράτορες τοῦ σκότους ²²⁾, *Angeli diaboli*, ἄγγελοι τοῦ διαβόλου, i. e. τοῦ πονηροῦ κατ' ἐξοχήν ²³⁾; porro adpellatur malus daemon *diabolus*, διαβόλος, i. e. adversarius ²⁴⁾, *satan*, ὁ σατάν, eodem significatu ²⁵⁾, *tentator*,

1) 2. Mach. 11, 6. 15, 23.

2) 1. Tim. 5, 21.

3) 2. Cor. 11, 14.

4) Matth. 24, 36.

5) Matth. 1, 20.

6) Gen. 31, 11.

7) 2. Thess. 1, 7.

8) Ps. 102, 21.

9) Dan. 4, 10, 8, 13. Zach. 14, 5. Ps. 88, 8.

10) Job. 1, 6, 2, 1. 38, 7.

11) Dan. 4, 10, 20.

12) Dan. 10, 13, 12, 1. Jud. 9. Apoc. 12, 7.

13) Dan. 8, 16, 9, 21. Luc. 1, 19, 26.

14) Tob. 3, 25.

15) 4. Esdr. 4, 1. 5, 20.

16) Cf. Wiest. *Inst. theol.* Ingolst. 1782 ss. T. 4. p. 783.

17) Act. 3. Mansi, *Coll. Conc.* T. 12. c. 379 s.

18) Luc. 7, 21, 8, 2. Matth. 12, 45. Act. 19, 13. Ephes. 6, 12. etc.

19) Matth. 10, 1, 12, 43. Marc. 1, 23, 26, 3, 11. Luc. 4, 36, 6, 18, 8, 29, 11, 24.

20) Matth. 8, 31, 9, 34. Jac. 2, 19.

21) Luc. 8, 30, 33, 35, 9, 1. 1. Cor. 10, 20.

22) Ephes. 6, 12.

23) Matth. 25, 41. Apoc. 12, 7.

24) 3. Reg. 21, 13. Sap. 2, 24. Matth. 13, 39.

25) Luc. 11, 18. Matth. 12, 26. Act. 26, 18. Apoc. 20, 2.

πειράζων ¹⁾, *mendax et homicida ab initio* ²⁾, *malignus*, πορνη-
ρὸς ³⁾, *Belial* בְּלִיַּל ⁴⁾, *Angelus abyssi* ⁵⁾.

Observ. Nomen ἄγγελος, ut jam observarunt Augustinus ⁶⁾ et Gregorius ⁷⁾, proprie officii nomen est, non naturae; significat enim sicut Hebraeorum מַלְאָךְ, *missum* seu *nun-*

tium. Quare quisquis legatione aliqua fungitur, ἄγγελος adpellari potest. Et hinc revera illo nomine in SS. Litteris insigniuntur nuntii quivis ⁸⁾; deinde autem speciatim *Angeli* nominantur, qui legatione divina funguntur, et quidem tam ordinaria, quo sensu Propheta ⁹⁾ Sacerdotes A. T., et Apostolus ¹⁰⁾ Episcopos *Angelos* cognominant, quam extraordinaria, quo significato praecursor Domini ¹¹⁾, imo ipse Christus Dominus *Angelus Testamenti* ¹²⁾, et Λόγος, jam in A. T. salute hominum occupatus, מְלִאֲכָה יְהוָה ¹³⁾,

ex sententia SS. Patrum nuncupatur. Quin imo res etiam mente ac sensu carentes, dum a Deo adhibentur ad voluntatem ipsius implendam, tanquam instrumenta ejus providentiae justitiaeve, velut grando, ignis urens, venti validi etc., Angelorum nomine veniunt ¹⁴⁾. Attamen pedetentim jam tempore antiquae oeconomiae usus invaluit, et eo magis deinde in Ecclesia obtinuit, ut *Angelorum* nomine nonnisi spiritus illi ordinis superioris, medii inter Deum et hominem, iique communiter boni, designarentur; quamvis subinde damnati quoque spiritus Angeli vocentur. Porro hoc sensu vocabulum acceptum, jam latius pro quolibet spiritu beato ¹⁵⁾, cujuscumque

¹⁾ Matth. 4, 3. 1. Joan. 3, 8.

²⁾ Joan. 8, 44.

³⁾ 1. Joan. 2, 13 s.

⁴⁾ Deut. 13, 13. 1. Reg. 2, 12. 2. Cor. 6, 15.

⁵⁾ Apoc. 9, 11.

⁶⁾ In Ps. 103. Serm. 1. n. 15. Opp. T. 4. c. 1140.

⁷⁾ Hom. 34. n. 8. Opp. T. 1. c. 1604.

⁸⁾ Num. 20, 14. 1a. 18, 2. 33, 7. Jos. 6, 17. Luc. 7, 24. 9, 52. Jac. 2, 25.

⁹⁾ Mal. 2, 7.

¹⁰⁾ Apoc. 2, 1. 8 etc.

¹¹⁾ Mal. 3, 1. Matth. 11, 10. Marc. 1, 2. Luc. 7, 27. Cf. 2. Paral. 36, 15. 16.

¹²⁾ Mal. 3, 1.

¹³⁾ Cf. Gen. 16, 7 ss. 21, 17 ss. 22, 11 ss. 48, 15 s. etc. Cf. Hengstenberg, Christologie des N. B. 1. B. p. 215 ss.

¹⁴⁾ Huc multi trahunt verba Ps. 77 (78), 49. et 103 (104) 4.

¹⁵⁾ Cf. Ps. 96, 7. Marc. 13, 32.

demum sit ordinis ac gradus, jam strictius sumitur, quando scilicet pro solis angelicis spiritibus ultimi ordinis usurpatur.

Simili ratione quoque vocabulum *δαίμων* genericum est, et tam de bonis, quam de malis spiritibus superioris ordinis adhiberi potest, et etiam a Scriptoribus profanis adhibetur, quapropter et *κακοδαίμονες* atque *εὐδαίμονες* distinguuntur; in S. Scriptura tamen *δαίμων* nonnisi Angelum malum seu diabolum denotat.

§. 3. Dantur Angeli a Deo creati.

Angelos existere, jam ratio non improbabili illatione colligit ex consideratione naturae humanae, utpote ex natura spirituali et corporali compositae, quarum hanc per se subsistentem videt, et ideo illam quoque pariter per se subsistere suspicatur, nec non ex contemplatione naturae mundanae, ab inferiori gradu ad superiorem ascendentis. Quapropter et fidem in genios, etsi ab Angelis, de quibus nos revelatio divina certos reddit, diversos apud populos gentiles invenimus, nec non a multis philosophis eos admissos fuisse legimus.

Interim tamen sunt alii, Materialistae, qui nihil esse existimantes, nisi quod sensu apprehendi possit, existentiam spirituum generatim, et ideo ipsius Dei quoque inficiantur. Quibus accensendi sunt Sadducaei, qui teste S. Scriptura asserebant, *non esse resurrectionem, neque Angelum, neque Spiritum* ¹⁾; nec non Pantheistae omnes, secundum quos Deus jam in homine ad perfectam sui conscientiam evehitur, ita ut ei spiritu quovis superiori haud sit opus. Praeter hos autem adversantur doctrinae de Angelorum existentia etiam Anabaptistae et Rationalistae, qui Angelos aut affectiones tantum motusque animi significare, aut vana phantasiae figmenta esse, a Chaldaeis et Assyriis excogitata, atque a Judaeis in captivitate adoptata, contendunt, Christum et Apostolos autem se falsis opinionibus adcommodasse, aut vero nonnisi usitam cogitandi ac loquendi rationem secutos esse, statuunt, vel vero esse rem tantum dubiam, cui fides minime praestari queat, praeciunt ²⁾.

Attamen revelatio existentiam Angelorum, bonorum ac malorum, clare ac indubitate tradit, simulque eos a Deo creatos, non autem, ut Gnostici, Manichaei ac Priscillianistae somniarunt, ex Deo progenitos esse aut profluxisse ostendit, et

¹⁾ Act. 23, 8.

²⁾ Cf. Wegscheider, *Inst. Theol. chr. dogm.* L. 1844, p. 387 s.

Ecclesia contra adversarios laudatos publica doctrina ac fidei professione tuetur ac confirmat. Et quidem

A. SS. Litterae partim Angelorum adparitiones commemorant, partim definitis verbis Angelos existere affirmant. Sic

a. narrant, Angelos adparuisse Abrahamo ante eversionem Sodomorum ¹⁾, et iterum cum manum extendisset, ut filium suum Isaac immolaret ²⁾; deinde Hagari ³⁾; tum Lotho, quem cum uxore et duabus filiis Sodomis educentes ab interitu liberarunt ⁴⁾; post, Angelum Raphaëlem missum esse ad Tobiam, qui hunc et Saram Raguelis filiam curaret ⁵⁾, atque Gabrielem ad Danielelem, ut ei prophetiam de Rege impudente ⁶⁾, et iterum de septuaginta hebdomadibus adferret ⁷⁾, ut alias adparitiones Prophetis et viris sanctis factas praetermittamus ⁸⁾. Et haec quidem occurrunt in libris A. T. — In libris autem N. F. legimus, adparuisse Angelum Zachariae, cui nativitatem filii praedicit, huncque Joannem vocari praecipit ⁹⁾; dein Mariae, conceptionem et nativitatem Messiae annuntiantem ¹⁰⁾; tum visos fuisse Angelos, quum J e s u s nasceretur, atque hunc natum pastoribus annuntiasse ¹¹⁾; postea Christo post jejuniū et devictum satanam ministrasse ¹²⁾, ipsum agonizantem confortasse ¹³⁾, ejus resurrectionem ad sepulchrum ¹⁴⁾, et quum in coelum ascenderet, ejus secundum adventum annuntiasse ¹⁵⁾; tandem Angelum Apostolos ¹⁶⁾, et iterum Petrum e carcere liberasse ¹⁷⁾. Ad nostram scilicet salutem promovendam creati, praecipue tunc comparent, ubi de hac modo extraordinario provehenda agitur. Porro

¹⁾ Gen. 18, 1 ss.

²⁾ Gen. 22, 11 ss.

³⁾ Gen. 21, 17. 16, 7 ss.

⁴⁾ Gen. 19, 1 ss. Cf. 28, 12.

⁵⁾ Tob. 3, 25, 5, 5 ss.

⁶⁾ Dan. 8, 16 ss.

⁷⁾ Dan. 9, 21 ss.

⁸⁾ Jud. 13, 2. 20. 3. Reg. 19, 5. 4. Reg. 1, 3.

⁹⁾ Luc. 1, 11 ss.

¹⁰⁾ Matth. 1, 20 ss. Luc. 1, 26 ss.

¹¹⁾ Luc. 2, 9 ss.

¹²⁾ Matth. 4, 11.

¹³⁾ Luc. 22, 43.

¹⁴⁾ Matth. 28, 2 ss. Marc. 16, 5 ss. Joan. 20, 11 ss.

¹⁵⁾ Act. 1, 10 ss.

¹⁶⁾ Act. 5, 19 s.

¹⁷⁾ Act. 12, 7 ss. Cf. Act. 27, 23 ss. Apoc. 10, 1 ss. 12, 7 ss. 19, 1 ss.

b. tradunt, Deum hominem minuisse paulo minus ab Angelis, i. e. paulo inferiorem Angelis instituisse ¹⁾; Angelis hominum custodiam demandasse ²⁾; Angelos pusillorum in coelis semper videre faciem Patris, qui in coelis est ³⁾; eos diem iudicii nescire ⁴⁾; filium hominis venturum esse in gloria Patris sui cum Angelis, ut reddat unicuique secundum opera ejus ⁵⁾; magnum gaudium fore coram Angelis super peccatore poenitentiam agente ⁶⁾; homines in altera vita aequales Angelis futuros ⁷⁾; atque Christum declarare, se omnem, quicumque ipsum confessus fuerit coram hominibus, confessurum esse coram Angelis Dei ⁸⁾, et impetrare a Patre potuisse plus quam duodecim legiones Angelorum ⁹⁾. Porro Apostoli fideles adjurant coram Deo, et Jesu Christo, et electis Angelis ¹⁰⁾; affirmant, Angelos Filium Dei adorare ¹¹⁾, esse omnes administratorios spiritus in ministerium missos propter eos, qui haereditatem capient salutis ¹²⁾, esse per Filium Dei creatos ¹³⁾, ei subjectos ¹⁴⁾, desiderareque cognoscere ea, quae Deus salutis nostrae causa fecerit ¹⁵⁾; atque fideles a falso et superstitioso cultu Angelorum avocant, cum Christus caput sit, ex quo totum corpus crescat in augmentum Dei ¹⁶⁾, quod certo felicius praestitissent, si plane Angelos non dari dixissent, sicut dicunt ab idololatria avocantes, nihil esse idolum ¹⁷⁾.

In his omnibus effatis manifeste Angeli tanquam vere naturae ratione praeditae, seu personae describuntur, una autem a Deo distinctae; cum aperte talia eis attribuantur, quae nonnisi naturis rationalibus adscribi possunt, atque a Deo creati et tanquam e

¹⁾ Ps. 8, 6. Hebr. 2, 7.

²⁾ Ps. 90, 11. Cf. 33, 8.

³⁾ Matth. 18, 10.

⁴⁾ Matth. 24, 36. 13, 32.

⁵⁾ Matth. 16, 27. 25, 31. 24, 31. 13, 39.

⁶⁾ Luc. 15, 10.

⁷⁾ Matth. 22, 30. Luc. 20, 36.

⁸⁾ Luc. 12, 8.

⁹⁾ Matth. 26, 53.

¹⁰⁾ 1. Tim. 5, 21.

¹¹⁾ Hebr. 1, 6.

¹²⁾ Hebr. 1, 14.

¹³⁾ Col. 2, 18.

¹⁴⁾ 1. Petr. 3, 22.

¹⁵⁾ 1. Petr. 1, 11—12.

¹⁶⁾ Col. 2, 18. 19.

¹⁷⁾ 1. Cor. 8, 4.

per omnia subjecti praedicentur. Falso itaque adstruitur, esse sub Angelis solummodo perfectiones divinas subintelligendas, aut plane esse illos entia mere imaginaria. Verum et illud assertum omni veritate destituitur, doctrinam S. Scripturae de Angelis repetendam esse a Chaldaeis et Assyriis; quum, ut vidimus, Angeli in libris sacris ante captivitatem exaratis, historicis aequae ac poetis, et quidem quam saepissime ac clarissime commemorentur. Insuper ex doctrina Gentilium genii ac daemones a divinitate non differunt, nisi gradu, utpote e Dei substantia profluentes, aut a Deo geniti; cum tamen in SS. Litteris Angeli per omnia tanquam a Deo conditi exhibeantur. Et sane quantum distat monotheismus a polytheismo, tantum quoque differt doctrina S. Scripturae de Angelis a doctrina de geniiis seu daemonibus Gentilium. Quominus de meris dicendi formulis, *παρομιμαζόμενοις λόγοις* (sprüchwörtlichen Redensarten) in effatis Christi et Apostolorum cogitemus, ipse illorum tenor prohibet. Adcommodationi autem Christi et Apostolorum dogmaticae obsunt illius divina natura et horum inspiratio, nec non ipse finis muneris docendi, quod Salvator et discipuli ejus nomine obibant.

Quae hucusque in medium prolata sunt S. Scripturae testimonia, existentiam Angelorum bonorum evincunt. Attamen quemadmodum SS. Litterae indubitate tradunt, dari Angelos bono ita quoque manifeste docent, existere Angelos malos, seu daemones. Etenim in libro Job, sine dubio omnium antiquissimo, saepius de satana sermo fit ¹⁾; in libris Regum et Paralipomenon legitur, spiritum nequam Saulem perturbasse ²⁾, satanam Davidem, ut numeraret Israël, concitasse ³⁾, spiritumque mendacem in ore pseudo-prophetarum fuisse ⁴⁾; atque in libro Sapientiae docetur, invidia diaboli mortem introvisse in orbem terrarum ⁵⁾. Insuper ubique cultus idolorum tanquam cultus daemonum exhibetur ⁶⁾. Sed si nulla etiam mentio in libris V. T. daemonum fieret: sufficiunt utique manifestissima in N. T. effata. Nam Christus Dominus Phariseis blasphemianibus, quod in Beelzebub, principe daemoniorum, ejiciat daemonia, longe abest, ipse, qui alias errores adversariorum suorum

¹⁾ Job. 1, 6 ss. 2, 1 ss.

²⁾ 1. Reg. 16, 14.

³⁾ 1. Par. 21, 1.

⁴⁾ 3. Reg. 22, 22. Cf. Zach. 3, 1. Tob. 8, 3.

⁵⁾ Sap. 2, 23. 24.

⁶⁾ Deut. 32, 17. 2. Par. 11, 15. Ps. 95, 5, 105, 37. Bar. 4, 7. 1. Cor. 10, 20.

summa libertate profligat, ut neget, diabolum existere, quo certo illos de falsitate calumniae sibi inflictae quam facillime convicisset, et malignas eorum linguas retudisset, sed potius ita de hac re disserit, se tanquam adversarium diaboli ejusque regni fortiolem exhibens, ut quilibet adstantium persuasum habere deberet, illum existentiam daemonum non tantum non impugnare aut dissimulare, sed confirmare ac tradere velle ¹⁾. Porro Salvator, ubi iterum adversus incredulos Phariseos disputat, hisce inter alia eos increpat verbis: *Vos ex patre diabolo estis*, i. e. patrem malum daemonem habetis: *et desideria patris vestri vultis facere*, ejus malis cupiditatibus obsequi studetis. *Ille homicida erat ab initio, et in veritate non stetit: quia non est veritas in eo*, in rectitudine non perseveravit, ab ea effectus alienissimus: *cum loquitur mendacium, ex propriis loquitur, quia mendax est, et pater ejus*, cum malum vos edocet, pro suo genio agit, siquidem perversus est, et perversitatis parens ²⁾. Quo loco certe omnis ad erroneas Judaeorum opiniones adcommotationis suspicio excluditur; cum sane nemo studio animos audientium sibi conciliandi ductus, hosce ejusmodi affatur verbis, illos necessario exasperantibus. Nec non ubi seorsim ad Apostolos verba facit, quos ab erroribus Judaeorum revocat, quibusque datum esse nosse mysteria regni coelorum, affirmat ³⁾, ita loquitur, ut illi, si nondum daemonem dari credidissent, necessario in hanc fidem adducerentur. Sic discipulis parabolam zizaniorum exponens, ait, inimicum qui seminaverit zizania, esse diabolum ⁴⁾, et parabolam seminantis explicans, diabolum esse, qui verbum Dei tollat de corde hominum, ne salvi fiant ⁵⁾; porro ad Simonem dicit, satanam Apostolos expetivisse, *ut cribraret, sicut triticum* ⁶⁾; atque affirmat, se in judicio novissimo injustos discedere jussurum *in ignem aeternum, qui paratus est diabolo, et angelis ejus* ⁷⁾. Paulus autem, haud timidus superstitionis Judaicae impugnator, fideles admonet: *Propterea accipite armaturam Dei, ut possitis resistere in die malo, et in omnibus perfecti stare. State ergo succincli lumbos vestros in veritate, et induti loricae justitiae, et calceati pedes in praepa-*

¹⁾ Matth. 12, 24 ss. Luc. 11, 15 ss. Marc. 3, 22 ss.

²⁾ Joan. 8, 44.

³⁾ Matth. 13, 11.

⁴⁾ Matth. 13, 39.

⁵⁾ Luc. 8, 12. Matth. 13, 19.

⁶⁾ Luc. 22, 31.

⁷⁾ Matth. 25, 41. Cf. Joan. 14, 30. 12, 31.

ratione Evangelii pacis, in omnibus sumentes scutum fidei, in quo possitis omnia tela nequissimi ignea extinguere, et galeam salutis assumite, et gladium spiritus (quod est verbum Dei) per omnem orationem, et obsecrationem orantes omni tempore in spiritu, et in ipso vigilantes ¹⁾. *Ut non circumveniamur a satana: non enim ignoramus cogitationes ejus* ²⁾. Petrus: *Sobrii estote, et vigilate: quia adversarius vester diabolus tanquam leo rugiens circuit, quaerens, quem devoret: cui resistite fortes in fide* ³⁾. Et Joannes: *Qui facit peccatum, ex diabolo est: quoniam ab initio diabolus peccat, i. e. qui peccat, diabolo similis est, qui statim a mundi creatione peccare coepit, et nunquam peccare desinit* ⁴⁾. Deinde etiam N. T. Scriptores passim idolatriam, nec non persecutiones Ecclesiae, hominum incredulitatem, diabolo adscribunt. Non uti autem, in locis laudatis quoque Christum atque Apostolos solummodo usitatis meris dicendi formulis, quivis primo obtutu sentit, quemadmodum et quivis falsis opinionibus haud praeoccupatus intelligit, neque Christum Dominum, Dei Filium ac regni divini in terris fundatorem, neque Apostolos, Legatos divinos, a Spiritu S. omnem veritatem edoctos, superstitionem, si qua in fide Judaeorum in daemones fuisset, dissimulare potuisse, nedum auctoritate sua tueri ac confirmare, quin ullum indicium alterius sententiae insinuaverint.

B. Patres autem non tantum uno ore existentiam Angelorum, tum bonorum tum malorum docent, sed et doctrinam hanc diserte Ecclesiae peculiarem et propriam declarant ⁵⁾, atque inter fidei articulos referunt. *Angelos novimus ex fide*, ait S. Augustinus, *et multis apparuisse scriptum legimus; nec inde dubitare fas nobis erit* ⁶⁾. Et hinc nonnisi tam scriptum, quam

¹⁾ Ephes. 6, 13—18.

²⁾ 2. Cor. 2, 11. Cf. Act. 13, 10.

³⁾ 1. Petr. 5, 8—9. Cf. 2. Tim. 2, 26. Jac. 4, 7.

⁴⁾ 1. Joan. 3, 8.

⁵⁾ Cf. Origen. *De princ. praef. n. 2—10*. Opp. T. 1. p. 47—49.

⁶⁾ In Ps. 103. *serm. 1. n. 15*. Opp. T. 4. c. 1140. Cf. Justin. *Apol. I. n. 6*; Opp. p. 47. *Dial. c. Tryph. n. 57. 79. p. 162. 185 s.* — Tatian. *Or. cont. Graec. n. 7. 8. Ib. p. 263. 264.* — Athenag. *Leg. pro Christ. n. 10. 24. 25. Ib. p. 305. 322. 223.* — Iren. *Cont. haer. l. 4. c. 37. s. 6. p. 282 s. l. 5. c. 23. n. 1. p. 320. c. 24. n. 4. p. 322. etc.* — Euseb. *Demonst. Evang. l. 3. c. 5. p. 106 s. l. 4. c. 6. p. 155 s. l. 5. c. 11. p. 238. l. 4. c. 6. p. 155 s.* — Cyrill. *Hieros. Cat. 15. n. 24. Opp. p. 337. Cat. 16. n. 23. p. 256. etc.* — Tertull. *Apolog. n. 22. Opp. V. 1.*

traditum verbum divinum proponitur, quando in Catechismo Rom., exposita creatione coeli et terrae, docetur: *Praeterea spiritualem naturam, innumerabilesque Angelos, qui Deo ministrarent atque assisterent, ipse ex nihilo creavit, quos deinde admirabili gratiae suae, et postestatis munere auxit, atque ornavit* ¹⁾).

C. Ratio autem doctrinam hanc de existentia Angelorum eo lubentius admittit, quum licet sibi relictam dari spiritus superiores certo cognoscere nequeat, id tamen, ut supra jam indicavimus, suspicatur. Nam cum una amborum naturarum, ex quibus homo est compositus, corporea, per se subsistat: ratio, etiam alteram, spirituales videlicet, per se subsistere, non improbabili illatione conjicit. — Haud improbabile porro est, quum mundus corporalis non unico, sed multis constet rerum ordinibus seu speciebus, quae a minus perfectis ad perfectiores ascendunt, et quasi continua serie decurrunt, junctae inter invicem arctissimo nexu progressionis, neque regnum spirituale uno tantum spirituum genere seu ordine, qui insuper ne per se quidem solus persistat, absolvi, sed quod in mundo physico observamus, etiam in mundo spirituali obtinere, et ita intervallum inter Deum, spiritum supremum, et inter homines, qui in infimo naturae rationalis gradu constituti sunt, spiritibus perfectioribus illis quodammodo repleri. — Denique Deus mundum creando se ad extra manifestare voluit, ita ut hic ipsius perfectum *ἐκτελεσθαι* existat; et hinc non possunt in mundo deesse naturae pure spirituales, quum secus recte perfectissima, quae dari potest, Dei imago in rerum natura desideraretur ²⁾).

Observ. Quod illorum sententiam attinet, qui putant, doctrinam de diabolo et daemonibus rationi repugnare: observamus, notionem biblicam Angeli sua culpa mali effecti tam parum rationi, vel potius sanctitati ac benignitati divinae adversari, quam parum notio hominis perversi sibi repugnat, et ideo minime, ut illi praecipunt,

p. 49 s. — Ambros. *Epist.* 20, n. 15. Opp. T. 2. c. 856. etc. — Lactant. *Div. instit.* l. 2. c. 9. Opp. T. 1. p. 143 s. — Augustin. *De civ. D. l.* 8. c. 22. Opp. T. 7. c. 299 s. etc. — Hilar. *In Ps. 129.* n. 7. Opp. T. 1. c. 494. Et rel. omn.

¹⁾ Ed. Vienn. 1833. p. 23.

²⁾ Cf. S. Thom. *1. q. 50. a. 1.* Eschenmayer, *Religionsphilosophie.* Tüb. 1817—21. 3. B. p. 201 s. — Tübing. *Quartalschrift.* 3. 1813. 1. S. p. 227.

cuit ¹⁾, an post eandem, ut tenent plerique Patres Latini ²⁾, et quidem aut primo, aut secundo, aut quarto, aut sexto, aut plane octavo cosmogoniae Mosaicae die, an vero simul, ut pariter non nemo sensit ³⁾, nihil certi statui potest.

Certo autem inter omnes constat, universam Angelorum multitudinem eodem momento procreatam a Deo exstitisse, in qua doctrina consentiunt Patres omnes ⁴⁾.

§. 5. Natura Angelorum.

Quod ad naturam Angelorum attinet: alia fide dogmatica constant, alia non item. Dogmatice certum est, Angelos esse spiritus, i. e. naturas intellectu et voluntate praeditas, eosque finitos. Id docent

A. SS. Litterae

a. eo, quod Angelos diserte spiritus, et quidem sensu proprio adpellent. *Nonne*, ait Apostolus, *omnes sunt administratorii spiritus, in ministerium* (ad operam praestandam) *missi propter eos, qui haereditatem capient salutis* ⁵⁾. Atque Christus Dominus ipse de daemoniis ad Apostolos verba faciens: *In hoc*, inquit, *nolite gaudere, quia spiritus vobis subijciuntur* ⁶⁾. In quo utroque loco spiritus manifeste naturam intelligentem ac volentem significat. Deinde

b. eo, quod Angelis, tam bonis quam malis, intellectum atque voluntatem, quibus spiritus natura constat, tribuant. Scien-

¹⁾ Cf. Basil. *Hexaëm. Hom. 1. n. 5.* Opp. T. 1. p. 5. — Gregor. Naz. *Or. 38. et 42.* Opp. T. 1. c. 547 s. 603 s. — Chrysost. *Ad Stagirl. 1. n. 2.* Opp. T. 1. p. 157 s. — Ambros. *Hex. l. 1. c. 5. n. 19.* Opp. T. 1. c. 9. *In Ps. 1. enarr. Praef. n. 2. c. 737.* — J. Dam. *De fid. orth. l. 2. c. 3.* Opp. T. 1. p. 158. Et al. Cf. Petav. *De Ang. l. 1. c. 15. n. 2—5. De theol. Dogm. Antv. 1700. T. 3. d. 47 s.*

²⁾ Cf. Augustinus, *De civ. D. l. 11. c. 9.* Opp. T. 7. c. 278. *De Gen. ad litt. l. 2. c. 8. T. 3. P. 1. c. 137.* — Junilius, *De part. div. leg. l. 2. c. 2.* In Galland. *Bibl. PP. T. 12. p. 84.* — Gennadius, *De dogm. eccles. c. 10.* Et al. Cf. Petav. l. c. n. 6—11. p. 48 s.

³⁾ Cf. Hug. a S. Vict. *De sacr. fid. l. 1. p. 1. c. 5.* Opp. Rothom. 1648. T. 3. p. 489. *Sum. Sent. tr. 2. c. 1. p. 436.* — Magist. *Sent. l. 2. d. 2. S. Thom. 1. q. 61. a. 3.* Opp. T. 20. p. 338 s. Et Theologi post Conc. Lateran. omnes.

⁴⁾ Cf. Petav. l. c. c. 16. n. 2. p. 51.

⁵⁾ Hebr. 1, 14.

⁶⁾ Luc. 10, 20. Cf. Matth. 8, 16. Luc. 11, 26. Act. 23, 8. Ephes. 6, 12. Apoc. 1, 4.

tiam, et quidem majorem hominum scientia, ast simul limitatam, Angelis Christus adscribit, quum de extremo judicio disserens ait *De die autem illo, vel hora nemo scit, neque Angeli in coelo, neque Filius hominis, nisi Pater* ¹⁾. Intellectum autem et voluntatem Angelis attribuit Salvator, quando a scandalis avocans inquit: *Videte, ne contemnatis unum ex his pusillis*, i. e. qui voluntate tales sunt, quales aetate parvuli, humiles scilicet, simplices, ambitionis et invidiae expertes: *dico enim vobis, quia Angeli eorum in coelis semper vident faciem Patris mei, qui in coelis est*, i. e. Deo sunt conjunctissimi, unde et in promptu ipsis est, injurias clientibus suis illatas Deo judici ac vindici quasi exponere, atque eum ad illas ulciscendas excitare ²⁾. Et iterum: *Gaudium erit coram Angelis Dei super uno peccatore poenitentiam agente* ³⁾. Quod uti factae resipiscentiae cognitionem, ita et voluntatem in bono obfirmatam arguit. Id ipsum inest verbis Petri: *Quae nunc nuntiata sunt vobis per eos, qui evangelizaverunt vobis, Spiritu S. misso de coelo, in quem, Christum videlicet, tanquam principem suum charissimum ac gloriosissimum, vel potius juxta textum originale, in quae, siq̃ a, desiderant Angeli prospicere* ⁴⁾. — Simili modo docetur, daemones cognovisse, Christum Filium Dei esse ⁵⁾, porro ipsos credere, ast contremiscere ⁶⁾, perverse agere, et homines ad perversitatem sollicitare ⁷⁾. Insuper

c. talibus officiis praeficiuntur, quae nonnisi naturae rationales exequi possunt ⁸⁾.

B. Quod autem sensum Patrum attinet: res adeo certa et ab omnibus admissa est, illos omnes unanimi ore, Angelos spiritus esse, docuisse, ut nec opus sit eorum effata hic in medium proferre; et si nonnulli eorum videntur Angelos corporeos habuisse, ut Tertullianus ⁹⁾ et quidam

¹⁾ Marc. 13, 32.

²⁾ Matth. 18, 10.

³⁾ Luc. 15, 10.

⁴⁾ 1. Petr. 1, 12.

⁵⁾ Marc. 1, 34. Luc. 4, 41.

⁶⁾ Jac. 2, 19.

⁷⁾ Joan. 8, 44. 1. Joan. 3, 8. 1. Petr. 5, 8. Ephes. 6, 11—18.

⁸⁾ Cf. Matth. 1, 18 ss. 4, 11. 24, 31. Ps. 90, 11. Zach. 1, 9. Job. 4, 18. 2. Petr. 2, 4.

⁹⁾ De carne Christ. n. 6. Opp. V. 2. p. 50 s.

alii ¹⁾, id nonnisi inde factum est, quoniam generatim de natura spiritus sinistre sentiebant.

C. Dogmatica tandem decisio prostat in definitione Concilii Later. IV. jam saepius laudata, in qua natura angelica et spiritalis, ut mundana et corporea, eadem declaratur, ex utraque naturam humanam, ex corpore organico et anima rationali constantem, esse compositam statuitur; adeoque, ni directe, certo indirecte veritas nostra solenni illo iudicio fidelibus credenda proponitur.

Porro Angelos, seu naturas illas spirituales, inter Deum et homines intermediarum, quoad vires suas nativas intellectus et voluntatis nobis praestantiores esse, nullo quidem solenni Ecclesiae iudicio definitum, attamen certissimum est, et tam in SS. Litteris quam a SS. Patribus clare enuntiatur. Etenim in illis diserte docetur, hominem a Deo inferiorem Angelis esse constitutum ²⁾; deinde de die iudicii ne ipsos Angelos quidem, et eo minus itaque homines scire ³⁾ traditur; tum intellectus perspicacissimus atque singularis justitia ac bonitas similis perspicaciae, justitiae ac bonitati Angelorum declaratur ⁴⁾, et Christus cum Angelis, ut ejus praestantia ostendatur prae omnibus rebus creatis, comparatur ⁵⁾; atque postea a Petro expresse effertur, Angelos vi ac potestate longe homines superare. *Ubi Angeli, ait, fortitudine, et virtute cum sint majores, non portant adversum se (illos) execrabile iudicium* ⁶⁾. Admonet Apostolus Christianos, ne malum imprecentur dignitate conspicuis, licet execratione dignissimis, quum ne ipsi quidem Angeli coelestes, vi ac potestate illos longe superantes, adversus eos sententiam ferant maledicam. Et ante Apostolum Psalmista: *Benedicite Domino, omnes Angeli ejus: potentes virtute, facientes verbum illius* ⁷⁾. Quod caeterum jam ipsa nomina *εξουσίαι* et *δυνάμεις*, *potestates* et *virtutes* innuunt.

¹⁾ Macar. Hom. 4. n. 9. Galland. Bibl. PP. T. 6. p. 15. De elev. ment. n. 6. p. 191. Cassian. Collat. 7. c. 13. Opp. p. 439. — Method. De resurrect. Cod. 234. ap. Phot. n. 7. Ib. T. 3. p. 783 s. — Caesar. Dial. 1. interr. 48. Ib. T. 6. p. 32. — Cyrill. Hieros. Cat. 16. n. 15. Opp. p. 251 s. Cat. 15. n. 23. p. 236. Cat. 18. n. 19. p. 297. — Basil. De Spir. S. c. 16. n. 38. Opp. T. 3. p. 32.

²⁾ Ps. 8, 6.

³⁾ Marc. 13, 32.

⁴⁾ 1. Reg. 29, 9. 2. Reg. 14, 17. 20. 19, 27.

⁵⁾ Hebr. 1, 4—14. 2, 2 ss.

⁶⁾ 2. Petr. 2, 11.

⁷⁾ Ps. 102, 20.

B. Idem tradunt SS. Patres. Sic Augustinus de Angelis loquens ait: *In quo (mundo) nihil melius instituit, quam spiritus, quibus intelligentiam dedit, et suae contemplationis habiles capacesque sui praestitit* ¹⁾. Similia habent omnes caeteri ²⁾, unico Tertulliano excepto ³⁾.

C. Verumtamen nec opus est hisce testimoniis, quum jam ipse locus, quem homo inter naturam angelicam et mundanam occupat, intermedius id postulet, ut scilicet altera natura mundana seu corporalis eo inferior, altera vero, angelica seu spiritualis, superior sit.

In quo autem illa Angelorum praestantia sita sit, ex natura spiritus dubium esse non potest. Praestant videlicet hominibus, majori vi facultatis cognoscendi et validiori appetendi ac agendi potentia. Attamen qualiscunque demum sit Angelorum praestantia: ipsa limitum haud est expers aut ignara. Quod jam inde manifestum est, quoniam Angeli ad naturas e nihilo creatas pertinent. Quod enim e nihilo conditum est, limitibus circumscriptum sit necesse est. Id ipsum quoque diserte tradunt SS. Litterae, quum doceant, Angelos minime nosse occulta consilia divina ⁴⁾, nisi ipsis a Deo patefiant, nam *quae Dei sunt, nemo cognovit, nisi Deus* ⁵⁾. Nec sciunt ea, quae Deus humanae salutis causa ordinare decrevit, *in quae*, ut scribit Petrus, *desiderant prospicere* ⁶⁾. Quin imo ne humanas quidem cogitationes naturali perspicacia cognoscunt, ita ut quae occulte apud nos animo revolvamus, et sola voluntate interius agitemus, uni Deo perspicua sint. *Pravum*, ait Propheta, *est cor omnium, et inscrutabile: quis cognoscet illud? Ego Dominus scrutans, et probans renes* ⁷⁾. Vo-

¹⁾ *De civ. D. l. 22. c. 1. n. 2.* Opp. T. 7. c. 655. *Tract. 110. n. 7.* T. 3. P. 2. c. 779.

²⁾ Cf. Athenag. *De resurr. mort. n. 16.* Opp. Justin. p. 350. — Clem. Alex. *Strom. l. 4. n. 3.* Opp. T. 1. p. 586 s. — Origen. *In Matth. l. 17. n. 21.* Opp. T. 3. p. 798. — Cyrill. Alex. *In Joan. l. 2. c. 5. (4, 22.)* Opp. T. 4. p. 186.

³⁾ *Adv. Marc. l. 2. n. 8.* Opp. V. 2. p. 186 s.

⁴⁾ Matth. 24, 36.

⁵⁾ 1. Cor. 2, 11. Cf. Joan. 1, 18. 1. Tim. 6, 16. 1. Joan. 4, 12. — Chrysost. *Hom. 11. in 1. Tim. (3. 16.) n. 1.* Opp. T. 10. p. 606.

⁶⁾ 1. Petr. 1, 12. Cf. Ephes. 3, 10. — Chrysost. *Hom. 1. in Joan. n. 2.* T. 8. p. 3. *Hom. 7. in Ephes. n. 1.* T. 10. p. 46. — Augustin. *De civ. D. l. 9. c. 21.* Opp. T. 7. c. 234. Cf. Pet av. *l. c. c. 8.* p. 24 ss.

⁷⁾ Jer. 17, 9. 10. Cf. 3. Reg. 8, 39. 2. Paral. 6, 30. Ps. 43, 22. 7, 10. Eccli. 42, 18. Hebr. 4, 12. — Augustin. *De Gen. ad litt. l. 12. c. 17.*

luit enim Deus naturae intelligenti, pro ejusdem idea, perfectum dare dominium actionum suarum liberarum, ita ut de iis absolute possit non tantum efficiendis, sed et patefaciendis disponere, neque illae cuidam enti finito, nisi illa consentiente, possint patere. Eo minus itaque sciunt futura contingentia, seu a libera hominum voluntate pendentia, quorum cognitio soli divinitati propria est. Hinc Isaias falsos deos ad edenda vaticinia tanquam certissima divinitatis testimonia excitat. *Annuntiate, inquit, quae ventura sunt in futurum, et sciemus, quia dii estis vos: bene quoque aut male, si potestis, facite: et loquamur, et videamus simul* ¹⁾ Ubi autem intelligentia certis limitibus est circumscripta: etiam voluntas et potentia illimitata esse nequit; et hinc neque ad creationem, neque ad gubernationem, neque ad miracula sufficit ²⁾.

Angelos esse immortales, in SS. Litteris de industria quidem non traditur; attamen tanquam certum ac indubitatum, utpote ex eorum indole spiritali sponte sua consequens, supponitur, atque ignem aeternum diabolo ejusque angelis paratum esse ³⁾, et homines post mortem ultra non morituros aequales fore Angelis declaratur. Patres autem constanter, Angelos esse substantias intellectuales et immortales, asserunt. Sunt vero Angeli immortales non eo sensu, ac si ab iis, utpote pro sua natura morti ob

n. 3. Opp. T. 3. P. 1. c. 309. *Serm. 243. n. 5. T. 5. c. 1014.* — Origen. *Hom. 8. in Gen. n. 8.* Opp. T. 2. p. 83. c. 1. C. — Chrysost. *Hom. 4. in Matth. n. 5. T. 7. p. 56.* — Cyrill. Alex. *In Joan. l. 1. c. 1. v. 47.* Opp. T. 4. p. 133. c. 2. v. 24. p. 144. etc. — Petr. Chrysol. *Serm. 50. p. 80. c. 2.* — Fulgent. *Ad Trasim. l. 2. c. 16.* Opp. p. 106. — Cassian. *Coll. 7. c. 15.* Opp. p. 442. — S. Thom. *1. q. 57. a. 4.* Opp. T. 20. p. 319 s. Et pl. al. Cf. Petav. *l. c. c. 7. p. 21 ss.*

¹⁾ Is. 41, 23. Cf. 44, 7. Dan. 2, 28. Deut. 18, 22. Jer. 23, 9. — Tertull. *Apol. n. 20. Idoneum testimonium divinitatis est veritas divinationis,* Opp. V. 1. p. 45. — Cyrill. Alex. *In Joan. l. 4. p. 394. Nulli alii, quam uni ac soli naturali Deo futura nosse convenit.* — Hilar. *De Triail. l. 9. n. 61.* Opp. T. 2. c. 306. *Proprium Deo quid aliud, quam cognitio futurorum?* — Augustin. *De civ. Dei l. 5. c. 9. n. 4.* Opp. T. 7. c. 124. *Qui enim non est praescius omnium futurorum, non est utique Deus.* Cf. *De divin. c. 5. n. 9. T. 6. c. 509.* — Chrysost. *Hom. 18. in Joan. n. 2.* Opp. T. 8. p. 112. — Hieron. *In Dan. 2, 9. 10. 19. 30.* Opp. T. 5. c. 628. 629. 633. — J. Damascen. *De fid. orth. l. 2. c. 3.* Opp. T. 1. p. 158. — Conc. Tolet. I. (a. 400) *can. 15.* Mansi, *Coll. Conc. T. 2. c. 1004.*

²⁾ Cf. J. Damasc. *De fid. orth. l. 2. c. 3.* Opp. T. 1. p. 158.

³⁾ Matth. 25, 41.

noxiis, singulari beneficio mors praecaveretur, sed et non illo sensu, quasi prorsus non possent etiam non existere, adeoque ab omnipotentia quoque divina destrui nequirent, sed eatenus, quatenus natura eorum exigit, ut non intereant, aut corrumpantur.

In hisce, quae hucusque exposuimus, licet omnia haud sint dogmaticè definita, omnes tam Patres antiqui, quam Theologi posteriores conveniunt. Si autem quaeritur, utrum Angeli sint corporati, an vero spiritus puri: Patres in diversas abeunt sententias.

In SS. Litteris quidem Angeli et daemones, ut ex locis citatis adparet, diserte spiritus compellantur, et etiam definite declaratur, *quia spiritus carnes, et ossa non habet* ¹⁾. Quoniam tamen Apostolus quoque corpus spirituale, *σῶμα πνευματικόν*, commemorat: non videtur ex illa Angelorum, licet constanti, cognominatione saltem necessario sequi, Angelos puros, omnis omnino corporis expertes, esse spiritus, quemadmodum etiam non ex eo, quod Paulus Angelos vocet *τὰ ἀόρατα, invisibilia* ²⁾, in oppositione reliquarum rerum, quas *τὰ ὀρατά* dicit; quamvis negari nequeat, ne unicum quidem locum in S. Scriptura ostendi posse, in quo vocabulum *spiritus, πνεῦμα*, de natura rationali sensu non proprio adhibeatur, et ne unicum quidem, ubi vel levissima corporis Angelorum mentio injiciatur, aut ubi homo simili ratione a nobiliori sui parte spiritus adpelleatur, quin imo illud saltem tanquam certum assumendum esse videtur, communem tempore Christi Judaeorum fuisse fidem, Angelos puros esse spiritus, quoniam in hocce sensu Angelorum existentiam Sadducaei inficiati sunt, dicentes, ut Lucas scribit, *non esse resurrectionem*, i. e. animas immortales, *neque Angelum, neque Spiritum* ³⁾. Ex altera parte autem certum quoque est, ex loco Geneseos: *Videntes filii Dei filias hominum quod essent pulchrae, acceperunt sibi uxores ex omnibus, quas elegerant* ⁴⁾, nec non ex variis illis adparitionibus minime colligi posse, ut quibusdam visum est, Angelos corporibus praeditos esse; quum sub filiis Dei in loco laudato nequaquam Angeli, sed posteri Seth intelligendi sint ⁵⁾, et in locis illis, in quibus de adparitionibus Angelorum sermo est, minime narretur, Angelos in propriis corporibus se spectandos praeuisse ⁶⁾.

¹⁾ Luc. 24, 39. Cf. Joan. 4, 24. 1. Cor. 2, 11. Act. 23, 8.

²⁾ Col. 1, 16.

³⁾ Act. 23, 8.

⁴⁾ Gen. 6, 2.

⁵⁾ Cf. Tirin. *Comm. in S. Script.* ad h. l.

⁶⁾ Is. 6, 1 ss. Matth. 28, 2 ss. Marc. 16, 5 ss. Act. 1, 10 s.

E Patribus alii Angelos plane corporeos, ex corpore scilicet aethereo, ut Angelos bonos, aut aëreo, ut Angelos malos, constantes, videntur habuisse, aut saltem ex corpore, subtili pariter, et spiritu compositos esse tenuerunt, ut Justinus († c. a. 167.) ¹⁾, Athenagoras († c. a. 180.) ²⁾, Tatianus († c. a. 180.) ³⁾, Irenaeus († a. 202.) ⁴⁾, Clemens Alex. († a. c. 220.) ⁵⁾, Origenes († a. 253.) ⁶⁾, Methodius († c. a. 311.) ⁷⁾, Macarius († a. 319.) ⁸⁾, Basilius († a. 379.) ⁹⁾, Cyrillus Alex. († 444.) ¹⁰⁾, Minucius Fel. († c. 210.) ¹¹⁾, Tertullianus († c. 220.) ¹²⁾, Lactantius († 330.) ¹³⁾, Ambrosius († 397.) ¹⁴⁾, Augustinus († 430.) ¹⁵⁾, Cassianus († c. 434.) ¹⁶⁾, Petrus Chrysologus († 450.) ¹⁷⁾, Mamertus Claudianus († 470.) ¹⁸⁾, Gennadius († c. 500.) ¹⁹⁾, Caesarius († 543.) ²⁰⁾, et Bernardus († 1153.) ²¹⁾, qui tamen potius sententiam suam suspendit.

¹⁾ *Apol. II. n. 5. Opp. p. 95. Dial. c. Tryph. n. 57. p. 162.*

²⁾ *Legat. pro. Christ. n. 24. Ib. p. 322. s.*

³⁾ *Cont. Graec. n. 12. Ib. p. 268 s.*

⁴⁾ *Cont. haer. l. 4. c. 16. n. 2. p. 246. c. 36. n. 4. p. 279. l. 5. c. 2. n. 2. p. 327.*

⁵⁾ *Paedag. l. 1. c. 6. Opp. T. 1. p. 122. Strom. l. 3. c. 7. p. 538. l. 5. c. 1. T. 2. p. 650.*

⁶⁾ *De princ. l. 1. c. 6. n. 4. Opp. T. 1. p. 71. l. 2. c. 8. n. 8. p. 94. l. 4. n. 35. p. 194.*

⁷⁾ *De resurr. Cod. 23. ap. Phot. In Galland. Bibl. PP. T. 3. p. 783.*

⁸⁾ *De elev. ment. n. 6. Ib. T. 7. p. 191.*

⁹⁾ *De Spir. S. c. 16. n. 38. Opp. T. 3. p. 32.*

¹⁰⁾ *In Joan. l. 9. c. 14. v. 11. Opp. T. 4. p. 787. D.*

¹¹⁾ *Octav. c. 26 s. Galland. Bibl. PP. T. 2. p. 396.*

¹²⁾ *De carn. Chr. n. 6. Opp. V. 2. p. 50.*

¹³⁾ *Div. instit. l. 2. c. 15. Opp. T. 1. p. 176.*

¹⁴⁾ *De Noë et arc. c. 4. n. 8. Opp. T. 1. c. 230. Apol. David. c. 1. c. 677.*

¹⁵⁾ *Epist. 96. ad Olymp. n. 8. Opp. T. 2. c. 260. Ep. 9. ad Hebrid. n. 3. c. 12. De Gen. ad litt. l. 3. c. 10. n. 14. T. 3. P. 1. c. 150. In Ps. 85. n. 17. T. 4. c. 912. De civ. D. l. 8. c. 16. T. 7. c. 204. l. 21. c. 10. c. 631. De Trinit. l. 3. c. 1. n. 4. T. 7. c. 795. Serm. 277. c. 9. n. 9. T. 5. c. 1117.*

¹⁶⁾ *Coll. 7. c. 13. Opp. p. 439.*

¹⁷⁾ *Serm. 52. p. 82.*

¹⁸⁾ *De stat. anim. l. 1. c. 13. Galland. Bibl. PP. T. 10. p. 425. l. 3. c. 7. p. 448.*

¹⁹⁾ *De Eccles. dogm. c. 11. 12. Opp. Augustin. T. 8. c. 77.*

²⁰⁾ *Dial. 1. Interr. 48. Galland. Bibl. PP. T. 6. p. 32.*

²¹⁾ *Serm. 5. in Cant. Cant. n. 2. 7. Opp. c. 1283 s. De consid. l. 5. c. 4. n. 7. c. 453.*

Alii vero Angelos spiritus puros seu *ἄσώματος*, i. e. corporis omnino, sive crassioris sive subtilioris, expertes esse tradunt. Ad hos pertinent: Ignatius († a. 107.), qui Angelos *ἄσώματος φύσεις*, *incorporeas naturas* vocat ¹⁾; Gregorius Thaumaturgus († 265), qui illos *ἄσώματος δυνάμεις*, *incorporeas potestates*, esse dicit ²⁾; Titus Bostrensis († c. 372.) ³⁾; Athanasius († 373.) ⁴⁾; Didymus († 393), qui Angelos tanquam spirituales substantias non circumscribi loco et finibus, tamen proprietate naturae finiri ⁵⁾ ait; Basilius († 379), qui licet semel Angelum spiritum *aërium, aut ignem immaterialem* esse dicat, tamen alibi iterum Angelos *simplices* ac *incorporeos* esse asserit ⁶⁾; Gregorius Nyss. († 396) ⁷⁾, qui Angelos *ἄσώματος κτίσιν*, *incorpoream creaturam*, nominat; Gregorius Naz. († 389), qui naturam angelicam *νοητὴν καὶ ἄσώματος*, *intelligibilem et incorpoream*, vocat ⁸⁾; Eusebius Caes. († 340), qui Angelos esse ait *incorporeas quasdam et intelligentes, ac divinas virtutes, Angelos et Archangelos, materiae expertes, et ab omni parte puros omnino spiritus* ⁹⁾; Epiphanius († 403.) ¹⁰⁾; J. Chrysostomus († 407.) ¹¹⁾; Cyrillus Alex. († 444.) ¹²⁾; Theodoretus († c. 457.), qui asserentes, Angelos foeminarum commercio pollutos esse, refutans ex eo argumentatur, quod corporis expertes substantiae, carnes non habeant, et manna panem Angelorum vocari ideo, quod ea vescantur Angeli, negat, siquidem *incorporea natura cibo non eget* ¹³⁾; Procopius († o. 536), qui in-

¹⁾ *Epist. ad Trallian. n. 9.* Cotelier. *PP. apost.* Amstel. 1724. V. 2. p. 64.

²⁾ *Hom. in Theophan.* In *Bibl. max. PP.* Lugd. T. 3. p. 314.

³⁾ *Cont. Manich. l. 1. n. 21.* Galland. *Bibl. PP.* T. 5. p. 280.

⁴⁾ *De comm. essent. P. F. et Sp. S. n. 51.* Opp. T. 2. p. 27.

⁵⁾ *De Spir. S. l. 1. c. 4—6.* Ib. T. 6. p. 284 s.

⁶⁾ *Adv. Eunom. l. 4. n. 2.* Opp. T. 1. p. 282. *Hom. in Ps. 44. n. 1.* p. 158. *Hom. Quod Deus non est auctor malorum. n. 9.* T. 2. p. 82.

⁷⁾ *Cont. Eunom. l. 12.* Opp. ed. Par. 1638. T. 2. p. 739. *De vit. S. Ephraem. T. 3. p. 601. De Trinit. T. 3. p. 12. Or. 4. in Or. Dom. T. 1. p. 743. De vit. Moys. T. 1. p. 195.*

⁸⁾ *Or. 34.* Opp. T. 1. c. 478. *Or. 37. c. 533. Or. 42. c. 603. A. Carm. Jamb. 15. T. 2. c. 169. In laud. virg. c. 35.*

⁹⁾ *Demonstr. Evang. l. 4. c. 1. p. 144. Cf. Praep. Ev. l. 7. c. 15. p. 362 s.*

¹⁰⁾ *Haer. 26. n. 13.* Opp. T. 1. p. 95 s.

¹¹⁾ *Hom. 22. in Gen. n. 2.* Opp. T. 4. p. 195.

¹²⁾ *In Joan. l. 4. c. 2.* Opp. T. 4. p. 351. *Adv. Anthropom. c. 17. T. 6. P. 2. p. 384.*

¹³⁾ *Quaest. 29. in Exod. Opp. T. 1. p. 93. Cf. Quaest. 20. in Gen. Ib. p. 16. q. 36. p. 30.*

telligentes substantias ac penitus incorporeas Angelos adpellat ¹⁾ Dionysius ²⁾ cum Maximo et Pahymera ³⁾; Sozomenus († c. 450.) ⁴⁾; Nilus († c. 450.) ⁵⁾; Joan. Climacus († c. 580.) ⁶⁾; Joan. Philoponus ⁷⁾; Sophronius († c. 636.) ⁸⁾; Joan. Damascenus († c. 754.), secundum quem *Angelus est substantia intelligens, perpetuo motu, nec non arbitrii libertate praedita, corporis expers, Deo serviens, immortalitatem in natura Dei munere consequuta*, quamvis cum Deo comparatus crassus et materialis dicendus sit ⁹⁾; porro Marius Victorinus († c. 367.), qui Angelos incorporea et *αἶλα* vocat ¹⁰⁾; Hilarius († 368.) ¹¹⁾; Hieronymus († c. 420.) ¹²⁾; Tycho-nius Afer († 420.) ¹³⁾; Leo M. († 461.) ¹⁴⁾; Fulgentius († 533.) ¹⁵⁾; Junilius Africanus († c. 570.) ¹⁶⁾; Gregorius M. († 604.) ¹⁷⁾. Graeci hodie Angelos simpliciter τοὺς ἁγ-
μάτων nominant ¹⁸⁾.

Concilium vero Nicaenum II. definit: *Honoramus et salu-
tamus, ac honoranter adoramus, τιμητικῶς προσκυννοῦμεν, — ima-
ginem — sanctorum etiam et incorporeorum Angelorum* ¹⁹⁾; at-
que Conc. Lateran. IV. statuit, Deum ab initio utramque naturam,
spiritualem et mundanam, angelicam videlicet et corpora-

¹⁾ *Comm. ad Gen.* Cf. Petav. l. c. l. 1. c. 3. n. 3. p. 8.

²⁾ *De div. nom.* c. 4. §. 1. Opp. T. 1. p. 551 s. *De coel.* Hier. c. 1. §. 3. c. 2. §. 2. p. 3. 16.

³⁾ *Ad. Dion.* II. cc. p. 599. 643. 12. 25. 33 s.

⁴⁾ *H. E.* l. 3. c. 18. ed. Reading. Aug. Taur. 1747. p. 113.

⁵⁾ *Hom. de Chr. ascens.* Ap. Phot. c. 276.

⁶⁾ *Scal. parad. Gr. 1. Bibl. PP. maz.* Lugd. T. 10. p. 390.

⁷⁾ *De mund. creat.* c. 9. Galland. B. PP. T. 12. p. 481 s.

⁸⁾ Conc. CP. III. a. 680—1. act. 2. Mansi, *Coll. Conc.* T. 11. c. 491.

⁹⁾ *De f. o. l.* 2. c. 3. Opp. T. 1. p. 155. Cf. ss.

¹⁰⁾ *Adv. Av.* l. 4. c. 11. Galland. *Bibl. PP.* T. 8. p. 190.

¹¹⁾ *Tr. in Ps.* 136. n. 5. Opp. T. 1. c. 557.

¹²⁾ *Epist. 124 ad Avil.* n. 3. Opp. T. 1. c. 919. *Ep. 75. ad Theodor.* n. 2. c. 453.

¹³⁾ *De sept. reg. Reg.* 7. Galland. B. PP. T. 8. p. 128. B.

¹⁴⁾ *Epist. 15. ad Turib.* c. 6. Opp. p. 228.

¹⁵⁾ *De fid.* c. 3. n. 28. Opp. p. 513.

¹⁶⁾ *De part. leg. div. l.* 2. c. 2. Galland. B. PP. T. 12. p. 84 s.

¹⁷⁾ *Mor. l.* 2. c. 3. n. 3. Opp. T. 1. c. 39. c. 7. n. 8. c. 41. l. 4. c. 3. n. 8. c. 108. *Dial. l.* 4. c. 29. T. 2. c. 416 s.

¹⁸⁾ Cf. Petav. *De Ang.* l. 1. c. 2—3. *De dogm. theol.* Antv. 1700. T. 3. p. 3. ss.

¹⁹⁾ *Act. 4.* Mansi, *Coll. Conc.* T. 13. c. 131.

lem, et deinde humanam tanquam ex utraque communem condidisse ¹⁾. Quibus quum spiritualis natura corporeae opponatur, atque animae nostrae simplici aequalis ponatur, non obscure significari videtur, Angelos neque esse corpora, neque corporibus implicatos. Attamen negari non potest, neque Concilium Nicaenum neque Lateranense sententiam quoad quaestionem nostram pronuntiare voluisse. Nam Concilium Nicaenum hoc unum tantum definire intendit, Angelos colendos esse, eorumque imagines, cum visibili specie adparuerint, esse habendas, minime autem etiam quidquam de natura Angelorum statuere. Unde quamvis incorporeos Angelos vocaverit: tamen epistolam Joannis Thessalonicensis haud reprobavit, licet in eadem legatur, Angelos esse *subtiles corpore, et aëreos et igneos*, quia ostendit, quod et Angelos oporteat pingi, quoniam *circumscripti sunt, et veluti homines apparuerunt* ²⁾. Et ita quoque Concilium Lateranense non nisi id sibi proposuerat, ut utriusque naturae, tam quae dicitur corporea, quam quae adpellatur spiritualis, Creatorem unum Deum esse, contra recentiores Manichaeos adstrueret. Caetera vero ex recepta per id tempus opinione intexuit ³⁾. Verum nihilo secius post illam Concilii Lateranensis definitionem publicatam altera opinio pedetentim inter Catholicos obsolevit, ita ut, si perpauci excipiantur ⁴⁾, vix sit, qui eam defendat; quum scilicet Concilium, licet consilium praecipuum non habuerit definiendi, Angelos haud corporatos esse, tamen quae desuper protulerit, ex suo tenore praeter omne consilium prolata dici nequeant.

Certum itaque esse videtur, ipsa ratione suffragante, quae ut supra jam monuimus, prout naturam corpoream per se subsistentem videt, ita alteram hominis partem, spiritum pariter per se existere, conjicit, Angelos propria corpora, humanis similia, non habere. Quum tamen Angeli minime ubique sint praesentes

¹⁾ *Cap. 1. De f. C. Ib. T. 22. c. 981—2.*

²⁾ *Act. 5. Ib. T. 13. c. 166.*

³⁾ Cf. Canus, *De loc. theol. l. 5. c. 6. q. 4.* Ven. 1759. p. 136. — Murator, *De ing. moder. l. 1. c. 13.* Aug. Vind. 1779. p. 123 ss. — Barth. Caranza, *Sum. Conc. Annot. ad act. 5. Syn. VII.* — Sixtus Sen. *Bibl. sanct. l. 5. ann. 1. Neap. 1742. T. 2. p. 563.* — Thom. 1. q. 50. a. 1. Opp. T. 20. p. 289 s. q. 51. a. 1. p. 295 s. — Suarez, *De Ang. l. 1. c. 6. n. 9. Comm. in 2. p. D. Thom. Mogunt. 1620. p. 24 s.* — Dom. Bannez, *In 1. q. 51. a. 1. 3. Concl. Schol. Comm. in 1. p. Thom. Duac. 1614. p. 468.*

⁴⁾ Cajetanus, *In Epist. ad Ephes. c. 2.* — Eugubinus, *De peren. philos. c. 26 ss.*

ac immensi, sed in certo aliquo loco existant, licet non circumscriptive, ut ajunt, attamen definitive ¹⁾, et localis praesentia adstricta esse videatur corpori: non videntur aberrare a vero, qui Angelis non proprium quidem et ad eorum naturam necessario pertinens corpus, sed assumptum ac extraneum tribuant, quo ut veste quasi induti locales reddantur ²⁾.

Quod tandem ad existendi modum Angelorum in loco, atque motum eorundem attinet: dumtaxat hoc statui potest, Angeles loco definiri, id est non ubique, sed in certo loco esse, quia tamen sint circumscripti, ita ut instar corporum in illo inexistant; porro eosdem non tantum in loco *οὐρανὸν καὶ ἐρηρυσσά*, *habitudine et virtute*, esse, sed etiam *οὐσία* seu *substantia*, ita tamen, ut non tam loco contineantur, quam potius locum aliquo modo contineant; atque moveri ipsos loco, ita ut non eodem momento simul in pluribus existant, neque ab uno in alterum tendant, quia per interjectum transeant.

§. 6. Numerus atque ordines Angelorum.

Omnes Angeli natura sua, ut mox vidimus, praestantiores sunt hominibus; attamen ideo nequaquam autumandum est, eos omnes prorsus ejusdem esse conditionis, et inter se haud esse nisi numero distinctos. Verum potius quemadmodum ingens datur rerum sensibilium numerus variique earum gradus ac ordines, ita quoque, ut revelatio divina tradit, permagnus est Angelorum coelestium numerus, variaeque sunt eorum classes. Haec quidem certa sunt. Quae autem ulterius quaeri possunt, quot scilicet numero Angeli sint, quanam porro sint Angelorum classes seu ordines, qualesque cujusvis ordinis dotes, divina revelatio haud docet.

Ingentem Angelorum multitudinem esse, addubitari nequit. Christus enim affirmat, si necesse fuerit, *plus quam duodecim legiones Angelorum* impetrare se a Patre posse ³⁾. Paulus memorat *multorum millium Angelorum frequentiam* ⁴⁾. Judas scribit, Dominum Angelorum *millibus* stipatum ad judicium esse venturum ⁵⁾. Et Joannes: *Audiivi vocem Angelorum*

¹⁾ Cf. Luc. 2, 15. 2. Petr. 2, 4. Apoc. 12, 7 ss.

²⁾ Cf. Murator. l. c. Dieringer, *Lehrb. der kath. Dogm.* Mainz, 1847. p. 206.

³⁾ Matth. 26, 53.

⁴⁾ Hebr. 12, 12.

⁵⁾ Jud. 14. 15.

*multorum in circuitu throni, et animalium (naturarum vivarum), et seniarum, et erat numerus eorum μυριάδες μυριάδων, καὶ χιλιάδες χιλιάδων*¹⁾. Quibus verbis innumerabilis multitudo significatur, quam latinus Interpres ita concepit: *Et erat numerus eorum mille millium*; sic enim incertus numerus, et propemodum infinitus exprimitur. In A. T. autem commemorantur *millia Sanctorum*, i. e. Angelorum, qui cum Deo apparuerint²⁾, *carrus Dei decem millibus multiplex, millia lactantium*³⁾, *exercitus coeli*⁴⁾, et Propheta visionem, quae sibi contigerat, describens narrat, *millia millium Domino ministrasse, et decies millicies centena millia ei adstitisse*⁵⁾.

Quibus consentiunt, quae Patres unanimi ore de innumerabili Angelorum numero adstruunt⁶⁾.

Quantus tamen numerus Angelorum sit, tam parum potest definiri, ut ne conjecturae quidem sit locus⁷⁾.

Non minus autem porro certum est, inter hos tam magnae multitudinis Angelos alios aliis esse superiores, eosque certis ordinibus esse attributos. Commemorantur enim in SS. Litteris praeter Angelos, quorum perfrequens sit mentio, Archangeli⁸⁾, Cherubim⁹⁾, Seraphim¹⁰⁾, Throni, Dominationes, Principatus, Potestates, Virtutes¹¹⁾. Hosce

¹⁾ Apoc. 5, 11.

²⁾ Dent. 33, 2. Cf. Gal. 3, 19. Hebr. 2, 2.

³⁾ Ps. 68 (67), 18.

⁴⁾ 2. Par. 18, 18. 3. Reg. 22, 19. Cf. Luc. 2, 13.

⁵⁾ Dan. 7, 10.

⁶⁾ Cf. Dionys. *De coelest. hierarch. c. 14.* Opp. T. 1. p. 167. — Chrysost. *Hom. 2. De incomprehens. n. 34.* Opp. T. 1. p. 467. — Justin. *Apol. I. n. 6.* Opp. p. 47. — Athenag. *Leg. pro Christ. n. 10.* Ib. p. 205. — Cyrill. *Hieros. c. 15. n. 24.* Opp. p. 237. — Thom. Aq. *Sum. 1. q. 59. a. 8.* Opp. T. 20. p. 292 s.

⁷⁾ Alii ex parabola centum ovium existimant, Angelos ita se habere ad homines, ut nonaginta novem ad unum; alii sicut novem ad unum, secundum alteram parabolam drachmarum decem; alii aequali ambos numero esse putant, alii electos ad aeternam felicitatem totidem fore censent, quot Angeli prolapsi sunt; porro Angelorum tertiam partem cecidisse, Apocalypsoos Liber quibusdam videtur ostendere. At haec opinionum diversitas ipsa dumtaxat humanam inscitiam ostendit.

⁸⁾ 1. Thess. 4, 15. Jud. 9.

⁹⁾ Gen. 3, 24. Exod. 25, 18—21. 2. Paral. 3, 7. 10—14. 3. Reg. 6, 23—35. 1. Paral. 28, 18. Ps. 79, 2. 98, 1. Ezech. 10, 1—22.

¹⁰⁾ Is. 6, 2.

¹¹⁾ Cf. Rom. 8, 38. Col. 1, 16. Ephes. 1, 21. 3, 10. 1. Petr. 3, 22.

adeo diversis nominibus insignitos Angelos omnes ejusdem esse conditionis ac dignitatis, nemo probabiliter inferet; alioquin non oportuisset illos diversis nominibus distingui.

Quapropter et SS. Patres unanimiter varios ordines assu-
munt ¹⁾, licet in eo, quot praecise existant, quomodo se exci-
piant, et qua ratione inter se differant, num scilicet omnes ean-
dem specie naturam habeant, ut homines, et eorum diversa di-
gnitas ex personali tantum merito sit repetenda ²⁾, an vero sicut
diversi sunt ordinis, ita et diversae sint speciei, i. e. nativis ani-
mi qualitatibus distincti ³⁾, minime inter se consentiunt ⁴⁾. Et
sane, quae quoad has quaestiones statuuntur, in meris conjectu-
ris plus minus posita sunt. Dionysius, cujus libri sub nomine
Areopagitae saec. V. evulgati sunt, primus novem ordines seu
choros Angelorum posuit, quos in tres hierarchias seu classes di-
stinxit, ita ut essent in

1. hierarchia *Seraphim, Cherubim, Throni*, in
2. hierarchia *Dominationes, Virtutes, Potestates*, et in
3. hierarchia *Principatus, Archangeli, Angeli* ⁵⁾.

Idem postea docuerunt Gregorius M. ⁶⁾, et qui post eum
secuti sunt, paene omnes; tametsi singuli ordines non eodem
loco ab omnibus collocentur.

Quoad quaestionem autem, quid discriminis sit inter singulos
illos ordines, scribit Augustinus: *Esse itaque Sedes, Domi-
nationes, Principatus, Potestates in coelestibus apparatibus, fir-
missime credo, et differre inter se aliquid, indubitata fide teneo.
Sed — quatenam ista sint, et quid inter se differant, nescio* ⁷⁾.
Similia habet Joan. Damascenus de discrimine Angelo-
rum, sive essentiali sive non. *Ac quoad essentiam quidem*, ait,

¹⁾ Cf. Petav. *De Ang.* l. 2. c. 1. *De dogm. theol.* Antv. 1700. T. 3. p. 55 ss.

²⁾ Cf. Origen. *De princ.* l. 1. c. 8. n. 4. Opp. T. 1. p. 75. — Conc. CP. II. a. 553. can. 2. et 14. Mansi. *Coll. Conc.* T. 9. c. 395. 399. — Hieron. *Comm. in Ep. ad Ephes.* c. 1, 21. Opp. T. 7. c. 586 s. *Cont. Ruf.* l. 1. n. 23. T. 2. c. 479 s. *Cont. Jovin.* l. 2. n. 28. T. 2. c. 369.

³⁾ Method. ap. Epiphan. *Haer.* 64. n. 33. Opp. T. 1. p. 556.

⁴⁾ Cf. Petav. l. c. l. 1. c. 14. n. 1—7. T. 3. p. 43—45. l. 3. c. 2—4. p. 59 ss. — Conrad. *Tr. theol. de op. sex. dier. Ang. etc.* Olom. 1761.

⁵⁾ *De coel. hier.* c. 6. Opp. T. 1. c. 75.

⁶⁾ *In Err.* l. 2. hom. 34. n. 7—10. Opp. T. 1. c. 1602.

⁷⁾ *Ad Oros.* c. 11. n. 14. Opp. T. 8. c. 618. Cf. *Enchir.* c. 58. n. 15. T. 6. c. 218.

aequalesne sint inter se, an dispares, compertum non est: solus hoc scit Creator illorum Deus, qui universa explorata novit ¹⁾.

Quoad angelos malos autem id solum constat, esse aliquem qui tanquam dux ac princeps in reliquos daemones ac impios durum et ignominiosum imperium exerceat, et sub quo iidem tanquam suo capite contenti, regnum tenebrarum et iniquitatis constituunt. SS. Litterae enim diserte loquuntur de *principi daemoniorum* ²⁾, qui vocatur quoque *Beelzebub* ³⁾, *princeps hujus mundi* ⁴⁾, *Deus hujus saeculi* ⁵⁾, *draco, serpens antiquus* ⁶⁾, *Belial* ⁷⁾, *diabolus* κατ' ἐξοχήν ⁸⁾, etc. ejusque imperium *imperium mortis* dicitur ⁹⁾, utpote qui mortem generi humano intulit, illudque captivum tenere studet ad suam voluntatem ¹⁰⁾. Verumtamen haec non ita sunt accipienda, ut opinemur, divisum habere Deum cum diabolo imperium, quod impiissimum saperet manichaeismum. Nam sicut Dei verbo omnia condita sunt, ita quoque certum ac inconcussum est, ejus voluntate omnipotenti omnia gubernari, nilque daemonem facere posse, nisi volente aut annuente Deo.

§. 7. Angelorum status originalis.

Secundum divinam revelationem, ut ex hucusque disputatis luculenter patet, dantur Angeli boni atque mali. Quando autem sacra revelatio docet, praeter Angelos bonos, malos quoque seu daemones existere, longe ab errore Manichaeorum et Priscillianistarum, nec non Gnosticorum quorundam abest, ut tradat, daemones natura sua malos esse, sed potius sententiam oppositam, Angelos videlicet omnes bonos creatos esse, exhibet, ab illa opinione falsa prorsus abhorrens. Etenim

A. quod ad SS. Litteras attinet: hae

¹⁾ *De orth. fid. l. 2. c. 3. Opp. T. 1. p. 157. Cf. Dionys. D. coel. hier. c. 6. §. 1. T. 1. p. 74.*

²⁾ *Matth. 12, 24.*

³⁾ *Matth. 12, 24. 10, 25. Luc. 11, 15. 18.*

⁴⁾ *Jean. 12, 31. 14, 30. 16, 11.*

⁵⁾ *2. Cor. 4, 4.*

⁶⁾ *Apoc. 12, 9. 20, 2.*

⁷⁾ *Deut. 13, 13. 2. Cor. 6, 15.*

⁸⁾ *Matth. 25, 41. — Job. 1, 7. 2, 1 ss. etc.*

⁹⁾ *Hebr. 2, 14.*

¹⁰⁾ *2. Tim. 2, 26.*

a. diserte tradunt, opera Domini *cuncta valde bona*, seu perfecta esse ¹⁾, ita ut Deus prorsus nullo modo auctor mali dici possit; atque

b. expresse declarant, malos daemones esse Angelos illos, qui in veritate non steterint ²⁾, sed peccaverint ³⁾, non servaverint suum principatum, sed dereliquerint suum domicilium, et ideo aeternas poenas luant ⁴⁾.

B. Idem porro tradunt SS. Patres ad unum omnes, Manichaeos et Priscillianistas impugnantes ⁵⁾. Accedunt Concilia, ut Carthaginense IV. a. 398. ⁶⁾, Bracaraense a. 563. ⁷⁾, et Lateranense IV. a. 1215. quod quum error Manichaeorum iterum instauraretur, definivit: *Diabolus et daemones alii, a Deo quidem natura creati sunt boni, sed ipsi per se facti sunt mali*. Et propositionem: *Diabolus non fuit bonus*, atro stigmate notavit ⁸⁾.

C. Nec non ipsa ratio ex infinita Dei sanctitate, sapientia ac bonitate id ipsum necessario colligit. Nam Deus tanquam sanctissimus ac benignissimus naturam intelligentem nonnisi ob finem sanctitatis et huic congruae felicitatis condere potest, et tanquam sapientissimus ad hunc finem aptam instruere debet. Malum morale naturae divinae absolute repugnat, ac solummodo per

¹⁾ Gen. 1, 31. f. Leo M. *Epist. 16, ad Turibud.* c. 6. Opp. p. 235.

²⁾ Joan. 8, 44.

³⁾ 2. Petr. 2, 4.

⁴⁾ Jud. 6. Cf. Job. 4, 18.

⁵⁾ Tatian. *Cont. Graec.* n. 7. Opp. Justin. p. 261. — Athenag. *Leg. pro Christ.* n. 24. Ib. p. 322 s. — Iren. *Cont. haer.* l. 5. c. 24. n. 4. p. 332. l. 4. c. 41. n. 2. p. 288. — Origen. *De princ.* l. 1. praef. n. 6. Opp. T. 1. p. 48. — Dion. *De div. nom.* c. 4. §. 23. Opp. T. 1. p. 579. — Athanas. *De Syn.* n. 48. Opp. T. 1. P. 2. p. 762. — Euseb. *Dem. Ev.* l. 4. c. 9. p. 159. *Praep. Ev.* l. 7. c. 16. p. 328 s. — Basil. *Hom. Quod Deus non est auct. mal.* n. 8. Opp. T. 2. p. 80. — Didym. *C. Manich.* n. 13. Galland. *Bibl. PP.* T. 6. 315. s. — Epiph. *H.* 64. n. 21. Opp. T. 1. p. 544. — Theod. *in Ex.* 28, 15—18. Opp. T. 2. p. 454. — Tertull. *Adv. Marc.* l. 2. c. 10. Opp. V. 2. p. 190. — Lactant. *l.* 2. c. 9. Opp. T. 1. p. 193 s. — Aug. *Act. c. Felic. Manich.* l. 2. c. 11. Opp. T. 8. c. 493. *C. Donat.* l. 4. c. 9. n. 13. T. 9. c. 129. *Gen. litt.* l. 11. c. 21. n. 28. T. 3. P. 1. c. 284 s. — Caesar. *Dial. & 1. interr.* 49. In Galland. *Bibl. PP.* T. 6. p. 33. — Fulgent. *De f. ad. Petr.* c. 21. n. 62. Opp. p. 524. — Cassian. *Coll.* 8. c. 6. 8. Opp. p. 471. 473 s. — J. Dam. *De fid. orth.* l. 2. c. 4. Opp. T. 1. p. 158 s.

⁶⁾ C. 1. Mansi, *Coll. Conc.* T. 3. c. 950.

⁷⁾ Can. 7. Ib. T. 9. c. 775.

⁸⁾ C. 1. de f. *Cath.* Ib. T. 22. c. 981—2.

abusum libertatis entis finiti ortum habere potest; et hinc omnis res creata per se, seu ex natura sua bona ait necesse est.

§. 8. Continuatio.

Verumtamen non tantum a peccato et perversitate immunes e manu Dei Angeli prodierunt, sed insuper donis supernaturalibus, et speciatim gratia sanctificante, qua erant habitualiter sancti ac justī, Deoque conjuncti, condecorati sunt. Quod non tantum jam inde haud improbabili ratione conjicitur, quod hominem primum in sanctitate ac justitia constitutum conspiciamus; non poterat enim deterior horum esse conditio, quam generis humani, cujus sator gratia et charitate erat donatus; sed et in SS. Litteris sat clare significatur. Nam Christus Dominus de diabolo loquens, ait: *Et in veritate non stetit: quia non est veritas in eo* ¹⁾. Docet itaque Christus diabolum, antequam peccasset, *in veritate*, i. e. rectitudine constitutum fuisse; nam quemadmodum *ψῆδος* perversitatem, ita et *ἀλήθεια* rectitudinem seu justitiam generatim indicat. Rectitudo autem illa, qua Angeli non inter bonum et malum indifferentes relinquerentur, sed positive ad summum Bonum essent conversi, quum ejusmodi conditio per naturam spiritus finiti, etiam nobilioris, haud exigatur, opus dumtaxat gratiae supernaturalis esse potuit. Atque id ipsum tradit Apostolus scribens: *Qui non servaverunt suum principatum, sed dereliquerunt suum domicilium*. Nam verbis his manifeste non sola immunitas a peccato, sed positiva bonitas exprimitur, quae Angelis non tantum obtigit, sed qua etiam exuti sunt ²⁾.

Eadem est SS. Patrum quoque doctrina. Sic ait Augustinus: *Qui eos (Angelos) cum bona voluntate, id est, cum amore casto, quo illi adhaerent, creavit, simul in eis et condens naturam, et largiens gratiam* ³⁾. Similia habent Gregorius Naz. ⁴⁾, Basiliius ⁵⁾, Cyrillus Alex. ⁶⁾, Theodoretus ⁷⁾, Titus Bostrensis ⁸⁾, Joan. Damascenus ⁹⁾,

¹⁾ Joan. 8, 44.

²⁾ Jud. 6.

³⁾ De civ. D. l. 12. c. 9. n. 2. Opp. T. 7. c. 308.

⁴⁾ Or. 38. Opp. T. 1. c. 547. D.

⁵⁾ De Sp. S. c. 16. n. 38. T. 3. p. 33.

⁶⁾ Dial. 6. de Trinit. Opp. T. 5. P. 1. p. 595. l. 2. in Joan. c. 5. T. 4. p. 186.

⁷⁾ Quaest. 34. 36. in Gen. Opp. T. 1. p. 30. H. F. l. 5. c. 8. T. 4. p. 268 sa.

⁸⁾ Cont. Manich. l. 1. n. 35. Galland. B. PP. T. 5. p. 292.

⁹⁾ De orth. fid. l. 2. c. 2. Opp. T. 1. p. 156.

Hieronymus ¹⁾, Gregorius M. ²⁾, Ambrosius ³⁾. Patrum antiquorum itaque nonnisi *sensa* exprimit Catechismus Rom., qui habet: *Unde sine bona voluntate, hoc est Dei amore nunquam sanctos Angelos fuisse credendum est* ⁴⁾.

Suffultos praeterea Angelos fuisse gratiae actualis adjutorio, docet imprimis Augustinus ⁵⁾, licet in auxilio hoc divino explicando Theologi inter se dissideant.

Ratio autem sententiam utramque, tam de gratia sanctificante, quam de gratia actuali, Angelis creatis concessa, eo lubentius admittit, quoniam intelligit, Angelos, utpote spiritus finitos, ad efficaciam spiritualem, perfectam Dei cognitionem ac dilectionem, seu sapientiam atque sanctitatem, quae virtutes iis in SS. Litteris diserte tribuuntur ⁶⁾, sine externa Dei in ipsos efficientia, seu revelatione ipsis facta, evehi prorsus non potuisse, atque hinc etiam illos viribus supernaturalibus gratiae internae, quibus hanc apprehenderent, participes esse debuisse. Quin imo non sine veri specie conjicitur, Angelos pro naturae conditionisque suae dignitate uberiorem gratiam accepisse, ut docent Cyrillus Alex. ⁷⁾ et Ambrosius ⁸⁾, nec non ipsos inter se alios aliis affluentiori gratia dignatos esse, pro eo, ac naturae praestantioris erant, ut habent Magister Sententiarum ⁹⁾, et Doctor Angelicus ¹⁰⁾. Uti enim Angelorum natura ad gratiam et gloriam a Deo facta est, ita et diversi naturae angelicae gradus ad diversos itidem ordinati sunt gratiae gloriaeque gradus.

Qualiscunque autem fuerit illa Angelorum interna sanctificatio atque externa illustratio: talis tamen ac tanta minime erat, ut ipsi labi prorsus non possent; hanc enim summam perfectionis plenitudinem Angeli tanquam praemium probatae virtutis primum accpturi erant; atque naturâ solus Deus est bonus et indefectibilis ¹¹⁾.

¹⁾ In Os. 3, 1. Opp. T. 6. c. 29. Cf. In Eccles. c. 2. T. 3. c. 396.

²⁾ Mor. l. 34. c. 20. n. 40. Opp. T. 1. c. 1134.

³⁾ De Spir. S. l. 1. c. 7. n. 84. Opp. T. 2. c. 618. Cf. S. Thom. 1. q. 62. a. 3. Opp. T. 20. p. 342 s.

⁴⁾ Ed. Vien. 1833. p. 23.

⁵⁾ De civ. D. l. 12. c. 9. T. 7. c. 307 s. De corr. et gr. c. 11. n. 32. T. 10. c. 768.

⁶⁾ Matth. 18, 10. 2. Reg. 14, 20. Ps. 102, 20.

⁷⁾ In Joan. l. 2. c. 5. (4, 22.) Opp. T. 4. p. 186.

⁸⁾ Enarr. in Ps. 34. n. 21. T. 1. c. 824.

⁹⁾ 2. d. 3. n. 2. Par. 1563. f. 124 s.

¹⁰⁾ 1. q. 62. a. 6. Opp. T. 20. p. 345.

¹¹⁾ Cf. Job. 4, 18. — Augustin. De civ. D. l. 22. c. 1. n. 2. T. 7.

Observ. Dum Christus ait, diabolum *ab initio fuisse homicidam* ¹⁾, et Apostolus, eum *ab initio peccare*: solummodo verbis his indicatur, diabolum ab illo momento, quo a Deo aversus, non autem quo creatus est, peccato oblectari, quod in ejus naturam quasi per primam a Deo abalienationem abiit, et in peccatum genus humanum inducere studere. — *Spiritus* autem, qui a Siracide dicuntur *ad vindictam creati* ²⁾, aut designant ventos ac spiritus procellarum, quos Deus immittit ad puniendos impios, aut verbum: *creati sunt*, pro: *destinati seu ordinati sunt*, accipiendum est, quo sensu saepius in SS. Litteris occurrit ³⁾.

§. 9. Finis Angelorum.

Quem in finem Deus Angelos creaverit, ex dotibus eorumdem naturalibus ac supernaturalibus expositis dubium esse nequit. Non possunt enim Angeli intellectu et libero arbitrio esse instructi, atque gratia divina donati, quae illos rectos et justos habitu ac dispositione efficiebat, atque insuper illustrabat et in bono adjuvabat, nisi ut Deum cognoscerent, eumque tanquam summum Bonum revererentur ac diligerent, donec decreto ipsi perpetuo inhaerendi, a quo creati sunt, *mutabilitatem*, ut ait Gregorius M., *in sanctitate ac justitia standi immutabilitate vincerent* ⁴⁾, et felicitate perenni se dignos efficerent, aut vero se a Deo avellerent, et perpetuae dissensioni atque miseriae dederent. Quapropter et Deus Angelis, ut hominibus, tempus probationis assignavit.

Jam plurimi inter Angelos probati sunt, et hi Angeli boni sunt, quorum conditio est felicissima; multi autem e contrario per peccatum a Deo avulsi sunt, Angeli mali, quorum status est misserrimus.

§. 10. Peccatum multorum Angelorum.

Angelos multos peccasse, diserta est

A. SS. Litterarum doctrina. Id enim docet apertis verbis Petrus, qui scribit: *Si enim Deus Angelis peccantibus non*

c. 655. — Basil. *De Spir. S. c. 16. T. 3. p. 32.* — Gregor. Naz. *Or. 38. T. 1. c. 547.* — Joan. Damasc. *De orth. fid. l. 2. c. 3. T. 1. p. 157.* — Hieronym. *Epist. l. 21. ad Damas. n. 40. Opp. T. 1. c. 16.* Fulgent. *De fid. ad Petr. c. 23. n. 64. Opp. p. 526.* — Gregor. M. *l. 5. c. 38. n. 68. T. 1. c. 170. et al.*

¹⁾ Joan. 8, 44.

²⁾ 1. Joan. 3, 8.

³⁾ Eccli. 39, 33.

⁴⁾ Mor. l. 25. c. 6. n. 11. T. 1. c. 791.

pepercit, sed ruentibus inferni detractis in tartara tradidit cruciandos, in iudicium reservari, (ἀλλὰ σαρὰς ζῶπον καταρπίσας ἀπέβαλεν εἰς ἅγιον ὑπομένους), vinculis caliginis in tartarum detritos tradidit servandos ad iudicium, quo eorum nequitia coram toto mūdo traducetur: eo minus effigere poterunt Dei iudicium, qui pravorum dogmatum auctores sunt ac magistri ¹⁾. Quo in loco duo insunt, Angelos aliquos peccasse, atque eos pro peccato commisso poenas luere; unde Apostolus infert, falsos doctores pariter habere, quem timeant iudicem. Idem prorsus tradit quoque Judas, qui ait: *Angelos vero, qui non servaverunt, principatum* (suam dignitatem, seu priorem conditionem), *sed dereliquerunt suum domicilium* (sedem ipsis assignatam, coelestem), *in iudicium magni diei vinculis aeternis sub caligine reservavit* ²⁾. Sensus est: Dominus Jesus Angelos desertores, e coelo praecipitados, in locum caliginosum, seu infernum detrussit, in quo velut quibusdam vinculis, iisque perpetuis, traditos et adstrictos servavit, ac servat, dum sibi ad iudicium illud universale exhibeantur, coram toto mundo suae damnationis sententiam accepturi. Quod ergo Petrus simpliciter effert, Angelos quosdam peccasse, id ipsum Judas verbis: *non servaverunt suum principatum, sed dereliquerunt suum domicilium*, enuntiat, atque poenam, quam ideo dant, aeternum esse duraturam, ut ille, affirmat.

B. Hanc doctrinam, Angelos scilicet quosdam peccasse, Patres uno ore tradunt, contra Gnosticos et Manichaeos adstruentes, omnes Angelos, etiam daemones, a Deo creatos esse bonos, attamen hosce peccando factos esse malos ³⁾.

C. Ea quoque semper fuit fides Ecclesiae, solenni definitione enuntiata in Conc. Lateranensi IV., quod statuit: *Diabolus et daemones alii a Deo quidem naturā creati sunt boni, sed ipsi per se facti sunt mali* ⁴⁾.

D. Ast ipsa ratio idem necessario intelligit, malos Angelos, quorum existentiam revelatio modo indubitato tradit, solummodo peccando atque libertate sua abutendo ortos esse posse; quum Deus pro infinita sua sanctitate ac benignitate, ut supra jam ostendimus, naturas per se malas condere minime possit.

Observ. Quodnam nominatim fuerit peccatum ab Angelis perpetratum, Patres non consentiunt. Quidam enim, qui corpora Ango-

¹⁾ 2. Petr. 2, 4.

²⁾ Jud. 6.

³⁾ Cf. §. 4. p. 439.

⁴⁾ C. De f. C. Mansi, Coll. Conc. T. 22. c. 981—2.

Ne assignarunt, censuere, Angelos, saltem illos, qui mundo administrando praeficerentur, cum mulieribus fuisse commixtos; provocantes ad verba Genesios: *Videntes filii Dei filias hominum, quod essent pulchrae, acceperunt sibi uxores ex omnibus, quas elegerant* ¹⁾. Quae tamen perperam intelliguntur de Angelis; quum hic loci potius nomine filiorum Dei veniant Sethitae, a Deo dilecti, in oppositione Caini progeniei, vel homines statura proceri, simili sensu, quo in SS. Litteris occurrunt *cedri, montes Dei*, i. e. excelatissimi. Sic sensit Justinus ²⁾, Athenagoras ³⁾, Clemens Alex. ⁴⁾, Tertullianus ⁵⁾, Lactantius ⁶⁾, Minucius Felix ⁷⁾, Methodius ⁸⁾, Ambrosius ⁹⁾. Alii tamen illam opinionem impugnant, ut Chrysostomus ¹⁰⁾, Basilii Seleuc. ¹¹⁾, Cassianus ¹²⁾, Cyrillus Alex. ¹³⁾; Philastrius autem non veretur plane eam inter haereses referre ¹⁴⁾. Et sane quomodo Angeli potuissent delectari rebus veneris, earumque usu, quum corpore humano destituantur; quomodo cum filiabus hominum e posteris Adae commisceri, quos ante peccatum Adami lapsos esse constat. Alii ex verbis S. Scripturae: *Invidia autem diaboli mors introivit in orbem terrarum*, conjiciunt, diaboli peccatum fuisse invidiam, ut Gregorius Nyss. ¹⁵⁾, Irenaeus ¹⁶⁾, Methodius ¹⁷⁾, Anastasius Sin. ¹⁸⁾, Tertullia-

¹⁾ Gen. 6, 2.

²⁾ *Apol. II. n. 5. Opp. p. 95.*

³⁾ *Legat. pro Christ. n. 24. Ib. p. 322 s.*

⁴⁾ *Strom. I. 3. c. 7. Opp. T. 1. p. 535. I. 5. c. 1. T. 2. p. 650. Paedag. I. 3. c. 2. T. 1. p. 260.*

⁵⁾ *De idolol. n. 9. Opp. V. 1. p. 160. De cult. foem. I. 1. n. 2. p. 233. Cont. Marc. I. 5. n. 18. V. 2. p. 397. etc.*

⁶⁾ *Div. inst. I. 2. c. 15. Opp. T. 1. p. 174.*

⁷⁾ *Octav. c. 27. Galland. B. PP. T. 2. p. 396.*

⁸⁾ *Orat. de resurr. In Galland. Bibl. PP. T. 3. p. 783.*

⁹⁾ *De Noë, et arc. c. 4. n. 8. Opp. T. 1. c. 230. De virg. I. 1. c. 8. n. 53. T. 2. c. 159.*

¹⁰⁾ *Hem. 22. in Gen. n. 2. Opp. T. 4. p. 195 s.*

¹¹⁾ *Or. 6. Bibl. m. PP. Lugd. T. 8. p. 436.*

¹²⁾ *Coll. 8. c. 21. Opp. p. 488 s.*

¹³⁾ *Glaphyr. I. 2. Opp. T. 1. P. 2. p. 28 ss. Adv. Anthrop. c. 17. T. 6. p. 384.*

¹⁴⁾ *De haeres. c. 80. Galland. B. PP. T. 7. p. 509 s.*

¹⁵⁾ *Cat. c. 6. Opp. Par. 1638. T. 3. p. 55 s.*

¹⁶⁾ *Cont. haer. I. 4. c. 40. n. 3. p. 287. I. 3. c. 23. n. 8. p. 222. etc.*

¹⁷⁾ *Ap. Epiph. Haer. 64. n. 21. T. 1. p. 544.*

¹⁸⁾ *In óðγγῶ c. 4. B. PP. mas. Lugd. T. 9. p. 820.*

nus ¹⁾, Cyprianus ²⁾, Lactantius ³⁾. Attamen in loco laudato aperte non de peccato diaboli, quo originalem dignitatem amisit, quam potius de peccato, quo jam perversus existens, protoparentes seduxit, sermo est. — Unde alii, et quidem, ut videtur, rectius superbiam peccatum illud fuisse censent, quum superbia non tantum *initium omnis peccati* declaretur ⁴⁾, sed et Apostolus Timotheum admoneat, ne neophytum ad munus episcopale promoveat, *ne scilicet in superbiam elatus, in iudicium incidat diaboli* ⁵⁾. Quibus verbis non obscure significatur, diabolum poenam superbiae luere. Hanc sententiam tenent Athanasius ⁶⁾, Eusebius ⁷⁾, Theodoretus ⁸⁾, Cyrillus Alex. ⁹⁾, Chrysostomus ¹⁰⁾, Gregorius Naz. ¹¹⁾, Joan. Damascenus ¹²⁾, Ambrosius ¹³⁾, Hieronymus ¹⁴⁾, Augustinus ¹⁵⁾, Fulgentius ¹⁶⁾, Gregorius M. ¹⁷⁾ et omnes fere reliqui ¹⁸⁾.

In quo autem superbia constiterit, revelatio silet, nisi forsan eo, quod diabolus a Christo Domino adorationem petierit, indicetur, eum se pro Numine habuisse, et propterea ab aliis naturis haberi voluisse ¹⁹⁾.

¹⁾ *De patient.* n. 5. Opp. V. 1. p. 220.

²⁾ *De zelo et livor.* n. 4. Opp. V. 2. p. 167.

³⁾ *D. inst.* l. 2. c. 9. Opp. T. 1. p. 144. Cf. Justin. *D. c. Tryph.* n. 124. Opp. p. 229. August. *De bapt. cont. Don.* c. 8. n. 11. Opp. T. 9. c. 127. *Cont. litt. Petil.* l. 2. c. 81. n. 180. c. 267.

⁴⁾ Eccli. 10, 15. Cf. Tob. 4, 14.

⁵⁾ 1. Tim. 3, 6. Cf. Matth. 4, 9. Ezech. 28, 2 ss.

⁶⁾ *De virginit.* n. 5. Opp. T. 2. p. 113.

⁷⁾ *De praep. Evang.* l. 7. c. 16. p. 329.

⁸⁾ *Graec. aff. cur. Serm.* 3. Opp. T. 4. p. 525.

⁹⁾ *Comm. ad Is.* l. 2. Opp. T. 2. p. 235. et al.

¹⁰⁾ *Hom.* 1. in 2. ep. ad Thess. n. 1. Opp. T. 11. p. 512.

¹¹⁾ *Or.* 38. in Christ. nativ. Opp. T. 1. c. 547. D. *Or.* 42. in Pasch. 2. c. 603. B. *Carm.* 6. *Arian.* T. 2. c. 146. et al.

¹²⁾ *De orth. fid.* l. 2. c. 30. Opp. T. 1. p. 201.

¹³⁾ In Ps. 118. *Serm.* 3. n. 34. *Serm.* 7. n. 8. Opp. T. 2. c. 1005. 1046.

¹⁴⁾ In Ezech. l. 16, 48. 49. 28, ss. Opp. T. 5. c. 181. 336.

¹⁵⁾ *De civ. D. c.* 12. c. 6. Opp. T. 7. c. 304. l. 22. c. 1. n. 2. c. 655. *De Gen. ad litt.* l. 11. c. 13. n. 17 ss. T. 3. P. 1. c. 281. a. et al. pass.

¹⁶⁾ *Ad Momin.* l. 1. c. 17. Opp. p. 14.

¹⁷⁾ *Moral.* l. 29. c. 8. n. 18. Opp. T. 1. c. 925. l. 4. c. 3. n. 8. c. 108. c. 9. n. 15. c. 110. l. 28. c. 2. n. 11. c. 897. *Pastoral.* p. 3. c. 17. T. 2. c. 59. *Dial.* l. 3. c. 14. c. 308.

¹⁸⁾ Cf. Petav. *De Angel.* l. 3. c. 2. *De dogm. theol.* Antv. 1700. T. 3. p. 90 s.

¹⁹⁾ Cf. Bonavent. *Brevil.* c. 7. Tub. 1845. p. 64.

Porro etiam illud ignoratur, quamdiu Angeli illi in originali bonitate steterint, et quando sit peccatum perpetratum. Id solum certum est, diabolum peccasse antequam peccaret Adamus, quoniam ad hujus peccatum concurrit ¹⁾).

Observ. 2. Quum in SS. Litteris de principe daemoniorum seu diabolo κατ' ἐξοχήν sermo fiat ²⁾): Patres communiter tradunt, hunc primum peccatum commisisse, et quodammodo antesignanum seditio- nis reliquorum exstitisse. Porro plures eorundem, diabolum princi- palem locum inter Angelos tenuisse, statuunt, idque ex variis simili- tudinibus S. Scripturae ³⁾ colligi posse autumant ⁴⁾. Alii tamen aliter sentiunt ⁵⁾. Utrum reliqui daemones post primum, ab hoc allekti, an vero sponte sua ejus peccatum suum fecerint, pariter definiri non potest. Hoc tamen certum est, peccatum non propter necessitudi- nem naturae ab uno in omnes alios transiisse, sed per liberam illius imitationem hos in peccatum atque perditionem incidisse.

Observ. 4. Diabolus cum angelis suis nec non omnibus per- versis, qui eum peccando sequuntur, regnum constituit tenebrarum ac peccati, summaeque miseriae, regno divino per omnia adversum; seu ut scribit S. Gregorius M.: *Sicut autem isdem Redemptor noster una persona est cum congregatione bonorum; ipse nam- que caput est corporis: ita antiquus hostis una persona est cum cuncta collectione reproborum; quia ipse eis ad iniquitatem quasi caput praeceminet, illi autem dum ad persuasa deserviunt, velut subjunctum capiti corpus inhaerent* ⁶⁾).

Observ. 5. Quum Deum nec Angelis peccantibus pepercisse legamus: lapsum Angelorum serio meditemur et contremiscamus, simulque fugiamus peccatum, imprimis vero peccatum superbiae,

¹⁾ Cf. Petav. l. c. 3. n. 11—17. p. 95 ss.

²⁾ Matth. 12, 24 ss. 25, 41. Apoc. 12, 7 ss.

³⁾ Cf. Is. 14, 12 ss. Ezech. 28, 12 ss. Job. 40, 14.

⁴⁾ Cf. Cyrilli Hieros. Cat. 2. n. 4. Opp. p. 23 s. — Tertull. Cont. Marc. l. 2. n. 10. Opp. V. 2. p. 189. — Lactant. D. inst. l. 2. c. 9. Opp. T. 1. p. 142 ss. — Gregor. M. Moral. l. 32. c. 23. n. 4. Opp. T. 1. c. 1072 s. Isidor. Sent. l. 1. c. 12. Opp. p. 417. Et al. Cf. Petav. l. c. n. 2. p. 93 s.

⁵⁾ Cf. J. Damasc. De o. f. l. 2. c. 4. Opp. T. 1. p. 158. — Gregor. Nyss. Cat. c. 6. Opp. T. 3. p. 55. — Athen. Leg. p. Christ. n. 25. Opp. — Justin. p. 323. — Maxim. Ad c. 11. de coel. Hierarch. Opp. Dion. T. 1. p. 157. — Augustin. Gen. ad litt. l. 11. c. 19. n. 25—26. Opp. T. 3. P. 1. c. 293 s. — Cassian. Coll. 8. c. 8. Opp. p. 474. Et al. Cf. Petav. l. c. n. 5—6. p. 94.

⁶⁾ Moral. l. 4. c. 11. n. 18. Opp. T. 1. c. 12.

quia Deus superbis resistit, humilibus autem dat gratiam ¹⁾). Quo respectu pulchre ait Paulinus: *Humilitas homines sanctis Angelis similes facit, et superbia ex Angelis daemones fecit. — Superbia est omnium peccatorum initium et finis et causa; quia non solum peccatum est ipsa superbia, sed etiam nullum peccatum potuit, aut potest, aut poterit esse sine superbia* ²⁾).

§. 11. Conditio Angelorum bonorum.

Conditio Angelorum, qui probati sunt, est beatissima. Nam decreto voluntatis haud revocando, perpetuo sese Deo, summo Bono, uniendi effecti, quod fieri debebant, statum absolutae perseverantiae in bono consecuti sunt, ita ut labi non possint amplius ³⁾). Qui enim tali modo probatus est, hunc Deus novae iterum probationi subicere non potest, et sic continuo salutem ejus periculo exponere. Hinc bona Angelorum voluntas in naturam eorum abiit, et ipsi perfectionibus plenitudinem nacti, tentationibus amplius nullis expositi, peccare haud possunt ⁴⁾). Etenim visione Dei, quam intuitivam adpellant; dignati ⁵⁾, summa cognitione perfectionum divinarum pollent, et summo ideo amore in Deum, summum Bonum, accensi, non possunt non eum quam maxime diligere, a quo se iterum dilectos sciunt, atque sic ex hac perfectissima cognitione atque Dei dilectione summam beatitudinem percipere, et per hanc iterum in illa confirmari ac corroborari. Quapropter secundum SS. Litteras unice cognitione decretorum divinatorum delectantur ⁶⁾, et continua Dei celebratione ⁷⁾ atque laeta voluntatis divinae executione occupantur ⁸⁾, in aeterna perseverantia firmati atque quibuscunque periculis et miseriis divina potestate exempti, tanta beatitudinis plenitudine fruenter, qua illis certissimum est, se in illa aeternum esse mansuros ⁹⁾.

¹⁾ Petr. 1. 5, 5.

²⁾ *De salut. docum.* Opp. August. T. 6. Append. c. 196.

³⁾ Cf. Gregor. M. *Mor.* 1, 25. c. 6. n. 11. Opp. T. 1. c. 791.

⁴⁾ Cf. Augustinus, *De corrept. et grat.* c. 10. n. 27. Opp. T. 10. c. 764 a. — Joan. Damascen. *De orth. fid.* 1. 2. c. 3. Opp. T. 1. p. 157.

⁵⁾ Matth. 18, 20. Cf. Augustin. *De civ. D.* 1. 11. c. 29. T. 7. c. 295. 1. 9. c. 22. c. 234 a.

⁶⁾ 1. Petr. 1, 12. Ephes. 3, 10.

⁷⁾ Cf. Joan. 6, 3. Luc. 2, 13. 14. Apoc. 7, 11. 12. Dan. 7, 10.

⁸⁾ Matth. 6, 10, 15, 7. 10. Ps. 102, 21.

⁹⁾ Cf. Augustin. *De civ. Dei.* 1. 22. c. 1. T. 7. c. 655 a. — Fulgent. *De fid. ad Petr.* 1. 3. n. 28. 31. Opp. p. 514 a. — Isidor. *Sent.* 1.

§. 12. Relatio Angelorum honorum ad genus humanum.

Quamvis Angeli boni inter invicem unam familiam constituent: tamen simul non tantum universi generatim, sed et regni moralis seu regni divini speciatim pars sunt ¹⁾. Eapropter inter Angelos atque homines necessitudo intercedat, illique ad nostram salutem promovendam concurrant necesse est. Ad finem enim communem omnes res creatae unitis viribus tendere debent; atque homo, ex utroque mundo compositus, qui quoad vitam suam corporalem tam vario ac multiplici modo a mundo corporali pendet, non potest quoad vitam spiritualem cum mundo spirituali non esse conjunctus.

Id ipsum autem est, quod nobis de Angelis divina tradit revelatio. Etenim

A. SS. Litterae diserte docent, Angelos curam salutis nostrae sustinere, pro nobis apud Deum intercedere, atque ideo etiam a Deo tanquam instrumenta providentiae suae sapientissimae ad salutem hominum modo extraordinario promovendam adhiberi. Prius edisserunt verba Apostoli: *Nonne omnes (Angeli) sunt administratorii spiritus, in ministerium missi propter eos, qui haereditatem capient salutis* ²⁾? Angelos pro hominibus intercedere, docet auctor libri Tobiae, qui haec a Raphaële Tobiae dicta refert: *Quando orabas cum lacrymis, et sepellebas mortuos, et dereliquebas prandium tuum, et mortuos abscondebas per diem in domo tua, et nocte sepeliebas eos, ego obtuli orationem tuam Domino* ³⁾. Porro Zacharias, qui inducit Angelum sic orantem: *Domino exercituum, usquequo tu non misereberis Jerusalem, et urbium Juda, quibus iratus es? Iste jam septuagesimus annus est* ⁴⁾. Nec non Joannes, qui scribit: *Et vidi septem Angelos stantes in conspectu Dei. — Et alius Angelus venit, et stetit ante altare, habens thuribulum aureum, et data sunt illi incensa multa, ut da-*

1. c. 12. Opp. p. 418. — Maxim. Ad. c. 13. §. 4. Dionys. De coel. Hier. Opp. Dionys. T. 1. p. 178. — Anselm. De cas. diab. c. 24. Opp. p. 72. c. 2.

¹⁾ Cf. Hebr. 12, 22.

²⁾ Hebr. 1, 14.

³⁾ Tob. 12, 12.

⁴⁾ Zach. 1, 12.

ret de orationibus sanctorum omnium super altare aureum, quod est ante thronum Dei. Et ascendit fumus incensorum de manu Angelis coram Deo ¹⁾. Praecipue autem saepius in S. Scriptura narratur, quomodo Deus Angelis executoribus voluntatis suae extraordinariis usus sit. Angelos enim juxta eandem jam in educandis primis parentibus occupatos deprehendimus ²⁾. Angeli adparent Abrahamo, aliisque illo tempore, quo prima quasi futuri regni Messiani jacta sunt fundamenta ³⁾. Ministrantibus Angelis data est Lex populo Israëlitico ⁴⁾. Tempore Prophetarum Angeli saepius praesto sunt, divinam voluntatem annuntiant, atque futura aperiunt ⁵⁾. Quum autem adveniret plenitudo temporis Angeli adventum Salvatoris, ejus conceptionem ac nativitatem annuntiant ⁶⁾, hanc divinis laudibus celebrant ⁷⁾, ipsi ministrant ⁸⁾, in agonia constituto assistunt ⁹⁾, in ejus resurrectione ¹⁰⁾ atque in coelum ascensione ¹¹⁾ spectandos se praebent, Apostolos in propaganda fide Christiana adjuvant ¹²⁾, et tandem aliquando cum Christo Domino ad extremum judicium adparituri sunt ¹³⁾, qui enim testes ac socii vitae nostrae erant, testes ac socii gloriae quoque nostrae sint necesse est. *Dico autem vobis, ait Salvator: Omnis, quicumque confessus fuerit me coram hominibus, et Filius hominis confitebitur illum coram Angelis. Qui autem negaverit me coram hominibus, negabitur coram Angelis* ¹⁴⁾.

B. Eadem docent SS. Patres. Eapropter Angelos nominant *παιδαγωγούς καὶ παιδονόμους, praedagogos et puerorum institutores*, ut Basilius ¹⁵⁾, *τῶν ἀνθρώπων διδάσκαλους, praecepto-*

¹⁾ Apoc. 8, 2—4.

²⁾ Cf. Gen. 3, 24.

³⁾ Gen. 18, 1 ss. 19, 1 ss. 22, 11 ss. Cf. 28, 12. 31, 11.

⁴⁾ Cf. Act. 7, 53. Gal. 3, 19. Hebr. 2, 2.

⁵⁾ Jud. 2, 1, 6, 12. 13, 2—15. 4. Reg. 19, 5—7. Dan. 14, 32 ss. 8, 15 ss. 9, 21 ss. 10, 1 ss. Zach. 1, 7 ss. 2, 3. 4, 1 ss. 5, 5 ss. 6, 4 ss.

⁶⁾ Luc. 1, 26—38. Cf. Matth. 1, 18—22. 2, 13—15, 19—23.

⁷⁾ Luc. 2, 13 s. Cf. 2, 9—12. Matth. 1, 20. 2, 12. 13. 19. 22.

⁸⁾ Matth. 4, 11.

⁹⁾ Luc. 22, 43.

¹⁰⁾ Matth. 28, 2—3. Joan. 20, 12—13. Luc. 24, 23. Marc. 16, 5—7.

¹¹⁾ Act. 1, 10—11.

¹²⁾ Act. 5, 19—20. 27, 23 s. 12, 7—11. 8, 26. 10, 1—7. 11, 13.

¹³⁾ Matth. 13, 39. 49—50. 16, 27. 24, 31. 25, 31 ss. Luc. 9, 26.

¹⁴⁾ Luc. 12, 8—9. Cf. 1. Par. 21, 15. 2. Par. 32, 21. 4. Reg. 19, 35. Prov. 17, 11. Eccli. 48, 24. Is. 33, 3. 37, 36. 1. Mach. 7, 41. Apoc. 7, 1 ss.

¹⁵⁾ *De Spir. S. c. 13. n. 30. Opp. T. 3. p. 25. Cf. n. 29. p. 24.*

*res hominum, ut Athanasius ¹⁾, pastores populi, ut Ambrosius ²⁾, Hieronymus ³⁾, et Eusebius ⁴⁾, τῇ ἀνάσσει ἐφείστωτες, qui ascensui praesunt, ut Clemens Alex. ⁵⁾, pedisequos animae, ut Bernardus ⁶⁾. Omnium autem pulcherrime rem nostram edisserit Augustinus, qui ait: *Reclus itaque confessionis ordo poscebat, ut Trinitati subjungeretur Ecclesia, tamquam habitatori domus sua, et Deo templum suum, et conditori civitas sua. Quae tota hic accipienda est, non solum ex parte, qua peregrinatur in terris, a solis ortu usque ad occasum laudans nomen Domini, et post captivitatem vetustatis cantans canticum novum: verum etiam ex illa, quae in coelis semper, ex quo condita est, cohaesit Deo, nec ullum malum sui casus experta est. Haec in sanctis Angelis beata persistit, et suae parti peregrinanti, sicut oportet, opitulatur: quia utraque una erit consortio aeternitatis, et nunc una est vinculo charitatis, quae tota est instituta ad colendum unum Deum ⁷⁾.**

§. 13. Custodia Angelorum.

Attamen revelatio divina non tantum generatim docet, Angelos nobiscum esse conjunctos, utpote ad idem regnum divinum pertinentes, nostramque salutem promovere, sed ulterius progrediens speciatim tradit, eosdem singulis hominibus in custodiam esse deputatos. Intelligimus autem sub custodia Angelica praesidium singulis hominibus ab Angelis exhibitum ad bonum eorum, tum spirituale tum corporale, promovendum. Pro qua itaque Angeli salutis nostrum singulorum, praecipue spiritualis, curam gerunt, imminetia undique pericula propulsare satagunt, animos ad virtutem sectandam faciunt, timidos corroborant, laborantes adju-

¹⁾ *De comm. essent. P. F. et Sp. S. n. 52. Opp. T. 2. p. 27.*

²⁾ *Expos. Ev. sec. Luc. l. 2. n. 50. Opp. T. 1. c. 1298.*

³⁾ *In Is. 14, 18 ss. Opp. T. 4. c. 246.*

⁴⁾ *Dem. Ev. l. 4. c. 6. p. 156.*

⁵⁾ *Strom. l. 4. c. 18. Opp. T. 1. p. 616. Cf. l. 5. c. 14. T. 2. p. 701, l. 7. c. 13. p. 881. etc.*

⁶⁾ *In Cant. serm. 31. n. 5. Opp. c. 1385.*

⁷⁾ *Enchir. n. 15. Opp. T. 6. c. 217. Cf. Enarr. in Ps. 62. n. 6. T. 4. c. 609. Enarr. in Ps. 78 n. 1. c. 839. Epist. 130. c. 9. n. 18. T. 2. c. 389. — Origen. De princ. l. 1. c. 8, n. 1. Opp. T. 1. p. 74. — Dionys. De coel. Hier. c. 4. §. 2—4. Opp. T. 1. p. 53 ss. — Maxim. Ad h. l. lb. p. 59 ss. — Tertull. De or. n. 12. Opp. V. 1. p. 209. — Anselm. Hom. 6. in Ev. S. Luc. Opp. p. 171. c. 1. D.*

vant, lapsos erigunt, moerentes recreant, salutaria monita suggerant, orantibus assistant, et eorum preces Deo offerunt, vita perfunctos post obitum excipiant, et ad beatorum sedes transferunt.

Tutela Angelorum impugnata est a Calvino, qui illam commentum esse, satanas astu, ut fiduciam nostram in Christum mediatorem minuat, in Ecclesiam insectum, asserit. Alii Protestantes tamen mitius de doctrina hac sentiunt. Rationalistae autem aevi incultioris ac rudioris ingenio eandem adscribunt.

Catholicis autem de Angelorum custodia dogmatice constat, licet reliquae quaestiones, quae moveri in hac re possunt, et etiam moventur, definitae minime sint. Quod

A. spectat ad SS. Litteras: pertinent huc sequentia divina effata: *Quoniam Angelis suis mandavit de te: ut custodiant te in omnibus viis tuis. In manibus portabunt te: ne forte offendas ad lapidem pedem tuum* ¹⁾. — *Immillet (castra metabitur juxta text. Hebr.) Angelus Domini in circuitu stamentium: et eripiet eos* ²⁾. Et: *Videte, ne contemnatis unum ex his pusillis: dico enim vobis, quia Angeli eorum in coelis semper vident faciem Patris mei, qui in coelis est* ³⁾. — Porro Propheta tradit, Angelos pro hominibus ad Deum precari ⁴⁾, nec non Apostolus ⁵⁾, ut supra vidimus. — Atque Christus Dominus docet, ab Angelis animas in sedes coelestes deportari. *Factum est autem, ait, ut moreretur mendicus, et portaretur ab Angelis in sinum Abrahae* ⁶⁾. — Quapropter et Jacobus loquitur de Angelo, qui eruerit ipsum de cunctis malis ⁷⁾, Judith de Angelo, qui se custodierit, *et hinc euntem, et ibi commorantem, et inde huc revertentem* ⁸⁾, atque congregati in domo Mariae, matris Marci, ancillae nuntianti, Petrum e carcere eductum ostium pulsare, credere nolentes ajunt: *Angelus ejus est* ⁹⁾.

B. SS. Patres vero unanimiter docent, Angelos testes factorum nostrorum esse, tacitamque ac praesentissimam nobis

¹⁾ Ps. 90, 11. 12.

²⁾ Ps. 33, 8.

³⁾ Matth. 18, 10.

⁴⁾ Zach. 1, 12. Cf. Job. 33, 23.

⁵⁾ Apoc. 8, 3—5.

⁶⁾ Luc. 16, 22.

⁷⁾ Gen. 48, 16.

⁸⁾ Judith. 13, 20.

⁹⁾ Act. 12, 15.

opem ferre. Sic ait Origenes: *Adest unicuique nostrum, etiam minimis, qui sunt in Ecclesia Dei, Angelus bonus, Angelus Domini, qui regat, qui moneat, qui gubernet, qui pro actibus nostris corrigendis et miserationibus exposcendis quotidie vidoat faciem Patris, qui in coelis est* ¹⁾. — Gregorius Thaumaturgus: *Nos praeter communem omnium hominum gubernatorem, hunc etiam agnoscimus et praedicamus, quisquis est privatim paedagogus noster (Angelus), qui re ipsa pueri et infantes sumus. Qui — ut olim me, ita nunc quoque alit, erudit, ac manu ducit* ²⁾. — Basilii: *Quod unicuique fidelium adeit Angelus velut praedagogus quidam et pastor ad vitam dirigens, nemo contradicet, qui meminerit verborum Domini, qui ait: „Ne contemnis etc.”* ³⁾. — Chrysostomus: *Hinc manifestum est, sanctos omnes Angelos ibi habere* ⁴⁾. — Hilarius: *Sunt Angeli parvulorum quotidie Deum videntes. Hi igitur spiritus ad salutem humani generis emissi sunt: neque enim infirmitas nostra, nisi datis ad custodiam Angelis, tot tantisque spiritualium coelestium nequitias obsisteret* ⁵⁾. — Hieronymus: *Magna dignitas animarum, ut una quaeque habeat ab ortu nativitalis in custodiam sui Angelum delegatum* ⁶⁾. — Augustinus: *Magna cura et sollicitudine Angeli adsunt nobis* ⁷⁾.

Post saec. IV. autem in honorem Angelorum custodum erecta sunt altaria et consecratae Ecclesiae; atque saec. XI.

¹⁾ *In Num. hom. 20. n. 3. Opp. T. 2. p. 350. Cf. In Gen. hom. 8. n. 8. lb. p. 83. B. in Ps. 37. Hom. 1. lb. p. 681. D. Comm. in Ep. ad. Rom. 1. 2. n. 4. T. 4. p. 479. et al. s.*

²⁾ *Or. de laud. Origen. n. 4. lb. P. 2. p. 60.*

³⁾ *Cont. Eunom. l. 3. n. 1. Opp. T. 1. p. 272. D. Cf. Hom. in Ps. 33. n. 5. p. 148. In Ps. 48. n. 9. p. 186.*

⁴⁾ *In Matth. Hom. 59. n. 9. Opp. T. 7. p. 599. Cf. In Ep. ad. Col. Hom. 3. n. 3. T. 11. p. 347. In Hebr. H. 14. n. 4. T. 12. p. 148.*

⁵⁾ *Tr. in Ps. 134. n. 17. Opp. T. 1. c. 533. Tr. in Ps. 136. n. 5. c. 557. Comm. in Matth. c. 18. n. 5. c. 758.*

⁶⁾ *Comm. in Matth. 18. 10—11. Opp. T. 7. c. 139. Epist. ad Eustoch. 108. n. 2. T. 1. c. 691.*

⁷⁾ *De quest. 83. q. 67. n. 7. Opp. T. 6. c. 51. — Method. Cono. 10 Virg. Or. 2. n. 6. Galland. B. PP. T. 3. p. 682. — Bernard. Serm. 12. in Ps. 90. n. 8. Opp. c. 870. In Cantic. Serm. 39. n. 4. c. 1411. — Theodoret. In Gen. q. 3. Opp. T. 1. p. 5. — Cyrill. Alex. In Is. 60. 18. l. 5. c. 5. Opp. T. 2. p. 854. De adorat. in Spir. l. 4. T. 1. p. 113. Cont. Julian. l. 4. T. 6. p. 122 s. et al. — Theophyl. In Matth. c. 18. Opp. T. 1. p. 95. — Ambros. Serm. 1. in Ps. 118. n. 9. Opp. T. 1. c. 976. De vid. c. 9 n. 55. T. 2. c. 200.*

vant, lapsos erigunt, moerentes recreant, salutaria monita suggerunt, orantibus assistant, et eorum preces Deo offerunt, vita perfunctos post obitum excipiant, et ad beatorum sedes transferunt.

Tutela Angelorum impugnata est a Calvino, qui illam *commentum esse, satanae astu, ut fiduciam nostram in Christum mediatorem minuat, in Ecclesiam insectum*, asserit. Alii Protestantes tamen mitius de doctrina hac sentiunt. Rationalistae autem aevi incultioris ac rudioris ingenio eandem adscribunt.

Catholicis autem de Angelorum custodia dogmatice constat, licet reliquae quaestiones, quae moveri in hac re possunt, et etiam moventur, definitae minime sint. Quod

A. spectat ad SS. Litteras: pertinent huc sequentia divina effata: *Quoniam Angelis suis mandavit de te: ut custodiant te in omnibus viis tuis. In manibus portabunt te: ne forte offendas ad lapidem pedem tuum* ¹⁾. — *Immittet (castra) metabitur juxta text. Hebr.) Angelus Domini in circuitu timentium: et eripiet eos* ²⁾. Et: *Videte, ne contemnatis unum ex his pusillis: dico enim vobis, quia Angeli eorum in coelis semper vident faciem Patris mei, qui in coelis est* ³⁾. — Porro Propheta tradit, Angelos pro hominibus ad Deum precari ⁴⁾, nec non Apostolus ⁵⁾, ut supra vidimus. — Atque Christus Dominus docet, ab Angelis animas in sedes coelestes deportari. *Factum est autem, ait, ut moreretur mendicus, et portaretur ab Angelis in sinum Abrahae* ⁶⁾. — Quapropter et Jacobus loquitur de Angelo, *qui eruerit ipsum de cunctis malis* ⁷⁾, Judith de Angelo, *qui se custodierit, et hinc euntem, et ibi commorantem, et inde huc revertentem* ⁸⁾, atque congregati in domo Mariae, matris Marci, ancillae nuntianti, Petrum e carcere eductum ostium pulsare, credere nolentes ajunt: *Angelus ejus est* ⁹⁾.

B. SS. Patres vero unanimiter docent, Angelos testes factorum nostrorum esse, tacitamque ac praesentissimam nobis

¹⁾ Ps. 90, 11. 12.

²⁾ Ps. 33, 8.

³⁾ Matth. 18, 10.

⁴⁾ Zach. 1, 12. Cf. Job. 33, 23.

⁵⁾ Apoc. 8, 3—5.

⁶⁾ Luc. 16, 22.

⁷⁾ Gen. 48, 16.

⁸⁾ Judith. 13, 20.

⁹⁾ Act. 12, 15.

opem ferre. Sic ait Origenes: *Adest unicuique nostrum, etiam minimis, qui sunt in Ecclesia Dei, Angelus bonus, Angelus Domini, qui regat, qui moneat, qui gubernet, qui pro actibus nostris corrigendis et miserationibus exposcendis quotidie videat faciem Patris, qui in coelis est* ¹⁾. — Gregorius Thaumaturgus: *Nos praeter communem omnium hominum gubernatorem, hunc etiam agnoscimus et praedicamus, quisquis est privatim paedagogus noster (Angelus), qui re ipsa pueri et infantis sumus. Qui — ut olim me, ita nunc quoque alii, erudit, ac manu ducit* ²⁾. — Basilii: *Quod unicuique fidelium adit Angelus velut paedagogus quidam et pastor ad vitam dirigens, nemo contradicet, qui meminerit verborum Domini, qui ait: „Ne contemnatis etc.”* ³⁾. — Chrysostomus: *Hinc manifestum est, sanctos omnes Angelos ibi habere* ⁴⁾. — Hilarius: *Sunt Angeli parvulorum quotidie Deum videntes. Hi igitur spiritus ad salutem humani generis emissi sunt: neque enim infirmitas nostra, nisi datis ad custodiam Angelis, tot tantisque spiritualium coelestium nequitis obsisteret* ⁵⁾. — Hieronymus: *Magna dignitas animarum, ut una quaeque habeat ab ortu natalitatis in custodiam sui Angelum delegatum* ⁶⁾. — Augustinus: *Magna cura et sollicitudine Angeli adsunt nobis* ⁷⁾.

Post saec. IV. autem in honorem Angelorum custodum erecta sunt altaria et consecratae Ecclesiae; atque saec. XI.

¹⁾ In Num. hom. 20. n. 3. Opp. T. 2. p. 350. Cf. In Gen. hom. 8. n. 8. Ib. p. 83. B. In Ps. 37. Hom. 1. Ib. p. 681. D. Comm. in Ep. ad. Rom. l. 2. n. 4. T. 4. p. 479. et al. s.

²⁾ Or. de laud. Origen. n. 4. Ib. P. 2. p. 60.

³⁾ Cont. Eunom. l. 3. n. 1. Opp. T. 1. p. 272. D. Cf. Hom. in Ps. 33. n. 5. p. 148. In Ps. 48. n. 9. p. 186.

⁴⁾ In Matth. Hom. 59. n. 9. Opp. T. 7. p. 599. Cf. In Ep. ad. Col. Hom. 3. n. 3. T. 11. p. 347. In Hebr. H. 14. n. 4. T. 12. p. 148.

⁵⁾ Tr. in Ps. 134. n. 17. Opp. T. 1. c. 533. Tr. in Ps. 136. n. 5. c. 557. Comm. in Matth. c. 18. n. 5. c. 758.

⁶⁾ Comm. in Matth. 18. 10—11. Opp. T. 7. c. 139. Epist. ad Eustoch. 108. n. 2. T. 1. c. 691.

⁷⁾ De quest. 83. q. 67. n. 7. Opp. T. 6. c. 51. — Method. Cono. 10 Virg. Or. 2. n. 6. Galland. B. PP. T. 3. p. 682. — Bernard. Serm. 12. in Ps. 90. n. 8. Opp. c. 870. In Cantic. Serm. 39. n. 4. c. 1411. — Theodoret. In Gen. q. 3. Opp. T. 1. p. 5. — Cyrill. Alex. In Is. 60. 18. l. 5. c. 5. Opp. T. 2. p. 854. De adorat. in Spir. l. 4. T. 1. p. 113. Cont. Julian. l. 4. T. 6. p. 122 s. et al. — Theophyl. In Matth. c. 18. Opp. T. 1. p. 95. — Ambros. Serm. 1. in Ps. 118. n. 9. Opp. T. 1. c. 976. De vid. c. 9 n. 55. T. 2. c. 200.

festum Angelorum custodum est institutum. Quae sane sufficiunt ad fidem Ecclesiae omnium saeculorum manifestandam.

C. Tandem etiam ratio et sana philosophia non potest non id ipsum quam maxime probare. Nam si praeter homines Angeli quoque ad mundum pertinent: non possunt ipsi esse exteri rebus humanis. Sicut enim omnia, ut supra jam iniecimus, in mundo corporeo, sive inter se sive cum hominibus, copulantur, quatenus hi corporibus sunt vestiti, ita similiter in mundo spiritali omnes naturae inter se et cum hominibus jungi, quatenus hi spiritus sunt, et hinc etiam hisce opem ferre, non sine veri specie conjicitur. Non mirandum itaque, Gentilium quoque animis hanc insitam fuisse persuasionem, et quam plurimos veterum philosophorum confessos fuisse, esse hominibus Angelos ad tutelam praesidiumque adjunctos.

Neque potest statui, per providentiam divinam superfluum nobis reddi custodiam Angelorum, et quidem tam parum, quam parum potest adstrui, eo quod Deus humanis rebus provideat, non esse divitum opibus sustentandos pauperes, non potentium viribus fulciendos inermes, non confugiendum aegrotis ad medicum, non indigere rudes magistro. Quemadmodum in hisce potius recte provida Dei cura nostri conspicitur, ita quoque Angelorum custodia praesentior Dei opem nobis testatur. Insuper non exigua inest veritati huic in hacce lacrymarum valle consolatio nec non ad virtutem excitatio et a peccatis, praecipue scandalis avocatio, quum sciamus, intimum esse sublimium illorum spirituum cum homine nexum, nosque et eorum perfrui consortio, et potenti muniri praesidio.

Haec certa sunt, et extra omne dubium collocata. Attamen si ulterius quaeritur, num scilicet tantum fidelibus, an vero omnibus omnino hominibus sine discrimine Angeli in custodiam deputentur; num porro singulis hominibus datus sit singularis Angelus custos, an vero pluribus unus, aut unicuique plures; atque num Ecclesiae, ejusque singulis partibus, seu Ecclesiis particularibus, nec non regnis ac provinciis singuli praefecti sint Angeli: nil certi definiri potest.

Interim tamen quod ad priorem quaestionem attinet: singulis hominibus singulos Angelos in custodiam destinari, ex laudatis verbis Christi colligi posse videtur, et ex responso a congregatis in domo Mariae, matris Marci, dato Rhode puellae nuntianti, Petrum adesse et pulsare, persuasionem hanc apud Judaeos ¹⁾ pervulgatam fuisse, clare cognoscitur. — Porro plu-

¹⁾ Act. 12, 15.

res Patres quidem, ut ex locis citatis adparet, affirmare videntur, nonnisi fidelibus ac justis Angelum in custodiam esse assignatum ¹⁾. Communior tamen sententia est, etiam peccatoribus et reprobis Angelum custodem adesse, quum Deus benigna sua voluntate omnes omnino homines comprehendat, et ordinaria salutis auxilia, ad quae manifeste custodia Angelorum referenda est, nemini deneget. Unde et Patres alii bene multi nullum discrimen instituunt inter fideles et infideles, inter justos et peccatores, inter electos et reprobos ²⁾. Cui sententiae quoque suffragatur Catechismus Romanus, qui habet: *Est Dei providentia datum hoc negotium Angelis, ut custodiant humanum genus, singulis hominibus praesto sint, ne gravius aliquod detrimentum accipiant* ³⁾. Accedit magnus fidelium omnium consensus.

Communis quoque est Theologorum doctrina, singulis communitatibus, regnis, provinciis speciales Angelos a Deo esse deputatos, cum in SS. Litteris commemorentur principes, i. e. Angeli, regni Persarum, Graecorum et Judaeorum ⁴⁾; et ideo

¹⁾ Origen. *In Num. Hom.* 20. n. 3. Opp. T. 2. p. 350. — Basil. *Cont. Eunom.* l. 3. n. 1. Opp. T. 1. p. 272. *In Ps.* 33. n. 5. p. 148. *In Ps.* 48. n. 9. p. 189. — Chrysost. *In Ep. ad Col. Hom.* 3. n. 3. Opp. T. 11. p. 347. — Anastas. *Sin. Anag. contempl. in Hexaëm.* l. 5. *Bibl. m. PP.* Lugd. T. 9. p. 880. — Petr. Damian. *Opusc.* 23. c. 4. Opp. T. 3. p. 240. — Hilar. *Tr. in Ps.* 136. n. 5. Opp. T. 1. c. 557.

²⁾ Cf. Theodoret. *In Gen. q.* 3. Opp. T. 1. p. 5. *Graec. affect. cur. Serm.* 3. et 4. *cont. Gentil.* T. 4. p. 525. 537. — Hieronym. *Comm. in Is.* 65, 20. Opp. T. 4. c. 822. *Ad Habac. c. 1.* 13. 14. T. 6. c. 604. — Gregor. M. *Mor. l.* 4. c. 29. n. 55. Opp. T. 1. c. 127. — Thom. 1. q. 113. a. 5. Opp. T. 20. p. 616 s. Cf. Petav. *De Angel.* l. 2. c. 7. n. 6. *De dogm. theol.* Antv. 1700. T. 3. p. 71.

³⁾ Ed. Vienn. 1833. p. 436.

⁴⁾ Dan. 10, 1 ss. Cf. 12, 1. Jos. 5, 14. — Clem. Alex. *Strom.* 6. c. 17. Opp. T. 2. p. 622. — Origen. *In Gen. H.* 16. n. 2. Opp. T. 2. p. 103. *In Exod. Hom.* 8. n. 2. p. 157. — Euseb. *D. E.* l. 4. c. 10. p. 161. — Dionys. *De c. hier.* c. 9. §. 2—4. Opp. T. 1. p. 129 ss. — Basil. *Cont. Eunom.* l. 3. n. 1. Opp. T. 1. p. 272. — Theodoret. *In Dan.* 10. 13. Opp. T. 2. p. 672 s. *Quaest. in Gen. q.* 3. T. 1. p. 5. *In Col.* 1, 16. T. 3. p. 347. — Epiphani. *Haer.* 51. n. 34. Opp. T. 1. p. 456 s. — Isidor. Pelus. l. 2. *Ep.* 85. p. 110. — Theodoret. *Haer. fab.* l. 5. c. 7. Opp. T. 4. p. 267 s. *Comm. in Dan. l.* 10, 10, 13. T. 2. p. 672 s. — Hieronym. *In Dan.* 7, 2—3. Opp. T. 5. c. 663. et 10, 13. c. 699. *In Is.* 14. 32. T. 4. c. 261. — *In Zachar.* 1, 8—9. T. 6. c. 784 s. — Victorin. Petav. *Comm. in Apoc.* c. 9. Galland. *R. PP.* T. 4. p. 58. — Isidor. *Hispal. Sent.* l. 1. n. 12. Opp. p. 418. D. etc.

eo magis tum universae Ecclesiae, tum singulis ejus partibus, seu dioecesibus ac coetibus religiosis praeesse creduntur ¹⁾, atque Michael Angelus custos Ecclesiae, quae in locum Synagogae successit, passim habetur ²⁾.

O b s e r v. Deus Angelis mandavit, ut nos custodiant. Discamus inde nostram dignitatem, discamus pie vivere. Si enim coram viro bono turpe quid committere formidamus: multo magis veneranda nobis sit spirituum praesentia, ne quid turpe dictu vel factu in nobis advertant, quo a nobis pellantur. Eleganter, ut solet, in hanc rem ait Bernardus: *Angelis suis mandavit de te, ut custodiant te in omnibus viis tuis. Quantam tibi debet hoc verbum inferre reverentiam, adferre devotionem, conferre fiduciam, reverentiam pro praesentia, devotionem pro benevolentia, fiduciam pro custodia* ³⁾.

§. 14. Cultus Angelorum.

Ex praestantia ac dignitate Angelorum nec non ex eorum ad nos relatione, modo exposita, sponte sua eorundum cultus, i. e. eorum veneratio ac invocatio consequitur. Quam utramque Ecclesia Catholica tuetur ac frequentat; haeretici vero pessime interpretantur, dum unius singularisque Dei, et unici perinde Mediatoris Christi majestatem et auctoritatem deteri hoc in illos obsequio jactitant, et esse nos affines idololatriae ac Gentilium superstitioni criminantur. Attamen inanis est et hic hostium nostrorum in rem Catholicam impetus. Etenim

1. quum Angeli dignitate morali emineant, et ideo divina visione dignati, quodammodo ab ipso Deo honorentur; atque insuper res nostras procurent, ad nos tuendos incumbant, preces nostras Deo offerant, et nobis vicissim beneficia ab eo reportent: venerationem ac dilectionem ipsis denegare non possumus, qui sanctitatem in quavis natura rationali aestimare et beneficia accepta cuique grato animo rependere tenemur. — Porro cum Angeli utilitates commodaque nostra apud Deum procurent, no-

¹⁾ Cf. Origen. *In Luc. hom. n. 12. 13. et 23.* T. 3. p. 946. 947. 961. — Gregor. Naz. *Or. 33.* Opp. T. 1. c. 466. — Basil. *De jejun. hom. 2.* n. 2. Opp. T. 2. p. 11. *Epist. 238 (191)* T. 3. p. 367. — Hieron. *In Mich. 6, 1—2.* T. 6. c. 500 s. *In Matth. c. 18, 10—11.* T. 7. c. 445 s. — Hilar. *In Ps. 124. n. 6.* Opp. T. 1. c. 454. — Petav. *l. c. c. 8.* p. 73 ss.

²⁾ Cf. Dan. 12. 1.

³⁾ *Serm. 12. in Ps. Qui habitat. n. 5.* Opp. c. 869.

stras necessitates, vota ac orationes eidem repraesentent, et gratiam coelestem nobis concilient: cur, quando ipsi ultro nobis navant operam, hanc ab eis desiderare fas non esset, nec desideratam postulare, siquidem viventium hominum preces pro se, aliisque non semel Apostolus implorat, eosque mediatores apud Deum et interpellatores adhibet, tum ipse vicissim pro illis orationes suas, et eandem mediatoris operam pollicetur ¹⁾. Hinc et

2. in SS. Litteris hunc honorem Angelis passim exhibitum esse, uti ab Abrahamo ²⁾, Lotho ³⁾, Balaamo ⁴⁾, Josue ⁵⁾, Tobia ⁶⁾ nec non Joanne Apostolo ⁷⁾, legimus. Exemplum invocationis Angelorum autem in Jacobo habemus ⁸⁾, et orationes nostras ab Angelis Deo offerri, ex libro Tobiae ⁹⁾ et Apocalypsi ¹⁰⁾ discimus.

3. Ita quoque SS. Patres cultum hunc Angelis praestandum esse docent, atque ubique receptum in antiqua Ecclesia fuisse testantur. Sic e. gr. Ambrosius ait: *Obsecrandi sunt Angeli pro nobis, qui nobis ad praesidium dati sunt* ¹¹⁾. Eusebius de virtutibus angelicis disserens scribit, *eas nos agnoscere, et honorare doctos esse pro dignitatis illarum modo, ita ut soli omnium regi Deo summi cultus honor attribuat* ¹²⁾. Theodoretus: *Hos tamen (Angelos), ait, deos non appellamus, nec divinum illis cultum tribuimus, nec in Deum et istos divinam adorationem partimur* ¹³⁾. Atque

4. Concilium Nic. II. tandem sollemniter definivit: *Honorare et magnificare didicimus — sanctas et angelicas virtutes* ¹⁴⁾.

Attamen cultus, quem ex mente Ecclesiae Angelis impendimus, nequaquam cultus divinus seu cultus *latras*, solius divi-

¹⁾ Cf. Rom. 15, 30. 2. Cor. 1, 11. Philem. 22.

²⁾ Gen. 18, 2.

³⁾ Gen. 19, 1.

⁴⁾ Num. 22, 31 *ss.*

⁵⁾ Jos. 5, 13—16.

⁶⁾ Tob. 12, 16.

⁷⁾ Apoc. 1, 4.

⁸⁾ Gen. 48, 16.

⁹⁾ Tob. 12, 12.

¹⁰⁾ Apoc. 8, 2—3. Cf. Matth. 18, 10. Luc. 15, 10.

¹¹⁾ *De eid. c. 9. n. 55. Opp. T. 2. p. c. 200.*

¹²⁾ *Dem. Evang. l. 3. c. 5. p. 69.*

¹³⁾ *Græc. aff. cur. Serm. 3. Opp. T. 4. p. 522. — Cf. Origen. Cont. Cel. l. 8. 12. Opp. T. 1. p. 751. In Ezech. Hom. 1. n. 7. T. 3. p. 358. — Augustin. De civ. Dei l. 9. c. 22. n. 3. Opp. T. 7. c. 236.*

¹⁴⁾ *Act. 4. Mansi, Coll. Conc. T. 13. c. 131.*

nitatis proprius, est. Angelos enim tantum tanquam Dei servos ac amicos, nostrosque benefactores honoramus; neque, quando amorem ac venerationem iisdem praestamus, ea, quae Dei et Christi sunt, ad eos transferimus, optime scientes, praesidia angelica a Domino nobis esse comparata. Deinde Angelos non invocamus, ac si nostri sint veri ac proprii mediatores, quo sensu scilicet Christus unus Mediator Dei et hominum est, sed solummodo tanquam intercessores et orationibus suis apud Deum adjuutores, seu mediatores secundarios, qui nos nequaquam redimere aut justificare ac sanctificare possint, sed nonnisi precibus applicationem meritorum Christi et gratiam divinam obtinere valeant. Quae item SS. Litterae sat clare insinuant, SS. Patres continuo monent, et Concilia praecipiunt.

Nam in SS. Litteris non tantum mandatum soli Deo serviendi ¹⁾ continetur, sed et Apostolus expresse cultum illorum reprobatur, qui falsis Platoniorum opinionibus imbuti asserabant, majoris esse dignationis Christum, ac fastigii, quam ut de nostris rebus adiri possit, et sequestris ac interpellatoris partes ei demandentur, ideoque mediatores unicos adhibendos esse Angelos, quales erant Simoniani, Menandriani, Valentiniani et Cerinthiani ²⁾; atque Angelus Joannem, qui illi, sibi terribili cum splendore apparenti, vel quia Christum esse suspicabatur, vel subito ac majori quodam horrore percussus, non cogitato ac meditato, cultum divinum tribuere voluit, monet a coeptis desistere his veris: *Vide, ne feceris: conseruus tuus sum, et fratrum tuorum habentium testimonium Jesu. Deum adora* ³⁾.

Ex SS. Patribus sufficiat Augustinum allegasse, qui scribit: *Honoramus eos charitate, non servitute, nec eis templa construimus* (i. e. consecramus) ⁴⁾. *Nolunt enim se sic honorari a nobis, quia nos ipsos, cum boni sumus, templa summi Dei esse noverunt* ⁵⁾. Concilium Laodicenum a. 320. autem

¹⁾ Deut. 6, 13, 10, 20. Matth. 4, 10. Cf. Gal. 4, 8.

²⁾ Col. 2, 18. Cf. Chrysost. Hom. 7. in Ep. ad Col. n. 1. Opp. T. 11. p. 372. — Theophylact. In Ep. ad Col. 2, 18. Opp. T. 2. p. 485.

³⁾ Apoc. 19, 20, 22, 9. Cf. Augustin. Cont. Faust. l. 20, c. 21. Opp. T. 8. c. 347. Serm. 101. de divers. c. 8. T. 5. c. 1108. Quaes. in Gen. 1. q. 61. T. 3. P. 1. c. 393. — Athanas. Or. 2. adv. Arian. n. 23. Opp. T. 1. P. 1. p. 491.

⁴⁾ Cf. Cont. Faust. l. c.

⁵⁾ De ver. relig. c. 55. n. 110. T. 1. c. 787. De civ. D. l. 9. c. 23. n. 3. T. 7. c. 236. Iren. Cont. haer. l. 2. c. 32. n. 5. p. 166. — Origen. Cont. Cels. l. 8. n. 13. Opp. T. 1. p. 751. — Euseb. Dem. Ev. l. 3. c. 3.

statuit: *Quod non oporteat (Christianos) Ecclesiam Dei relinquere, et abire, atque Angelos nominare, et congregationes facere; quae interdicta noscuntur. Si quis igitur inventus fuerit huic occultae idololatriae serviens, sit anathema; quia derelinquit Dominum nostrum Jesum Christum filium Dei, et se idololatriae tradidit.* Quo canone tamen manifeste non prohibetur quicumque cultus Angelorum, sed is tantummodo, qui ad contemptum pertinet Domini nostri Jesu Christi; quod illi faciebant, qui Angelos pro diis venerabantur Platónico, gentilique more. Nam cum a Concilio Martyrum verorum cultus recipiatur, falsorum autem Martyrum superstitionosa veneratio tantum prohibeatur: quis credat, Patres Martyribus quidem ob sanctitatem, qua donati sunt, cultum ac venerationem adjudicasse, Angelis autem, qui illos et naturae et gratiae donis excellunt, omnem honorem et piam observantiam ademisse.

Possunt itaque Angeli interpretes ac internuntii adhiberi, atque ad Deum precatores allegari, non tamen ita, ac si sine illis nobis nullus ad Deum pateat aditus, aut Deus nullum nobiscum habeat commercium, sed solummodo eatenus, quatenus exorari se, interpellarique ab Angelis vult Deus, et facilius indulget, quidquid a nobis, iisdem nobiscum orantibus, petitur.

§. 15. **Conditio daemonum.**

Quemadmodum conditio Angelorum bonorum est felicissima, ita conditio Angelorum malorum est miserrima. Peccando quidem natura eorundem non est immutata, quod nec fieri potuit, ast est corrupta et inversa; vitium enim naturam non expellit, sed turbat atque deteriorem efficit quoad perfectionis gradus, salva substantia. Non amiserunt itaque Angeli mali nativas cognoscendi ac libere appetendi vires, et hinc adhuc Deum, absolutum Bonum et Verum, universim cognoscunt, attamen haec cognitio eos tremore replet ¹⁾; unde illam pervertere student ²⁾, ac illa ad malum abutuntur ³⁾, utpote veritatis osiores effecti ⁴⁾. Porro

p. 107. *Praep. Ev. l. 7. c. 15.* p. 327. — *Basil. Adv. Eunom. l. 5. Opp. T. 1.* p. 304. — *Chrysost. In Col. H. 7. n. 1. Opp. T. 11.* p. 372.

¹⁾ *Can. 35. Mansi, Coll. Conc. T. 2. c. 580.* Cf. Balsamon, *Zonaras, Aristid. in h. c.*

²⁾ *Marc. 1, 24. Matth. 8, 29.*

³⁾ *Matth. 8, 29. Jac. 2, 19.*

⁴⁾ Cf. *Gen. 3, 4. 5. 1. Tim. 4, 1.*

⁵⁾ Cf. *Marc. 3, 11—12. 2. Cor. 11, 14.*

⁶⁾ *Joan. 8, 44.*

sponte sua ac voluntate quidem agunt, attamen omnis ipsorum agendi ratio peccatum ac malum est ¹⁾. Quoniam autem toti odio veri ac honesti tenentur, studio mendacii ac peccati nominai ducuntur daemones: etiam mendacium ac peccatum, atque hinc perniciem ac mortem, parati ad nocendum turbandosque consiliorum divinorum fines optimos, propagare satagunt ²⁾. Huiusce vero perversitatis fructus poena est, eaque aeterna, cum aversio Angelorum malorum a Deo sit plenissima, et ideo cum obstinatione in male conjuncta ³⁾, ita ut nullus ipsis resipiscen-
tiae locus sit relictus, et nulla prodesse possit redemptio, cujus insuper, uti interna indole, ita etiam externa conditione sunt incapaces, quam per generationem haud orti, genus minime constituent. Quam poenam inde a lapsu suo jam luunt, plenam vero percipient in fine huius saeculi, quando perfecta fiet rerum per peccatum turbatarum restitutio, atque boni ac mali absoluta separatio ⁴⁾. Christus enim discrete docet, ignem aeternum paratum esse diabolo, et angelis ejus ⁵⁾; atque Judas ait, Angelos, qui non servaverunt suum principatum, sed dereliquerunt suum domicilium, vinculis aeternis sub caligine reservari in iudicium magni diei ⁶⁾; et Joannes, diabolum missum esse in stagnum ignis, et sulphuris, ubi et bestia, et pseudopropheta cruciabitur die ac nocte, in saecula saeculorum ⁷⁾. Haec eadem est SS. Patrum ⁸⁾ doctrina, atque contrariam Origenis

¹⁾ Joan. 8, 44. 1. Joan. 3, 8.

²⁾ Luc. 9, 12. Matth. 13, 39. 2. Cor. 11, 3. Ephes. 6, 11. 1. Petr. 5, 8. 1. Thess. 2, 18. Luc. 22, 31.

³⁾ Cf. Nemes. Emes. *De nat. hom. c. 1.* Galland. B. PP. T. 7. p. 357. — Cassian. *Coll. 4. c. 14.* Opp. p. 382. — Gregor. M. l. 9. c. 50. n. 76. Opp. T. 1. c. 322. — J. Damas. *c. De f. orth. l. 2. c. 3.* Opp. T. 1. p. 186.

⁴⁾ 2. Petr. 2, 4. Jud. 6. Cf. Matth. 8, 29. 23, 41 ss. Marc. 5, 7. Ephes. 2, 2. 6. 12.

⁵⁾ Matth. 25, 41. Cf. 8, 20.

⁶⁾ Jud. 6. Cf. 2. Petr. 2, 4.

⁷⁾ Apoc. 20, 9.

⁸⁾ Cf. Justin. *Apol. 1. Apol. 2. n. 8.* Opp. p. 98. — Tatian. *Cont. Graec. n. 15.* Ib. p. 373. — Iren. *Cont. haer. l. 3. c. 23. n. 3. p. 231. l. 1. c. 10. n. 1. p. 48. l. 5. c. 27. n. 1. p. 325.* — Tertull. *De carn. Chr. n. 14. V. 2. p. 60.* — Augustin. *In Ps. 77. n. 28.* Opp. T. 4. c. 832. *In Ps. 54. n. 4. c. 502. De civ. D. l. 14. c. 27. T. 7. c. 377. etc.* — Hieronym. *In Is. c. 14, 20.* Opp. T. 4. c. 257. 17, 12—13. c. 224 15, 9—10. c. 343. — Cyrill. *Hier. Cat. 4. n. 1.* Opp. p. 51. — Hilar. *In Ps. 148. n. 7.* Opp. T. 1. c. 647.

sententiam, Christum etiam pro daemonibus passurum esse, horumque poenam aliquando finem habituram, quum absoluta rerum omnium ἀποκατάστασις sit exspectanda, Concilium Constantinopolitanum II. a. 550. condemnavit¹⁾. — Ignem illum, quo secundum SS. Litteras daemones cruciantur, alii SS. Patrum mere spirituales habent²⁾, alii vero materiales esse censent³⁾, quod tamen corpora in illis non arguat, sed tantum similem relationem ad ignem, qualis inter animam et corpus intercedit, exigat⁴⁾.

§. 16. Relatio daemonum ad mundum.

Prout per lapsum Angelorum eorundem natura non est immutata, ita quoque illorum nexus cum mundo non est abruptus, adeo ut, quemadmodum Angeli boni, sic quoque mali in mundum agere queant. Attamen dum Angeli boni bene volunt hominibus multisque amoribus eos prosequuntur, Angeli mali in nostram perniciem conspirant, nec quidquam intermittunt, quo nos malos efficere possint, et infelices. Student autem hominibus nocere, eos partim in peccatum inducendo seu tentando, partim corpus affligendo et malis temporalibus vexando. Utrumque docet revelatio, nec contra afferre valet quidquam sana ratio. Et quidem postquam in protoparente omnem humanam naturam divina privarunt gratia, vinculumque, quo illa cum Deo conjungebatur, abruperunt: non potest ipsa non eo magis esse exposita, et quodammodo patere influxui diabolico.

¹⁾ Can. 1. 7. 12. 13. 15. Mansi, *Coll. Conc.* T. 9. c. 395 ss. Cf. Origen. *De princ.* l. 1. c. 6. Opp. T. 1. p. 69 ss. — Augustin. *De haer.* c. 43. T. 8. c. 13. — Hieron. *Epist.* 124. ad Avit. n. 12. §. 10. Opp. T. 1. c. 929 s. 918. 927 s.

²⁾ Origen. *De princ.* l. 2. c. 10. n. 4—5. Opp. T. 1. p. 102. Cf. Hieron. *Epist.* 124. ad Avit. n. 7. Opp. T. 1. c. 923. Cont. *Ruffin.* l. 2. n. 7. T. 2. c. 496. — J. Damasc. *De f. orth.* l. 4. 28. Opp. T. 1. p. 304. *Dial. cont. Manich.* c. 75. p. 460. — Theophylact. *In Marc.* 9. Opp. T. 1. p. 221. — Ambros. *In Luc.* l. 7. n. 205. Opp. T. 1. c. 1460.

³⁾ Lactant. *Div. inst.* l. 7. c. 21. Opp. T. 1 p. 573. — Ambros. *In Ps.* 118. *Serm.* 20. n. 12. Opp. T. 1. c. 1225. — Augustin. *De civ. D.* l. 21. c. 9. s. Opp. T. 7. c. 629 ss. et al. — Gregor. M. *Moral.* l. 15. c. 29. n. 35. Opp. T. 1. c. 481. *Dial.* l. 4. c. 39. T. 2. c. 416 s. — Isidor. *Hisp. Sent.* l. 1. c. 31. Opp. p. 425. — S. Thom. 1. q. 64. art. 4. Opp. T. 20. p. 362. et al. — Hugo Victor. *De Sacr.* l. 2. p. 16. c. 5. Rothom. 1648. T. 3. p. 695 s. Quibus conspirant Bonaventura, Alexand. Alens., Scotus, Durandus, Salamantici, etc.

⁴⁾ Cf. Augustin., Gregor. M., Thom. II. cc.

Firmum proinde SS. Patribus erat, in idololatria inter homines introducenda, atque religione Christiana impugnanda et persequenda daemones suas partes habuisse ¹⁾. Certa quoque est per daemones ad malum sollicitatio, atque corporum per eosdem obsessio, de quibus speciatim adhuc dicendum est. Caeterum qualiscunque influxus ille daemonum, sive in animam sive in corpus sit, per omnia tamen divinae providentiae est subjectus ²⁾.

§. 17. Sollicitatio diabolica.

Sub sollicitatione, seu ut passim dicitur, tentatione diabolica intelligitur suggestio cogitationum, sensationum aut cupiditatum, quibus ad peccatum allicimur ac trahimur, a diabolo effecta.

Sunt quidem, qui tentationes diabolicas inter *advēta* referant, ast contra manifestissima S. Scripturae effata. Etenim, hac testante, diabolus erat, qui protoparentes ad peccatum induxit ³⁾, et ipsum Salvatorem adgressus est ⁴⁾, quum munus suum publicum auspicaretur. Ad diabolum item refertur a Joanne proditio Judae ⁵⁾; atque Ananiam et Saphiram a diabolo tentatos esse, testatur Petrus ⁶⁾. — Porro Christus docet, diabolum esse, qui *seminavit zizania* ⁷⁾, qui *tollit verbum de corde* hominum ⁸⁾, qui expetiverit Apostolos, *ut cribraret sicut triticum* ⁹⁾. Paulus scribit, diabolum operari *in filios diffidentiae* (a vera religione et virtute alienos) ¹⁰⁾, nosque arma induere admonet, *ut possimus stare adversus insidias diaboli* ¹¹⁾. Petrus pari modo nos hortatur, ut sobrii simus, et vigilemus, *quia adversarius noster diabo-*

¹⁾ Cf. Justin. *Apol. I. n. 12.* Opp. 50. — Tatian. *Cont. Graec. n. 12.* 18. Ib. p. 269. 275. — Athenag. *Legat. pro Christ. n. 26.* Ib. p. 324 a. — Theophil. *Ad Autol. l. 2, c. 28.* Ib. p. 393. — Tertull. *De Baptism. n. 5.* Opp. V. 1. p. 337. *Apolog. n. 22.* p. 50. — Minuc. Fel. *Oct. c. 27.* Galland. *Bibl. PP. T. 2.* p. 396. — Stollberg, *Gesch. der Relig. Jesu. 5. B. 3. Beil.* Cf. Act. 26, 18. Apoc. 2, 13. 13, 2.

²⁾ Cf. Job. 1, 6 ss. 2, 6 ss. 3. Reg. 22, 21. 22.

³⁾ Gen. 3, 1 ss. Apoc. 12, 9.

⁴⁾ Matth. 4, 1—11. Marc. 1, 13. Luc. 4, 1 ss.

⁵⁾ Joan. 13, 2. 27. Cf. Luc. 22, 3.

⁶⁾ Act. 5, 3. Cf. 1. Par. 21, 1. Zach. 3, 1.

⁷⁾ Matth. 13, 39.

⁸⁾ Luc. 8, 12.

⁹⁾ Luc. 22, 31.

¹⁰⁾ Ephes. 2, 2. Cf. 1. Thess. 3, 5. Rom. 16, 20.

¹¹⁾ Ephes. 6, 11. Cf. 2. Cor. 2, 11.

lus tanquam leo rugiens circuit, quaerens, quem devoret ¹⁾). Atque Jacobus habet: *Subditi ergo estote Deo, resistite autem diabolo, et fugiet a vobis* ²⁾).

Fides autem antiquae Ecclesiae, tentationes diabolicas dari, adeo est certa et manifesta, ut nec opus sit singulorum Patrum excitare testimonia.

§. 18. Continuatio.

Licet autem, ut modo vidimus, sollicitationes diabolicas revera dentur: non est tamen, cur propterea has diabolicas infestationes justo plus timeamus, multo minus animum abjiciamus, aut vero peccata in illum refundentes excusemus. Nam quod habebat diabolus, i. e. quod ei debebatur, mortis imperium, Christus Dominus, *fortior eo superveniens* ³⁾), qui *in hoc apparuit, ut dissolvat opera diaboli* ⁴⁾), ei eripuit, *palam triumphans* de illo ⁵⁾), ita ut diabolus nihil juris habeat in nos, nisi volentes jugum subeamus ignominiosae servitutis. *Latrare, ut ait quidam antiquitatis Scriptor, potest, sollicitare potest; mordere non potest, nisi volentem. Non enim agendo, sed suadendo nocet: nec extorquet a nobis consensum, sed petit* ⁶⁾). Insuper varia nobis sunt exhibita a Salvatore nostro media, ad insidias illas repellendas. Qualia sunt regeneratio seu charitas, per Spiritum S. in cordibus eorum, qui credunt, diffusa, fides, seu fiducia in Deum, spes vitae aeternae, verbum Dei, oratio et obsecratio. Ita enim docet discipulus, quem diligebat Dominus: *Scimus quia omnis, qui natus est ex Deo, non peccat: sed generatio Dei conservat eum, et malignus non tangit eum* ⁷⁾). Et Paulus nos adhortatur: *State ergo succincti lumbos vestros in veritate, et induti loricae justitiae, et calceati pedes in praeparatione Evangelii pacis, in omnibus sumentes scutum fidei, in quo possitis omnia tela nequissimi ignea extinguere. Et galeam salutis assumite, et gladium spiritus, (quod est verbum Dei), per omnem orationem, et obsecrationem* ⁸⁾). Qui itaque hisce utitur

¹⁾ 1. Petr. 5, 8.

²⁾ Jac. 4, 7.

³⁾ Luc. 11, 22.

⁴⁾ 1. Joan. 3, 8.

⁵⁾ Col. 2, 15.

⁶⁾ Auct. *Serm. de Dav. et Golia.* n. 6. Int. Opp. Augustin. T. 5. append. c. 74.

⁷⁾ 1. Joan. 5, 18.

⁸⁾ Ephes. 6, 14—18.

mediis, persuasum habeat, se auxiliis divinis haud destitutum iri. *Fidelis enim*, ait idem Apostolus, *Deus est, qui non patietur vos tentari supra id, quod potestis, sed faciet etiam cum tentatione proventum, ut possitis sustinere.*¹⁾ Unde omne peccatum tandem ac proprie ex prava hominis prodit voluntate. Quo sensu dicit Jacobus: *Nemo cum tentatur, dicat, quoniam a Deo tentatur: Deus enim intentator malorum est: ipse autem neminem tentat. Unusquisque vero tentatur a concupiscentia sua abstractus, et illectus*²⁾. Neque daemones, neque mundus, neque perversi homines, qui daemonum voluntatibus subserviunt, nocere alia ratione possunt, quam malas cupiditates vitiorum illecebris inflammando, ut homo propria voluntate in interitum ruat. Concupiscentia enim est sola peccatorum omnium causa proxima, per quam causae remotae, mundus atque daemones, solummodo agere in voluntatem nostram possunt.

Quo modo tentationes diabolicae fiant, ignoramus; ast id nos minime perturbare potest, quum aliquo modo eas fieri, sive per corpus³⁾, sive alia ratione, perspiciamus.

Observ. Cum ergo Angeli mali salutem nostram insidiantur: eo vigilantiores atque cautiore in omni vita nostra ambulemus, hostem tam potentem et insidiosum continuo ante oculos habentes, qui se facile illi, quem in pectore gestamus, associet, atque piis castisque precibus auxilium divinum impetrare studeamus. Ita certantibus autem, persuasum teneamus, multa parata esse auxilia, et praemia vincentibus magna nimis. Facienti enim, quod in se est, Deus non denegat gratiam, omnibusque adest, qui in viribus suis diffidentes, omnem spem in ipso collocant.

§. 19. Obsessiones daemoniacae.

Ast non tantum tentationibus nobis daemones nocere student, verum etiam, ex permissu divino, malis physicis homines vexando, aut plane eosdem obsidendo seu possidendo i. e. corpora illorum intrando et inhabitando, variaque in iis efficiendo, quae vires humanas superant.

¹⁾ 1. Cor. 10, 13.

²⁾ Jac. 1, 13, 14. Cf. Herm. Past. l. 2. m. 7. 12. Cotélér. PP. ap. Amstel. 1724. T. 1. p. 95. 101.

³⁾ Bernard. Serm. 5. in Cant. n. 8. Opp. c. 1284 s. tradit, *nullum creatorum spirituum per se nostris mentibus applicari, ut videlicet, nullo mediante nostri sive corporis instrumento, ita nobis immisceantur vel infundantur, quo ejus participatione docti vel doctiores, vel boni sive meliores (et hinc etiam mali sive pejores) efficiamur.*

Causam malorum physicorum daemones esse posse, docetur eo, quod in libro Job expresse legatur, Deum potestatem viro sancto nocendi satanae concessisse, huncque illi mala varia, eaque summa inflixisse ¹⁾, et quoniam in N. T. saepius morbi ad diabolum tanquam causam eorundem referuntur ²⁾).

Quod autem ad obsessiones daemonicas attinet: illas possibiles esse, et tempore Christi revera obtinuisse, nos assumere cogit Scripturae auctoritas, nec non universalis ac constans fides Ecclesiae. Etenim Christus Dominus et Apostoli ita se gerunt, ita loquuntur, ut opinio, dari homines a daemone obsessos, nisi jam mentibus auditorum insedisset, eos necessario occupare debuisset. Nam Salvator non tantum constanter daemonicos ab aegrotis, ejectionem daemoniorum ab aegrorum sanatione distinguit ³⁾, sed daemonia diserte spiritus immundos appellat ⁴⁾, ea alloquitur, cum summa auctoritate increpat, et ex corporibus hominum egredi jubet ⁵⁾. Perro daemonia secundum relationem S. Scripturae vident, audiunt, loquuntur, clamant, Christum cognoscunt, atque Sanctum Dei esse confitentur ⁶⁾, ipsum supplicant ⁷⁾, ex hominibus exeunt ⁸⁾, et cum Salvatoris permissu porcos invadunt ⁹⁾. Et quidem tali modo Christus se gessit, ac tali modo locutus est, non tantum spectante et audiente populo, sed etiam privatim cum solis discipulis agens, quibus datum erat, nosse mysteria regni Dei ¹⁰⁾; et quam discipuli septuaginta duo, quos ad singulas civitates praemisarat, revertentes gauderent, quod daemones sibi subjicerentur, eos non tantum non correxit, sed potius confirmavit, dicens: *Videbam satanam sicut fulgur de coelo cadentem. Ecce dedi vobis potestatem calcandi supra serpentes, et scorpiones, et super omnem virtutem inimici: et nihil vobis nocebit. Verumtamen in hoc nolite gaudere, quia spiritus vobis subficiuntur: gaudete autem,*

¹⁾ Job. 1, 12 2, 5 ss. Cf. Tob. 6, 14. 3, 8. Ps. 77, 49.

²⁾ Cf. Matth. 9, 32. 33. Marc. 9, 16. Luc. 11, 14. 13, 11. — J. Damasc. *De f. orth.* I. 2. c. 4. Opp. T. 1. p. 159.

³⁾ Marc. 3, 15. 16, 17 s. Luc. 13, 32. Matth. 10, 8.

⁴⁾ Marc. 5, 8. Luc. 10, 20.

⁵⁾ Marc. 1, 25. 5, 8. 3, 12. 9, 24. Luc. 4, 35. 9, 43.

⁶⁾ Marc. 1, 24. 3, 11 s. 5, 7—12. Matth. 8, 29.

⁷⁾ Marc. 1, 24. 28. 3, 11—12. Luc. 4, 34. 8, 31.

⁸⁾ Marc. 1, 26. Luc. 8, 33. Matth. 12, 43.

⁹⁾ Luc. 8, 32—33. Marc. 5, 12—13.

¹⁰⁾ Matth. 17, 18 ss. Marc. 9, 27 s.

quod nomina vestra scripta sunt in coelis ¹⁾. — Pariter Apostoli, baptizati Spiritu S. ac omnem veritatem edocti, adcurate inter daemones spiritus immundos, spiritus nequam adpellant ²⁾, loquentes et agentes inducunt ³⁾, atque ut ex hominibus exeant, iis praecipunt ⁴⁾.

Manifestum igitur est, eo tempore, quo Christus et Apostoli vixerunt, multos exstitisse a daemonibus infestatos. Nam rem tanquam certam et indubitam non tantum tradunt Scripturae, sed et Christus et Apostoli ita se gerunt, ut, si error subesset, is merito in ipsos refunderetur. Num autem Christus, Deus homo, erroris patronus aut magister? Num decepti deceptoresque Apostoli?

B. Facillimum esset, quae in SS. Litteris tam aperte praedicantur, etiam ex veterum Patrum testimoniis probare. Omnis enim retro antiquitas et proximiores Apostolorum temporibus Patres non tantum in eo conspirant, veras esse illas daemonum possessiones, quae in S. Scriptura narrantur, sed et suis temporibus similia contigisse testantur ⁵⁾. Christianis virtutem inesse daemones invocato nomine Jesu ad testimonium contra semetipsos edendum adigendi, eosque expellendi tradunt, et ad eam tanquam certissimum documentum veritatis religionis Christianae provocant. Ad finem adhuc saeculi II. tam frequentes sunt daemonum possessiones, tam certa ac manifesta Christianorum in illos potestas, ut Tertullianus non vereatur Imperatores ita compellare: *Edatur hic aliquis sub tribunalibus vestris, quem daemone agi constet; iussus a quolibet Christiano loqui spiritus ille, tam se daemonem conflebitur de vero, quam alibi deum de falso:*

¹⁾ Luc. 1, 1—20.

²⁾ Matth. 4, 24. 8, 16. 10, 1. Marc. 1, 32. 34. 3, 10 s. Luc. 6, 18. 7, 21. 8, 2. 13, 32. Act. 5, 16. 19, 12.

³⁾ Marc. 1, 23. 26. 3, 11. 5, 13. 9, 24. etc. Act. 8, 7. 5, 16. 19, 13.

⁴⁾ Act. 8, 7.

⁵⁾ Act. 16, 18.

⁶⁾ Justin. *Apol. n. 2*. Opp. p. 96. — Tatian. *C. Graec. c. 16*. lb. p. 278. — Iren. *Cont. haer. l. 2. c. 32. n. 4*. p. 166. — Origen. *Cont. Cels. l. 1. n. 6*. Opp. T. 1. p. 325. l. 7. n. 4. p. 596. — Gregor. Naz. *Or. 1*. Opp. T. 1. c. 32. D. — Cyrill. *C. Julian. l. 6*. Opp. T. 6. P. 2. p. 202. — Minuc. *Fel. Oct. 27*. Galland. *Bibl. PP. T. p. 396 s.* — Cypr. *De Idol. vanit. n. 4*. Opp. V. 2. p. 108. — Lact. *D. inst. l. 2. c. 15 s.* Opp. T. 1. p. 176 s. l. 4. c. 27. p. 345 ss. — Augustin. *De c. D. l. 22. c. 8. n. 7—8*. T. 7. c. 667 s. — Clem. R. *Recogn. l. 4. c. 20*. Cotel. *PP. ap. Amstel. 1724. V. 1. p. 524*.

aeque producaturs aliquis ex iis, qui de deo pati existimantur, qui aris inhalantes numen de nidore concipiunt, qui ructando conantur, qui anhelando profantur; — nisi se daemones confessi fuerint, Christiano mentiri non audentes, ibidem illius Christiani procacissimi sanguinem fundite. — Christum timentes in Deo, et Deum in Christo, subjiuntur servis Dei et Christi: ita de contactu, deque afflatu nostro, contemplatione et repraesentatione ignis illius correpti, etiam de corporibus nostro imperio excedunt inviti et dolentes, et vobis praesentibus erubescences ¹⁾. Ast nec opus est haec allegare Patrum testimonia; quum ea adversarii haud negent, sed explodant, majori utique supercilio, quam ratione. Nam viri isti nullius plerumque studii et levissimae doctrinae multo se celeberrimis quibusvis Ecclesiae Patribus doctiores putant, ipsi Scripturae haud parcentes, quam aut aperte rejiciunt, aut tantum hac lege retinent, ut omnem, quam ipsi volunt, formam induat, neque de vi sibi illata conqueratur, idque solummodo propterea, ne a fidei adhuc plebe offensa, quae S. Scripturam ut verbum divinum veneratur, tanquam pseudo-prophetae ac impostores repudientur.

Sensus autem Ecclesiae universae vel ex solo exorcismorum usu, qui a primis saeculis in Ecclesia obtinuit, nec non Exorcistarum ordine instituto evincitur.

Permisiit autem Deus, ut illo temporis curriculo, quo Christus publicam inter homines egit vitam, tantus esset daemoniacorum numerus, ut Christus hac ratione se victorem diaboli, qui quo magis homines ad resipiscentiam et ad conjunctionem cum Deo excitantur, eo magis vires intendit ad illos a Deo avertendos, palam probaret, et visibili operatione invisibilem victoriam, et Incarnationis saluberrimum finem demonstraret.

Obser. 1. Priscos Scriptores nonnunquam quosdam aegros a daemone obsessos dixisse, qui reapse obsessi non erant, concedi potest. Attamen vocabulum tropice nonnunquam adhibitum non amittit sensum suum nativum. Quis negabit dari aurum, quia aetas quaedam aurea, aurei Sacerdotes, Reges, Principes dicuntur? Et omen et nomen auri antea exstitit, priusquam idem verbum tropice adhiberetur. Sic obsessi reapse a daemone videbantur, antequam infirmantium quidam similitudinis ergo daemoniaci dicti sunt.

Obser. 2. Licet secundum dicta non omnis omnino nobis nocendi potestas daemoni per Christum sit ablata: nimii tamen sunt,

¹⁾ *Apolog. n. 23. Opp. V. 1. p. 51 s. Cf. Ad Scap. n. 2. et 4. p. 129. 131.*

qui plenam audendi, perficiendive quidlibet in daemonibus facultatem agnoscunt, aut omnis generis morbos, quibus mortalium genus conflictatur, diabolo adscribunt, quive putant, magos, aut sagas efficere posse, quodcunque lubeat, ope diabolica. Putamus enim omnia, quae venditantur de magia, seu arte perficiendi mira ope daemonis, nocendique hominibus variis modis, quo revocantur praestigiae, incantationes, fascinationes, pacta ac commercium cum daemone, commenticia esse; quamvis negari non possit, talia ab hominibus tentata, et scelera nefanda, adhibitis mediis naturalibus, esse commissa. In S. Scriptura quidem leges contra magiam latae deprehenduntur, quae tamen etiam contra attentionem solam magiae ad imitationem idololatrarum statutae esse possunt. In Ritualibus autem quidem multi occurrunt exorcismi contra infestationes diabolicas, nullus tamen proprius habetur contra magiam; bullae pontificiae vero poenas credentibus, et profitentibus magiam dictitant. Primus qui processus contra sagas, frequentiores inter Protestantes, quam Catholicos, impugnavit, erat *Fridericus Spee* e Societate Jesu, qui affirmat, inter centum ob magiam damnatos, quorum statum optime perspexerat, tantum duos probabili judicio suspectos exstitisse ¹⁾).

¹⁾ In opere : *Cautio criminalis circa processus contra sagas.*

O. A. D. G.



E r r a t a.

pag.	8. lin.	6. adcommadato	loco	adcommodato
—	10. not.	4. Trinil	—	Trinit
—	21. lin.	19. demonstrat	—	demonstrat
—	32. —	15. adcurrata	—	adcurata
—	38. —	penult. Carhusianus	—	Carthusianus
—	41. —	21. in genuae	—	ingenuae
—	64. —	7. baudquaquam	—	haudquaquam
—	84. —	11. Hier solimitanae	—	Hierosolymitanae
—	95. not.	5. ha	—	ha-
—	157. lin.	25. sculis	—	oculis
—	170. —	3. omnes ,	—	est delendum
—	177. —	10. e	loco	et
—	215. —	1. edissere	—	edisserere
—	217. —	8. fuciet	—	faciet
—	253. —	22. פרוץ	—	פרוץ
—	257. —	8. ὑποστάσεως	—	ὑποστάσεως
—	293. —	27. D o m i u m	—	D o m i n u m
—	307. —	2. Spiritu	—	Spiritu
—	351. —	7. proe-	—	proce-
—	375. —	8. e	—	et
—	385. —	3. 1)	—	1).
—	390. —	19. optimus	—	Optimus
—	—	21. breviori	—	breviori
—	396. —	7. calculos ,	—	calculos
—	402. —	31. autem	—	autem ,
—	413. —	27. esisteret	—	existeret
—	414. —	30. auctorem	—	auctorem
—	424. —	2. facta	—	facta.
—	425. —	16. nostris ,	—	nostris :
—	428. —	30. incolunt	—	incolunt ,
—	429. —	5. vigil	—	vigil
—	433. —	ult. e	—	ei
—	434. —	23. bono	—	bonos
—	439. —	16. ea	—	ea,
—	442. —	5. ex	—	et ex
—	444. —	ult. ob	—	ob-
—	447. —	5 ἀσωμάτους	—	ἀσωμάτους
—	—	14 νοητῶν	—	νοητῶν



1. The first part of the document is a list of names and titles.

